





ქვეყნური ისტორიული ბროზა

**მეთევან
ნუსუზიძე**

**ითანუ
შოსხი**

ისტორიული რომანი

VII საუკუნის გამოჩენილი მოღვაწის იოანე მოსხის ცხოვრებისა და შემოქმედების შესწავლა დღესაც უაღრესად აქტუალურია. სწორედ იოანე მოსხის ცხოვრებას, მისი პიროვნების წარმოჩენას ეძღვნება ქეთევან ნუცუბიძის ეს ისტორიული რომანიც, რომელიც უთუოდ სასარგებლო და საკვირო წვლილს შეიტანს ქართული კულტურის შესწავლის ისტორიაში.

რედაქტორი მერი გუგუშვილი

გამომცემლობის რედაქტორი ლალი თუგანდიშვილი

ილუსტრაციები ლადო გუდიაშვილისა

4702017200—62

26—89 © გამომცემლობა „მერანი“

შ 604 (08)—89

ვუძღვნი შეგობრის გამოუთქმელ გრძნობათა სამარადისო ხსოვნას.

ავტორი

წი ნ ა ტ მ ა

აღრინდელ საუკუნეებში, როდესაც დიდი მოაზროვნენი არ ეძიებდნენ სახელსა და ჯიღებას, გაუზობდნენ ამქვეყნიურ აღიარებას, აზრებს გამოთქვამდნენ გულის კარნახით, ისე, როგორც სჯეროდათ, როგორც ამას სათქმელის სიღრმე და მნიშვნელობა მოითხოვდა, ნაწარმოებებს კი სიფრთხილისათვის ანონიმურად აქვეყნებდნენ, ან სხვა ავტორიტეტულ პიროვნებას მიაწერდნენ. კეშმარიტების მაძიებელი იყვნენ და არ ეძიებდნენ, თუ მათ აზრებს ვინმე მიითვისებდა, და თუ მაინც მიითვისებდა—ეს გამარჯვების მალეუფებელი იქნებოდა.

თანამედროვეთათვის დამწერის ვინაობა, ასე თუ ისე, ცნობილი ხდებოდა, რადგან ისინი თავიანთ აზრებს ერთმანეთს უზიარებდნენ, საჭიროების მიხედვით საჯაროდაც ქადაგებდნენ, მაგრამ მომდევნო საუკუნეებში ეს ცოცხალი კვალი ქრებოდა, მნიშვნელოვანი აზრები საერთო კუთვნილებად იქცეოდა და უკვე სადაო და საძიებელი ხდებოდა თხზულების დამწერის ვინაობა. ასეთი ბედი ხვდა წილად პეტრე იბერს, ასე დაეშართა იოანე მოსხის შემოქმედებასაც.

იოანე მოსხი ცნობილი იყო როგორც თსრობათა კრებულის, „სამოთხის“ დამწერი, რომელსაც სიყეთისა და ბოროტების „უტყუარ სარკეს“ უწოდებდნენ. მას იმორწმუნებდნენ, როგორც ავტორიტეტს მსოფლიო კრებებზე, ადარებდნენ პლატონისა, ციცერონისა და მოგვიანებით კი ბოკაჩოს თხზულებებს.

მოსხის ნოველები „სულის მარგებელ თსრობებს“ წარმოადგენენ და ამდენად, ტრაგიკულ ელემენტებსაც შეიცავენ; მათში ნაკლები ყურადღება ეთმობა მოქმედების ადგილს, პერსონაჟთა დახასიათებას, რის გამოც ზოგად ხასიათს იძენენ. მასვე მიეწერება ჰაგიოგრაფიული ძეგლი „სიბრძნე ბალაჰვარისი“.

„სიბრძნე ბალაჰვარისი“ მუდამ მიმზიდველ და რთულ საკითხებს აყენებდა მეცნიერების წინაშე და მხატვრულ ლიტერატურას კი „შემოქმედებით გენიის ნაპერწკლებით აღავხნებდა“. და აი, შალვა ნუცუბიძემ საბაწმინდელ ბერში განსჭვრიტა რა იოანე მოსხი, „სიბრძნე ბალაჰვარისის“ დამწერადაც იგი აღიარა.

ძუნწია მტრთან და ამდენად ძნელია, თითქოსდა შეუძლებელიც იოანე მოსხის, ამ შორეულ საუკუნეთა ადამიანის ცხოვრების აღწერა და მით უფრო, მისი ცოცხლად წარმოჩინება. მაგრამ როდესაც ვეხებით ისეთ დიდ მოაზროვნესა და შემოქმედს, რომლის ნაწარმოებები შეიძლება ითქვას მხატვრული ენით დაწერილი დღიურებია, სულდგმულებენ რა იმ რწმენით, რომ დაბადება არ არის ცხოვრების დასაწყისი, ცხოვრება იწყება შეხვედრებიდან... რომ ადამიანებსა და მათ შეხვედრებშია ჩადებული ცხოვრების საიდუმლოება, რომლის გახსნა „დაფარულის წაღიერა,

იგი უკვდავებისაკენ ხილია“, ამდენად ჩვენთვის უკვე უამთა აღმწერელის დუმილიც კი მეტყველია და იოანე მოსხის ცხოვრება, აღსავსე დიდი კულტურულ-ისტორიული მოვლენებით ჩვენს წინაშე ცოცხლად წარმოსდგება.

დიდად გავლენიანი და სახელგანთქმული ანაქორეტი, იოანე მოსხი, დაიბადა მესხეთში 555 წელს. იგი ოცი წლისა უკვე პალესტინაში მოღვაწეობს და მთელი სიცოცხლის მანძილზე რჩება სამშობლოს გარეთ — სირია-პალესტინასა და ეგვიპტეში. იგი მოღვაწეობს იმ დიდ ადამიანებთან ერთად, რომელნიც მიმართულებას აძლევენ საზოგადოებრივი ცხოვრების განვითარებას: მისი მოწაფე და შემდეგ განუყრელი მეგობარი — სოფრონ პალესტინელი იერუსალიმის უთვალსაჩინოესი პატრიარქია; იოანე სინელი — წინამძღვარი, სათნოების კიბის აღმწერელი (ბერძნულად ცნობილი „კლემაქსისა“), მასთან უშუალო კავშირშია; იგი ახლო ურთიერთობაშია იოანე მოწყალესთან, პატრიარქთან ალექსანდრიისა; მას შეხვდრა აქვს იმ დროის უდიდეს ქრისტიან-ღვთისმეტყველთან — მაქსიმე კონფესორთან.

ეს ის დროა, როდესაც შუამდინარეთიდან საქართველოში შემოდის ათცამეტი სირიელი მამა, რომელთა ქართველობაც მეცნიერებისათვის სავარაუდოა და რომელნიც, ფლობდნენ რა ქართულ ენას, ქვეყნის უკაცრიელ კუთხეებს კულტურულ ცენტრად აქცევენ, ხელს უწყობენ ქვეყნის დაწინაურებას და მრავალ საუკუნეთა მანძილზე დიდ გავლენას ახდენენ ადამიანთა აზროვნებაზე.

იოანე მოსხის საუკეთესო ნაწარმოებები დაიწერა სიცოცხლის უკანასკნელ ათწლეულში, 60—75 წლის ასაკში (620—634); გარდაიცვალა 634 წელს, დაკრძალულია იერუსალიმის მახლობლად, თეოდოსე დიდის საფანეში. იოანე მოსხის შემოქმედება დღესაც აქტუალურია, და ამიტომაც ვთავაზობ მკითხველს ამ თხზულებას.

ცოსარტყელა

დიდხანს გაჰყურებდა იოანე ბერი სენაკის ვიწრო სარკმლიდან გრძელ გზას, რომელიც მთას გარს უვლიდა და თვალსაწიერიდან იკარგებოდა. არც თუ ვინმეს ელოდა, არც ვისმეს გამცილებელ თვალს გააყოლებდა; გონებაში ქალის სახე ელავდა, ქალისა, რომელსაც ერთი გაღიშებით ჩაშოქცია სამყაროსაგან გამთიშველი ჯებირები. უსაზღვრო სივრცეში ნავარდს ჩვეული მიწაზე დანარცხებულიყო, მიწის სიხარული განეცადა და სიამისა და ტკივილის გრძნობას ვეღარ განარჩევდა, რამეთუ შინაგანი კმაყოფილებით გამსჭვალულს აოცებდა ის ახალი და მთულოდნელი, რაც მასში ხდებოდა, რაც იმავე დროს ჩვეულებრივიც უნდა ყოფილიყო.

დროს კი ეს უჩვეულო სიხარული გაემძაფრებინა, გაელრმავებინა და იოანე ქალის ბედზე ფიქრს თავს ვერ ართმევდა. სად წავიდოდა ქალი? რა გზას დაადგებოდა? ღვთაებრივის მაძიებელი თვალთმაქცი ვერ იქნებოდა, ვერც დედათა მონასტერს შეეკედლებოდა — იუდაველი იყო იგი, მაგრამ გულწრფელი, გულწრფელი ადამიანი კი ყველგან დაუმარცხებელი იქნებოდა.

უზენაესს მის მფარველობას ავედრებდა, შესთხოვდა ცოდვას აღარ დაებრკოლებინა.

და აი, როგორც კი ფეხის ხმა შემოესმა, გულმა ისეთი ფრთონა ასტეხა, ლამის მივარდა კარს, ურდულის საიმედობა მოსინჯა, ფართოდ გაშლილი ხელებით კარს აეკრა. ვინ უნდა ყოფილიყო? — ნუთუ ქალი იგი კვლავაც მოაკითხავდა? — და ეს დამფრთხალი კრავი უფლისა ყაფაზში გამომწყვდეულ ვეფხვს უფრო ჰგავდა. რას იფიქრებდა, რომ ვისაც ახლა კარს უკეტავდა, ვისთან განშორებისთვისაც ღმერთს ჰმადლობდა, მთელ სიცოცხლეს მასზე ფიქრს შესწირავდა!

ფეხის ხმა სულ ახლოს მოვიდა კართან და გაისმა:

— გვაკურთხენ, მამაო.

მამაკაცის ხმა იყო და იოანე უცებ მოეშვა, დაბნეულ აზრებს გაფაციცებით დაუწყო კრეფა, საკეტი ფრთხილად დაუშვა, ფრთხილად გადადგა რამოდენიმე ნაბიჯი სიღრმეში და დაბალი ხმით მიუთო:

— გაკურთხოს ზეციერმან.

კინოვიაში შემოვიდა ყმაწვილი კაცი, რომლის საოცრად ნათელმა სახემ, ფართო თვალებმა, მზესავით შემოანათეს და სენაკის კე-

დელზე გამოსახულმა ანგელოზ მიქელის მიერ წყვდიადის ძლევის დათრგუნვის სატებამაც საზეიმო ელფერი მიიღო.

ყმაწვილის ასოვანი გარეგნობა, მოხდენილი ჩაცმულობა, გამჭოლავი, მაგრამ თავაზიანი გამოსხედვა, მის დიდებულებაზე მეტყველებდა. აღარ იყო საჭირო ვინაობის გამოკითხვა, მით უფრო, რომ ერთი შეხედვით სულმა სული იცნო.

წმიდა ადგილების მომლოცავს დიდგვაროვან ჭაბუკს გზად თეოდოსე დიდის სავანეშიც შემოეხედა.

ჭეშმარიტების მაძიებელი იყო ჭაბუკი. მისი მეფური სიმშვიდე ძლიერებაზე მეტყველებდა, თუმც ურჩი ბაგენი ყმაწვილის უსუსურობას აღიარებდნენ.

— მე მიყვარდა სოფელი ესე, — ამბობდა იგი, — მაგრამ რა ვსცან, დიდი თუ მცირე, ძლიერი თუ უძლური, ბრძენი თუ სულელი, ყოველნი წარვალთ, განვიბნევით, და მესმა სიტყვა ღვთის წიგნთაგან, რამეთუ სიკვდილის ხიდით წარვალთ ყოველნი ქვეყნად უცხოდ, რომელსა შინა არიან ორნი სადგურნი: ერთი იგი არს სავანე ყოველთა კეთილთა დაიცევს მცნებანი ღვთისა, ხოლო მეორე იგი სავანე სავსე არს სატანჯველთა მათთვის, რომელნიც განუდგენ ქრისტესა, მეშინის, რამეთუ მრავალ არიან ცოდვანი ჩემნი, მე ვერ დავძლიე ტრფიანი დიაბოსა და უფრო მეტიც, ვერ შევიცან, თუ რატომ არის იგი ცოდვა და თუ ცოდვაა, მითხარ, მამაო, როგორ უარჰყავ შენ იგი?

— ტრფიანი ადამიანის მიმართ დაუძლეველია, გაუმართლებელია მისი უარყოფა, რამეთუ იგი ამალლებს მას. ადამიანი საკუთარი თავისთვის არ იბადება, ადამიანი ადამიანისთვისაა გაჩენილი და მისი არსებობაც იმდენადაა ღირებული, რამდენადაც იგი საჭიროა სხვისთვის, მაგრამ სიძვა კი დასცემს ადამიანს.

ცდილობდა რა იოანე მოსხი ჭაბუკის გათვითცნობიერებას, გრძნობდა, თავდაც რალაც მნიშვნელოვანში ერკვეოდა.

— რა უფრო ღიდი ცოდვაა, — კითხულობდა კრძალვით ჭაბუკი, — რასაცა ვიკმთ, თუ რასაც არა ვიკმთ?

იოანე მსჯავრდადებულებით იდგა ამ უზარმაზარ კითხვის წინაშე. ახლა თავად უფრო საჭიროებდა ამ კითხვის განმარტებას, მაგრამ მოძღვარი იყო და პასუხი ახლავე უნდა გაეცა, პასუხი კი ღრმა განსჯას, დროს მოითხოვდა: „მიწყალე, ღმერთო, დიდითა წყალობითა შენითა, გული წმიდა დაბადე ჩემთანა და სული წრფელი განმიასლე გვამსა ჩემსა, აღმიდგინე, უფალო, წმიდა სამკვიდრებელი შენი და გამინათე დაბნეული გონება ჩემი“, — ლოცულობდა გულში და პასუხს აგვიანებდა.

ჭაბუკი კი ისევ კითხვით მიმართავდა:

— როდესაც ღმერთმა ადამიანს ცნობიერება მიანიჭა, ამით დასწყევლა თუ..? — კითხვა ველარ დაამთავრა, ეგონა, ბერი ახლა მას სულაც არ უსმენდა, მაგრამ აქ უკვე იოანემ უმაღ მიუგო:

— ცნობიერება არის დიდი წყალობა, თუ გინდ კურთხევა ღვთისა და არა წყევლა.

ჭაბუკს სანდომიანმა ღიმილმა გადაურბინა სახეზე, თუმცა იოანე გრძნობდა, რომ მისთვის ეს სიტყვიერი რწმუნება ასე ადვილად დამაჯერებელი ვერ იქნებოდა. წამოდგა და ბუნებაში გასვლა, იერუსალიმის მონასტლებს შესთავაზა.

— ბუნება გაგვცემს პასუხს ყველაფერზე, — ამბობდა იოანე.

იერუსალიმი, უძველეს დროში „საღმად“ ანუ „სამყაროდ“ წოდებული, ყველა საუკუნეებში რელიგიით სუნთქავდა და პატივდებული იყო წმიდა ქალაქად. ებრაელთათვის იგი მიწიერი და სულიერი სამშობლო იყო, ქრისტიანები მას თავყანს სცემდნენ, როგორც აკვანს სარწმუნოებისას. იერუსალიმი თავისი ღვთაებრივი მოგონებებით სამყაროს ყველა კუთხიდან იზიდავდა ადამიანს, ყველა ტომისასა და წოდებისას მოკრძალებით თავს ახრევიანებდა. იერუსალიმს უფლება ჰქონდა ეთქვა, რომ იგი იყო სავანე კაცობრიობის იდუმალ ზრახვათა, იგი წარმოადგენდა ყველას კუთვნილებას, მაგრამ არავის საკუთრებას.

გზად სოფელი მალხა უნდა გაევიდოდა. ეს იყო ქართველთა სოფელი, სადაც „ქრისტეს საფლავის“ მცველი ქართველთა ლეგიონი იბნაკებდა ხოლმე.

— იბერიის განმგებელთ, — ამბობდა იოანე, — თავი მოაქვთ, რომ ბიბლიური ეპოქის სიღრმეში აქვთ გადგმული ფესვები, ბიბლიური დავითის ჩამომავალნი არიან ქართველებით და საქართველოს ღვთისმშობლის წილხვდომილებაც შემთხვევითი არ იყო, — ისე ამბობდა იოანე, ეტყობოდა, მათზე ნაკლებად არ მოსწონდა თავი.

იერუსალიმის ჯვრის მონასტერი თავისი ვერცხლისფერი გუმბათითა და სამრეკლოს ბრწყინვალეობით შორიდანვე თვალს იტაცებდა.

ეს ადგილი ქართველებს ბერძენთა და რომთა იმპერატორისაგან დიდი კონსტანტინესაგან მიეღოთ, პირველი მსოფლიო კრების განჩინებით.

თლილი ქვის გალავნით გარემოცული მონასტერი, მასიურ ლოდებში მოქცეულ ვიწრო რკინის კარით, ჩაფლული იყო ზვრებში, ზეთის ხილისა და ბროწეულის ბაღებში. ეს და სხვა მრავალი შესანიშნავი ტაძარი და მონასტერი, პეტრე იბერს აეგო. შთამბეჭდავი და მრავლისმთქმელი იყო ისიც, რომ სწორედ იმ ადგილზე იყო აგებული ჯვრის მონასტერი, სადაც ქრისტეს საწამებელი ჯვრისათვის მოეჭრათ ხე. „ლაზთა მონასტერში“ კი განისვენებდა თვით პეტრე იბერი თავის მასწავლებელ, იოანე ლაზთან ერთად.

გაზაფხული იდგა და ბუნება დაფდაფით ხვდებოდა ყვავილების დღესასწაულს, ცაზე ცისარტყელა გადაჭიმულიყო და იერუსალიმი ნაირფერი სამოსელით იკაზმებოდა.

— ბუნება ყველას ერთნაირად გვაუწყებს: გიხაროდეთ ხილვა ცი-

სარტყელისა, იგი ადამისა და ნოეს ბედის მოგონებაა, ცისარტყელა ხსოვნაა ღვთისა. არავის ივიწყებს ღმერთი, ვინც კი მას მიენდობა, ახსოვს ღმერთს თავისი ალექმა, — ამბობდა იოანე.

მინდვრის ყვავილები თავს იწონებდნენ, ნამი სამკაულად აბრწყინებულიყო მათ სადა სამოსელზე. ყველაფერს საზეიმო ელფერი მისცემოდა. აქ ყველაფერი ქრისტეზე მოგონებით სუნთქავდა.

ცისარტყელა მთელი თავისი ფერთა ელვარებით სადაფივით ციალებდა და აღფრთოვანებული ჭაბუკის სულში შვიდივე ფერით ირეკლებოდა. პირველად ადგამდა ფეხს წმიდა მიწაზე და ეკრძალებოდა, თავს უღირსად მიიჩნევდა და დუმილს არჩევდა. რა იცოდა, რომ მასში იერუსალიმის უთვალსაწიანოესი პატრიარქი სუფევდა!

ხმა დუმილისა ქადაგებდა: გულგრილია ბუნება ადამიანის მიმართ, იგი ხარობს მაშინაც, როდესაც ადამიანი იტანჯება, მაგრამ ბრძენია იგი, თავისი გულგრილობითაც ნუგეშს იძლევა, აგროპოზინებს ადამიანს, რომ დიდ მწუხარებას დიდი სისარული მოჰყვება, როგორც ზამთარს—გაზაფხული; მწუხარებაში იბადება ადამიანი, მწუხარებაშივე იბადება ჭეშმარიტი აზრი. ეს ხომ სუმბულმაც კარგად იცოდა — ზამთრის სუსხით დედამიწის პირისგან აღგვილი, გაზაფხულზე რომ მთელის მშვენიერებით ამოიზიდებოდა და სურნელებას აფრქვევდა!

ეღეონის მთის მწვერვალდიდან იერუსალიმი მთელი თავისი სიდიადით მოჩანდა.

ტბა ტიბერიისა კი, რომლის ტალღებიც საუკუნეების მანძილზე ერთსა და იმავე ადგილს აწყდებოდნენ, ყვავილებთან ერთად დარჩენილიყო მოწმედ ღვთაებრივი ადამიანის არსებობისა, ახლა რომ საუკუნეთა სიღრმიდან იხედებოდა.

ამაყად იდგნენ საუკუნოვანი ზეთის ხილის ხეები გეტსიმიანის ბაღისა; იგივე სინათლე, იგივე ჩრდილები, ნიავიც იგივე თრთოლვას იწვევდა და იგივე სურნელი მოჰქონდა.

ეს პატარა ხიდი კი, რომელზედაც იესო გადადიოდა, ჯადოსნურ ჯილად ქვეუღიყო — ადამიანები ამქვეყნიდან იმქვეყნად გადაჰყავდა.

ამ ბილიკებზეც არაერთხელ გაევილო იესოს!
„ვნების გაზაზე“ ყოველი ქვა, ყოველი ხე მიუთითებდა ქრისტეს შესვენების ადგილს ჯვარცმისაკენ. ვოლგოთაზე ათასი პატარა ანემონი სისხლის წვეთებად მოსჩანდა. ლოდები, რომლის წინაშეც ახლა ორივენი მუხლს იდრეკდნენ, ნაკურთხი იყო იესოს ცრემლითა და სისხლით.

ამ ღია ცისქვეშ ერთად წარმოსთქვეს „მამაო ჩვენო“ და მოხდა საოცარი რამ, ისეთი შვება იგრძნეს, ვითარცა მტვერი განეყარათ, და შეტბორებულ აზროვნებასაც მდინარება მიეცა.

ჭაბუკი ხან ცას გახედავდა, ხან მიწას დააცქერდებოდა, გული ზეციურის მიწიერთან შერწყმას ლამობდა.

ისე ეწვიმა და გადაეკარა, იოანეს ვერც შეეცყო. მას გონებაში თავისივე ნათქვამი უტრიალებდა, თითქოს იმ დღეს პირველად გაი-

გო და ისევ და ისევ უნდოდა გაემეორებინა — ადამიანი საკუთარი ბედნიერებისათვის არ იბადება, ადამიანის ბედნიერება მეორე ადამიანის ბედნიერებაშია, უმაღლესი ბედნიერება კი ღვთის ხილვაშია.

და თითქოს ჭაბუკი მის ფიქრებს განაგრძობდა, ამბობდა:

— ღმერთი იხილვების სიწმინდეში, სილამაზეში, სიყვარულში, თავისუფლებაში, გმირობაში.

— ყველაფერი ეს კი ბრძოლით მოიპოვება, ბრძოლით, — დაუმატა იოანემ.

— რომ იბრძოლო, ამისათვის საკუთარ სიმტკიცეს უნდა გრძობდე. ჭეშმარიტებას ნათლად შეიცნობდე. — თითქოს სინანულით წარმოთქვა ჭაბუკმა.

— თუ ბუნებას დააკვირდები და აზრის სიღრმეში ჩაიხედავ, დაინახავ, რომ ის, რაც სასრულია, სიმბოლოა უსასრულოებისა, ანარეკლია უხილავი ქვეყნისა. ბუნება სავსეა ხელთუქმნელი სიმბოლოებით...

ჭაბუკი აღრაფერი ეკითხებოდა, იგი უსმენდა.

იჩვევით ყოველივე საოცნებოდ იწვევდა, თავისი მშვენიერებით თვალს ათრობდა და ადამიანს ავიწყებდა ქვეყნიურ საქმეთ, ყოველივეს, სატანჯველს რომ უქმნიდა.

ანტონ წამებულს ეზრდებოდა ხეობისათვის ქვეყნიური სამოთხე ეწოდებინა, და სწორედ აქ, სადაც წყაროები ამხიარულებდნენ მიდამოს, იკრიბებოდნენ ახალგაზრდა ქალწულნი, იგი ქალი კი ყველაში გამოირჩეოდა ბაგეთა წყობით, თმის ვარცხნილობით, მაგრამ ახლა აღარ მოჩანდა მათ შორის, და მათი სიცილი დაცინვად ესმოდა ჭაბუკს. გულს რაღაც მოსწყდა და სიღრმეში მიძიმედ ჩაწვა. უსიამო გრძობბამ მთელი არსებით მოიცვა, თითქოს თავბრუც დაეხვა, უნებლიეთ თავი დახარა და თვალი მოარიდა მათ. უცხო იყო მისთვის ასეთი განცდა, და წუხდა.

ქალებისაკენ არ მიუხედავს, დროდადრო იოანეს სახეში აცქერდებოდა, თან ფიქრობდა: ადამიანები ყოველთვის ასე დაკვირვებით რომ უცქერდნენ ერთმანეთს სახეში, უფრო მეტს ამოიკითხავდნენ და მეტი პატივისცემით განიმსჭვალებოდნენ ერთუროს მიმართ. იმ ქალის სახემიც დროზე ამოიკითხავდა ყოველივეს და ცოდვასაც აღარ ჩაიდენდა. მაგრამ ულამაზენი იყო იგი, ვნებიანი და თვალთ უბნელებდა.

— ადამიანი ჰგავს ბროლის სასახლეს, — როგორც იქნა, იოანემ დასძრა სიტყვა, — რომელშიაც ვიღაცა სუფევს, და ადამიანის სახეში ცქერა არ მოვწყინდება ისევე, როგორც მდინარის ცქერა, რომელიც მიედინება სადღაც შორს და შენც თან მიჰყვები. ასევე გიტაცებს ცეცსელთან ყოფნა, მისი გიზგიზიც სხეულთან ერთად სულს გითბობს და მივიწყებულს მოგაგონებს.

— კარგი ნათქვამია, — ამბობდა ჭაბუკი. — ოღონდ როდესაც ეს ცეცსელი ხანძარად გადაიქცევა, წაგეიდება, მდინარე ნიაღვრად გარდაიქცევა და შენც წალეკვით დაგემუქრება, მაშინ კი გარბისარ თავის საშველად.

იოანესაც მოეწონა ნათქვამი.

მოვიდნენ გოლგოთას.

— ვილოცოთ საიდუმლოდ, მაგრამ აშკარა რწმენით, — თქვა იოანემ და მუსლთ მოიყარეს, ისევ „მამაო ჩვენო“ წარმოსთქვეს.

იოანემ ახლა უკვე ლოცვისაგან შვება ვერ მიიღო და აჩქარდა. თავს ცუდად გრძნობდა, თითქოს შეაცია კიდევ.

— იქნებ, — გაბედა ჭაბუკმა გოლგოთიდან გამობრუნებისას, — იქნებ ლოცვა მხოლოდ ზნეობრივი ვარჯიშია, სულიერი წრთენაა, იქნებ იძულებია ყოველგვარი ღვთაებრივის ჩაურევლად? ან იქნებ ლოცვა ისეთივე ნიჭია, როგორც მჭევრმეტყველება?

— ლოცვა მარტოოდენ ზნეობრივი ვარჯიში არაა, ლოცვა გონებით შეერთებაა უფალთან, ყოველივე, რასაც რწმენით ვითხოვ, შეწყნარებული იქნება უფლისა მიერ, — ამბობდა იოანე და მის გამოსხედაში რაღაც მკაცრი გამოსჭვიოდა.

იოანე სინელი ამბობს: — განაგრძობდა იგი — „თუ გრძნობებში ყველაზე უკეთესი მხედველობაა, ყველა სიკეთეზე უკეთესი ღვთაებრივი ლოცვაა და როგორც დაბოროკიდ ადამიანს არ ძალუძს გაქცევა, ასევე ვნებების მორჩილებაში მყოფ გონებას არ ძალუძს აღმაფრენა“.

ჭაბუკი კი დამშვიდებით ველარ უსმენდა, ამჩნევდა იოანეს სატიკივარი რამ აღონებდა — სიტყვის დროს სუნთქვა ეკვროდა, ფერი შესცვლოდა, სიარულიც უჭირდა. გზის პირად ჩამოსხდნენ.

ჭაბუკი შიშამდგარი თვალებით შესცქეროდა.

იოანე თავს ძალას ატანდა, სატიკივარს არ ამხელდა, თითქოს უნდოდა მოესწრო მისი შეგონება, — მერე? მერე, — ფიქრობდა, — იყოს ნება ღვთისა და განაგრძობდა:

—...ლოცვა სუნთქვაა სულისა, ლოცვა კიბეა უზენაესთან მისადგომი, ლოცვა გასაღებია საუფლოში შესასვლელი, რწმენა კი ჯილდოა ღვთისა ჩვენი ღვაწლისათვის, სიმდაბლე და სინანული საფასურია, რითაც ქრისტე მოისყიდება... ქრისტიანული სრულქმნილება ქრისტეს ჯვარცმაშია დაფარული...

ესა სთქვა იოანემ და ცხელებამაც შეიპყრო.

შეშფოთდა ჭაბუკი, აღარ იცოდა რა ექნა.

— ნუ შეშინდები, ოღონდ ჩქარა მივიდეთ სავანეს, — ნაძალადევი ღიმილით ამბობდა იოანე ჭაბუკის დასამშვიდებლად, თორემ სენი მასში ყოველთვის მისტიურ შიშს იწვევდა, სიკვდილზე აფიქრებდა, სიკვდილი კი მხოლოდ ამქვეყნიდან ცოდვების მოუნანიებლად წასვლით აძრწოლებდა.

რა მოვიდნენ სავანეს, იოანემ ჭაბუკს ძლივს გასაგონად შესთხოვა: — ილოცე ჩემთვის, შვილო ჩემო, შესთხოვე უფალს, რათა განმკურნოს.

იოანე ხედავდა, როგორ მსურვალედ აღავლენდა ჭაბუკი ლოცვას და იმედი ძალას აძლევდა.

არ გასულა დიდი ხანი და იოანეს ცხელებამ გაუარა.

გაიხარეს ორივემ, მაგრამ ჭაბუკს თავის დამსახურებად არ მიაჩნდა იოანეს განკურნება, იჭვი არ ასვენებდა და სთქვა:

— ჩემი ლოცვით საკუთარი თავის განკურნება ვერ მიიწმუნებია. მით უფრო, ვითარ ვირწმუნო, რომ ჩემი ლოცვით განიკურნე შენ?!

— აბა, დააკვირდი ქრისტეს ლოცვას, — სთქვა იოანემ, — „მამაო ჩვენო“ და არა მამაო ჩემოს ამბობს მაცხოვარი, „მოგვეც ჩვენ“ და არა მომეც მე, „მოგვიტევენ ჩვენ“ და არა მომიტევე მე, „გვიხსენ ჩვენ“ და არა ვიხსენ მე... ჩვენი თავისთვის კი არ ვითხოვთ, არამედ კაცთათვის. ჩვენ ვლოცულობთ ყველასათვის და ამიტომაც ჩვენი ლოცვით სხვასაც შევეწვიეთ.

ყველაფერი ეს ჩინებულად იყო ნათქვამი, მაგრამ, ჭეშმარიტად სარწმუნო რომ გამხდარიყო, ჭაბუკი გრძნობდა, ამისათვის დრო იყო საჭირო და რადგან ერთმანეთიც მოეწონათ, ერთმანეთის საჭიროებას ხედავდნენ, იმ დღიდან გადაწყვიტეს ერთად ელვაწათ და დარჩა ჭაბუკი იოანესთან.

გავიდა დრო, ახლა ჭაბუკი შეიპყრო ცხელებამ, ახლა მან სთხოვა იოანეს ელოცა მისთვის.

ილოცა იოანემ, მაგრამ ჭაბუკი ვერ განიკურნა.

მკურნალის მოყვანა დასჭირდათ...

განკურნებულმა ჭაბუკმა მერე ღიმილით თქვა:

— მამაო, ეს ამბავი მე ძალიან მაფიქრებს, რამეთუ, როდესაც ავად იყავი შენ, მთხოვე მე და შეველაღდე ღმერთს, მან ისწრაფა ჩემი შეწყნარება და მყის განიკურნე. შენ კი, როცა ითხოვე ჩემი განკურნება, ღმერთმა არ მოიღო ჩემზე წყალობა.

მაშინ იოანემ ღიმილით მიუგო:

— რაც შეიძლება მე, შვილო ჩემო, როდესაც გთხოვე, რომ ჩემთვის გელოცა, მე მწამდა შენი ლოცვისა, შენ კი როდესაც მთხოვე, შენთვის მელოცა, ჩემი ლოცვისა არ ვწამდა და ამის გამო არ ვიქენი შეწყნარებული, რამეთუ სწერია: „მსგავსად შენი რწმენისა მოგეზღვება შენ“.

თ ა 3 0 II

ს კ ა რ ს ე ლ 6 0

ბიზანტიელთა მეფის ტიბერის მეფობისას, როცა სტრატეგოსმა მავრიკიმ წარმატებით უმეთაურა სპარსთა წინააღმდეგ საომარ მოქმედებას, მეფემ ცოლად შერთო მას თავისი უფროსი ქალიშვილი და სიცოცხლეშივე, მძიმედ ავადმყოფმა, მავრიკი მეფედ აკურთხა. მავრიკი თავის მხრივ მემკვიდრედ ამზადებდა თავის ვაჟს, თეოდოსის.

გავიდა დრო და რომაელთა და სპარსთა შორის ომი ისევ განახლდა. ვერაგი ინტრიგის მსხვერპლი გახდა კეისარი მავრიკი. მოხდა ისე, რომ სამხედრო გადატრიალების შედეგად ტახტზე ავიდა ერთი უთვისტომო, ბედის მამიებელი ჯარისკაცი ფოკა.

ფოკამ მავრიკის მთელი ოჯახი ამოწყვიტა. მხოლოდ ერთი ვაჟი გადარჩა, თეოდოსი, რომელსაც ლაშქრობიდან დაბრუნებისას მოწამე ავტონომეს ტაძარში შეეფარებინა თავი. გავრცელდა ხმები, რომ ფოკამ ისიც მოაკვლევინაო. ამბობდნენ იმასაც, რომ თეოდოსის მავრად სხვა მოჰკლეს, თეოდოსი აღმოსავლეთში გაიქცა და, რაკი ცოცხალი გადარჩა, ტახტსაც დაიბრუნებსო, ზოგი კი იმასაც ამბობდა, რომ ტირანს თავდაღწეულმა თეოდოსიმ კოლხეთს შეაფარა თავი და დაუძღურებულ სხეულს თავად მოუღო ბოლოო. ხალხის უმრავლესობას უნდოდა დაეჯერებინა, რომ თეოდოსი ნამდვილად ცოცხალი იყო. ერთ დღესაც დაირხა ხმა, რომ თეოდოსის, მართლაც, გადაეჩრინა თავი და ალექსანდრიის ერთ მონასტერში ეპოვა თავშესაფარი. ამან ფოკასაგან დაზარალებულთ განწყობილება იმდენად გამოუკეთა, რომ სამეფო კარზე შეთქმულება მოეწყო.

ამავე დროს სპარსეთის მეფის ხოსროს კარზე გამოჩნდა თვითმარქვია თეოდოსი, რომელიც თავს მავრიკის შვილად აცხადებდა. ხოსრომ უბრძანა პატრიარქს, იგი მეფედ ეკურთხებინა. მერე მისცა ჯარი და გაგზავნა ვითომდა თავისი სამეფოს დასაბრუნებლად.

იმპერიის საზღვრებში შეჭრილ თვითმარქვია თეოდოსის წინააღმდეგ გამოვიდნენ რომის ჯარები და დაამარცხეს იგი. გაიგო თუ არა ეს ხოსრომ, მაშინვე გაეშურა მისაშველებლად. პირველი შეხვედრა რომის ჯარებთან წარუმატებლად დამთავრდა. მაგრამ მეორე დღეს, სპარსელებმა სასტიკად დაამარცხეს რომაელები.

ფოკამ მოლაპარაკება გამართა ავარების ხანთან. ამასობაში, ხოსრომ სასაზღვრო სიმაგრეს ალყა შემოარტყა. ძირი გამოუთხარა ქალაქის კედლებს და ფართო სამხედრო ჩანაფიქრის განხორციელება დაიწყო. თვითმარქვია თეოდოსის მეთავეობით სპარსელებმა დაიპყრეს ქალაქი სატალი, თეოდოსიპოლი, რის შემდეგ სამხედრო მოქმედება გადაიტანეს კაპადოკიაში და მიაღწენ ქალაქ კესარიას.

ქრისტიანები სპარსელებში ხედავდნენ ნაციონალურ მტერს, იუდაელები კი სპარსელებისაგან ელოდნენ განთავისუფლებას იმ ჩაგვრისაგან, რომელსაც ისინი განიცდიდნენ იმპერიაში და ამიტომ თავგამოდებთ უჭერდნენ მხარს სპარსეთის ჯარებს.

იოანე და ჭაბუკი თვალს ადევნებდნენ მოვლენებს. ანუგეშებდნენ და გზას უჩვენებდნენ ხალხს.

ჭაბუკი იმდენად გაიტაცა თვითმარქვია თეოდოსის ამბებმა, რომ შექმნა თხზულება, გალექსა და უკვდავყო იგი ისტორიაში.

ფოკას უმწიობამ სპარსელებთან ომებში, მისმა ვერაგობამ მოთმინების ფიალა აღუესო დიდებულთ. მოაწყვეს შეთქმულება, თუმცა

შეთქმულება გამხელილ იქნა, ფოკა მაინც დაეცა, და ტახტზე ავიდა ჰერაკლე.

კეისარმა ჰერაკლემ, აღიჭურვა რა სამხედრო ძალაუფლებით, დაამყარა ახალი დინასტია და ბიზანტია აღმოსავლეთის ყაიდაზე გარდასაქმნელად აღმოსავლეთისაკენ შემოაბრუნა.

სახელმწიფო წესრიგის დიდი მოყვარული, ყველასათვის მისაწვდომი, გამოცდილი სტრატეგია, ჰერაკლე ამბობდა: მტერი კი არ უნდა მოჰკლა, უნდა დაიმორჩილო.

ჰერაკლეს ცოლი ვაჟის შეძენას გადაჰყვა და სულ მალე ჰერაკლემ ცოლად შეირთო თავისი დის, მარიამის ქალიშვილი მარტინა. ამ ქორწინებამ სამეფო კარისა და ხალხის აღშფოთება გამოიწვია.

არც პატრიარქი სერგი იწონებდა კეისრის მოქმედებას. მავრამ კეისრის ნება-სურვილი ასეთი იყო და წინ ვერავინ აღუდგებოდა.

გამოფიტულ იმპერიას სპარსთა მხრიდან კვლავ მრისხანე საფრთხის აჩრდილი წამოადგა. ძალაუფლების შენარჩუნებისათვის ჰერაკლეს ბევრი რამის დათმობა და თავის დამცირებაც დასჭირდა.

მან ხოსროს გაუგზავნა ელჩები. იგი სწერდა:

„ფოკა მოკვალი, რადგან მან შენი მეგობარი მავრიკი მოკლა, ამიტომ გთხოვ, ზავი შევკრათ“.

ხოსრომ ამაზე არც კი უპასუხა, პირიქით, დააჩქარა სირიაზე გალაშქრება. აიღო ანტიოქია, დამასკო, ალყა შემოარტყა იერუსალიმს და ოც დღეს ფალაკვანთა ძლიერ სროლით აიღო კიდეც.

პაღესტინაში მას წინააღმდეგობას ვერ უწევდნენ იმპერიის დასუსტებული სამხედრო ძალები, ადგილობრივი იუდაველები კი სპარსელებს სვდებოდნენ, როგორც იმპერიის ჩაგვრისაგან მსხნელებს და შურს იძიებდნენ რა ქრისტიანებზე, სპარცვაგდნენ და ანგრევდნენ ქრისტიანულ ტაძრებს, სპარსელებმა კი არ დაუფასეს იუდაველებს ასეთი მხარდაჭერა, მეტიც — აუკრძალეს მათ იერუსალიმში ცხოვრება.

ტყვეებითა და ალაფით აღვსილმა ხოსრომ სპარსეთს წაიღო წმიდა ძელი, ცხოველმყოფელი ჯვარი მაცხოვრისა, და თან გაიყოლია პატრიარქი იერუსალიმისა ზაქარია, რომელმაც ტყვეობაში 14 წელი დაჰყო.

ხოსროს საყვარელი ცოლი, შირინ, ქრისტიანი იყო და ძელი თავის სასახლეში მოათავსა.

ამბობდნენ: სპარსელები ქრისტიანებს რომ უღელტდნენ, ქალაქს სისხლის მდინარე სდიოდა, ყრმანი, ვითარცა ფრინველთ მართვენი ჟიოდნენ, დედები გოდებდნენ შვილთა განშორებას, ქალწულნი — თავის ქალწულებას, ცოლნი ქმართა და ქმარნი ცოლთა სტიროდნენო.

ხოსროს მხედართმთავარმა შაჰრბაზრმა დატოვა რა იერუსალიმი, გადაიარა მთელი მცირე აზია და მიადგა ბოსფორს. აიღო ქალკედონი და ჯარი განაწყო ქრისთოპოლისთან.

ჰერაკლემ მდიდარი საჩუქრებით ძლივს დაითანხმა ხოსრო ზავი

დაედო. მაგრამ, რადგან ხოსრო ჰერაკლეს არ სცნობდა, მოითხოვა, გუჯარი სენატის სახელით წარედგინათ.

გუჯარში ეწერა:

„ღმერთმა, რომელმაც ყოველივე შექმნა და ხელთ უპყრია ყოველივე თავის ძლევამოსილებით, მისცა ადამიასთა მოდგმას ნიჭი ღირსეული მისი სახიერებისა — სამეფო ძალაუფლება, რისი წყალობითაც ჩვენ მოვიპოვეთ ცხოვრების უზრუნველყოფას ქვეყანაზე და ვპოულობთ კურნებას უბედურების შემთხვევაში. იმედი გვაქვს ამ ძალაუფლებისა და თქვენი მოწყალებისა, რომ გვაპატიებთ გამბედაობას მოგმართოთ თხოვნით.

ჩვენ ვიცით, ადრინდელ დროში მიღებულ იყო წესი ორივე თვითმპყრობელობას შორის წარმოქმნილი უთანხმოება თვითონ მეფეთა უშუალო განცხადებით გადაწყვეტილიყო, მაგრამ ეს წესი დაარღვია ფოკამ, რომის სამეფოს მიმტაცებელმა.

შფოთმა, რომელიც მთერია თვითმპყრობელობას, არ მისცა ჰერაკლეს საშუალება მიეზღო პატივი წარმომადგენლობის საშუალებით თქვენი სიმშვიდის უზომო ძლიერებისათვის. და აი, ჩვენ, უმნიშველო კაცუნები, მოგმართავთ ვედრებით თქვენს სამეფო უდიდებულებობას, მეფეთა მეფეს, ჩათვალთ თქვენი უკეთილმსახურესი მეფე ჰერაკლე ღვიძლ შვილად, რომელიც მზად არის ყოველგვარი სამსახური გაუწიოს თქვენს გულმონწყალებას. და აღვაველენთ ლოცვას ღვთისადმი თქვენი დღევანდელიობისათვის, მოვიხსენებთ რა თქვენს სიკეთეს რომის მეფობაში უკუნითი უკუნისამდე“.

მოწინააღმდეგის ამ დამამცირებელი სიმდაბლით ხოსროს თავბრუ დაესხა, და მოლაპარაკების ნაცვლად იმპერიის წარმომადგენლობა საპყრობილეში დაამწყვდია, აღჭურვა გემები და კვლავ შეუტია ბიზანტიას, მაგრამ ამჯერად ჰერაკლეს საზღვაო ფლოტილიამ სპარსნი სამარცხვინოდ აოტა.

იმპერია მაინც დიდ განსაცდელში იყო — ლანგობარდებმა დაიპყრეს იტალიის მხარეები და იმპერიამ საბოლოოდ დაკარგა თავისი ესპანური სამფლობელოები.

სლავები, რომლებსაც ბიზანტიის ჩრდილოეთ პროვინციები ეკავათ, იჭრებოდნენ საზღვრებში და სახლდებოდნენ ახალ ადგილებში, სძარცვავდნენ ეგეოსის ზღვის კუნძულებს.

ავარების ხანმაც ვერაგულად უღალატა აღთქმულ მეგობრობას და დაიწყო კონსტანტინოპოლის რბევა.

ორმხრივი საფრთხე ჰერაკლეს ილაჯს უწყვეტდა, ამ ჩამოწოლილ წყვილადში გლეხის ტანისამოსში გადაცმულმა იმპერატორმა ქალაქი დატოვა.

ავარებმა აიღეს ევდომი, ტყვეებითა და დიდძალი ნაძარცვით დატვირთულნი დედაქალაქიდან გავიდნენ.

ჰერაკლე დაბრუნდა კონსტანტინოპოლს, აღადგინა ხანთან კეთილი განწყობილება, დედაქალაქი იხსნა დარბევისაგან, ხოსრომ კვლავ

დასძრა ლაშქარი იმპერიის დასაპყრობად. ჰერაკლე სასოწარკვეთილებას მიეცა და ხალხის რისხვა რომ აეცდინა, გადაწყვიტა დედაქალაქი კართაგენში გადაეტანა.

უკვე სამეფო განძით იტვირთებოდა აფრიკაში მიმავალი გემები, რომ კეისრის განზრახვა ქალაქში გაცხადდა, შეიქმნა საერთო ალიაქოთი, შეიტყო პატრიარქმა სერგიმ, რომლის ძლევამოსილ გავლენას ქვეყანა ყოველთვის გრძნობდა და ახლაც თავი ჰერაკლეს უნდა ეჩინა.

სერგიმ წმიდა სოფლის ტაძარში მოუხმო ჰერაკლეს და მოსთხოვა, უარი ეთქვა გადაწყვეტილებაზე. ხალხს კი თვითონ მიმართა:

— შეილნო და ძმანო! ნუ შეშინდებით მტერთა სიმრავლისაგან რომელთა გარე მოგვიცვეს ჩვენ! ძლიერებაში როდია ნება ღვთისა, არამედ — სიმართლეში მტერი იარაღით წამოსულა ჩვენზედა, ჩვენ კი უმეტეს უფლის რწმენით აღვიჭურვით, მის სახელს მოვუხმით და დაეცეს მტერი, რამეთუ უსამართლოა საქმე მისი. მაკედონელმა მხნეობითადა სასოებით დაიპყრო სამყარო, მხნეობითა და სასოებით დავეწვიოთ ჩვენც აპეურნი და განვაგდოთ ჩვენგან უღელი მათი.

ღმერთო! შენ დასცე ყოველი, რომელნი გვემტრნეს ჩვენ ამოდ, რამეთუ ყოველი კაცთაგან შეუძლებელი, ღვთისა მიერ შესაძლებელ არს და ნუმცა უხარონ ჩვენზედა მტერთა ჩვენთა უსამართლოდ!

— ამინ! — იყო ერთხმად შეძახილი აღფრთოვანებული ხალხისა.

სერგის ზემთაგონებულმა სიტყვამ, ხალხის შემართებამ, ჰერაკლე შინაგანი ცეცხლით აღანთო და წარმოთქვა:

— ერთი იყოს ნება ღვთისა და ნება ერისა! უფალმან ძალი ერსა თვისსა მოსცეს, უფალმან აკურთხოს ერი თვისი მშვიდობით!

ჰერაკლე დაეუფლა თავის თავს და მეტი ძალით ჩაეჭიდა სამეფო საჭეს.

ჰერაკლემ მთავარსარდლის მოვალეობა თავისთავზე აიღო, რამაც დიდი წინააღმდეგობა გამოიწვია. ტრადიციულად იმპერატორს მხოლოდ მიმართულება უნდა მიეცა სახელმწიფოს ცხოვრებისათვის. მაგრამ ჰერაკლემ მაინც თავისი გაიტანა, სახელმწიფოს მმართველობა კი პატრიარქ სერგის დააკისრა.

წარსდგა რა ჰერაკლე, როგორც მთავარსარდალი საბრძოლოდ განწყობილ მეომართა წინაშე, ქება შეასხა მათ:

— ძმებო, ვაჟკაცნო! შევიარაღდეთ რწმენით, ვიქონიოთ ღვთის შიში და გულადად დავხვდეთ მტერს, რომელმაც მრავალი საშინელება დაატეხა თავს ქრისტიანობას, სირცხვილისაგან დავიცვათ რომელთა თავისუფალი სახელმწიფო; გვახსოვდეს, რომ მტრის გარემოცვაში ვიმყოფებით და დიდი საფრთხე მოელის მას, ვინც გაქცევას გაბედავს. შური ვძიოთ ქალწულთა გახრწნისათვის, ჩვენი ჯარისკაცების დაკოდილ სხეულთათვის.

ხოსროს კი წერილით მიმართა, რომელშიც კვლავ სთხოვდა ზავი დაედოთ. წინააღმდეგობის შემთხვევაში, სპარსეთის დაპყრობით ემუქრებოდა.

ამაზე ხოსრომ უპასუხა:

„ღმერთების მიერ საყვარელი ბატონი, მთელი დედამიწის მეფე, დიდი ორმუხდის შობილი ხოსრო—ჰერაკლეს, ჩვენს უგუნურ და უვარგის მონას.

არ გინდოდა რა გაგეწია ჩვენთვის მონური სამსახური, შენ თავს უწოდებ ბატონსა და მეფეს, შენ ანიაგებ ჩემს განძეულს, განა მე არ ამოვწყვიტე ბერძნები? შენ ამბობ, რომ ღმერთის იმედით ხარ. რატომ არ იხსნა მან იერუსალიმი და ალექსანდრია ჩემს ხელთაგან? ნუთუ ახლაც არ იცი, რომ მე დავიმორჩილე ზღვა და სმელეთი? განა მე ახლა არ შემიძლია კონსტანტინეპოლს ძირი გამოვუთხარო? მაგრამ მინდა მოგიტევეო ყველა შენი დანაშაული. და წამოიყვანო შენი ცოლი, შვილები და მოხვიდე აქ. მე მოგცემ მინდვრებს, ბალებს, რომლებსაგან შენ შესძლებ იცხოვრო. მეც მოწყალე თვალით შეგხედავ. ნუ მოტყუვდებით ამაოდ იმედით თქვენი ქრისტესი, რომელმაც თავისი თავი ვერ გადაარჩინა იუდაველებისაგან და მათ ჯვარს აცვეს. თუ შენ შთახვალ ზღვის უფსკრულში, იქაც შეგიპყრობ და შენ მაშინ დამინახავ მე ისეთს, როგორსაც არ ისურვებდი გენახე“.

ამ შეურაცხმყოფელმა, მუქარით სავსე წერილმა ჰერაკლე კიდეც უფრო გაამძვინვარა. მთელის საბრძოლო ძალების დარაზმვით გარდაიარა არაქსი და შეიჭრა სპარსეთში, როგორც დაუნდობელი მომსვრე-ლი.

ხოსროს აღარ ეგონა, ჰერაკლე მასთან ომის გაგრძელებას თუ გაბედავდა, ამიტომაც არავითარი სამზადისი არ ჰქონდა და საქმე გასაქცევად შეექნა. გაიქცა შაჰრაბაზრიც და იერუსალიმში ჰერაკლეს არავითარი წინააღმდეგობა აღარ შეხვედრია. შესვლისთანავე, უპირველეს, სპარსთა მარადიული ცეცხლის საკურთხეველი დაანგრია.

თავი III

ქოსა ბერი

ქვეყნის შფოთსა და ვერაგობას განშორებული, სულ ახალგაზრდა, უწვერ-ულვაშო იუდაველი მოადგა ადგილსა უშენსა და უმკვიდროსა. ცა ღრუბლებით მოგრაგნილიყო, უცებ დასჭექა კიდეც და ხშირმა წვიმამაც წამოუშინა. მწირმა გამოქვაბული დაინახა და თავი შეაფარა. წვიმა მოდიოდა და მოდიოდა. მიიხედ-მოიხედა — სიღრმეში დაყუდებული ბერი შენიშნა: თმა თეთრად უბზინავდა. თეთრი გრძელი წვერი კი მიწას სწვდებოდა.

მეტანია ჰყო მისთვის და კრძალვით წარმოსთქვა:

— ჩემთვისაც ილოცე, მამაო.

მაგრამ მოძღვარი არას იტყოდა.

დიდხანს ელოდა იგი ბერის ლოცვის დასრულებას, მაგრამ ამოდ, ახლოს მივიდა. ნახა, მკვდარი იყო.

შიშნაკრავი მყის კარეთ გამოენტო. შორით მიმავალს უხმო და ორივემ იქვე დაჰფლეს.

ღვთის განგებად მიიჩნია თავის აქ შეფარება და აღარ ინდობა იქიდან წასვლა, მისთვის ხომ მაინც სულერთი იყო, სად დაივანებდა! ჭრაქი ანთო, იქვე ხის მორისგან გამოჩორკნილი ორი მცირე დგამი იყო — ერთზე სატრაპეზოდ თიხის ქოთანნი და ხის ფიალა იდო, მეორეზე — საღრმთო საკითხავი წიგნები, პაპირუსები და სიძველისაგან მთლად გაყვითლებული ეგვიპტური „მკვდრების წიგნი“.

შუალამედე ათვალეირებდა, რა დაამთავრებდა ერთის კითხვას, მეორეს იწყებდა, მაგრამ „მკვდრების წიგნმა“ მაინც ყველაზე მეტად დაიპყრო.

წიგნი ესე იუწყებოდა: ქვეყანა შექმნილია კვერცხიდან, რომელიც დადო საუცხოო ფრინველმა ფენიკმა მზის საკურთხეველში. კვერცხშია მოცემული სიცოცხლის საწყისები, კვერცხი თავისი საიდუმლოებით მუდმივი სასწაულია: ნაჭუჭი — ცაა, გარსი — ღრუბლები, ცილა — წყალია და გული კვერცხისა კი — მიწა, ნაყოფის გამომღებელი. კვერცხი არის წმინდა სიმბოლო სიცოცხლის შემოქმედებითი ჩასახვისა, იგი განგების ამოუხსნელი სიდიადის ხსოვნის სამაჟულია და საფლავებზეც მიაქვთ ნიშნად ურთიერთკავშირისა. ეგვიპტელები კვერცხს არ სჭამდნენ სიცოცხლის მოსპობის შიშით და სარკოფაგებშიც მუმიასთან დებდნენ, როგორც სიმბოლოს მომავალი დაბადებისა.

ამოუხსნელი რჩებოდა რიცხვი 40. მოსეს ღმერთი გამოეცხადა მხოლოდ მაშინ, როდესაც შეუსრულდა 40 წელი; 40 დღე ლოცვაში იყო მოსე სინას მთაზე; 40 დღე მოგზაურობდა იღია სარიფსანს; 40 დღე და ღამე გრძელდებოდა წარღვნა; 40 წელი მოგზაურობდნენ ებრაელები კადიშის უდაბნოში, ქრისტე დაბადებიდან მე-40 დღეს მიიყვანეს ტაძარში მსხვერპლის შესაწირავად; 40 დღე გაატარა ქრისტემ ნათლისღების შემდეგ უდაბნოში მარხვასა და ლოცვაში, 40 დღე ეცხადებოდა ქრისტე თავის მოწაფეებს ჯვარცმის შემდეგ: გარდაცვალებიდან მე-40 დღე საიქით ცხოვრების მიღების გამოცდადაა მიჩნეული, დაბადებიდან მე-40 დღეს უნდა ინათლებოდეს ადამიანი, 40-ჯერ ითქმის „უფალო შეგვიწყალებ“!

წიგნის კითხვაში შუალამეც გადასულიყო. მოქანცული და ძილ-თორეული სიცივისაგან ბაბანებდა, დასაძინებლად არა გააჩნდა რა, გარდა ბერის ერთი ჭილობისა, რომლის ერთი ნახევარი ზემოდან უნდა გადაეფარა, მეორე ნახევარი კი მიწაზე დაეგო, ლეიბად. ამ ჭილობში გასახვევად ისე ემზადებოდა, თითქოს ბუმბულში უნდა ვავორებულიყო. — მადლობა უფალსა, — ამბობდა გულში, — რომ ჩემი თავი მრავალს ამჯობინა. რამდენი მდიდარია, ასლა ბორკილებგაყრილი საპყრობილეში, ფეხებიც ფალაკში აქვთ და არ ძალუძთ თავიანთ ნე-

ბაზე იარონ, მე კი მოსვენებული მეფესავით ვჭიმავ ფეხებს, როგორც მინდა და წავალ, სადაც მინდა.

დედის ნათქვამიც ასწენდებოდა: მთავარია გქონდეს ღმერთის ძიების სურვილი და ღმერთი თავად მოვა შენთანო.

გულის ძილით ეძინა, მიუსაფრობის შიში არ ჰქონდა, გაუცნობიერებულ შთაგონებას მინდობილს იმედი რწმენად ჰქცევოდა.

როდესაც მზე ალისფრად ჩაესვენებოდა, ცის თაღზე ცთომილნი გამობრწყინდებოდნენ და მთვარე ვერცხლის ელვარებით ამოცურდებოდა. ოცნება იტაცებდა და ლოცვით იძინებდა:

„მიწყალენ ჩვენ და მაკურთხენ ჩვენ და გამოაჩინე პირი შენი ჩვენ-ზედა, ჰეი, ყოვლად მოწყალეო. იესო! შეიწირე აწ მცირედი ესე ვედრება ჩემი; ვითარცა შეიწირე ოდესმე ქვრივისა მის ორი წვლილი“.

ხელსაქმობდა და დროდადრო ნაქმნარს გასასყიდად ქალაქს წაიღებდა, მიღებული საფასურით სახმარს შეიძენდა. ზამთარში ტყიდან ფირს ეზიდებოდა.

ერთხელ ერთი კარგი შეკვრა ფირსი ქალაქს გასასყიდად თან წაიტანა.

მოღრუბლული და ცრიატი დღე იყო. მწირი, ჩვეულებრივ ფლასკებში გამოხვეული, უნდილად მიაბიჯებდა, რომ გზად ერთი უბადრუკი ვინმე შემოხვდა, კურთხევისათვის ორივე ხელი გაუწოდა და უთხრა:

— წყალობა მიიღე, ტყის ბერო.

— ღმერთმან გიწყალობოსო, — გაუბედავად წარმოსთქვა მწირმა და ჯვარი გადასახა უცნობს.

ეს პირველი და უცაბედი კურთხევის გაღება იყო მისთვის. ჯერ შეშფოთდა, ჰქონდა თუ არა ამის უფლება? შემდეგ რაღაც უცნობმა მღელვარებამ მოიცვა. გრძობდა, რომ მისთვის მონასტერი უფრო შესაფერისი იქნებოდა და თავისი მსახურებითაც იქ სხვისთვისაც მეტი სარგებლობის მოტანა შეეძლო.

გამოქვაბულში, მობრუნებული, ლოცვად დაემხო.

„გარემოვადგე საკურთხეველსა შენსა, შევიყვარო შევნიერება სახლისა შენისა, ადგილი საყოფელი დიდებისა შენისა. ნუ წარსწყმედ უღმერთთა თანა სულსა ჩემსა“.

რადა ამ უკაცრიელ ტყეში თივასავით ჩამოვხმე, ბარემ ნამდვილი ბერი ვიქნებო, — იფიქრა, და ერთ დღეს მივიდა კიდეც მახლობელ მონასტერში შეურევბული.

მონასტრის კართან ბერი იჯდა და ფერხთ ჩაუვარდა:

— მაკურთხენ, მამაო, — ძლივს წარმოთქვა.

ბერმა წამოაყენა და უთხრა:

— არასდროს, არა კაცთაგანს არ დაუჩოქო, შეილო, მხოლოდ ღვთის წინაშე ხამს მუხლთ მოყრაო.

მწირიც მკვირცხლად წამოიჭრა და შეჰვედრა:

— ჰყავ სიყვარული ღვთის გულისათვის, მამაო, მიმიღე მსახურად და, თუ ღირს ვიყო, შემოსე სქიმა მონაზვნობისა.

რასივან მოგვიპოვებია ასეთი გულისტკივილი? — ჰკითხა ბერმა.
— მე ვარ უფსკრული ცოდვათა, შევცდი, ვითარცა ცხოვარი წარწყმენდილი, — თქვა მწირმა.

ბერმა კი ისევ განუმეორა კითხვა:

— შვილო ჩემო, აღსარება კეთილ არს კერძოთა საქმეთა აღიარებით და ვითარცა ყოველთა სენტა უძლურებათა შესაფერისი საკურნებელი წამალი არს, ეგრეთვე ცოდვისა მსგავსად სინანული არს. ცოდვილნი ვართ ჩვენ ყველანი, შეცთომილნი, ადამიანად წარმომავალნი. აწ მაუწყე ცოდვა შენი და შესაბამისად მისსა მიიღე საკურნებელი, რამეთუ სხვა არს სინანულისათვის კაცის კვლისა...

აქ მწირმა ხელებისა და თავის ქნევით უარყო ესე ცოდვა და ბერმა განაგრძო:

—...სხვაა სიძვათა მყოფლათთვის...

აქ მწირმა თავი დასარა ისე, არც შერხეულა. ბერმა იმავე სიღინჯით განაგრძო:

—...სხვაა გრძნულთათვის, სხვაა მპარავთათვის.

აქ მწირი ისევ გაიმართა წელში და ბოლომდე შემართებული დარჩა.

— იქნებ ვისიმე გმართებს რაიმე? — ცნობისმოყვარეობით აცქერდებოდა ბერი მოსულს.

— სინანულად და ტირილად ვარ მოსული სიჭბუკის ცოდვათა ჩემთათვის, მოსწრაფე ვართ ათივ მცნების აღსრულებად, მონაზვნობის ღვაწლთათვის, — თქვა უკვე შეშფოთებულმა.

— შვილო ჩემო, აიძულე თავი შენი, — განუმეორა ბერმა, — და მითხარი რა არს საქმე შენი და შეწევნითა ღვთისითა მიიღე კურნება. სინანულმა უძლებსა შვილსა მარგალიტი სათნოებისა აპოვნინა და დიადი სახე მიენიჭა, ბიბლიურმა მეზვერემ შენდობა მიიღო. უფალმა მონანულსა მეძავსა სიწმინდე შეჰმოსა, მონანულსა ავაზაკსა სამოთხის კარი გაუღო. ეგრეთვე შენცა შეგიწყნაროს ოდეს აღიარო დანაშაული.

მოსული ისეთი მავედრებელი, გულწრფელი თვალებით შესცქეროდა, რომ ბერმა ამოოხვრით წარმოთქვა:

— დაგტოვებ ერთხანს, ილოცე, შვილო; ამ ღამით დაიძინებ მონასტრის კართან და თუ ცისკრამდის მხეცნი ტყისანი არას გავნებენ, გასწავლი გზასა სინანულისასა, განგებას მონაზვნობისასა და შეგმოსავ წმინდა სქიმითა.

ის ღამე მწირმა სავანის კარიბჭესთან გაათენა და არა მხეცნი მიჰკარებინა მას, მაგრამ მის სულში ყველა მხეცის ღმუილი ისმოდა, სინდისი არ ასვენებდა, რადგან მას არ ძალედვა სიმართლის ბოლომდე აღიარება და თავს ინუგეშებდა მხოლოდ იმით, რომ ის, ქმედება რაც მიაჩნდა, სხვას ვნებას არ მოუტანდა და უფალთანაც პირნათლად წააყენებდა.

რაკი ღამეს მშვიდად ჩაეცლო, მოძღვარი კეთილი ღიმილით შე-

მოსვდა, აღარაფერს შეეკითხა, მაგრამ აგრძნობინა, რომ მთელის კეთილგანწყობით მზად იყო მოსასმენად და, მართლაც, ისეთი გულისყურით, ისე სანდომიანად უსმენდა, რომ მწირი მთელის გულწრფელობით აღიარებდა, როგორ შეჰყვარებოდა უმშვენიერესი არსება, რომელსაც აღთქმა დაედო უბიწოებისა, მაგრამ იმდენად მომხიბვლელი, იმდენად მიმზიდველი და ბუნებრივის განცდების აღმძვრელი იყო ოგი, რომ მწირი შეიქმნა მიზეზი მისი ფიცის დარღვევისა და ახლა თავადაც უნდა დაედო ფიცი სიწმინდის დაცვისა და ელოცა მისთვის შენდობის მოპოვებისათვის ელოცა.

მის გულწრფელობაში, ნათქვამის სიმართლეში მოძღვარს ეჭვი არ შეჰპარვია, აღსარების ბოლოსაც მწირს ბეგრები რომ უწყდებოდა და თითქოს რაღაც რომ რჩებოდა უთქმელი, აღარ ნაეკითხებოდა, რამეთუ ფიქრობდა: ნამდვილი აღსარება მხოლოდ წმინდანს და იმ ადამიანს შეუძლია თქვას, რომელიც სიცოცხლეს ეყვარება. განა თვითონ კი აღსარებისას გულის სიღრმიდან ყველაფერს ამოსწურავდა? ყველაფერს მხოლოდ ჩურჩულით გაანდობდა ხოლმე მაცხოვარს ჯვარცმასთან. ეს გამართლებულად მიაჩნდა, რადგან სჯეროდა, რომ ყოველი ადამიანი უფლებამოსილი იყო ჰქონოდა ისეთი საიდუმლო, რომელიც თვითონ ცოდვად არ მიაჩნდა.

— ღმერთმა შეგინდოსო, — თქვა მოძღვარმა და იმავე დღეს საზეიმოდ შემოსეს მოსული წმიდა სქიმით და სასულად თეოდორე უწოდეს.

არქიმანდრიტმაც საქმე მაშინვე მიუჩინა:

— ძმაო თეოდორე, გევალება ბოსტნის მორწყვა, ძმათა შეჭამანდის მომზადება და ძმათათანავე ლოცვა დაუცადებელი. ქალაქადაც წახვალ ძმათა მსახურებისათვის.

ამ ღარიგების შემდეგ მოძღვარმა საიდუმლოდ აჩვენა ის ბალახი, რომელიც ხორცის მზურვალებას გაანელებდა.

თეოდორეს უფრო მოკრძალებული თავაზიანობით ეღიმებოდა, ვიდრე მადლიერებას გამოხატავდა საშვებელისათვის, რადგან მას ამის საჭიროება არ ჰქონდა, მოძღვარმა კი გაიფიქრა — ეს მისთვის ისედაც ცნობილიაო.

მკაცრი იყო თეოდორეს მრწამსი, მაგრამ სუსტი იყო არსება მისი, იმდენად სუსტი, რომ ხშირად ავიწყდებოდა ლოცვა წარმოეთქვა საზრდელის მიღებისა თუ დამთავრებისას, ისე ჩაეძინებოდა, ძილად მისვლის ლოცვას არ წარმოსთქვამდა. ბოსტანს კი მუდამ ხალისიანად რწყავდა, არანაკლებ მზრუნველობით ამზადებდა შეჭამანდს ძმათათვის.

განცვიფრებას იწვევდა მისი ყველასადმი თავაზიანობა და მორჩილება, ისეთი სიყვარულით მსახურობდა განსაკუთრებით სწეულთ, რომ მათ მკურნალი აღარ სჭიროდათ.

ერთი იყო ჭამადით განლაღებულს ძილი ისე მეყსეულად მოეკიდებოდა, ბოსტანშიც კი მიეძინებოდა ხოლმე.

მოძღვარმა პირველი დღიდანვე გამოარჩია სხვებში და სამაგალი-

თოდ აქებდა, რაც ძმებში შურის გრძნობას იწვევდა, ვერას უხიაკს კი ვერ დასწამებდნენ, რომ მოძღვარის განწყობა გაეცუდებინათ, მეტიც— ვინც კი მასთან ასლო, უშუალო ურთიერთობაში იყო მისადმი სიყვარულითა და მეგობრობით განწყობილი.

მამა თეოდორე მდიკოთა, ფერი მიეცა და ერთ დღეს ძმათა მსახურებისათვის ქალაქად რომ ვიდოდა, ანაზღად იგივე მავანი ვინმე შემოხვდა, — ტყის ბერად რომ მიმართავდა და ის იყო თეოდორეს თავისი სქიმითა და კუნკულით თავი უნდა მოეწონებინა, რომ ქვასავით მოხვდა მისი სიტყვები:

— გამარჯობა, მონასტრის ღორი!

თეოდორე შეკრთა, გუნებაწამსდარს ვეღარ მოეფიქრებინა, როგორ უნდა მოქცეულიყო — უნდა ეპასუხნა, თუ ისე გაეგლო, ვითომც არც გაუგონიაო. მაგრამ ვიდრე რაიმეს მოისაზრებდა, მთქმელი უკვე აღარცა ჩანდა, მისი ხმის გესლი კი გულში ჩაჩენილია და მთელ არსებას უშხამავდა. იმ დღიდან საგონებელს მისცემოდა, თუმცა ვერავისთან ამხელდა საწუხარს. ღამეებს თეთრად ათენებდა, გულმოდგინედ ლოცულობდა, ჭამადს სრულიად იკრძალავდა მარხვაში და დაუბრუნდა სინატიფე, მოერია თავის თავს — ერთი ჭეშმარიტებაც ირწმუნა, რასაც ძმათ ვაანდობდა:

— სჯობს გენასტრებოდეს, ვიდრე გენაყრებოდესო.

მაღე გუნება-განწყობილება გამოუსწორდა, მაგრამ მაინც შეიცვალა — თამამი — მოკრძალებული გახდა, მოდავე — დამთმობი.

მოძღვარს კი ასეთმა აშკარა და უცაბედმა ცვლილებამ საფრთხე რამ აფიქრებინა, იჭვნაკრავ თვალს ადევნებდა და მიზეზს ეძებდა.

მამა თეოდორე უმეტესად მონასტრიდან გასასვლელ საქმეებს ეტანებოდა და ესეც აფიქრებდა მამასახლისს, თეოდორეს კი უნდოდა კვლავც შეხვედროდა იმ მავანს, დანახვებოდა, ახლა რალას ეტყოდა?

მაგრამ ამოდ, ვეღარსად შეხვდა და ფიქრობდა: შესაძლოა ის სულაც ჩვეულებრივი ადამიანი კი არ იყო, არამედ ადამიანის სახით მოვლენილი ანგელოსი, რომელიც მას ჭეშმარიტ გზაზე აყენებდა და რაკი თეოდორე მართლაც მიმხვდარიყო, როგორ უნდა ეცხოვრა, ამიტომ მისი შეხვედრაც აღარ მოხდებოდა. ხან თავს ძალას ატანდა დაევიწყებინა იგი, როგორც სრულიად შემთხვევითი ამბავი, მაგრამ ის, რომ ამ შემთხვევამ მასზე გარდამქმნელი გავლენა მოახდინა, ეს მისთვის უფრო მეტი იყო, ვიდრე უბრალო შემთხვევა.

ყველაზე გამოცდილ ბერებსაც კი აოცებდათ თეოდორეს გამუდმებული ღამის თევა მუხლმოყრილი ლოცვით. ამით ყველას სიყვარულს იმსახურებდა.

ერთხელაც მონასტერს შემოაკლდა ხორბალი, ზეთი და უბრძანა მამასახლისმა:

— წარასხამ აქლემთ ალექსანდრიას, შეიძენ ყოველ სახმარს მონასტრისათვის. უკეთუ გზაში დაგალამდეს, ენატის მონასტერს განუსვენე აქლემთ, — თან ღიმილით დასძინა, — დედათა მონასტერია და ღამეს აქლემებთან ერთად გაათევე კარიბჭესთან. აბა, შენ იცი. ახლა შენც

ფიცის გამტეხი არ შეიქნე, თორემ ველარაფერი ლოცვა ვეღარ გიშველისო.

ალექსანდრიიდან მობრუნებისას, მამა თეოდორეს, მართლაც, და-ალამდა გზაში. დაღლილმა ენატის დედათა სავანეში ითხოვა განსასვენებელი გათენებამდე.

დედანი შეწუხდნენ, მამაკაცი როგორ უნდა მოესვენებინათ სენაკში, მაგრამ ადამიანს თავშესაფარზე უარს ვერ ეტყოდნენ. თეოდორემ ბევრიც არ დააღონა დედანი და თავად უთხრა:

— აქლემებთან ერთად გავათევ ღამეს, და ისე წავალ უთენია, თქვენ ვერც გაიგებთო.

ყველას მოეწონა ეს აზრი, მხოლოდ დედამ ვერ მოითმინა და მიუღო:

— თუკი გარეთაც შეგიძლია გაათენო, რაღა მაინცდამაინც მონასტრის კართან, მოშორებით გარეკე ეგ შენი აქლემებით.

არავინ დედათაგანმა არ მოიწონა ეს სიტყვები. თეოდორეს იქვე მიუჩინეს ადგილი, ლოგინად ჩალა დაუგეს და ისიც ისე მიიყუჟა აქლემებთან ერთად მონასტრის კართან, რომ ვერც შეამჩნევდა ვინმე, თუ იქ აქლემების გარდა ადამიანი იყო.

ცა ლეგა ღრუბლებმა დაბურეს, სინათლის სხივიც კი არსაიდან ჭიატებდა. მაგრამ თვალი რომ შეაჩვია სიბნელეს, კარგად გაარჩია ირგვლივ ყველაფერი. კარგ გუნებაზე იყო, ჩალაზე მოსვენება ეამა. უკვე ძილბურნაში იყო, როცა გაიგონა როგორ გაიჭრიალდა მონასტრის კარებმა და იქიდან პირბადე აფარებული მონაზონი გამოვიდა. კარებთან ერთხანს შეჩერდა. თეოდორემ იფიქრა, ქალს ის აფიქრებდა, მას ეძინა თუ არა და კიდევ უფრო მოიმიძინარა თავი, ხვრინვაც კი ამოუშვა. მონაზონი უმალ ციმციმ უკანვე შეიპარა და კარი ღიად დატოვა. თეოდორემ ახლა ფენის ხმა გაიგონა და შენიშნა, იქვე, მოფარებით მომლოდინე ახალგაზრდა ვაჟი. თეოდორე დაიძაბა, ვაჟი ისე თამამად მივიდა ღია კართან, ჩანდა თეოდორე მისთვის შეუმჩნეველი დარჩენილიყო. თეოდორემ თვალები დააჭყციტა — ჩაცმულობით სასულიერო პირს არა ჰგავდა, მოხდენილობით, უეჭველად, დიდგვაროვანი უნდა ყოფილიყო. მისი სახე კარგად დაახსომდა, განსაკუთრებით, დიდრონი თვალები. ვაჟის სავანეში შესვლისთანავე კარი შიგნიდან უმალ ჩაირაზა.

ამ გარემოებამ თეოდორეს ძილი დაუფრთხო. საოცარი გრძნობა დაეუფლა, გული ისე აჩქარებით უძგერდა, უნებურად ხელს აფარებდა ზედა.

თუმც თეოდორე მათ ქმედებაში საძრახისს ვერას ხედავდა და თითქოს ამართლებდა კიდევ, მონაზონი ქალი მაინც ებრალებოდა — იგი თავის უბიწოების ფიცს ღალატობდა და რა სინანულით, რა სასჯელით გამოისყიდოდა მას?! მაგრამ დანაშაული თუ თავისთავად ხდებოდა, ბუნებრივიც იქნებოდა და ამდენად, აუცილებელიც. მათ ბედს შინაგანი ძვრები გადასწყვეტდნენ და ორივენი თუ არა, ერთი მაინც ჭეშმარიტების გზას დაადგებოდა. ასეთი ფიქრით მოცული, თავისი

საერო ცხოვრების უკანასკნელ დღეს იგონებდა. რა ამალღებული, წმინდა გრძნობებით მიიღტვოდა მშვენიერებით შემკულ ადამიანისაკენ, რა ალტაცებით, რა ჯადოსნურ მოლოდინით შეეხო კიდეც, თითქოს შეუცნობელისაკენ ვადაეღვა ნაბიჯი, უცხო ბაღნარში გადაეხედა, და უჩვეულო სილამაზის ყვავილი დაენახა, მის სურნელებას დაეთრო და შემდეგ... შემდეგ აღასრულა ბუნებამ ნება თვისი. რა მღელვარება იფარებოდა იმ უსიბყვო თანხმობაში, რა ამბოხება მზადდებოდა იმ მორჩილებაში. რა ძალნი თრთოდნენ მაშინ მის გულში?! და თუ აქამდე მონაზონი დედა ებრალებოდა, როგორც ცთომილი, ახლა ვაჟიც შეებრაღა, რადგან მიზეზი იყო ცთომილებისა და რას მოუტანდა მას ეს წამიერი ნეტარება?

ამ ფიქრებში დრო გასულიყო. სავანის კარი ისევ ფრთხილად გაიღო და ისევე ფრთხილად დაიკეტა, ვაჟი კედელ-კედელ გაჰყვა სავანეს, მონღენილად გადაახტა ზღუდეს და სიბნელეში გაუჩინარდა.

ამ ამბავმა თითქოს შეუმსუბუქა კიდეც ფიქრები წარსულზე, თუმცა აღარ დაუძინია და ალიონზე აქლემებს თავისი მონასტრისაკენ მიერეკებოდა უაჟვი.

სავანეში მისი დაბრუნებით ყველამ გაიხარა, თავადაც კმაყოფილი ჩანდა, არც დაღლა ემჩნეოდა და მაშინვე საქმიანობას შეუდგა, რამეთუ სხვისი ამბების მოყოლად არ სჩვეოდა და ამ შემთხვევის გაცხადებაც თავისი ცოდვის საჯაროდ აღიარებად მიაჩნდა, ამიტომაც არავისთვის არაფერი უთქვამს.

გავიდა რამოდენიმე თვე და ენატის ილუმენიამ შეიტყო, რომ მისი მორჩილი დედა მიდგომილია, იხმო იგი და ჰკითხა:

— მითხარ, ვინ არს ესე შენთანა?

ხოლო დედამ დაფარა ის ყმაწვილი და თქვა:

— თქვენ რომ აქლემებთან ერთად მონაზონს კარიბჭესთან განუსვენეთ, ლამით რა გავედი რაიმესათვის საქმისა, მან ვითარცა მხეცმან შემიაჟრო, ესრეთ წარმწყმიდა.

აღშფოთდა ილუმენია, აღშფოთდნენ მონასტრისანი და ყოველივე ესე აცნობეს იმ სავანის წინამძღოლს, სადაც თეოდორე მოღვაწეობდა. პასუხი რომ ვერ მიიღეს, აქოშინებით მოცვივდნენ სავანეს, თითქოს მიწიდან ძვრებოდნენ, ისე იზრდებოდა მათი სიმრავლე და მძვინვარებით ყვიროდნენ:

— სადა არს უმსგავსო იგი მონაზონი, რომელიც ჩვენ შევიფარეთ და მან კი განხრწნა ქალწული ჩვენი?

წინამძღვარმა გამოიყვანა თეოდორე.

თეოდორეს, ვითარცა ქურციკს ვეფხვთა შორის, თვალები მიეფეთებინა მათთვის და ბრალდებას ფიცით უარობდა:

— როგორ? როგორ? — იმეორებდა გაოცებულნი.

მის ხმაში ისეთი გულწრფელი წყრომა გამოსჭვიოდა, წინამძღვარმა ეს ბრალდება ცილისწამებად შერაცხა და თეოდორე განარიდა.

ძლივს განდევნეს ენატოსელნი სავანის გარემოდან, მაგრამ მათი,

ფიცი, რომ თეოდორეს დაუსჯელად არ დასტოვებდნენ, ყურთასმენას არ შორდებოდა.

თეოდორეს შეეძლო ერთი სიტყვით თავის მართლება, მაგრამ ეს ის სიტყვა იქნებოდა, რომელიც მის საიდუმლოებასაც გააცხადებდა და მაშინ კი მართლაც ბრალდებული გახდებოდა, ამიტომ — დუმილი არჩია.

— მრიდებელი ბაგისა გონიერ იყოს, — თქვა წინამძღვარმა თეოდორეს მდუპარებით კმაყოფილმა.

მონასტერში კი დიდხანს იდგა ქოთქოთი — უქმსიტყვაობის მოყვარულნი, ძვირის მზრახველნი არ ცნებოდნენ და თეოდორეს გასაგონათაც იტყოდნენ:

— უყურებ შენ ამ ქოსას! ჩვენ რას ვფიქრობდით და ეს ვინა ყოფილა!

როდესაც წინამძღვარი მასთან შევიდა სენაკში, უმალ გაჩნდნენ ჭუჭყურტანებიდან მოთვალთვალენი, კარებთან მიყურადებულნი და ეგონათ რასმე მამხილებელს გაიგონებდნენ, მაგრამ ესმოდათ მხოლოდ თეოდორეს აუღელვებელი სიტყვები: ღმერთმა სომ იცის სიმართლე და მან განმსაჯოსო.

თეოდორეს დანახვისას ძმანი მაინც ჩუმ-ჩუმად ერთმანეთს მრავალმნიშვნელოვნად გადახედავდნენ და ჩაიჭირქილებდნენ სოლმე.

— რა მაგის საქმე იყო ბერობა, — ამბობდნენ, — ღმერთი ადამიანს რაიმე ნიქს რომ მოამადლებს, შესაფერისადაც ამკობს: მემუსიკეს ჯადოსნური თითებით აჯილდოვებს, მგალობელს — სმენითა და სმოვანებით, ამ ბედშავისათვის კი წვერ-ულვაშიც ვერ გაუმეტებიაო!

— რა იცით, იქნებ ანგელოზია კაცის სახით მოვლენილი?! — გამკილავი სერიოზულობით იტყოდა ვინმე.

თეოდორე კი მრავალმნიშვნელოვანი ღიმილით გახედავდა მათ და ზურვს აქცევდა უსიტყვოდ. ხედავდა, რომ ძმანი საერთოდაც უზნეობას უფრო პატიობდნენ ადამიანს, ვიდრე გარეგნულ ნაკლს, მასაც ხომ დაცინვით ქოსა ბერად მოიხსენიებდნენ, და ვინ იცის კიდევ რაღას არ დასწამებდნენ! წინამძღვარს აგონებდნენ, იჭვს აწვეთებდნენ, მაგრამ მაინც ვერ ამხედრებდნენ, რამეთუ მან იცოდა, რომ ადამიანი თანაგრძნობით უფრო განიკურნებოდა, ვიდრე გაკიცხვით, მით უფრო, თუ დარწმუნებული არ იყო ადამიანის დანაშაულში. თუმცა იგი თეოდორეს მაინც შეაგონებდა:

— ჩვენი მფარველი ანგელოზნი იწერენ ცხოვრებას ჩვენსას. წიგნი ესე დამარხულ არს ქრისტეს მეორედ მოსვლამდე. მაშინ განეხვენებიან წიგნი თითოეულისა საქმეთანი, რათა მიეხედვოდეს თითოეულსა თავისი ვალი და ვითარცა უცვლელია ღმერთნი, უცვლელია განჩინება ჟამსა მას; არცა ქრთამი, არცა სიტყვა, არც ცრემლიანი სინანული არ შეიწირების, არცა დრო მოგვეცეს გამოსასყიდად. ცხოვრება ვითარცა ქურაა რკინისათვის. ვიდრე ცეცხლი უკიდია, იჭედება და რა გაცივდება, მას ველარაფერი შესცვლის. ვიდრე ცოცხალნი ვართ, უნდა ვაღიაროთ ჩვენი ცოდვანი, რამეთუ ყველანი ცოდვილნი ვართ და

აღსარებით მიღებულ შენდობას კი დიდი ძალა აქვს — რასაც აქ მომღვარი შეგინდობს, ის ცოდვა თან არ წარიტანება, ამიტომ მუდამ ეცადე შენი აღსარებაც გულწრფელი და სრული იყოს.

თეოდორე კი ისევ და ისევ ფიცით განამტკიცებდა ამ ბრალში თავის უცოდველობას.

ამდენმა დაცინვამ, უნდობლობამ, შეგონებებმა თეოდორეს გული აუცრუეს ყველაფერზე, ინანა ბერად აღკვეცა და იმაზე ფიქრობდა რაპდენად უფრო ბედნიერი იქნებოდა, რომ დარჩენილიყო იმ წმინდა ბერის გამოკვებულში! იქ თუ სიმარტვე აღონებდა, აქ ცხოვრებას მთელი თავისი დავიდარება მასზე მიესვეტა და მხოლოდ იმაზე ფიქრობდა, როგორ დაეღწია თავი აქაურობისათვის — ტაძარი ღვთისა სატანის სარბიელად ჰქცეოდა და რწმენა, რომელიც საღ კლდედ მიაჩნდა, მოხვეწებასავით ციალებდა. მაგრამ თეოდორი არ დრტვინავდა, ფიქრობდა, ალბათ ასეთი იყო მისი ბედი, რომ დაბადებული იყო იმისათვის, ყველასაგან შეურაცხება მიეღო და მაინც შეუბღალავი დარჩენილიყო.

დრომ ყველაფერი გადაწყვიტა — ქალმა შვა ყრმა.

ენატოსელთა აწონილებული ბრბო ასლა უკვე ყრმით ხელში მოაწყდა მონასტერს. ხმამაღლა იხსობდნენ თეოდორეს, პაგრამ კონამძღვრის ბრძანებით არავინ არ უნდა გასულიყო.

მაშინ დედათა ბრბომ ახლადმობილი დატოვა კარის ზღურბლზე და ღვთის რისხვის მოწოდებით განეშორნენ მამათა სავანეს.

პირველი მაინც თეოდორე გამოვიდა. მოულოდნელი იყო მისთვის არა ის, რაც მოხდა, არამედ აზრი, რომელიც იმ წუთას დაებადა.

— რა მოხდებოდა აეყვანა ბავშვი და გაქცეულიყო შორს, შორს მონასტრისაგან? მაგრამ ეს სომ დასტური იქნებოდა ბრალდებისა! მაშინ სიცილს დააყრიდნენ, ყრმას წაართმევდნენ და რომელსამე ქალთა მონასტერში გააძიძავებდნენ. რა უნდა ექნა, როგორ უნდა დაეჭირა თავი, რომ ეს არ მომხდარიყო?

ამ ფიქრებში იყო, რომ გამოვიდნენ მონასტრისანი. თეოდორემ ერთი კი გადახედა ყველას, მაგრამ სიტყვა არ დასცდენია, თავდახრილი იდგა ახალშობილთან. იდუმალ მრავალგზის წარსთქვამდა: „იყოს ნებაი შენი“.

წინამძღვარმა სამსჯავროდ მოუხმო ყველას.

ძმანი წუხილის ნაცვლად თეოდორეს ნიშნის მოგებით, აღმაცერად გახედავდნენ. იგი ნაბიჯის გადადგმასაც არ აპირებდა, თითქოს ეშინოდა ახლადმობილი არავის გადაემადა და მხოლოდ წინამძღვრის ბრძანებით გაჰყვა ბერებს უკან.

— თავად აღიაროს ყოველივე, — აიმაღლა ხმა ერთმა ძმათაგანმა, — და შემდეგ განვსაჯოთ.

თეოდორემ არ იცოდა, როგორ წარემართა სიტყვა, რომ ახლადმობილი სხვისთვის არ მიეცათ და, რაკი არ იყო ჩვეული მრუდსა და ცბიერ სიტყვას, ერთხელ კიდევ გამომწვევად გადახედა ყველას, წინამძღვარსაც თამამად გაუსწორა თვალი და პირდაპირ განაცხადა:

— უცოდველი ვარ ამ ახლადშობილი ადამიანის ბედში, მაგრამ ბედნიერი ვიქნებოდი, რომ მისი მშობელი ვყოფილიყავი.

ამ მოულოდნელი აღიარებით ყველა სახტად დარჩა.

წინამძღვარს მის სახეში ამპარტავნობა თუ ზვიადობა ამოეკითხა და შთამაგონებელი ხმით მიმართა:

— ყოველთვის გიჯობდეს ცოდვის აღიარება სიმდაბლითა და სინანულით.

ამაზე თეოდორემ აღარაფერი თქვა.

— მამა თეოდორემ კარგი გამოსავალი მოუნახა მის ცოდვის დაფარვასა და აღიარებასაც, მაგრამ, თუ კანონი სჯის საფლავების მიმარცვლებს, მით უფრო მეტად უნდა დაისაჯოს ქალწულობის მიმტაცებელი, — სთქვა ერთმა.

და იქმნა თეოდორე საყვედრელ და საკიცხელ ყველასაგან.

— ცილისწამებამ უნდა მაცხოვროსო, — ფიქრობდა თეოდორე წარბშეუსრქლად და ახლაც შორს იყურებოდა.

ძმათა სამსჯავრომ მას მონასტრიდან გაძევება მიუსაჯა:

— რაკი მამა თეოდორეს ბედნიერებად მიუჩნევია იყოს მშობელი, ახლადშობილი თან წაიყვანოს და მისი ზრუნვა მის კისერზე იყოს.

მაშინ, როდესაც ძმანი ფიქრობდნენ, თეოდორესათვის ეს უმძიმესი დოლაბი იქნებოდა, თეოდორეს თითქოს ფრთები შეესხა. სიხარული რომ დაეფარა, თავს უფრო მეტად დაბლა ხრიდა და გულში იმეორებდა: „ამინ“.

დაიბნო მოწყალება იყო სამსჯავროსაგან, რომ სქიმა არ გახადეს და უდაბნოდ მოსანანიებლად განუტევეს.

თეოდორემ, როგორც კი ხელში აიყვანა ახლადშობილი, თავი მალა ასწია და გაბრწყინებული სახით წარმოთქვა:

— ღმერთმა ყველას თავისი სიმართლით გაუმარჯოს და რამდენადაც თქვენ მართალი არ იყოთ, იმდენად მე მომხედოსო.

წინამძღვარმა რალაც მამხილებელი ამოიკითხა მის ხმასა და სიტყვებში, მაგრამ ველარას იქმოდა.

მამა თეოდორეს თავი სიზმარში ეგონა, სიხარულისაგან ლამის გაქცევას ლამობდა, მაგრამ გონიერებას მოუხმო. წინამძღვართან მოკრძალებით დამშვიდობება სცადა. ახლოს მივიდა და უსიტყვოდ ანიშნა, რომ უდანაშაულო ყრმისათვის კურთხევა გაეღო.

წინამძღვარმა ფლასებში გამოხვეულ ადამიანს ჯვარი გადასახა და მღუმარედ, დამძიმებული გულით გზა დაულოცა.

მართალია თეოდორე დიდის გზნებით ჩაეჭიდა ბედის გამოწვდილ ხელს. მაინც ეშინოდა, შეძლებდა განა იგი ჩვილის გაზრდას? სად ჰპოვებდა თავისაფარს? ახლა მას თავის თავზე ფიქრის უფლებაც აღარ ჰქონდა, მონასტრიდან კი იმისათვის გააძევეს, რომ ცოდვები სინანულით გამოეყვიდა.

უფალმა შეისმინა მისი ლოცვა, უფალმა დაინახა მისი სიმართლე და რაკი თავისუფლების გზა გაუხსნა, თავშესაფარსაც აღმოუჩინდა.

ლოცვა-ღალადისით ფეხს უჩქარებდა, რომ დაღამებამდე მახლო-

ბელ სოფლამდე მიედწია. თუმცა არც იცოდა, ვინ იყო ეს დაბადები-
დანვე საიდუმლოებით მოცული და სხვისათვის სასიხარულოდ მოვ-
ლენილი არსება — ქალი თუ ვაჟი? ქალი ნამდვილად არ ენდომებო-
და და მთრთოლვარე ხელებით შესწნა ჩვილს სახვევი.

თითქოს განძი რამ ეპოვოს — ვაჟი იყო, გაიხარა, ახლადშობილი
უფრო მეტის სასოებით მიიკრა მკერდთან და სადიდებელი საგალო-
ბელით განაგრძო გზა, თან ფიქრობდა: რა მარტივი ყოფილა ეს ბრძენ-
თაგან ამოუცნობი სამყარო და რა შესაბრალისია ადამიანი!

თავი IV

ოთახე მოწყალე

იმ დროს, როდესაც სპარსეთი ანადგურებდა პალესტინას, უტევდა
ბიზანტიას, ეგვიპტე შეუვალი რჩებოდა, ალექსანდრია — შეუხებელი,
თავისი ძლიერი კედლებით. ზღვაზეც თავისუფალი იყო მიმოსვლა,
რადგან სპარსეთს არ ჰყავდა ფლოტი.

იოანესა და ჭაბუკს ამიტომაც აქეთ გადაეწყვიტათ წამოსვლა.

გზად ყველაფერი განსაცვიფრებელი და შთამბეჭდავი იყო.

ეს უნაპირო ზღვაც კი სულ სხვა ელვარებით ღელავდა, ხეობის,
ხეფრენისა თუ მიკერინოსის პირამიდები, ეს ბუმბერაზი ქანდაკება-
ნი — საუკუნეების მდუმარე გუმბანი, ფარაონთა საძვალეებში მითი-
ურ სამოსელში გახვეული, ზღაპრული სამყაროს საოცრებათა მოწ-
მენი „მზის შვილები“, ცივი, იდუმალებით განისვენებდნენ. სფინქსი
თავისი მკაცრი სიდიადით უდაბნოში მარადიულობას ეტოქებოდა.
მათი შემქმნელნი მოქანდაკენი კი იდუმალებით მოცულნი საუკუნე-
თა წყვდიადში გამქრალიყვნენ.

და აი ქალაქი ალექსანდრიაც, რომის შემდეგ რომ პირველ ქალა-
ქად ითვლებოდა ზღვაზე. იგი, ჯერ კიდევ ქრისტეს დაბადებამდე, ალ-
ექსანდრე მაკედონელს დაეარსებინა და როგორც წარმართული განათ-
ლების, ისე ქრისტიანობის მგზნებარე კერას წარმოადგენდა. მისი გა-
რემო კი, მოფენილი უთვალავი განდევილთა სკიტეებით, სამართლია-
ნად იწოდებოდა მიწიერი ვარსკვლავთა სამყაროდ.

ვიდრე ქალაქში შევიდოდნენ, გადაეწყვიტათ მიეღოთ რჩევა-და-
რიგებანი ცნობილ მწირთა თუ ბერძენთაგან.

მოვიდნენ ერთ ლავრაში, სადაც იოანეს ეგულებოდა ეგვიპტელი
ზუცესი, პალადიოსი, განთქმული თავისი სიბრძნით, სწავლულებითა
და ჭეშმარიტი საღმრთოებით.

— წმინდაო, გვითხარ სიტყვა სულის ცხოვრებისათვის, — მიმართა
იოანემ პალადიოსს, როგორც ძველ ნაცნობს, — ჭაბუკს სურს განეშო-
როს ამაქვეყნიურ ამოებათ და გახდეს მონაზონი.

კეთილმოღვაწე პალადოსს სახე გაუბრწყინდა. მათი ხილვით გაიხარა და ჭაბუკს ღიმილით მიმართა:

— კარგი გაგიკეთებია, შვილო, რაკი გსურს დატოვება ამოებათა სულის ხსნისათვის. მაგრამ მეტად ახალგაზრდა ხარ, სიფრთხილე გვმართებს, რამეთუ აღთქმის გატება უფრო დიდი ცოდვავა, ვიდრე ადამიანური ბუნების სისუსტით დაცემა. თქვენ, ალბათ, ილოცეთ, აქ მოსვლამდე, ილოცეთ ჩვენს ლავრაშიც და ყოვლად მოწყალე ღმერთმა დაგაყენოთ ჭეშმარიტ გზაზე.

ასე მოიქცნენ. წავიდნენ მახლობელ ლავრაში.

გზად ჭაბუკმა იოანეს ჰკითხა:

— რატომ მიიჩნევა სულიერ დაცემად ბუნების ძალთათვის დამორჩილება, კაცთა მოდგმა ხომ სხვანაირად ვერ გადარჩება?

— ჭეშმარიტს იტყვი, კაცთა მოდგმა სხვანაირად ვერ გადაჩნება. ცოლ-ქმრობაც ეკლესიით კურთხეულია, ქორწინებასაც თუ სულიერი ამოძრავებს, მარადიულისაკენ მისწრაფებას ხელს არ შეუშლის, მაგრამ ხორციელი სწრაფვა ამორებს ადამიანს მარადიულს და ამდენად დაცემაცაა, ისევე, როგორც სიმდიდრით გატაცება, საკუთარი თავის განდიდება, ამპარტავნობა.

ჭაბუკს აღარაფერი უთქვამს. ილოცეს ლავრში და მობრუნდნენ პალადიოსთან.

მაგრამ პალადიოსმა თავისი სიტყვა მანაც დილისათვის გადადო. დილით ამავე აზრით გამოცხადდნენ პალადიოსთან და მაშინლა მისცა მან კურთხევა მონაზვნობისა.

ჭაბუკმა იმავე დღეს მიიღო მონაზვნობა და იყო ამიერიდან სახელი მისი სოფრონი.

მეორე დილას სოფრონი ჰყვებოდა:

ძილ-ღვიძილში ვიყავი, რომ რომელიდაც გზით მოვიდა ჩემთან მთელი გუნდი ქალწულისა და სიხარულით იტყოდნენ: დაგვირგვინდა სოფრონი, სოფრონი დაგვირგვინდა! და ზეიმობდნენ ამისათვის ჩემს წინაშე.

ეს ზმანება განგების ნებად მიიჩნიეს სამივემ და გაიხარეს.

— შვილო ჩემო, — ამბობდა პალადიოსი, — რათა მუნ საუკუნოდ ვიხარებდეთ, მოსწრაფე ვიქმნეთ ამა სოფლისა მცირედსა ჟამსა სულთა ჩვენთათვის, გავისხენებდეთ მუდამ ვითარ იგვემებოდნენ ქრისტესათვის სატანჯველთა შინა ურჯულთა მიერ და სიხარულით მითმენდნენ წმინდანნი; რომელთამე მათგანთ დაჰლენდნენ, ცეცსლითა დასწავდნენ, ზღვასა დანთქმიდნენ. და უკეთუ ჩვენცა ვიღვანოთ ჟამსა ამას, შევირაცხნეთ სამარადისოთ.

აღფრთოვანებულნი წამოვიდნენ იმ ბრძენის მოსანახულებლად, რომელთანაც სოფრონის განათლება უნდა მიეღო.

სამხრის ჟამი იყო და ბრძენის მსახურებმა მათ უთხრა:

— სძინავს, ცოტა მოითმინეთ, ვიდრე გაიღვიძებსო.

იქ მოცდას არჩიეს მახლობელ სავანეში წასულიყვნენ, სადაც ასევე ცნობილი ბერი ცხოვრობდა.

ბერი იგი ჭილობსა ქსოვდა. ჩამოუსხდნენ, ეგების, საუბარში მისგანაც რაიმე სასარგებლო ვპოვოთო.

ბერი კი სდუმდა და ჭილობის ქსოვას არ სწყევტდა.

მაშინ მორიდებულად განუცხადეს:

— ჩვენ მოვსულვართ, რათა ვისმინოთ შენგან სიტყვა, რომლისაგანაც გვსურს სარგებელი მივიღოთ. სწავლის მოსწრაფენი ვართ და სიტყვაში ვვარჯიშობთ.

ბერმა ქსოვა შეაჩერა, გახედა და მშვიდად უთხრა:

— თქვენ აგებთ თქვენს მონაგებს, რათა ისწავლოთ სიტყვა, ხოლო, მე დავუტევე სოფელი, რათა ვისწავლო დუმილი.

გაკვირდნენ, მაგრამ მაინც მადლიერები დარჩნენ.

წამოვიდნენ იქიდან ალექსანდრიელთა სამრეკლოსთან, და მის ტალანებში შეიცადეს.

ეს ადგილი წმიდა ადგილად იყო მიჩნეული, ქალაქის დაარსებისას ალექსანდრე მაკედონელს აქ გადმოეტანა იერემია წინასწარმეტყველის გვამი და დაეკრძალა. უყვარდათ ალექსანდრიელებს აქ მოსვლა. ეს იყო მკვიდრთა თავშეყრის ადგილი, სადაც ხალხი ამბების გასაგებადაც მოდიოდა.

იოანემ და სოფრონიმ ამჟამად ვერავინ კაცთაგანი ჰპოვეს თვინიერ სამი მობაასე ბრმისა.

მოვიდნენ მათთან ახლოს და შეუმჩნევლად ჩამოუსხდნენ, რომ მათი ბაასი მოესმინათ.

ერთი ბრმა ეკითხებოდა მეორეს:

— გვითხარ შენ, თუ როგორ დაბრმავდიო.

— ოდეს ჭაბუკი მეზღვაური ვიყავ, — ამბობდა მეორე, — ანტიოქიაში წავედი სავაჭროდ და დაბრუნებისას გზაში ძალიან ბევრს ვუცქერდი ზღვას, იმდენად ბევრს, რომ თვალებმა ჩხვლეტა დამიწყეს, შემდეგ ლიბრი გადამიკრა. მკურნალი ვერ ვპოვე და აი ასე დამემართა.

მესამემ თქვა:

— მე მინაზე ვმუშაობდი და ცეცხლის მსურვალეებისგან დავბრმავდიო.

ახლა ორივემ ჰკითხა პირველს:

— შენ როგორღა დაბრმავდიო?

პირველმაც მოჰყვა:

— ნამდვილს მოგახსენებთ. როდესაც ჭაბუკი ვიყავი, არ მიყვარდა შრომა და მომწონდა ხანჯლის ტრიალი, მაგრამ არა მქონდა რა, რომ მეჭამა, მესვა, მენებებოდა, ამან კი ქურდობისაკენ მიიბიძგა. ერთ დღეს დავინახე, მოასვენებდნენ მიცვალებულს, შემოსილს მდიდრულად. ავედევნე. მიცვალებული დამარხეს წმინდა იოანეს ეკლესიის უკან. როდესაც ხალხი დაიშალა, შევედი საფლავში და გავძარცვე მკვდარი. იგი სამოსელი საუცხოო იყო და არ დავუტოვე მას არაფერი, თვინიერ ერთი პერანგისა; როდესაც გამოვდიოდი, არ მომასვენა უკე-

თურობამ ჩემის სულისა და უთხარი ჩემს თავს: აიღე დარჩენილი პერანგიც-მეთქი. დაებრუნდი მე საწყალობელი და, როდესაც შემოვბარცვე უკანასკნელი ტანსაცმელი, ჩემ წინ წამოჯდა მიცვალებული და თვალეში დამთხარა. მაშინ დავტოვე იქვე ყველაფერი უბადრუკმან და მრავალი ჭირით გამოვყვი და საფლავიდან.

— აი, რა იცის სისარბემი — თქვა მეორემ.

— არ არს ქვეყნად ვინმე, ვინც ჩაიდენს ესოდენ დიდ ბოროტებას და შეძლოს მისი დაფარვა, — ამოხვრით თქვა მესამემ.

როდესაც ეს მოისმინეს, იოანემ თვალით ანიშნა სოფრონის და წამოვიდენ.

— ნამდვილად გეტყვი, უფალო იოანე, — ამბობდა სოფრონი, — დღეს აღარ გვინდა ვისიმე ნახვა. საკმარისია ჩვენთვის ის სასარგებლო, რაც მოვისმინეთ

— ამინ, — სთქვა იოანემ.

მაგრამ რა დააპირეს ვასცლოდნენ იქაურობას შეჩერდნენ. დაინახეს ხალხი იყრიდა თავს, ისმოდა ხმამალალი კამათი.

იმ დროს ეგვიპტეში ბრძოლა სევეროსის მწვალებლობასთან დღითიდღე მწვავდებოდა და სარწმუნოების სიწმინდე საჭიროებდა მეტ და მეტ მხარდაჭერას.

იოანემ მათში ნაცნობი დაინახა. ალექსანდრიის პატრიარქის ქორეპისკოპოსი, რომელიც ყველაზე მეტ ალმყოფობას იჩენდა და მგზნებარებით წარმოსთქვამდა:

— იესოს სახელით შეუპოვრად დავკრათ მტერს, რადგან არც ცაზე, არც დედამიწაზე არ არსებობს უფრო მძლავრი იარაღი.

სოფრონი იოანეზე მეტ ინტერესს იჩენდა საზოგადოებრივ ცხოვრების მოვლენებისადმი და მეტის მხურვალეობითაც ერთვოდა კამათში, ამასთან, გამოსთქვამდა სურვილს, კვლავაც შესვედროდა ამ ხალხს.

შეჩვივნენ აქ სიარულს და იოანესაც სოფრონისაგან ედებოდა ეს შინაგანი ჯანყი და ყოველთვის ერთად ესწრებოდნენ ხალხთა თავყრილობებს, სადაც ამხედდნენ მწვალებელურ მიმდინარეობათა მცდელობას იმარჯვებდნენ კიდევ მწვალებლებთან შეტაკებისას, რითაც მართლმადიდებელთ აღაფრთოვანებდნენ.

მათი მოღვაწეობის ამბავი ალექსანდრიის პატრიარქის ყურამდეც მივიდა. მან მოუხმო ბერებს თავისთან, რადგან მისი უპირველესი საზრუნავი სწორედ ამ მწვალებლობის საბოლოო დამარცხება, სამწყსოს ერესისაგან განწმენდა იყო.

იოანე და სოფრონიც, გახარებულნი ამ ყურადღებით, დაუყოვნებლივ ეახლნენ პატრიარქს.

პატრიარქმა პირველი შესვედრისთანავე მათში საიმედო ძალა დაინახა, რამეთუ იგი ადამიანის სახეში ამოიკითხავდა მის ბუნებას, და რასაც ჩვეულებრივი ადამიანები მხოლოდ ხედებოდნენ, იგი თვალნათლივ ხედავდა. პატრიარქის დიდებული სისადავე არ ზღუდავდა მათ, ბევრი რამ საერთოც დაინახეს და სულ მალე გულწრფელი

ურთიერთობა დამყარდა მათ შორის. პატრიარქმა აღარ მოიცილა იოანე და სოფრონი და თავისთან საცხოვრებლად დატოვა.

იოანე მოწყალე — ასე უწოდებდნენ ალექსანდრიის პატრიარქს. კვიპროსის მხედართმთავრის შვილი, ადრე ცოლ-შვილიანი, ცხოვრობდა ქალაქ ამფუნტში. ბედნიერ მამასა და მეუღლეს მძვინვარე სტიქიამ ერთბაშად მოსტაცა ყველანი, მაგრამ ამ უბედურებამ იგი ბერად არ შეაყენა, არც ეკლესიის მსახურად აქცია, ჭეშმარიტებას თავის სულის სიღრმეში ეძიებდა და თავისუფლება აირჩია, თავისუფლება იმდენად სრული, რომ სიმდიდრისაგანაც კი არ უნდა ყოფილიყო დამოკიდებული და მთელი ქონება უპოვართ განუყო. თავისთვის მხოლოდ იმდენი დაეტოვებინა — „მოწყალეს ღმერთი წყალობას არ მოაკლებს“.

იოანე მოწყალე იმდენად იყო განთქმული თავისი სიბრძნითაც, რომ როგორც კი განთავისუფლდა ეგვიპტის საპატრიარქო ტახტი, ხალხის სურვილით და იმპერატორ პელეს ბრძანებით იგი აღზევებულ იქნა. თავად იოანე ამის დიდი წინააღმდეგი იყო, მაგრამ იმპერატორის რწმუნებას, რომ ეს ხალხის კეთილდღეობისათვის იყო აუცილებელი, დათანხმდა.

ჩვეულებრივ, ტახტზე ასვლისას, იმპერატორთან მიდიოდა მოქანდაკე და ეკითხებოდა, რომელი მარმარილოსაგან გაეკეთებინა პატრიარქის საფლავი და იოანემაც უბრძანა მოქანდაკეს:

— საფლავი იქ გამიკეთეთ, სადაც ჩემი წინა პატრიარქები განისვენებენო. სასაფლაო არ დაასრულოთ, ყოველ დღესასწაულზე ჩემთან მოდით და ყველას თანდასწრებით მითხარით: შენი საფლავი არ არის დასრულებული, გვიბრძანე, რომ დავამთავროთ, რადგან არ იცი, რა დღეს, რა საათს გეწევა სიკვდილიო.

ეკონომოსებს კი დაავალა:

— შემოიარეთ მთელი ქალაქი და აღწერეთ ყველა ჩემი ბატონიო. ეკონომოსები გაჰკვირდნენ, ვინ უნდა ყოფილიყვნენ პატრიარქის ბატონები და შეეკითხნენ:

— ვინ არიან თქვენი ბატონები?

— ისინი, — უპასუხებდა პატრიარქი, — რომელთაც თქვენ უწოდებთ მათხოვრებს, რომელთაც შეუძლიათ მომენმარონ მე მივალწიო ხსნას და შემოიყვანონ სასუფეველში.

შემდეგ შეეკითხნენ:

— არიან კარგად შემოსილნი ასულნი, მოწყალეობას კი თხოულობენ, ისინიც მათხოვრებად ჩავთვალოთ?

— თუ თქვენ ქრისტეს მსახურნი ხართ, — უპასუხა პატრიარქმა, ისინიც ჩათვალოთ, — ყველა, განურჩევლად, ვინც თხოულობს მოწყალეობას; ნუ გამოკითხავთ მათ ცხოვრებას, ვისაც უნდა ღვთისაგან მოწყალეობა მოიპოვოს, თავადაც მოწყალე უნდა იყოს.

მონათმფლობელებს კი არიგებდა:

— მონების დანაშაული მაშინ განსაჯეთ, როდესაც რისხვა გადა-

გივლით, თქვენც ხომ არ გინდათ უფალმა მაშინვე დაგსაჯოთ, როგორც კი რამეს დააშავებთ? მონა იმითომ გყავთ, რომ საწყლები არიან. არა არს მონება, არცა აზნაურება, არა არს რჩევა მამაკაცისა, არცა დედაკაცისა, თქვენ ყველა ერთი ხართ, ღმერთი ერთნაირად ჰხედავს მაღალთა და მდაბალთა.

გამოაცხადა: ვინც მრუდე სასწორსა თუ საწყაოს იხმარს, მას მთელი ქონება ჩამოერთმევა და ღარიბებს დაურიგდებაო. მექრთამეებს ჯამაგირები მოუმატა და დაემუქრა — ქრთამის ამღების სახლი ცეცხლში დაიწვებაო. ამის შეპდეგ მექრთამეობა, მართლაც მოისპო.

იოანესა და სოფრონს კი თავისი ცხოვრებიდან უყვებოდა:

— როდესაც შიმშილობა იყო ალექსანდრიაში, ჩემთან მოვიდა ჩემი მონასტრის მსახური კოზმა, რომელსაც ორცოლიანობის გამო აღარ აქონდა უფლება სამღვდელო წოდების მიღებისა და იფიქრა, გაჭირვებაშია პატრიარქი, მოვისყიდო. მითხრა: მაქვს აუარებელი ხორბალი, თქრო, რომელიც შენი ხელით მინდა ქრისტეს მივართვა, მე ვუსაყვედურე სასულიერო წოდების ქრთამით მიღების მცდელობისათვის, რაც იმავე დროს ჩემს შეურაცხყოფასაც ნიშნავდა. ვუთხარი: შენი ძღვენი დიდად დიდია და ფრიად საჭირო ამ დროისათვის, მაგრამ ეს ძღვენი წმინდა არ არის. უნდა იცოდე, რომ უფალი მხოლოდ იმ ძღვენს შეიწირავს, რომელიც წმინდა და კეთილი გულით შეიწირება. ხოლო ჩემს გაჭირვებულ ძმებს ღმერთი მაშინაც ასაზრდოვებდა, როცა არც მე არც შენ დაბადებული არ ვიყავით. საზრდოს ახლაც აღმოუჩენს ღმერთი ღარიბებს. მოინანიე შენი ცოდვა და გეშინოდეს გიეზის სასჯელისა. იქნებ შენ არც იცი გიეზი ვინ არის-მეთქი? ძველი აღთქმით გიეზი ელისეს მსახური იყო. ერთხელ, როდესაც ელისემ განკურნა სირიელი მხედართმთავარი ნეემანი კეთროვანებისაგან, არ აიღო მისგან საფასური. გიეზიმ კი ნეემს გამოსტყუა ბევრი ვერცხლი, ვითომცდა ელისესათვის. როცა ელისემ გაიგო ეს, გიეზის უთხრა: „დეე, ნეემის კეთროვანება შენზედ იყოს და შენს მემკვიდრეობაზე მარადისო“. გამოვიდა გიეზი ელისესაგან კეთროვანებისაგან თოვლივით გათეთრებული. კოზმა ჯერ კიდევ ჩემთან იყო, რომ მომივიდა ცნობა — სიცილიიდან დაბრუნდა ხორბლით დატვირთული ორი დიდი ხომალდი და შევალადე უფალს: გმადლობ, შენ უფალო, რომ ფულზე არ გამაყიდვინე შენი მაღლი და მაჩვენე კიდევ ერთხელ, რომ „რომელნი ეძიებენ უფალსა, არა ნაკლულევან იქმნენ ყოვლისაგან კეთილისა“.

პატრიარქს მუდამ გზაზე ეჭირა თვალი, რომ ყოველი მომჩივანი-სათვის გულის წადილი აღესრულებინა.

— ვისაც უნდოდეს, რომ ღმერთმა მისი გულისწადილი აღასრულოს, მანაც უნდა აღასრულოს კაცთა წადილი გულისა. რომელმანც ქრისტეანის გული გაახაროს, ყოველთა წმიდათა და წამებულთა მადლი მას მოხვდეს. ვისაც რომ თავის ცოდვების შენდობა ეწადოს ღვთისაგან, მანაც უნდა შეუნდოს, — ამბობდა იგი.

ერთხელ, წირვის დროს, შენიშნა მრევლი საუბრობდა, გადიოდნენ და ისევე შემოდდიოდნენ. სახარების კითხვა რომ ჩაამთავრა, თვითონაც გაჰყვა ზარმაც მლოცველებს, კიბესთან ჩამოჯდა და საუბარი გაუბა ყველას, ვინც კი გამოელაპარაკა.

მისი ასეთი საქციელი ყველას გაუკვირდა და რაკი შეკითხვას ვერაინ გაუბედავდა, თვითონ, ყველას გასაგონად წარმოთქვა:

— რატომ გაკვირვებთ ჩემი თქვენთან ერთად ყოფნა? სადაც ცხვარია, მწყემსიც იქ უნდა იყოს. ამ წმიდა ტაძარში თქვენი გულისათვის მოვდივარ, თორემ მე არა მჭირდება აქ მოსვლა, შემძლია ვწიროო.

ერთხელ კი, როდესაც ეკლესიაში მიბრძანდებოდა ღარიბი მოხუცი დედაკაცი შემოხვდა თვალცრემლიანი: სიძე უდიერად მეპყრობაო. პატრიარქი შედგა. იოანემ და სოფრონიმ მოაგონა — წირვის ჟამია და ამ დედაკაცს მერეც სცემო ნუგეშს. მაგრამ მან მიუგო:

— ჩემ ლოცვას შენიშმენ კი უფალი, თუ მე ამ განაწყენებულ დედაკაცს არ მოვეუსმინე? რა ვიცი, იქნებ ხვალამდე არც კი ვიცოცხლო, მაშინ რა პასუხს გავცემ უფალს? ვაი იმას, ვისაც სიკეთე სწაფია და ამბობს მერე ვიქმო!

პატრიარქთან უწყვეტად მოედინებოდა მრავალი ჯურისა და საჭიროების ადამიანი, მაგრამ მსახურნი ყველას შესახებ არ მოახსენებდნენ მიღების დღეებში, ამასთან, ისინი ხშირად თავიანთ უფლებებს ბოროტადაც იყენებდნენ და საკმეს სწორ მსვლელობას არ აძლევდნენ.

იცოდა ეს პატრიარქმა, ებრალვოდა მზით გარუჯულნი თუ ყინვით დამზრალნი ლატაკნი და სნეულნი, ამისთვის ყოველ ოთხშაბათსა და პარასკევს ჩამოჯდებოდა მონასტრის შესასვლელთან იოანესა და სოფრონისთან ერთად; ნებას აძლევდა ყველას მასთან მისულიყო და მიეღო მოწყალება, მსახურთ კი ეტყოდა:

— თუკი უფალთან არასოდეს არ არის დახშული კარი, არასოდეს გვეკრძალება ლოცვაში მასთან საუბარი, რატომ არ უნდა დავუშვათ ჩემთან ჩემი მოყვასი, რათა მან მოხვოს რაც უნდა? თუ გინდათ, რომ ხალხს თქვენ მოგაქცეთ სამართლიანად, თქვენც უნდა სამართლიანები იყოთო.

თუ მოხდებოდა ისე, რომ უამინდობის გამო მასთან არავინ მოვიდოდა, სევდიანად იტყოდა:

— დღეს ვერაფერი ჰპოვა მორჩილმა იოანემ უფალთან მისატანად. სოფრონი და იოანე კი ანუგეშებდნენ:

— ჭეშმარიტად დღეს უნდა გიხაროდენ, რომ თქვენი სამწყსო ცხოვრობს უშფოთველად, როგორც ანგელოზნი, არავის არაფერი უჭირს.

მაგრამ შფოთავდნენ არამც თუ ცალკეული ადამიანები, შფოთავდა მთელი იმპერია, როგორც გარედან მომდგარი მტრის ვერაგობით, ისე შინაგანი განხეთქილებებით. ეს განხეთქილებანი იწვევდნენ ხალხთა შორის შუღლსა და საფრთხეს უქმნიდნენ იმპერიის სახელმწიფოებრივ მთლიანობას. ამიტომაც ალექსანდრიაში შედგა მსოფლიო საეკლესიო

კრება, რომელსაც ესწრებოდა მაქსიმე კონფესორი თავისი მოწაფით ანასტასი აპოკრიარისით.

აქ შეხვდნენ პირველად იოანე და სოფრონი მაქსიმე კონფესორს. მონოთელიტობის საწინააღმდეგოდ მებრძოლ იდეურ მიმართულებას გეზს აძლევდა მაქსიმე კონფესორი. იგი იყო ეპოქის განწყობილებათა ყველაზე უკეთესი გამომხატველი. მემატიაზე მის შესახებ ასე წერს:

„სამოქალაქოთა საქმეთა შინა განშვენებული, ვითარცა ყოვლად სიტყვიერი და ზესთა მკონებელთა პატივთა მიერ შემკული, მას წილად ხვდა დიდი სამეფისკარო თანამდებობა და საერო პატივი, რომლითა შემკული იყო მაქსიმე ჰერაკლე კეისარის დროს. ჰერაკლე აიძულებოდა რა მას პალატასა მისსა ყოფად მისცა მას პატივი სამეფოთა მწიგნობართა მთავრობისა და იყო იგი პატივცემულ ყოველთა მიერ ხელმწიფეთა და მთავართა და ყოვლისავე მხედრობისა ერისა თავთა სპასპეტთა და ყოველთა მიერ საწადელ იყო და საქებელ“.

მაქსიმე ქრისტიანული აღმოსავლეთის უძლიერესი ფილოსოფოსია. კაცი წმინდა და ნიადაგ მოქმედი.

იგი ხატოვნად და გასაგებად წერდა: „ღმერთი არის ის, რაც გამოვლენილია ბუნებაში. ღმერთის არსებობა მის არ არსებობაშია, ...რაც პეტრე იბერის შრომებში ასეთი სირთულითა და სიღრმითაა მოცემული.“

მაქსიმეს წიგნების ხელნაწერები ხელიდან ხელში გადადიოდა და მისი თანამოაზრეების დიდ არმიას ჰქმნიდა, იმდენად დიდს, რომ სახელმწიფოთა მეთაურთ შეაშფოთებდა.

მისი წიგნები ალექსანდრიისათვისაც ხელმისაწვდომი იყო და მათგან წიგნი „სიყვარულისათვის“ იოანე მოსხს მუდამ სასთუმალს ედო „სახარებასა“ და „დავითთან“ ერთად საკითხავად.

რასაც მაქსიმე აკეთებდა ბიზანტიაში, იმასვე ავითარებდნენ ეგვიპტესა და პალესტინაში იოანე მოწყალე, იოანე მოსხი და სოფრონი. ისინი წარმოადგენდნენ იმ სალ კლდეს, რომელზედაც უნდა დამსხვრეულიყო მონოთელიტობა.

ახლა კი გარედან მომდგარი მტერი ყველაფერს ერთნაირად ამსხვრევდა.

ქრისტიანები, რომელნიც პალესტინიდან ეგვიპტეს გამოვლიდნენ, თავს აფარებდნენ იოანე მოწყალეს, სადაც მათ ხვდებოდათ გულუხვი მზრუნველობა, პალესტინაში დარჩენილთ ეგზავნებოდათ ოქროთი და სანოვაგით დატვირთული ქარავნები ტყვეების დასახსნელად.

მაგრამ შაჰრახბაზრმა დაიბყრო რა პელუსია, დელტას გასაღები, ნილოსით სამხრეთ ბაბილონისაკენ დაიძრა და აიღო მემფისი; ნიკიუს ალებამ კი გზა გაუხსნა ალექსანდრიისაკენ.

სპარსელნი მოადგნენ თუ არა ალექსანდრიას, იოანე მოწყალემ, მოსხთან და სოფრონისთან ერთად დატოვა ალექსანდრია, მათ კონსტანტინოპოლს გასწიეს, რათა ეთხოვათ იმპერატორისაგან მხედრობა ქალაქის დასაცავად.

ალექსანდრიიდან მათი წამოსვლისთანავე თავი იჩინა ღალატმა, არავიიდან სასწავლებლად წამოსულმა ერთმა ახალგაზრდამ შაჰრაბაზრს აცნობა, რომ ქალაქის ალება მხოლოდ ზღვიდან შეიძლებაო.

სპარსელები უმალ დაერივნენ მეთევზეთა ნავებს, ვადაიცვეს ბიზანტიელების ტანსაცმელი, ჩასხდნენ ნავებში, მოუსვეს ნიჩბები და უთენია შეერივნენ რა ეგვიპტელ მეთევზეთა ნავებს, შეიჭრნენ დასავლეთის კარიბჭეში. ამოჟლიტეს დაცვა, აცოცდნენ კედლებზე და საქვეყნოდ გამოაცხადეს ხოსროს გამარჯვება.

მტრის გამოჩენამ იმ მხრიდან, საიდანაც არავინ ელოდა, საშინელი დაბნეულობა გამოიწვია, ხალხი გარბოდა, საეკლესიო, სახელმწიფო თუ პირადი სიმდიდრით იტვირთებოდა ნავები, პირქარი კი მთელ ფლოტილიას სპარსელთ უგდებდა ხელში.

სპარსელებმა ქალაქის კარიბჭის გასაღები გაუგზავნეს ხოსროს კტიეფონში, ლაშქრობა კი განაგრძეს ეთიოპიის საზღვრებამდე.

ეგვიპტის დაკარგვა იმპერიისათვის ძლიერი დარტყმა იყო — იმპერია ჰკარგავდა უმთავრეს შემოსავლიან პროვინციას, დედაქალაქი კი — ბელელს.

0130 V

სადა არს პანი იბი ჩეიბი

მამა თეოდორეს გულზე ასუტებული მიჰყავდა ჩვილი. ფიქრებით კი ისე შორს წასულიყო, რომ ჩვილ არსებაში უკვე ჭაბუკს ხედავდა. მის ცხოვრებასაც აზრი ეპოვა, სწამდა, იგი მეორე არსებისათვის იყო საჭირო. უცნობი იყო ასალი გზა, მაგრამ მომხიბლავი. ბუნებით თამამი ამ განწირულებაში არ იბნეოდა და შიშის ნაცევლად შეებას გრძნობდა, სიმართლის ყოველს შემძლეობით სუნთქავდა, ადამიანის ბედში ღვთის განგების უშუალო მონაწილეობას შეუცნობლად განიცდიდა; შეურაცხმყოფ ცეცხლს მთმინების წყალი ეპკურებოდა, ქრებოდა და უფალს სასოებით შეჰღალადებდა: ჰეი, უფალო, ისენ სული ჩემი, ჰეი უფალო, წარგვიმართე ჩვენ!

ჩქარობდა, მაგრამ სოფლამდის მაინც შემოაღამდა.

ხედავს, ცვილის სანთლიანი ფარნით ხელში სოფელს ვილაცა გარს უვლის. მალე უცნობი მოუახლოვდა. ფარანი სახეში შეანათა და ჰკითხნა, საით მიდიხარო, შემდეგ თავშესაფარიც შესთავაზა.

მასპინძელი გაოცებით შესცქეროდა ჩვილს. მაგრამ თეოდორე არაფერს ამბობდა; მხოლოდ საზრდელს ითხოვდა ჩვილისათვის. და უცნობმაც სულ მალე მოჰგვარა მეძუბური ქალი.

ჩვილი ხარბად დაეწაფა საზრდელს და ისევ ღრმა ძილს მიეცა.

— ისე მოეკიდა საწოვარს, ფხიანი იქნება, ღვთის წყალობა ნუ მოაკლოს გამჩენმა, მეც შვება მივიღე. ჩემი ახლადშობილი ვერ ერევა, ერთის მეტს ვერა სცლის და, ვიდრე საჭირო ვიქნები, თავად მოვალ, მადლობელი მე თვით დაგრჩებით, — სთქვა ქალმა, რომელსაც, მართლაც სატიკივარი მოესხნა გახურებული და გამკვრივებული მკერდიდან.

მასპინძელმა სტუმარს ფხები დაბანა, ავახშმა, ნარჩენები ძაღლებს გადაუყარა და მაშინლა მიუჯდა თეოდორეს, რომ გაეგო, ვინ იყო და სადაური.

თეოდორეს არც სურვილი ჰქონდა ახსნა-განმარტებისა და აღარც საუბრის თავი ჰქონდა. ისე დაღლილიყო, ძილის გარდა აღარაფერზე ფიქრობდა, მაგრამ, რაკილა აღარ მოეშვა ცნობისმოყვარე, მოკლედ თქვა:

— ჩვილი უპატრონოდ დაგდებული ვნახე და გადავწყვიტე მისი პატრონობა, — ადამიანი ვისმესთვის საჭირო უნდა იყო.

— მე კი ყველაფერს მხოლოდ იმისათვის ვაკეთებ, რომ ღვთის წინაშე მოვიბოვო დამსახურება, — ზვიადად წარმოსთქვა მასპინძელმა.

— შენ ვილა ხარ, კეთილო კაცო? — უკვე მთქნარებით ეკითხებოდა თეოდორე.

— მე ვარ ქვის მჭრელი, სახელად ევლოგი, — ამბობდა იგი, — ჩემი შრომით საზრდელს ვყიდულობ და უცხო სტუმრებთან ერთად ვვახშმობ, დაინახავს, ალბათ, ღმერთი ჩემს სიკეთეს, — წამოღდა და პირფვარი გადართახნა, თან დასძინა, — ხომ კარგია, რომ შევიფარე? ახლა იფიქრე, რამდენი სიკეთის ვაკეთებას შევძლებდი, ბევრი ფული რომ მქონოდა!

დაძინებისას, როგორც ყველას, ევლოგიმ თეოდორესაც შესთხოვა ელოცა მისთვის, რათა ღმერთს მეტი ფული მიეცა.

ევლოგის თეოდორე მოეწონა თავისი მოკრძალებითა და გამრჯობით და აღარ გაუშვა, საკუჭნაოს გამგებლობაც შესთავაზა, რაკი შეატყო, რომ ყაირათიანიც იყო. ეს დიდი წყალობა იყო მისგან, ყველას არ ანდობდა, რადგან იქ მრავალ საწუკვარს ინახავდა.

მადლიერებით აღსავსე თეოდორე ყოველ ღოვცვაში ღმერთს დაუხინებით შესთხოვდა ევლოგისათვის ბევრი ფული ეწყალობებინა, რათა მას კიდევ უფრო მეტი სიკეთე ეკეთებინა.

ევლოგის სარწმუნოება პირზე ეკერა, თორემ გული ცივი ჰქონდა. მას, უფრო ქვეყნიური ამბები იტაცებდა, განსაკუთრებით კი სამეფოთა საქმეთა ვითარებით ინტერესდებოდა. ისე დაწვრილებით, ისეთი კრძალულებითა და თაყვანისცემით ჰყვებოდა იმპერატორ იუსტინიანესა და დედოფალ თეოდორას ფუფუნებით აღსავსე ცხოვრებაზე, რომ თუ არა საუკუნეების სიშორე, კაცო იფიქრებდა, ევლოგი მათი უშუალო თანამოსაგრე უნდა ყოფილიყო. კონსტანტინოპოლი რომ რომს ედრებოდა, მსოფლიო ქალაქსა ჰგავდა, ესეც მათ დამსახურებად მიაჩნდა. განსაკუთრებით აღიარებდა ხოლმე, რომ იმპერატორიცა და დედოფალიც, ორივენი მდაბიო ხალხისაგან ყოფილან წარმოშობილნი, ის-

ინი ისეთივე ჩვეულებრივი ადამიანები იყვნენ, როგორც თვით ევლოგი. როგორ ეთქვა, თორემ თვითონ მათთან შედარებით უპირატესობაც კი ჰქონდა, ისინი უბრალო ცირკის მსახიობები იყვნენ და ევლოგი კი, თავადაც ხედავდა თეოდორე, ღვთიურ საქმიანობას ეწეოდა. — მაგრამ, — ნაღვლიანად დასძინდა ხოლმე ევლოგი, — ბედიც უნდა გწყალობდეს, თორემ ავრცო ვერაგობითაც კი ავიდა ტახტზეო.

თეოდორეს ყველაფერი არამც თუ ანტიერესებდა, აღონებდა კიდევ, მაგრამ მადლიერების გრძნობა აიძულებდა ღიმილითაც კი მოესმინა. მალ-მალ იშშუშნებოდა, თვალების უფრო ფართოდ გახელას ცდილობდა, რომ უეცრად არ ჩასძინებოდა. გულის სიღრმეში თავის თავსაც საყვედურობდა, რომ არ შეეძლო გაეზიარებინა ევლოგის საქვეყნო საქმეებით ესოდენ დიდი დაინტერესება.

ერთ დღეს, როცა თეოდორე ჩვეულებრივ ევლოგისათვის ევედრებოდა ღმერთს, უცბად შეწუხდა. შუადღე იყო, თითქოს არც ეძინებოდა, მაგრამ მკვდარივით ჩაქობინა. ერთი ლამაზი ბერი დაეზმანა: „რაა შენს თავს თეოდორე?“ — შეეკითხა. „მისმინოს უფალმან და უწყალობოს ევლოგის ბევრი ფული, რათა მან მრავალ ადამიანს არგოს“, — მიუგო თეოდორემ. მაშინ მოხუცმა თქვა: „ევლოგი კარგად არის, დაეხსენ, იყოს როგორცაა“. „არა უფალო, უწყალობეო“, — დაჟინებით იმეორებდა თეოდორე. ბერმა კვლავ თქვა: „მე შენ გეუბნები დაეხსენ, რამეთუ იგი კარგად არის, ხოლო შენ თუ მაინცდამაინც გინდა, რომ ბევრი ფული ეწყალობოს, მაშინ თავდებად დამიდეჟი, რომ იგი გაუფრთხილდება იმ ფულს და მე მივცემ იმას, რასაც ითხოვ“. „ჩემით განიკითხე იგი, უფალო“, — აღტაცებით მიუგო თეოდორემ. „ჭეშმარიტად შენ მოგკითხავ პასუხსო,“ — მიუგო ბერმა და გაუჩინარდა.

თეოდორემ ძლივს წაართვა ძილს თავი. ისე გამოიყურებოდა, თითქოს ვიღაცას ცხადლივ ესაუბრებოდა. დიდხანს იჯდა ასე გაოგნებულად. ევონა, ბედნიერი იყო ამ გამოცხადებით, მაგრამ ზმანებას ისე ჩაიფიქრებინა, სიხარულის ნაცვლად წუხილი დაუფლებოდა — რატომ ითხოვდნენ მისგან თავდებობას? ბევრნაირად ასწონ-ლასწონა, ვერ გარკვეულიყო, რა შეიძლებოდა ისეთი მომხდარიყო, რომ იგი პასუხისმგებელი შექმნილიყო მისთვის, მაგრამ მაინც გადაწყვიტა ევლოგისათვის არ გაემხილა. იქნებ სულაც მისი დაჟინებული ფიქრი იყო ეს და იმის დაჯერებით, რომ იგი ღირსი გახდა ღვთაებრივი ხილვისა, შეიძლება სასაცილოც კი გამხდარიყო.

დრო გაოიოდა, ზმანებით გამოწვეული განცდები უფერულდებოდა, დაბოლოს, სიზმარი სულაც დავიწყებას მიეცა. ჩვილს საზრუნავი ბლომად გაეჩინა, ყრმა დღითიდღე იზრდებოდა, იცვლებოდა, თეოდორე მთელი არსებით დაეპყრო. როცა ყრმამ ბგერების გამოთქმა დაიწყო, მის სიხარულს საზღვარი არ ჰქონდა, მაშინ ქათმების კაკანი, ძროხის ბღავილი, თხის კიკინი, ყველაფერი მუსიკასავით ესმოდა, ჩიჩების სტევენას ხომ როგორც საგალობლებს ისე უსმენდა.

ერთ დღეს ევლოგის კართან აუარება ხალხმა მოიყარა თავი. ისინი ენატოსელი მონაზვნები იყვნენ. მათ წესად ჰქონებოდათ დიდ ხუთშა-

ბათ დღეს იმ მიდამოს ყველა ლატაკისა და ქვრივ-ობოლთათვის წყალობა დაერიგებინათ: სორბალი, პური, ღვინო და თაფლი. ეს ყველაფერი კარგი იყო, მაგრამ ისინი სომ ენატოსელნი იყვნენ, კარგს რას ეტყოდნენ ევლოგის მის შესახებ. იქნებ განგებაც კი არიან მოსულნი, რომ ყრმა მიმტაცონო, ფიქრობდა თეოდორე და შემინებული აცქერდებოდა ყველას, იქნება როგორმე გაეგო მათში რომელი იყო მშობელი ყრმისა? და აი, მოუასლოვდა კიდეც ერთი მათგანი, შორიდანვე რომ რაღაც არაბუნებრივად იღიმებოდა. თეოდორესათვის არც შეუხედავს, ყრმას დააცქერდა, მიეაღერსა კიდეცა. თეოდორეს ტანში ჟრუანტიღმა დაუარა. მისი ნართაული სიტყვებისაგან თეოდორეს გული ისეთნაირად უბგერდა, თითქოს ამოვარდნას ლამობსო. ვეღარ გაუძლო ამ შემადრწუნებელ შიშს, ყრმა უხეშად მოარიდა მონაზონ დედას, უცებ შემოტრიალდა, სენაკში შევიდა და მათ წასვლამდე აღარც გამოსულა.

წავიდნენ ყველანი, ჩამოვარდა სიწყნარე, მაგრამ თეოდორე ვერ დამშვიდდა. ევლოგის კუშტმა სახეზეც შეაცბუნა. აშკარა იყო, ენატოსელმა მონაზვნებმა რაღაც უთხრეს, შეიძლება კიდეც გააფრთხილეს, რომ ამისთანა ადამიანის შეფარება, ღვთის წინაშე ვერაფერი მოსაწონი იქნებაო და ბევრიც აღარ უფიქრია, გადაწყვიტა გასცლოდა იქაურობას.

წასასვლელადაც ისეთი მორიდებით ემზადებოდა, ეგონა, ევლოგის აწყენინებდა, სახეში ვერ უყურებდა, მაგრამ გაცივებული დარჩა იმ ამბით, რომ როდესაც გაუბედავად წარმოსთქვა წასვლის შესახებ, ევლოგი, უბრალოდ ზრდილობისთვისაც კი არ შეეკითხა, ასე უმიზეზოდ, ასე სწრაფად რატომ გადაეწყვიტა წასვლა. პირიქით, თეოდორე ხედავდა, თითქოს იგი ამ დღეს ელოდა კიდეც.

დამშვიდობებისას ევლოგიმ კეთილი მგზავრობა უსურვა თეოდორეს და იმედი გამოთქვა, რომ მის სიკეთეს არ დაივიწყებდა, კვლავაც მისთვის ილოცებდა და ისე სწრაფად მიიხურა კარი, თითქოს გაუნარდა კიდეც თეოდორეს თავიდან მოშორება.

თეოდორე დარწმუნებული იყო, რომ ის უსიამო ქალი ჭეშმარიტად მშობელი უნდა ყოფილიყო ყრმისა. მიუხედავად ამისა, იმ დღეს ქალს ყრმის გატაცების მცდელობაც კი არ ემჩნეოდა, თეოდორე გრძნობდა — მისი სასჯელი სწორედ იმაში იქნებოდა, რომ დედობის დაუძლეველი გრძნობა არ მოასვენებდა.

თეოდორე კი ღმერთს გულმხურვალედ ჰმადლობდა იმ სასჯელისათვის, რომელიც მისთვის ჯილდოდ ქვეუღიყო და ევადრებოდა უფალს შეენდო იმ ბედშავი ქალისათვის ცილისწამების ცოდვა, რამეთუ ეს ცილისწამება თეოდორესათვის მადლს მოასწავებდა.

თეოდორეს ყრმა გულზე აეხუტებინა და თავისუფლების შეგრძნებით იმედიანად გასცქეროდა ცას.

გზა უდაბნოდ გაწოლილიყო, რომელსაც ეწოდებოდა ვადი ჰაბიბ.

სოფელს მიადგნენ და სოფლის განაპირას მითოვებულ ფარდულს შეაფარეს თავი.

— სად არის ვანი იგი ჩემი? — ფიქრობდა თეოდორე და თითქოს ეპოვოს, წუხილს არ გრძნობდა.

უკვე ბინდი ეშვებოდა, დედამიწას ღამის ცაც გადაეფარა და მთვარის მიმჭრალ შუქზე გზა გაუღწეველი ჩანდა. აჩვილებულ გრძნობათა ნიავს ნაბი მოჰქონდა და თვალები ცრემლებით ებინდებოდა. გათენებამდე იქ უნდა დარჩენილიყო, მაგრამ ჩათვლემდა თუ არა, რაღაც საშინელებანი ეზმანებოდა: თითქოს მხეცთა სიმრავლე მოდიოდა მასზე, თითქოს ზღვა უეცრად შთანთქავდა, „ღირს არს შეჭმად მხეცთა, უღმრთო ესე“, ესმოდა და რა გაახელდა თვალს, დახედავდა მშვიდად ჩაძინებულ ყრმას, მადლობდა ღმერთს, რამეთუ ყოველივე ეს ზმანება იყო.

ამ განცდებში იყო, რაღაც მოციმციმე რომ შენიშნა. ადამიანი უახლოვდებოდა სანათურით, ხახეში უნათებდა სარტყელზე თოფრაკამობმზულ ბერი:

— საით გაგიწევიაო? — შეეკითხა. — საითაც განგება გზას მიჩვევნებსო, — მიუგო თეოდორემ.

მაშინ ბერმა შესთავაზა მის ჭერქვეშ შეეფარებინა თავი.

თეოდორე ფიქრობდა ღამეს გავათევ და უთენია, ისევ გზას გავუღებო.

— ღმერთი გადაგინდის ამ დიდ სიკეთეს და მე კი რა მოგაგო? — თქვა თეოდორემ.

— შენ უფრო დიდ სიკეთეს აკეთებ ჩემთვის, ვიდრე მე შენთვის, — უპასუხა ბერმა.

და ეს მართალიც იყო. რადგან მას სწამდა, რომ სამარადისოსათვის მხოლოდ სიკეთე იუნჯებოდა, რაც ამქვეყნად გადაუსდელი დარჩებოდა. ბერს ჩვევად ჰქონდა ყველაფერზე ხალხური სიბრძნის დამოწმება და ახლაც დასძინა:

— წისქვილის ქვები ერთმანეთს რომ არ ესმარებოდნენ, ცალმა რამდენიც უნდა იტრიალოს, ვერას დაფქვავსო.

წყალობაუხვი კაცი იყო ბერი იოაკიმი. იგი მუდამ გამოდიოდა სოლმე იერუსალიმის გზაზე, რომელიც იორღანედან მოემართებოდა. თოფრაკი რაიმე ხემსს იქონიებდა. თან სადგისსა და ღვედსაც წამოიღებდა. თუ შეხვდებოდა კაცს, რომელსაც ფენსაცმელი გასწყვეტოდა, დაუჯდებოდა და დაუკერებდა; თუ ტვირთის ზიდვით დამაშვრალს ნახავდა — ტვირთს ჩამოართმევდა და წაუღებდა, ვიდრე არ მიიღწევდა ზეთის ხილის მთას. იქიდან გამობრუნებულს თუ სხვა მომავალ კაცს შეხვდებოდა, ახლა იმას ამოუდგებოდა მხარში, თუ ამ კაცს ბავშვი ჰყავდა, მხარზე შეისვამდა და წაიყვანდა, ვიდრე იერიქოს არ მოვიდოდა. მიცვალებულს ნახავდა გზაში — დამარხავდა. ასეთი ბუნება ჰქონდა, ასეთი იყო მისი ცხოვრების წესი. თავის სამყოფელში კი იშვიათად თუ ვისმე მოიყვანდა, ადვილად ვერავის ენდობოდა, თეოდორე კი თავიდანვე სანდომიანად ეჩვენა, მიუხვდა როგორღაც, მსხვერპლი უნდა ყოფილიყო სხვისი ცოდვისა. თუნდაც მისი საკუთარი ცოდვის ნაყოფი ყოფილიყო ეს ჩვილი, მაინც კეთილშობილება მეტყველებდა მისი არ-

სებიდან და აღარ გაუშვა, თავისთან დატოვა. სულ მალე კი ისე შეეწყვნენ ერთმანეთს, სამარადისო მეგობრობის ალექსანდრე და დევიდ.

მამა იოაკიმე ყრმის ბაბუბობასაც ჩემულობდა. თეოდორესაც ახლა მხოლოდ მოხუცებულები და ყრმანი თუ შეუყვარდებოდა, თორემ თავისი ტოლი მამაკაცისათვის გული სამუდამოდ გამოკეტილი ჰქონდა.

ორთავეს ერთნაირად აფიქრებდა და ამოქმედებდა ჩვილის საზრუნავი. ერთნაირად აღაფრთოვანებდა ყრმის სიცილი თუ ტირილი, მასზე უკეთესი არსება არ ეგულებოდათ, იგი იყო მათთვის ქურციკი სიყვარულისა.

უმეტეს ხილითა და მცენარეულობით, თხის აუღუღარი რძით იკვებებოდნენ.

ბრძენი იყო მამა იოაკიმე, თეოდორეს პირველსავე დღეს უთხრა: — თუ ადამიანს შვილისათვის ბოროტი არ უნდა, იგი მას ყველა სურვილს არ შეუსრულებს. შემოქმედიც თავის შექმნილს მხოლოდ მას უსრულებს, რაც მისთვის სასიკეთოა. სწორად ადამიანს ჰგონია, ღმერთი არ უსმენს და მისი საწაადელის შესრულების მაგიერ სასჯელსაც უვლენს, მაგრამ სწორედ ამ სასჯელმა უნდა დააფიქროს ადამიანი და მასში სიკეთე ამოიცნოს. ვინ იცის, შეიძლება დღევანდელი სასჯელი მომავალი სიკეთის სამზადისია. როგორც შვილი მშობლის ნაწილია და მონაწილეა მისი ცხოვრებისა, ისე შექმნილი მონაწილეა შექმნელის შემოქმედებისა და არავინ იცის, ღმერთს უფრო სჭირდება ადამიანი, თუ ადამიანს ღმერთი. ღმერთი თავის შესახებ იმდენად აცნობიერებს ადამიანს, რამდენადაც ადამიანი ეძებს მას. ერთი უტყუარია — ადამიანი ადამიანისათვის უფრო მეტი სარგებლობის მომტანია, ვიდრე თავის თავისათვის, სხვისთვის ბოროტებით კი თავის თავს მეტად ვნებს, ამიტომ, ჩვენ ერთმანეთის სიკეთისათვის უფრო უნდა ვიზრუნოთ, ვიდრე საკუთარი თავისათვის.

მან ისიც კარგად იცოდა, რომ, თუ მშობელს შვილი განუსჯელად უყვარს, შვილი მშობელს განუსჯის, ბავშვი ეკითხება მშობელს „გიყვარვარ მე შენ?“ და არა მშობელი შვილს. დაკვირვებული იყო იოაკიმე და მას შეუმჩნეველი არა რჩებოდა, როდესაც ყრმა დიდხანს იდგა ხოლმე განმარტობით სარკმელთან, და რაღაცას გაჰყურებდა. ეტყობოდა ნაღვლობდა რაღაცას მაშინ ბავშვი და უმალ რითიმე დაასაქმებდა, ან მოჰკიდებდა ხელს და თავის ლამაზად მოვლილ ბლანარში გაასაიერებდა. ხედავდა იგი, ბავშვის სახიდან ღრუბელი როგორ გადაიყრებოდა და მის თვალებში მზის სხივი აბრწყინდებოდა. კიდევ სხვადასხვა ნივთების გაკეთებას ასწავლიდა პალმის ფოთლების ქერქისაგან, გრძელი წიწვებისაგან პატარა კალათებს აქსოვინებდა. ხილს, ყვავილებს დააკრეფინებდა, იმ კალათებში ჩააწყობინებდა და ურჩევდა, რომელიმე მგზავრისთვის შეეთავაზებინა. ეს ბავშვს ძალიან ახალისებდა და უკვე დამოუკიდებლად ცდილობდა ყოველივე ამის გაკეთებას. ყრმას განსაკუთრებით, მგზავრებთან გამოსაუბრება, მათგან შექება სიამოვნებდა.

დანაშაულზე პატარას სასჯელად წკებლები არ ელოდა, მაგრამ იოაკიმეს საყვედური მაინც მტკივნეული იყო. თეოდორე ბავშვს ჯიუტობისთვისაც რომ არა სტუქსავდა, მამა იოაკიმეს არ მოსწონდა და ეტყოდა:

—პატარა ღრუბელს ხშირად დიდი წვიმა მოჰყავსო.

ბავშვი ყვავილებზე უფრო ფოთლებს ეფერებოდა, რადგან იოაკიმესაგან გავონილი ჰქონდა — ფოთოლი მცენარისათვის კუჭია, სამზარეულო, უფოთლოდ მცენარე ვერ გაიზრდებაო, ცხოველებს კი ისე ექცეოდა, როგორც დიდები ექცევიან ბავშვებს.

ერთ დღეს მამა იოაკიმეს შეეკითხა:

— ჩვენც ხომ ისეთივე არსებანი ვართ, როგორც ცხოველები, ფრინველები, თუნდაც მცენარეები, ჩვენც მათსავით ერთ დღეს მოვკვდებით, გავქრებით აზრდილებივით ისე, როგორც ღრუბელი გადაუვლის ცას უკვალოდ. მიწად ვიქცევით. რა საშინელი იქნება მიწის ქვეშ ყოფნა! და კიდევ უფრო საშინელია ფიქრი იმაზე, რომ ამქვეყნად ველარასოდეს მოხვალ, ველარასოდეს იხილავ შენს საყვარელ ადამიანებს!

მამა იოაკიმესათვის მოულოდნელი არ ყოფილა ეს უზარმაზარი და თავის დროზე საშინელებით განცდილი კითხვა, რადგან ყრმის ეს იჭკვები გამოწვეული იყო ჭეშმარიტების მიგნების სურვილით და ყველაფერზე თავს უქნევდა ყრმას, ღიმილითაც კი განუმარტავდა:

— თუკი ადამიანი თავის თავს ცხოველებისა და მცენარეებისაგან ვერ გამოარჩევს, მართლაც ასე უნდა იყოს.

— მაშ, მე ადამიანი არა ვარ? — წყრომით შეეკითხა ყრმა.

— ჰო, შენ ჯერ ცხოველის მდგომარეობაში ხარ, მაგრამ რაკი ბუნებამ ადამიანად გაგაჩინა, გაიგებ კიდევ, რომ ადამიანი არ კვდება, რომ უკვდავება ისეთივე ბუნებრივია, როგორც ზამთრის მერე გაზაფხული.

ბავშვი მხიარულდებოდა და ფიქრს თავს ანებებდა.

ერთხელ თეოდორეს, როცა ყრმა და იოაკიმე საუბრობდნენ, ჩაეძინა, უცებ გველნაკბენივით წამოვარდა დაფეთებული, თითქოს ევლოგი ეძახდა, ისე ცხადად გაეგონა მისი სასოწარკვეთილი ხმა.

— ნამდვილად რაღაც გასაჭირი მისდგომია ევლოგის, — უთხრა იოაკიმეს და ბევრიც აღარ უფიქრია, გადაწყვიტა მასთან წასვლა.

ყრმამაც მოიწადინა თან გაჰყოლოდა.

გაუდგნენ გზას.

დიდი გზა განვლეს და შეისვენეს. არავის მიუქცევია მათთვის ყურადღება. მაგრამ აი, გამოიარა მონაზონმა ქალმა, რომელიც თითქოს მოსდევდა კიდევ მათ, ქალმა ხელით ანიშნა ყრმას, მასთან მისულიყო, ყრმამაც ხალისიანად მიიბრინა. მონაზონი მიეაღერსა და სათუთ ხელზე ლამაზად ნაქარგი, გროშებით სავსე პატარა ქისა ჩამოჰკიდა, პირჯვარი გადასახა და ისე სწრაფად წავიდა, თეოდორემ ვერც კი დაინახა მისი სახე.

ყრმამ ქისა რომ გახსნა და შიგ გროშები ნახა, იწყინა:

— რატომ მომცა იმ ქალმა გროშები? ჩვენ სომ მათხოვრები არა ვართ! მოდი, დავეწვევი და დავუბრუნებ. ქისა კი ძალიან ლამაზია და დავიტოვებ.

თეოდორემ ყრმას ხელი ჩაავლო, არ გაუშვა, რაღაც აზრმა გაუელვა. ამ დროს იჭექა კიდეც, ახლოს მესი დაეცა. თეოდორემ ბავშვს არაფერი აგრძნობინა და ჩვეულებრივი სიმშვიდით უთხრა:

— მართალია ჩვენ არ ვვიჭირს, მაგრამ შესაძლოა მას უჭირს, და ჩვენთვის მოწყალების გაღებით სიკეთეს იქმს. შენც ამ გროშებით ვისმე დაასაჩუქრებ და გაახარებ, ქისას კი შენთვის დაიტოვებ, რომ იმ ქალის სიკეთე დაგახსომდეს.

ყრმას მოეწონა ნათქვამი და სულ იმაზე ფიქრობდა, თუ ვის გაახარებდა ამ გროშებით, ქისას კი სულ ათვალეიერებდა, ისე ლამაზად იყო ამოქარგული მძივებივით.

თეოდორე ხელს აღარ უშვებდა ბავშვს და აფრთხილებდა კიდეც, რომ თუ კიდეც ვინმე დაუძახებდა, მარტო არავისთან მისულებო; აშინებდა, ეუბნებოდა, რომ ქვეყანა სავესა ბოროტი ადამიანებითო.

ამ განცდებსა და ბაასში მოადგნენ ევლოგის სოფელს. ევლოგის სახლს გამოკეტილი დახვდათ.

— სად არის ის ქრისტეს მოყვარული კაცი, აქ რომ ცხოვრობდა? — შეეფოთებით იკითხა თეოდორემ.

— ვინ არის შენი ქრისტეს მოყვარე, ევლოგი? მიუგო მოხუცმა.

— ჰო, ევლოგი, ქვის მტენი, — გაუხარდა თეოდორეს..

— ჰოდა, როდესაც ღმერთმა იხილა მშვენიერება მისი მოღვაწეებისა, წყალობა მოიღო მასზე, მისცა ბევრი ფული და გახდა იგი პატრიკოსი კონსტანტინოპოლისა, — თქვა მოხუცმა ნიშნის მოგებით.

თეოდორეს თავზარი დაეცა და უმაღ პირი კონსტანტინოპოლისაკენ იბრუნა.

ყრმას გაუხარდა, რომ ამ ზღაპრულ ქალაქს ნახავდა და გზაზე თეოდორეს შეკითხვებით დაფიქრების საშუალებას არ აძლევდა.

თეოდორეს მთელი არსება შეძრულიყო და რას პასუხობდა და რას არა აღარ გაეგებოდა.

მოვიდნენ კონსტანტინოპოლსაც, კითხვა-კითხვით მიადგნენ ევლოგის ხვიარა ვარდებით შემოვლებულ სრა-სასახლესაც.

ჩამოსხდნენ მის სადარბაზოსთან და დაელოდნენ.

და აი, იხილეს კიდეც მრავალრიცხოვან მსლებლებითურთ გარშემორტყმული დიდ პატივსა და ღირსებაში, თვითკამყოფილი სახით მომავალი ევლოგი.

თეოდორე თვალებს არ უჯერებდა, გაოგნებული შესცქეროდა ფარშევანგით ვაფხორილ, გაბღენძილ, სულ სხვა ადამიანს, სად გამქრალიყო ის ღვთისმოსავი, გაჭირვებულთა მწყალობელი კაცი? მის მდიდრულად მოოჭვილ მოსასხამში მხოლოდ შინაგანი სილატაკე

გამოსჭვიოდა, მის გამოხედვაში — უგუნურება, მაგრამ თეოდორემ მაინც გულის სიღრმიდან ამოხეთქილი ხმით შესძახა:

— შემიწყალე, უფალო ჩემო!

ევლოგიმ მხოლოდ ქედმაღლურ-შემწყალებლური ღიმილით ერთი კი შეხედა და მსახურთ ანიშნა მხოლოდ: თუ რამ მოწყალებას ითხოვდნენ მისგან, მიეცათ.

თეოდორე კი მის მოწყალებას არ უყურებდა და გაიძახოდა:

— სიტყვა მაქვს შენთან, სიტყვა, უფალო ჩემო!

მაშინ მისმა მცველებმა უხეშად წაავლეს ხელი და მოაცილეს გზიდან.

გონებააბნეული თეოდორე ღამის გასათევად უცხოთათვის განსასვენებელ სახლში მივიდა.

ყრმას ებრალებოდა თეოდორე, უნდოდა გარკვეულიყო, რა ხდებოდა, რისთვის ეძალებოდა ასე ამ ვიღაც ევლოგის, ამ ურჩხულივით შემზარავ ადამიანს, მაგრამ ვერავითარ პასუხს ვერ ღებულობდა.

მოსასვენებელ სახლში გულმონწყალე მასპინძელი დახვდათ. მასპინძელმა ყრმა თავის ბავშვებს გააცნო და ვიდრე თეოდორე თავის საქმეს მოაგვარებდა, მათთან ამყოფა.

ბავშვებს ისე მოეწონათ ერთმანეთი, ყრმამ იფიქრა, ამათზე უკეთეს ვის დაეასაჩუქრებო და რაც კი იყო ქისაში, მათ სათამაშო მაგიდაზე გადმოუყარა, ქისა კი ვერ გაიმეტა და თავისთვის შეინახა. ეს გროშები ყოველგვარ მოსალოდნელ ჯილდოს აღემატებოდა და მასპინძელმაც უფრო მეტი პატივი და ყურადღება მიაუო.

ბავშვები თითქმის თანატოლები იყვნენ და უმაღლ დამეგობრდნენ. ყრმისთვის ეს პირველი იმსხვედრა იყო თანატოლებთან და უზომოდ გაიხარა, მასში ასაღმა გრძობებმა გაიღვიძეს. უკვირდა ამდენ ხანს როგორ გაეძლო მათ გარეშე და სთხოვდა მათ, ეპატიჟებოდა, მისი სამყოფელიც მოენახულებინათ, სადაც ბევრ საინტერესოსაც ნახავდნენ.

თეოდორე კი მეორე დღეს უარეს განსაცდელში ჩავარდა. ახლა უკვე გზად გადაეღობა ევლოგის, უკეთ დავენახვებით.

— თეოდორე ვარ, თქვენო მოწყალეებავ, თეოდორე, თქვენგან დავალებული, არასა გთხოვ, სიტყვა მაქვს შენთან, მომიხმინე, — შესძახა სასოწარკვეთილმა.

მაგრამ ამაოდ. ევლოგის უფრო მაღლა აეწია თავი და მცველებს ანიშნებდა, ჩამომაცალეთო. მცველებიც მივარდნენ და კეთროვანივით მოაშორეს იმ არემარეს.

თეოდორე მაინც არ ეპუებოდა და ყოველდღე უსაფრდებოდა, იქნებ რა გუნებაზე შევხვდე და მომხედოსო, ათასნაირ ხერხს ჰლონობდა, ათასნაირ შეურაცხყობას ითმენდა და ვიდრე მცველებისაგან წკეპლებიც არ იგემა, არ მოეშვა. მაშინ კი წავიდა მონასტერში და ღვთისმშობლის ხატს შეჰლაღადა:

„უფალო, განმათავისუფლე ევლოგის თავდებობისაგან, თუ არა,

მაშინ მე მივატოვებ მონაზვნობას და ერისკაცობას დავუბრუნდებოი“.

ერთხელაც ამ ვოდებაში რომ იყო, ხატთან ჩაეძინა. ხედავს უამრავ ხალხს და ესმის: „დედოფალი მოდის!“ შემინებულმა შორიდანვე შესტირა მას: „შემიწყალე, შემიწყალე, დედოფალო!“ „რა გინდა?“ ჰკითხა დედოფალმა. მე ვარ ევლოგის, პატრიკიოსთა უფროსის თავდები და გვედრები, გამათავისუფლო მისი თავდებობისაგან, — სულ-მოუთქმელად რებსძასა თეოდორემ, მაგრამ დედოფალმა მშვიდად მიუგო: „მე ვერ შეგიწყალებ და შენ როგორც გინდა ისე მოექეცი შენს თავდებობასო“.

გამოღვიძებულმა თეოდორემ თავს შემოიკრა:

— ვაი, მე ცოდვილს, როგორ დავლუპე თავი

სხვა გზა არ იყო, ისევ რამენაირად ევლოგისათვის უნდა გაეგებინებინა, რომ არა მარტო თავად არის ცოდვაში, არამედ თეოდორეც ცოდვაშია ჩაარდნილი და სანამ დროა, სანამ გვაცლის ღმერთი, გონს მოეგოსო.

ამჯერად, უკვე ყრმაც თან წაიყვანა, მარტო მას მივუშვებ, იქნებ მას მაინც შეხედოს მოწყალე თვალითო და ყრმაც დაარიგა, რა უნდა ეთქვა ევლოგისათვის.

რარიც მოწადინებული იყო ყრმა, რა გულფიცხლად ემზადებოდა ევლოგისთან შესახვედრად, თეოდორეს თხოვნის შესასრულებლად, მაგრამ მეკარემ შორიდანვე იცნო ღობეს ამოფარებული თეოდორე, მათრახი შეატრიალა ჰაერში და გააკონა, რომ უკეთესს ვერას მიაღწევდნენ, თუ ნებით გზიდან არ ჩამოსცილდებოდნენ. თეოდორე ადგილიდან არ იძვროდა, ყმაწვილი ლამის ფეხებში უვარდებოდა უკვე მომავალ ევლოგის, რომ უცერად თავბრუ დაესხა და უგონოდ გზის მეორე ნაპირას აღმოჩნდა.

თეოდორე ხედავდა, რაც ელოდა ყრმას, მაგრამ ყველაფერზე თავლებს ხუჭავდა, ოღონდ ევლოგი წამიერად შეეჩერებინა და ორი სიტყვა ეთქვა, მაგრამ ევლოგიმ მცველებს ყრმა გზიდან გადაავდებინა. უკიდურესობამდე გამწარებულმა თეოდორემ თავის თავს უთხრა: „უდანოსაკენ გაუყევი, საცოდავო. ღმერთს თუ სურს ევლოგის გადარჩენა — გადარჩენს და მე კი რაც თავდებობისათვის სასჯელია, მაინც არ ამცდებაო“.

ხელი ჩაჰკიდა თავზარდაცემულ ყმაწვილს, ცდილობდა, ენუგეშებინა, მაგრამ ყრმა თავად ამხნევებდა, და აფიცებდა, რომ ამიერიდან მის სახელს არასოდეს აღარ ახსენებდა. უნდოდა რამენაირად გაეცი-ნებინა და წარმოიდგენდა, თუ როგორ მოუყვებოდა ყველაფერს.

უკვე ზღვის ნაპირთან მოსულიყვნენ. გემზე თეოდორე ისეთ შვებასა გრძნობდა, თითქოს ჯოჯოხეთიდან დააღწია თავიო. ყრმას კი გული სწყყდებოდა, რომ მეგობრებს ვერ დაემშვიდობა.

იმ ღამეს, გემზე, თეოდორემ კვლავ ნახა სიზმარი: იგი დაეჭირათ, ხელები უკან გაეკრათ, თავქვე ჩამოეკიდათ, საწამებლებით აწამებდნენ და თან შეაგონებდნენ: „თავს ნუ იღებ ისეთ რამეს, რაც არ ძალ-

გის და უფალსაც ნუ ეურჩები“. „აღარ ვიქმ, უფალო, ცუდი ვკმენ, მომიტყევე“ — ძლივს გამოსთქვამდა თეოდორე. დაბოლოს, როგორც იქნა, გაათავისუფლეს, პირობით, რომ მეტს აღარ იკისრებდა თავდებობას.

რომ გაიღვიძა, გაიხარა და უკვე დაშვიდებული იყო, როცა მოვიდნენ სკიტეში.

— კაცი კაცითა ხარობს, ხე — ფოთლითა, — ამბობდა გახარებული იოაკიმე, და არ აცლიდნენ ერთმანეთს სვევნა-ამბორს.

ყრმა არ აცლიდა თეოდორეს რამის თქმას, თავად ჰყვებოდა ყველაფერს, განსაკუთრებით თავის თავგადასავალს, როგორ სდრუხეს და გადაადგეს გზიდან. თეოდორეს ახლა მხოლოდ ელიმებოდა და დაღლილი, თითო-ოროლა სიტყვას თუ ჩაურთავდა. ყრმა იმდენად აღვზნებული იყო, რომ არც უკითხავს იოაკიმესათვის, როგორ იყო მათ არ ყოფნაში.

შეუწყვეტელი ლაპარაკით მიჰყვებ-მოჰყვებოდა იოაკიმეს ყრმა საუჭუნაოში, ახლა უკვე თავის ახალ მეგობრებს აცნობდა, კონსტანტინოპოლის შესანიშნაობებს აღუწერდა.

მოილხინეს საგანგებოდ შენახული ღვინოებით და მხოლოდ მაშინ თქვა თავისი სიტყვა იოაკიმემ:

— თავდებობა იგივე ფიცით შებრკოლებაა, არ იცის ადამიანმა რისი შესრულება შეუძლია და რისი არა, მით უფრო არ იცი, სხვა რისი მომქმედია.

ყრმას კი საგანგებოდ უთხრა:

— აქლემი უფრო ადვილად გავა ნემსის ყუნწში, ვიდრე მდიდარი შევა სამოთხეში, — და ბავშვის გაცხებული სახე რომ დაინახა, დასძინა, — „ნემსის ყუნწში“, განა მართლა საკერავი ნემსის ყუნწია, „ნემსის ყუნწი“ იერუსალიმის გალავნის ერთ-ერთ კარიბჭეს ჰქვია, რომელიც ყველაზე დაბალია და აქლემს მისი გავლა მხოლოდ წაწოლით შეუძლია, რაც იმას გულისხმობს, რომ მდიდარს სამოთხეში შესასვლელად გასაჭირი არ ასცდება.

ღრო გადიოდა, მაგრამ თეოდორეს ევლოგის ბედი მაინც აფიქრებდა. ერთხელაც ევლოგის ძველ საცხოვრებელ ადგილზე გავლისას, შემოალამდა, ჩამოჯდა იმ ქვაზე, სადაც ევლოგის პირველად შეხვდა, სევდიანად მოაჯლო თვალი იქაურობას და უცებ მისკენ მომავალი ანთებულფანრიანი კაცი შენიშნა. სულ მალე კი მის წინაშე წარმოსდგა წელში მოხრილი, გაცვეთილ მოკლე ჯუბიანი ხნიერი კაცი. ჩახედა სახეში და იცნო ევლოგი.

როდესაც პირველმა განცვიფრებამ გაიარა, ევლოგიმ შესთავაზა, სახლში წავიდეთო. თეოდორემ არც კი დაამთავრებინა სიტყვა, უარით გააქნა თავი.

ევლოგიმაც აღარაფერი სთქვა. გამოხუნებული, ჩამქრალი თვალებით სადღაც შორს იყურებოდა და მთვლემარესავით იჯდა.

ისევ თეოდორემ დაარღვია სინუმე და ევლოგიც გამოფხიზლდასაკით.

— როგორ ხარ დღეს? — შეეკითხა თეოდორე.

— ილოცე ჩემთვის, მამაო, რამეთუ ერთი ღატაკი კაცი ვარ, არაფერი გამაჩნია.

— მე ვიცი შენი ყველაფერი და ნეტავ რაც გქონდა, ისიც არა გქონებოდა, — მოუჭრა თეოდორემ.

ევლოგი აიპურწა, აიბუზა, არ იცოდა, რა ექნა, გაქცეულიყო, თუ მუსლებში ჩავარდნოდა.

— საიდან იცი? — წაილულულა ცხვირში ქსუტუნით.

თეოდორემ ყველაფერი გაასხენა.

ევლოგი ხმას ვერ იღებდა. ისევ თეოდორემ ჰკითხა:

— მიინც, როგორ გახდი პატრიკოსი?

ევლოგიმ მოიწმინდა ღვარადწამოსული ჭირის ოფლი და მოგუდული ხმით დაიწყო:

— ერთ დღეს კლდეს მეორე მხრიდან მივადექი ქვების სატეხად და როდესაც დავარტყი, ვიგრძენი, კლდეს ღრმული ჰქონდა. დავარტყი კიდევ, კიდევ და აი, თქროთი სავსე ჭვებთან აღმოვჩნდი. შევცბი და განვცვიფრდი, — ლაპარაკისას ევლოგის თვალები დაეყვლიპა, მეორე მოჭუტა, სანე დაებრიცა, მეჩხერი კბილები გამოუჩნდა და შემზარავი გახდა.

თეოდორეს გულმა ბაგაბუგი ასტეხა.

— ...ვიფიქრე: ამოდენა ფული სახლში წამეღო — წამართმევდნენ. შემეშინდა და გადავწყვიტე, წავსულიყავი სხვა ქალაქში, სადაც არ მიცნობდნენ. დავიქირავე სახედრები, ვითომ ქვებს ვეზიდებოდი და შუალამეს ეს ფული გემზე მოვათავსე. მივეცურე ბერძენთა მიწაზე, კონსტანტინოპოლს. მეორე დღიდანვე დავიწყო მოქროთამევა იმათი, ვინც კეისარს იყვნენ შეფარებულნი. კეისარსაც საჩუქრებს ვუგზავნიდი, ვიდრე არ გავხდი მეც სასახლის ერთ-ერთი დიდებული. როცა კეისარი წავიდა საომრად, მისმა მოადგილემა, პატრიარქმა სერგიმ, ბევრი დიდებული ამხილა დანაშაულში და მათთან, ჩემი მფარველიც. მეც ბრალი დამედო და იყო განაჩენი ყველას საპყრობილეში გამომწყვდევისა. მე მოვანერხე შუალამეს გამოქცევა და აქ თავის შეფარება, ჩემი ქონება კი მთლიანად იქ დარჩა, — ატირდა ევლოგი. — ჩავიცი ჩემი ძველი ტანისამოსი და ისევ ქვის ტეხას მივყევი. როდესაც სოფელმა ჩემი დაბრუნების ამბავი გაიგო, მითხრეს: გავიგეთ, კონსტანტინოპოლის პატრიკოსი გამხდარხარ და აქ რალაზე იწუხებ თავსაო, მე ვუთხარი: ის სხვა ევლოგია-მეთქი, მე მოლოდ იერუსალიმში წავედი წმიდა ადგილების მოსალოცავად და ღვთის მადლით ისევ დავბრუნდი-მეთქი. დაიჯერეს. მე კი ახლა მხოლოდ მოგონებებით ვცხოვრობ, ვიხსენებ კეისრის ნუგბარ-ნუგბარ კერძებს, დიდებულთ კრებულს, იმ სიუხვეს, იმ პატივს, — აქ ძლივს გადაყლაპა ნერწყვი, — ვარწმუნებ ჩემს თავს, უნდა დავეხსნა ამ ფიქრებს-მეთქი, მაგრამ ვერ ვახერხებ...

— შენ კი გამოქცეულხარ, მაგრამ პატივმოყვარეობის უინი თან

გამოგყოლიაო, — თქვა თეოდორემ, წამოდგა და ზურგი შეაქცია.

ევლოგი ხელების მტკრევით, ვედრებით აედევნა:

— წმიდა მამაო, ილოცე კიდევ ჩემთვის და ამიერიდან გამოვ-სწორდები.

— არ გყოფნის ის, რომ აქ უშიშრად ხარ? — ნაბიჯის შეუჩერებლად უპასუხა თეოდორემ, ისე რომ ზედაც არ შეუხედავს.

— ცარიელ უშიშროებას რას ვაქნევ, თუ სიმდიდრე აღარ მექნება,— გამყინავი ხმით პასუხობდა ევლოგი.

— იმედი ნუ გაქვს, უფალმა ვისმეს კიდევ უსმინოს შენს გასამდიდრებლად, სამუდამოდ დაიხსომე, უმჯობესია სასოება უფლისა მიმართ, ვიდრე სასოება მთავართა მიმართ.

თეოდორემ აუჩქარა ნაბიჯს და დარჩა ევლოგი მარტო.

თეოდორე ლამის გარბოდა, ლოცულობდა, ღმერთს მადლობდა, თან ევედრებოდა ღვთისმშობელს, ჩვენებით განეცხადებინა, თუ ვის ედრებოდა, რაკი ღირსი გამხდარა უფლის შეწყნარების.

სკიტეში მოსულს იოაკიმე არ დახვდა, ყრმასაც ჩასძინებოდა და დაღლილს გზითა და განცდილით, სალოცავად დაყრდნობილს უჭმელს ჩაეძინა.

სძინავს თეოდორეს და ესმის: „შენ ედრები მეპატრაკე სერგის, რომელი არს ალექსანდრიას, მჯდომარე ყოველსა შესაკრებელსა“.

გაედვიძა, ეგონა სინამდვილეში ვინმე ესუბრებოდა, მაგრამ სკიტეში არავინ ჩანდა, კარგი ისევ დაკეტილი იყო. ეს, რაც გაიგონა, ნამდვილად პასუხი იყო მის კედრებაზე და დაღონებულმა თავის თავს უთხრა: ვაი, შენ თეოდორე, საწყალობელო, რამდენი წელი გაქვს მსახურებისა ჯაფითა და ჭირითა და აჰა, შეირაცხე ყოველთა შესაკრებელსა მის თანა!

ფიქრები საზარელ მოგონებებს აღუძრავდა. ჯერ ეგონა განგება ძველ ცოდვებს არ მპატიობსო, მერე ზმანება ცდუნებად ჩათვალა, მაგრამ რა დანებდა ძილს, ისევე ესმა: „მეპატრაკე სერგის ედრები შენ. რომელი არს ალექსანდრიას, მჯდომარე ყოველთა შესაკრებელსა“.

გონებაამღვრეული წამოიჭრა.

მამა იოაკიმე კარს მოსდგომოდა.

დადგა თუ არა ფარანი იოაკიმემ, მაშინვე აიძულა თეოდორემ დამჯდარიყო და მისთვის მოესმინა:

იოაკიმე ამჩნევდა შეძრულიყო თეოდორეს არსება და მთელის გულისყურით უსმენდა. უსმენდა და თან თავის აღფრთოვანებას ვეღარ ფარავდა, სიტყვას აწყვეტილებდა, სახე სიხარულისაგან უბრწყინავდა და ეუბნებოდა:

— ახლა მისმინე, მე მრავალს მსგავსს ღვთის განჩინებისას გეტყვი. აი იმას ანტონ დიდმა რომ შესთხოვა ღმერთს ეცნობა მისთვის ზომა მისი სრულქმნილებისა და იყო ზეციური მის მიმართ: „შენ ჯერ კიდევ არ მიგიწევია საზომსა მეპატრაკისასა, რომელიც ცხოვრობს ალექსანდრიას“. და მონახა ანტონმა მეპატრაკე იგი, ანუ 4. ქ. ნუსუბიძე

დაბალი, მოვაჭრე ტყავითა და ჰკითხა მას, თუ რას აკეთებს იგი თავის გადარჩენისათვის. მეპატრაკემ მიუვო, რომ მას არ ახსოვს, ოდესმე სიკეთე თუ გაუკეთებია და ამიტომ მუდამ თავს ეუბნებოდა, რომ ალექსანდრიის ყველა მცხოვრები შევა ღვთის სასუფეველში და თვითონ კი თავისი ცოდვების გამო სამარადისო სატანჯველში წავა.

თეოდორეს უნდოდა ეთქვა, რომ ანტონ დიდი წმიდანი იყო და მას შეეძლო ღმერთთან ბაასიო, მაგრამ თვითონ...

იოაკიმე კი სათქმელს განაგრძობდა:

— გეტყვი კიდევ: ერთი მონაზონი ქალი შენსავით ევედრებოდა ღვთისმშობელს, გაეცხადებინა მისთვის, თუ ვინ იყო მასზე მაღლა, რომ მისთვის მიებაძა და მიიღო გაცხადება: „წასულიყო ერთ სიფელში, მოენახა იქ ვინმე ქალი და მისთვის ეკითხა. მანაც მონახა იგი ქალი ბავშვებით გარემოცული და შეეკითხა, თუ რას აკეთებს იგი თავის გადარჩენისათვის? შემკრთალმა ქალმა უპასუხა, რომ ძალიან ცოტას, სულის ხსნისათვის თითქმის ვერაფერს, რადგან ძალიან ბევრი საზრუნავი აქვს დიდი ოჯახის გამო. ერთადერთი, რასაც ვახერხებ, ამბობდა ქალი, ეს არის მუდმივ, ყოველ საქმიანობის დროს, თუ საზრდელის მიღებისას წარმოვსთქვამ „მამაო ჩვენო“.

— „მამაო ჩვენო“ არც მე მავიწყდება არასდროს, — მოკრძალებით ჩაიღაპარაკა თეოდორემ.

— ჰოდა, — დამთავრა მამა იოაკიმემ, — მუდმივი ლოცვა ყველაზე ძლიერი, მუდმივი ფიქრი თავის უღირსობაზე, წადი ალექსანდრიას, მონახე მეპატრაკე სერგი. დარწმუნებული ვარ, ეს შენთვის მხოლოდ სასიკეთო იქნება და ჩვენც ყველანი კიდევ ერთხელ კარგად მოვიღებენ.

თეოდორე მადლიერებით გადაეხვია იოაკიმეს და აღუთქვა:

— არა დაჯვადე, ვიდრემდის არ ვიხილო, თუ ვინ არის, გინა თუ არა გავიგო რა არს საქმე ვინმე სერგისა.

თ ა შ ი VI

რ ო მ შ ი

იოანე მოწყალემ, მოსხმა და სოფრონიმ ალექსანდრიიდან კონსტანტინოპოლს ვერ ჩააღწიეს. როდოსში გემი ქარიშხალში მოჰყვა, და იოანე მოწყალესათვის ეს მგზავრობა საბედისწერო აღმოჩნდა — ზღვის სენის მიჰინვარებამ შეიპყრო და აღსასრულზე დააფიქრა, ამიტომაც მეგობრებს სთხოვა:

— შვილნო ჩემნო და ძმანო, აიძულეთ გონებანი თქვენნი, რათა

მერწმუნოთ, აღსასრულის მოახლოებებს ვგრძნობ და მსურს ჩემს სამშობლოში, ამაფუნტის მიწას მიმბაროთ.

შეჭირვებულნი მეგობრის ბედით ამაფუნტიისაკენ მობრუნდნენ. იოანე მოწყალემ უპირველეს თავისი ცოლ-შვილისა და მშობლების საფლავები მოინახულა. ატირდა მოგონებებით, ატირდა სიხარულითაც, რომ სულ მალე მათთან შეხვედრა ელოდა.

მაღლიერმა ამაფუნტიელებმა კი დიდად გაიხარეს საამაყო შეილის სამშობლოში დაბრუნებით. აქ ყველაფერმა საზვიამო ელფერი მიიღო, ხალხი დაუსრულებლად მოედინებოდა იოანესთან კურთხევის მისაღებად; იგონებდნენ, ვინ როგორ გადარჩენილიყო მისი რჩევა-დარიგებით, რა წარმატება მოეპოვებინათ მისი შემწეობით, რამდენ ობლისა და ქვრივის სიდუხჭირე შეებად ექცია, იხსენებდნენ მის გამონათქვამებს, უმთავრესად კი, იმას, რომ უმეტესად „სიმდიდრე არის დედა მცონარებისა, ბოროტებისა“,

ყოველივე ამან იოანე მოწყალეს ისეთი მხნეობა დაუბრუნა, ეგონათ, სამიზრობამ გაუარაო, მაგრამ სულ რამოდენიმე დღეში სწეულებამ იმძლავრა, თავისი გაიტანა, იოანეს რვა ათეული წლის ნაჯაფი სხეული გარდუვალს დანებდა და მეგობრებთან მშვიდი საუბრისას აღესრულა.

იგი დაკრძალეს წმიდა ტიხონ სასწაულმოქმედის ეკლესიაში ორ ეპისკოპოსს შუა. მთელი მისი ქონება კი, მისივე სურვილით მათხოვრებს დაურიგეს.

თუ ამაფუნტიელები ადრე ალექსანდრიაში მის გამგზავრებას სევდიანად შეხვდნენ, ახლა, სულ უცნობ სამყაროში გაღასვლისათვის, ნუგეშობდნენ, რომ იგი სამუდამოდ მათთან იქნებოდა, მათზე მფარველობასაც გააგრძელებდა, რამეთუ სწამდათ იგი წმიდანად შეირაცხებოდა.

რადგან საომარ მდგომარეობაში მყოფი კონსტანტინოპოლი უპეკ ალყაშემორტყმული იყო, იოანე და სოფრონი რომს წამოვიდნენ.

რომი იმ დროს სათავეში ედგა მთელ სამყაროს.

აქ მათ შემოხვდათ იერუსალიმელი მონაზონნი — თეოდოსე განგრელი თავისი ძმითურთ, ისინი სამარადისოს მოპოვებისათვის იღწვოდნენ და თავიანთ სიმდიდრეს ახმარდნენ მართლმადიდებლობისათვის მებრძოლად. ისინი დიდხანს ცხოვრობდნენ კონსტანტინოპოლში პატივით განშვენებულნი, ახლა კი ერთი ქვეყნიდან მეორეში გადადიოდნენ, ქველმოქმედებდნენ, თანაუგრძნობდნენ ბიზანტიის ხელისუფალთა მიერ ექსორიაქმნილთ და კიდევ ჰმადლობდნენ, რამეთუ მათი საშუალებით ეძლეოდათ შესაძლებლობა ეთესათ სიკეთე.

რომში იყო თვით მაქსიმე კონფესორი, თავისი მოწაფითურთ, ანასტასი აპოკრიარისით.

ჰერაკლე კეისარი, როგორც მხედრობათა და ბრძოლათა შინა აღზრდილი, ვერ გარკვეულიყო რელიგიის საკითხებში, განუსჯელად აპყროლოდა მღვდელმთავართა და მონაზონთა სიტყვას და გამოეცა

ბრძანებულება „საწამებელი“ ანუ „ეკთეზისი“, რაც მოასწავებდა მწვა-
ლებლობის შემწეობას. ამან მაქსიმე აიძულა გასცლოდა სამეფო კარს,
კეისარს კი უთვლიდა:

„ჩვენ არა შიშისაგან სიკვდილისა ვიქმენით განსაველად ქვეყნით
შენით, არამედ რთა არა შემწე გექმნეთ სიბოროტესა შინა და მიზეზ
გექმნეთ უღმერთობისა“.

ჰერაკლე დაღონდა მაქსიმესთან განშორებით, მაგრამ ვერას იქმდა
მის დასაბრუნებლად, რამეთუ მაქსიმე აღკვეცილიყო ბერად და ახლა
ქრიზოპოლისის ბერ-მონაზონი გაძხდარიყო, ჰერაკლეს ერთიღა დარ-
ჩენოდა — არ შეეზღუდა, ხელშეუხებელი ჰყოლოდა იგი, რაც მაქსი-
მისათვის დიდი წყალობა იქნებოდა.

მაქსიმეს მოქმედი და მგზნებ რე ბუნება სენაკის კედლებში ვერ
იკეტებოდა, იგი ქვეყნიდან ქვეყანაში, ქალაქიდან ქალაქში ჩნდებო-
და, გამწვავებული ბრძოლა ყველგან მის უშუალო მონაწილეობას
ითხოვდა. მას იცნობდნენ როგორც ორენებიანთა წინამძღვარს, ბრძო-
ლაში მამაცსა და პაექრობაში ბრძენს, ამიტომაც ახლად არჩეულმა
პაპმა, მარტინე პირველმა მიიწვია ლატერანის სინოდზე, მონოთელი-
ტების შესაჩვენებლად. სულ მალე კი, თვით პაპი, წმიდა მარტინე
ამისათვის, დაგმობილ, დევნილ იქნა და ახლა იგიც რომში იმყოფე-
ბოდა.

ასევე კონსტანტინოპოლიდან გაძევებული ყოფილი პატრიარქი
პიროსიც აქ იყო და ყველანი ერთად, შეთანხმებით უტევდნენ მონო-
თელიტებს, და იბრძოდნენ მართლმადიდებლური სარწმუნოების გან-
მტკიცებისათვის.

ამ შერისხულ ჭეშმარიტების მძაბებელთ კი ამა ქვეყნის დიდების
დაკარგვა კიდევაც შეენოდათ და შერისხვაც მათში მხოლოდ სულიერ
აღზევებას იწვევდა.

როდესაც ყველა პაექრობდა, დაობდა, სოფრონი მთელის არსებით
ერთვოდა, იგი თავის მსოფლგაგებასთან ერთად თავის ადამიანურ რა-
ობასაც ავლენდა, რითაც დიდ მოწონებას იმსახურებდა და მრავალი
ადამიანის გულს იგებდა.

იოანე მოსხი კი სდუმდა, ღიმილით უთმობდა მოპაექრეთ და თუ-
კი რასმე იტყოდა, მის უბრალოდ ნათქვამსაც საგანგებო მნიშვნელო-
ბა ეძლეოდა. მუდამ მასზე იჯდა ჩაფიქრებული და რაღაცას უკვირ-
დებოდა, თავისთვის მსჯელობდა:

„თუ შავი მიწის ლაბირინთებში ჩამარხულია ბუნების, სიცოცხ-
ლის საიდუმლოება, სულიერ სამყაროში დაფარულია ჭეშმარიტება.
ადამიანი ღმერთს გონებით ვერ მისწვდება, ცოდნა არ შევლის ადამი-
ანს ღმერთთან მისასვლელად, მასთან უშუალობის დასამყარებლად.
ადამიანი მხოლოდ ისწრაფვის მისკენ, და ამ ქვეყანაზე რომ ვერ აღ-
წევს, იმიერ ქვეყნით იმედოვნებს. რწმენა და სინდისი ყველასათვის
პირდაპირი გზაა ღმერთთან მიახლოებისა, როდესაც ჩვენში გულის
ფაზე ჭეშმარიტი სიყვარული აღინთება, ჩვენ შევიცნობთ ღვთაებრივ
სამყაროს“.



გულში კი ახლა იოანეს სამუშის სიცხე უტრიალებდა, ვერა და ვერ შეგუებოდა იოანე მოწყალის გარდაცვალებას, ფრთებდალეწილი არწივით გამოიყურებოდა. გემის რყევასაც არ ჩაეველო მისთვის უშედეგოდ. სხეული დაძაბუნებოდა, სიარული უჭირდა, სშირად განმარტოვდებოდა, არავის შესწიოდა თავის უძლურებას, არ უყვარდა საკუთარი განსაცდელით სხვისი დაღონება, მაგრამ ერთ დღეს რომ მიწვა, სარეცელზე, სულაც ვეღარ წამოდგა. გული უტევდა და შეძრწუნებულმა სიკვდილს თვალბრძოლი რომ ჩასედა, დიდის აჩქარებით, უკანასკნელი ძალის სმევით სოფრონისათვის ანდერძი დაწერა, სთხოვდა უზრუნა მისი თხოვნათა კრებული „სამოთხე“ ავტორის განუცხადებლად ძმათთვის საკითხავად გაევერცელებინა.

შემოთავაზებული სოფრონი თავის შეჭირვებას ვერ ფარავდა, მაგრამ მაინც ნაძალადევი ღიმილით ეტყოდა:

— ილოცე გრძნობით, სისანულით, ილოცე ცრემლებით, ილოცე არა სურვილების შესრულებისათვის, არამედ მისთვის, რომ ნება ღვთისა იყოს შენში.

იოანეს მიმქრალ თვალებში ნაპერწკალმა ინათა, ეს ხომ მისივე სიტყვები იყო, ახლად მოსული სოფრონი რომ დამოძღვრა.

შადლიერების, სიყვარულის ცრემლებმა გულიდან საფლავის ღოღი გადააგორეს.

მოინახულა ყველამ. არავინ დაიშურა მისთვის გასამხნეველები სიტყვა და ლოცვა.

იოანემ მოიხედა, იმედი განნდა, მოიკეთა.

უპი აცლიდა კვლავაც ეღვაწა.

სანდახან გამოჩნდებოდა ხოლმე ვინმე სახალისო ამბავსაც რომ მოყვებოდა, რაც სნეულს გუნებას გამოუკეთებდა. ერთმა უამბო, თან გააფრთხილა იოანე, რომ ახლავე არ ჩაეწერა, მერეც მოასწრებდა.

— დავაქსის მონასტრის ორ ძმას აღთქმა დაედოთ, არ გაჰყროდნენ ერთმანეთს არც სიცოცხლეში და არც აღსასრულისას, — ისინი ბიზანტიის მონასტრის მშენებელნი იყვნენ და ერთ დღეს ერთად მივიდნენ ქალაქს რილაცის საჭიროებაზე. ერთმა ძმამ დაინახა მშვენიერი ასული და მისგან შეძრულ იქმნა. უთხრა ძმას: გამიშვი, ძმაო ჩემო, რამეთუ სიძვა მეზრძვისო. ძმამ დაუწყო შეგონება: ნუ იქმ, ნუ წარწყმედ შენს შრომას წუთიერ ვნებისათვის. ჭალი იგი მეძავი აღმოჩნდა. როდესაც ნახა ძმამ, მასთან ვერას გააწყობდა, მიუშვა. ჯნებით ძლეული ძმა შევიდა მეძავის სახლში. მისი ძმა კი კარებთან იჯდა გულდასერილი. როდესაც იმრუშა და გამოვიდა იგი, ძმამ უთხრა: რა სარგებლობა ჰპოვე ახლა ამ ცოდვისაგანო? ძმა სდუმდა. მაინც წამოდი მონასტერშიო, უთხრა ისევ დაღონებულმა ძმამ. არა, მე აღარ შემიძლია უდაბნოში წამოსვლაო, უპასუხა. მაშინ უბიწო ძმამ უთხრა: მომიცადე, რათა აგრეთვე მეცა შევცოდო და შემდეგ ერთად წავიდეთ და მოვინანიოთო. მართლაც, შევიდა იგი მეძავთან, მისცა მისი გასამრჯელო ისე, რომ არც მიუხედაია მისკენ, გამოსულმა კი თავი ისე

წარმოადგინა, თითქოს მასაც ჩაედინა ცოდვა, რათა ძმას იმედი არ გაწყვეტოდა და მასთან ერთად მონასტერს დაბრუნებოდა. მაგრამ, ამოდ. ვნებით ძლეულმა ძმამ მაინც არ ინდომა მონასტერს წასვლა და მაშინ დარჩა მასთან უბიწო ძმა. იგი დღისით მიდიოდა მშენებლობაზე, ორთავეს მაგიერ მუშაობდა და საფასური მოჰქონდა. ძმა, რომელიც მრუშობდა, ყოველდღე იღებდა ორივე ქისას და საჭმელ-სასმელისათვის ხარჯავდა, მეორე კი ყოველდღე მარხულობდა, ლოცულობდა, იყო ჯაფაში და არავის ხმას არა სცემდა. როდესაც მშენებლობა ნახეს, რომ იგი არცა ჭამს, არც ლაპარაკობს, აუწყეს წმიდა აბრაამს, რომელიც მშენებლობის საქმეს განაგებდა. აბრაამმა მოიხმო იგი და ჰკითხა: საიდან ხარ, მიაბზე შენი ამბავიო, ძმამაც მოუთხრო მთელი ამბავი. როდესაც აბრაამმა მოუსმინა, თქვა: იცოდე, ღმერთმა უკვე მოგიძღვნა შენ შენი, ძმაო. როდესაც დაუძღურებულმა ძმამ აღსასრული შეიგრძნო და ამ ქვეყნიდან მისი გასვლის ჟამი დადგა, ხელი მოჰკიდა თავის ვნებით ძლეულ ძმას და უთხრა: იცოდე, ჩემო ძმაო, მე შეუბღალავი ვარ იმ ცოდვით, რომელიც შენ გგონია, რომ ჩავიდინე. მაგრამ მე შენგამო ვეწოდი გულმოდგინედ მთელ ამ შრომას, რათა შეეწყნარებინა ღმერთს შენი სინანული, მაშინ გამოჰყვა ძმა მონასტერში და როს გარდაიცვალა უბიწო ძმა, თავად დარჩა იმ ქვაბში, რათა მოენანიებინა და დაეცვა ის ფიცი, რომელიც მათ შორის იყო დადებული. შემდგომად ამისა, რაც მიიცივალა მისი ძმა, მივიდა მასთან ბერი კალამონის მონასტრიდან და ჰკითხა: მითხარი, ძმაო ჩემო, ამ წლების მანძილზე რას მიაღწიე? მან უპასუხა: შემინდე, მამაო, რამეთუ არასოდეს არ ვუთმობდი მე გონებას მიწიერ ამბებს მაშინ, როდესაც ჩემს წესს ვასრულებდიო.

დაამთავრა მთხრობელმა ამბის თქმა და დასძინა:

— ისე რომ, ღმერთი ჩვენს გულმოდგინე ლოცვასაც შეისმენს, შენს ზღვის სენსაც უკვალოდ გააქრობს და შენც ისევე დაამშვენებ ჩვენს ძმობას და კიდევ ბევრს გააკეთებ სულთა სასარგებლოდ.

სხვა კიდევ სხვა ამბავს ჰყვებოდა და ასე...

იოანე გამოჯანმრთელდა, მოიკეთა და როგორც კი სიარული შესძლო, სთხოვა სოფრონის წასულიყვენენ სადმე მყუდრო ადგილას მოსასვენებლად, და დატოვეს კიდევ რომი.

წამოვიდნენ რაბენს, სადაც დიდხანს უნახავი მეგობარი ეგულებოდათ.

მეგობარს ომი გამოეველო და ბევრს რასმე საინტერესოსაც იტყობდა.

— ბარბაროსებთან ტყვედ მოვხვდი, — ამბობდა იგი, — ერთ დღეს რამოდენიმე ძმამ თავი დავადწიეთ პყრობილებას, გამოვიპარეთ. მრავალ დამეს ვიდოდით თრაკიის უდაბნოში, რადგან დღისით გვეშინოდა. შემოგვევლია საზრდელი და სიკვდილის პირას მივიწიეთ, ვწუხდით არა მხოლოდ საზრდელისათვის, არამედ იმისათვის, რომ განვიდოდით ამ საწუთროსაგან უზიარებელნი. ძმები ფიცით მაძიებდნენ.

მეზიარებინა, მე ვარწმუნებდი, რომ არა ვარ ხუცესი და არც პურო გვაქვს-მეთქი. ადგა ერთი მათგანი, გადმობერტყა ყველა ჩვენი აბგები და ჰპოვა მცირე პურისა და მაშინ მომცეს რა ის ნატეხი, მრავლითა ტირილითა მაიძულეს მეზიარებინა. დავცვივდით ყველანი მიწაზე მუხლთ მოყრით, შემდეგ აღვდექ და ვყავ ლოცვა დიაკონებისა. მერე ვთქვი ერთად, „მრწამსი“, „მამაო ჩვენო“, „ერთ არსი“ და „რომელი შეუდგეს მას“. ვეზიარენით ნატეხისაგან პურისა და განვძლიერდით, განვახსლდით და უვნებლად მოვედით სოფლად.

ყველამ გაიხარეს ლოცვის ძალით.

იოანე და სოფრონი კი შეუდგნენ წერას წიგნისა: „ცხოვრება იოანე მოწყალისა“.

თ ა ვ ი VII

ო თ ა ნ ე ს ი ნ ე ლ ი

იოანე მოწყალეს გარდაცვალებისა და იმის გამოც, რომ იმ შოთთან, არეულ დროში მშვიდობიან განათლებაზე ფიქრიც აღარ შეიძლებოდა, იოანემ და სოფრონიმ სიმყუდროვისათვის სელევკიას მიაშურეს.

ეს ქვეყანა შუამდინარეთისა, განთქმული კეთილ ჰაეროვნებითა და იაფობისათვის ნაყოფთა, ყოველის მხრიდან იზიდავდა ადამიანებს. უმეტესად კი იგი ცნობილი იყო საჩინო მამაკაცთათვის, სწორედ მის მახლობელი დაბებიდან იყვნენ საქართველოში შემოსული ათცამეტი მამანი, თავდადებულნი მართლმადიდებლობისათვის. ანტიოქიასა და საქართველოს შორის ცოცხალი ხიდი იყო გადებული. აქ მუდამ შეხვედებოდი ქართველებს. ანტონ ქართველს ზეგარდამო ბრძანებაც კი მიეღო „ჯერ არს მისდა თანამკვიდრობა სვიმეონ მესვეტისა“-ო და იგიც წამოსულიყო პალესტინას. აქ ბერად შემდგარიყო, შემდეგ კი შავ მთაზე სვიმეონ მესვეტისათვის რომ ქრისტეს ჯვრის ნაწილები მიეტანა, სვიმეონს სულ მალე ეკურთხებინა იგი სელევკიის ეპისკოპოსად.

ახლა კი მათ იქ დახვდათ პონტოელი ხუცესი პეტრე.

გაიხარეს ქართველებმა ერთმანეთის ნახვით. სოფრონი იოანეს არც აცლიდა სიტყვას, თავად გამოჰკითხავდა, რამეთუ ქართველი მას უკვე თავის ნათესავად მიაჩნდა.

პეტრე ხუცესისაგან კი გაიგო, როს სიტყვა ქართული ნიშნავდა სიბრძნეს და ვისიმე ბრძნულ ნათქვამზე იტყოდა: ეს ქართულიაო.

— ყველა ქართველს კი არ შეუძლია სთქვას, მე ქართველი ვარო, — ნაღვლიანად დასძინა ხუცესმა ისე, თითქოს რაღაცას იხსენებსო.

საუბარი ალბათ დიდხანს გასტანდა, რომ მოულოდნელად არ მო-

სულიყო ვინმე მოგზაური და არ მოეტანა სამწუხარო ამბავი იოანე სინელის მძიმედ დაავადებისა.

იოანე არც დაფიქრებულა, უმალ წამოდგა და სოფრონისთან ერთად სინას მთისაკენ გაუდგა გზას.

იოანე სინელი მისთვის უახლოესი მეგობარიც იყო და მასწავლებელიც, სოფრონის კი მის შესახებ მხოლოდ შორიდან სმენოდა და სინას მთის მონახულება იზიარებდა ძველი აღთქმის მოვლენებით.

სინას ნახევარკუნძულის მთათა შორის სინას წმიდა მთა უმაღლესი იყო. აქ მიეღო ისრაელს უზენაესისაგან მცნებანი კანონისა, აქ იყო თავშესაფარი დევნილი ქრისტიანებისა, აქ ააშენა იმპერატორმა იუსტინიანემ სავანე, რომელშიც 600 ყარობს მოეყარა თავი.

გზად იოანე შეუწყვეტლივ ლაპარაკობდა სინელზე, სიტყვას რატომღაც წარსულში იტყოდა.

— ერთხელ შევეკითხე — ამბობდა იოანე ამ შრომასა და ღვაწლში რას მიაღწიე-მეთქი და მიპასუხა: ლოცვისას არ ვუთმობ გონებას მიწიერს და მხოლოდ ერთხელ შევძელ მეთქვა: „უფალო, იყავ ჩემს მიმართ ისეთი, როგორც მე ვარ სხვის მიმართ“-ო. „ადამიანი ღვთიურის ძიებაში მეტ სარგებლობას პოულობს, ვიდრე წიგნებიდან მიღებულ ცოდნაში, სწავლა კარგიაო, მაგრამ სულიერი მდგომარეობა მაინც მთავარიაო...“

იოანეს სიტყვა უწყდებოდა, სვლა უჭირდა და მალ-მალ შეჩერდებოდა.

— ...ეს სულიერი სამყაროს ხუროთმოძღვარი, — განაგრძობდა იოანე, — შემიკული ღვთაებრივ უმწიკვლოებითა და მიწიერ უბიწოებითა მუდამ ჰუმორით აციაგებულ სახით ეგებებოდა ყველას. მასთან შეხვედრები ნადიმებად იქცეოდა. არასოდეს გვინახავს იგი მგმუნვარე, რამეთუ პირად საწუხარს, შინაგან ჭიდილს განმარტოებაში დასძლევდა, ძმებსაც ეტყოდა: „ყველამ თავისი საწუხარი უნდა თავად დასძლიოს, სხვა არ დააღონოსო. საწუხარია, რომ ამადლებს, ამდიდრებს ადამიანს, წუხილი ყველასათვის სასარგებლოა. ჭეშმარიტი გლოვა დეზია ოქროსი, რომელიც ყოველსა ჟამსა სჩხვლელტს სულსა, იგი გლოვა განშორებულია ყოველისაგან ამა სოფლის სიყვარულისა და ხორცის ნუგეშისცემისაგან. ჭეშმარიტად მგლოვიარე სულს არ შეეჩება სული მოწყინებისა. რა ჟამს იხილო მგლოვიარეთა თანა მრისხანება და ამპარტყვენება — მათი ცრემლი და გლოვა ცთომილად შერაჩხებო. ევაც არ იყოს, არის დრო მდუმარებისა და არის დრო მეტყველებისა. მდუმარება გამართლებულია მაშინაც, როდესაც პირადად შეურაცხვეყოფენ, გყვედრიან, გზრახავენ, ბოროტ განზრახვით გეკითხებიან — იქნებ გარიგებენ, რასმე შეგაგონებენ, მაგრამ გახსოვდეთ, ღუმილი ბოროტებაა — როდესაც ეკლესიას უპატიოდ ექცევიან, შენს წინაშე ადამიანს ცილს სწამებენ, როდესაც შენი ღუმილი სხვისთვის შეურაცხყოფაა, შენ კი თავს იწონებ... ძმანი ყოველდღე ვამოწმებდით თავს, თუ სათნოების რომელ კიბეზე ავსულვართ, ზოგს ფეხი დასცდენოდა,

ზოგს რომელიმე კიბე ვერაფრით ვერ დაეძლია, მე კი ხშირად სულ მალე ასული სულ დაბლა დავგორებულვარ... პირველ საფეხურად კიბისა კლემასქს მიაჩნდა მდაბლობა, რამეთუ სიმდაბლეა კარი ცათა სასუფეველისა, „კაცი, რომელიც ებრძვის ბოროტებას თვინიერ სიმდაბლისა, — მსგავს არს კაცისა, რომელსაც ენებოს ხელითა თვისითა შეპყრობა ელვის“, „ვინც ვერცხლის მოყვარეობისაგან ან შეკრულ იყოს, ვერ ოდეს ილოცოს წმინდა გულითა და კაცი, რომელიც განმრავლდეს ზრუნვითა, მსგავს არს კაცისა, რომელმან შეიკრან ფერხნი და ენებოს მალიად რბენა“...

ისე გაეტაცათ მოგონებებს სინელზე, რომ ვერც გაიგეს როგორ გაელიათ გზა და სინას მთას მოახლოვებოდნენ.

შორიდანვე ავის მაუწყებლად ენიშნათ შავი ღრუბლები, რომელთაც მთა ჯანყით მოეცვათ. მთაზე უამრავი ბერ-მონაზონი ერთ ადგილს შეგროვილიყო. რა დაინახეს მათკენ მომავალნი, ერთმანეთს გადაულაპარაკეს სიხარულით: „ჩვენი იოანე“, „ჩვენი სოფრონი“ მოდიანო.

შეკრებილობა ორად გაიბო და გზა დაუთმეს ახლად მოსულებს. იოანე შეტორტმანდა და ატირებული დაემხო სინელის საფლავს. ყველა აქვითინდა. მძიმე იყო მოძღვართან დაუმოძღვრებლად განშორება, მაგრამ საერთო იყო მწუსარება და ერთობის ძალა მის სიმძაფრეს ანელებდა. ეს განშორებაც ხომ სამუდამო არ იქნებოდა, ისინი კვლავაც შესვდებოდნენ ერთმანეთს, თუკი სათნოების კიბის უმაღლეს საფეხურს მიაღწევდნენ.

უნუგეშოდ გამოიყურებოდა მხოლოდ სინელის უერთგულესი მსახური მოსე, რომელიც ცრემლებით მოიგონებდა:

— ერთსა დღესა მიბრძანა ნეტარმა, ერთი ადგილიდან მიწა მიზიდა ბოსტნისათვის და მეც წარვედი ადგილსა მას აღსრულებად მისი სიტყვისა. ფიცხელი გულმოდგინებით ვეზიდებოდი და როდესაც განძლიერდა სიცხე, შევედი დიდსა ლოდსა ქვეშე და მიმეძინა. უეცრად ხმა მესმა იოანესი, ვითარცა მიხმობდა და უმაღ გამოვედ ადგილისაგან მისგან სირბილით და, ვითარცა გამოვედ, მიესყულად დაეცა დიდი ლოდი იგი და მე გადავრჩი სიკვდილს. ხოლო რა მოვბრუნდი ჟამსა მწუსრისასა, მკითხა ნეტარმან: ჭირი რამ ხომ არ მოიწია შენზედა, შვილო და მე ვუთხარი მას ყოველი. მან მაშინ არა მითხრა რა, არამედ გალობითა ადიდა ღმერთი და შემდგომად განაცხადა ხილვა თვისი.

ეხილა ვინმე მღვდელი მშვენიერი, რომელი განალვიძებდა და ეტყოდა: ჰოი, იოანე, ვითარ შენ უზრუნველად გძინავს, მოწაფე შენი მოსე ჭირსა არისო და მიესყულად განელვიძა რა, ილოცვიდა ჩემთვის. ყველამ ცრემლიანი სიხარულით განიხარა და ახლა იოანემაც მოიგონა:

— მოვიდა ოდესმე მასთან ტირილით მონაზონი ვინმე, რომელიც იმძლავრებოდა ბრძოლისაგან ხორცისა... სარწმუნოება მისი გაუკვირ-

და ნეტარსა მას და უთხრა: დადგეთ ორნივე ლოცვად, საყვარელოო. და ვითარცა მოიდრიკეს მუხლნი და აღასრულეს ლოცვა, გველი იგი ილტვოდა ლოცვითა განდევნილი, ხოლო სნეული იგი ხედვიდა თავსა თვისსა განკურნებულად და თავყანს სცემდა ნეტარსა, სულიერთა წყეულებათა მკურნალსა.

სოფრონისათვის ყოველივე ეს უბრალოდ მოსასმენი ამბავი არ იყო, იმ დღიდან მან სამუდამოდ იწამა, რომ ლოცვას არამართ მლოცველისათვისა აქვს მნიშვნელობა, არამედ ლოცვას შეუძლია სსვის ბედზეც იმოქმედოს, თუ იგი ჭეშმარიტი ლოცვაა.

თითოეული თავის მხრივ კიდევ მრავალს მნიშვნელოვანს გაიხსენებდა. ივონებდნენ, თუ როგორ ვერ უბედავდნენ ხშირად ამ ცათამბჯენ ვოლიათს რამის შეკითხვას, ის კი ხედებოდა მათ სათქმელს და თავისთვის, მაგრამ ყველას გასაგონად იტყოდა:

„ძნელია, შეუძლებელიც, ყოველთვის, ყველასათვის იყო მოსაწონი. თუ ზედმეტად ნაღვლიანი ხარ — იტყვიან, აბუზარიაო, ზედმეტად მხიარული ხარ — სულელიაო, თუ მეტად თავაზიანი ხარ — მლიქვნელიაო, არც პირქუშობა ვარგა — იტყვიან, დათვიაო“.

თუ ვისიმე საუბარს მოჰკრავდა ყურს, ჩაილაპარაკებდა:

„დაუძლეველია უარყოფა სიყვარულისა! სიყვარული შეიძლება დაჰკარგო, სიყვარული შეიძლება ბიწიერებაში დაახრჩო, მაგრამ, რომ არც დაჰკარგო და არც დაახრჩო, იგი სიწმინდე უნდა აამაღლო და სამარადისოსათვის დაიუნჯო“.

ეს კი თითქოს მხოლოდ იოანესათვის იყო თქმული, მისთვის გამოუთქმელი სთქვეს და იდუმალ პირჯვარს გადაისახავდა.

ყველასათვის კი ერთნაირად ნათელი იყო, თუ რა ძლიერი იყო უხილავი სამყარო ხილულზე და დავითნს დაიმოწმებდნენ: „რომელმან შექმნა თვალი იგი არა ხედავს? ვინც დანერგა ყური — არ ესმის მას? რომელმან სამართალი განგვიჩინა — არ განგვიკითხავს?“

ამ ფიქრებსა და მოგონებებში იყვნენ, რომ მოსემ სინელის სენაკიდან გამოიტანა შეკვრა პერგამენტებისა, რომელშიც თავმოყრილი იყო რაც სინელს ზეგარდმო ეუწყა მარადიულ საუფლოსთან შესაერთებლად გარდაცვალებიდან გასავლელ საზვერავებზე და რადგან ვინიმესათვის გაცხადების უფლება არ მიეღო, პერგამენტისათვის მაინც გაენდო.

თ ა ზ ი VIII

ც დ უ ნ ე ბ ა

სპარსთაგან დარბეული იერუსალიმი განსაცდელში იყო. სასჯელის შიშით აყრილნი ქრისტეანენი დაფანტულიყვნენ.

იოანემ ურჩია სოფრონის, წასულიყო იერუსალიმს, ხალხისათვის პატრონობა გაეწია.

სოფრონისაც ეფიქრა ამაზე, მაგრამ თქმა ვერ გაებდა, იოანესთან დაშორება ვერ გადაწყვიტა, ახლა კი, თავად იოანე ავალებდა, ერთი კი სთქვა „შევძლებ განაო?“ და დაუყოვნებლივ გასწია, რადგან მას უმეტეს საზოგადო მოღვაწეობა იზიდავდა. თავისი მრწამსის ღუზა ყოველდღიურ ცხოვრებაში ჩაუშვა და მთელის მონდომებით, თავდავიწყებით, შეუდგა საეკლესიო მოღვაწეობას.

იოანე დარჩა სინას წმიდა მთაზე. სინელის საფლავთან ახლოს ყოფნა ეწადა. აქ, ამ მართლაც სამოთხის კართან, შეეძლო ლაღად ესუნთქა, აზრის მთელი სიღრმის წვდომით ესაზრდოვა. მხოლოდ განმარტობას შეეძლო ახლა მისთვის შვების მოტანა, შეეძლო ეწერა გატაცებით, შეუსვენებლივ, რითაც იმ დაუკმაყოფილებელ სურვილებს შეავსებდა, იმ ოცნებათ ხორცს შეასხამდა, რაც მასში სულიერ ძვრებს იწვევდა, რაც იმ ღირსშესანიშნავ ამბებს აღწერდა, რომელთა მიხედვითაც საერთოდ აღინუსხება ადამიანთა ცხოვრება. ამასთან, ყველაფერი იყო ძმათა საკითხავად სულის მარგებელ თხრობებად რომ იკინძებოდა. ფიქრობდა იმაზე, თუ რისი გაცემის შემძლებელი იყო და არა იმაზე, თუ სხვისგან რას მიიღებდა. მაგრამ შვილივით შეზრდილ სოფრონისთან განშორება გულს ნაკლულევანს ხდიდა და დროდადრო იერუსალიმს მიაკითხავდა.

იერუსალიმში კი სოფრონის წარმატებით გაიხარებდა, ეს ხომ მისი წარმატებაც იყო! სოფრონის ქადაგებანი მის ირგვლივ შემოკრებილ მკვიდრთ ალაფრთოვანებდა. მისი მოწოდებანი დანგრეული იერუსალიმის აღდგენისათვის ხალხის ნებისყოფას ამტკიცებდა, იგი მტერს იმითაც ამარცხებდა, რომ მასში არ იყო წადილი ადამიანის გმობისა და არც სხვისი დამცირებით საკუთარი უპირატესობის წარმოჩინებისა.

სოფრონისთან შესვედრებს საზეიმო ელფერი ეძლეოდა. იოანეც იმდენს რასმე ყვებოდა, თითქოს მთელი ქვეყანა შემოევლოს, მაშინ, როდესაც სინას მთიდან შორსაც არ გაიხედავდა.

იოანეს წარსულის განცდები გაუჩინარებულ ქალზე გაუფერულებულიყო. მის გამოკვეთილ სილამაზიდანაც მხოლოდ ნისლოვანი მონატულობანი დარჩენილიყო და სულაც გაქრებოდა თუ არა ერთი საოცარი შემთხვევა, რამაც მთელი წარსული არა თუ განუახლა, მეტი ბრწყინვალეობაც კი შეჰპოვა.

აქ, იერუსალიმში, ისევე, როგორც ყველგან, იოანე ყველასათვის სასურველი მოსაუბრე იყო, ყველას ხალისიანად ეგებებოდა, მეგობრებსაც ადვილად იძენდა და აი, ერთ დიდებულ ერის კაცსაც დაუახლოვდა. იგი იოანეს ბევრს ისეთ რასმესაც გაანდობდა, რის გაცხადებაზე კანონი პასუხს აგებინებდა. ეს იოანეს ხიბლავდა, რამეთუ ციოდა — გენდობა ის, ვინც თვითონაც სანდოა და სულ მალე ამ კაცში მგზნებარე მეგობარიც ჰპოვა.

კაცი იგი წარმართი იყო, მაგრამ განსწავლული, კერპებს ვერ მიანდობდა თავის ბედს, რადგან მაშინ ადამიანის ყოველი მცდელობა

უაზრობა ხდებოდა, ვერც ქრისტიანობა მიეღო, ბევრი რამ იყო მასში დაუჯერებელი და იჭკვის ჭია ღრღნიდა, ესოდენ რთული და საოცრად მიზანშეწონილი არსება, როგორც ადამიანია, უმიზნოდ როგორ უნდა შეექმნა ბუნებას და მართალი გული მეცნიერებაში ეძებდა ადამიანის დანიშნულების გაგებას. ხუმრობით, მაგრამ მაინც სერიოზულის გაგების მიზნით იოანეს სულ რაღაცაში ედავეებოდა.

იოანე კი რწმენის საკითხებში არავის შეედავებოდა, რამეთუ სჯეროდა მხოლოდ საკუთარი თავის, მან კარგად იცოდა, რომ გამოკითხვით და არა სხვისი დაკითხვით შეიცნობდა ადამიანი თავის დანიშნულებას და ამ გარეგნულ ქაოსს მიღმა დაინახავდა ამ თითქოსდა ერთმანეთთან დაუკავშირებელ საგანთა უსასრულო სიმრავლესა და სირთულეში ერთიან, მარტივ, მუდმივსა და ყოვლის შემქმნელ უმაღლეს გონებას, რომელიც წარმმართველია ბუნების კანონზომიერებისა.

ეს მეგობრობა ორივესათვის ერთნაირად მიმზიდველი იყო. იოანეს იღუმალ სწაღდა თავადის მოქცევა ჭეშმარიტ სჯულზე, თავადს კი — ზესთა სამყაროს საიდუმლოების მიგნების გზის პოვნა.

იოანე ხედავდა, რომ თავადი გრძობით უფრო სწვდებოდა ჭეშმარიტებას, ვიდრე გონებით. ეს იყო მთავარი, სწორი გზა, გზა დაკვირვებისა, და თუ ადამიანი სწორ გზაზე დადგებოდა, თვალნათლივ დაინახავდა კიდეც, რომ ცხოვრების სასრულობა და სიცოცხლის უსასრულობა ერთმანეთზეა გადაჯაჭვული, რომ დროული მარადიულის ისევე ემორჩილება, როგორც ნაწილი — მთელს. თუ ადამიანების შეხვედრებშია ჩადებული პიროვნების განვითარების საიდუმლოება, ქრისტესთან შესვედრა — ჭეშმარიტებასთან შესვედრა, რადგან ქრისტეა ჭეშმარიტი მეგობარი ადამიანისა, ქრისტე ის მეგობარია, რომელთანაც გარბინარ, როცა გენგრევა ცხოვრება, (ოღ.) სამყარო ორად იყოფა. იგი მუდამ მზადაა გამოგიწოდოს ხელი.

იოანემ ისიც იცოდა, რომ ადამიანი ბოლომდე გულწრფელი ვერ იქნებოდა ვერასოდეს და ეს ბუნებრივად მიაჩნდა, რადგან ისევე, როგორც გარე სამყარო ფლობს საიდუმლოებას, რომელსაც არავის გაანდობს, ყოველ ადამიანსაც, როგორც მცირე სამყაროს, აქვს უფლება ჰქონდეს ისეთი რამ, რასაც სხვას ვერ გაანდობს, მაგრამ იოანე მაინც ცდილობდა ამ საიდუმლოების ამოცნობას და ამიტომაც მოსაუბრის მრავალსიტყვაობაში კი არ ეძებდა არსებით მამოძრავებელს, არამედ სიტყვებს მიღმა ისედაც გონების თვალთ, რამეთუ ყველაფერი სათავეს უთქმელიდან იღებდა, იქიდან გამომდინარეობდა და ამდენად მის მგზნებარე ბუნებას სიცივის ელფერი დაჰკრავდა.

უყვარდა თავადს ადრინდელი ფილოსოფოსების დამოწმება, იოანე კი ერთთავად კლემაქსს იშველიებდა და იტყოდა:

— რად გვინდა აგრე შორს წასვლა, ჯერ კიდევ გუშინ ჩვენთან იყო ბრძენი, რომელიც ამბობდა, რომ „ღმერთის ჩვენთან ყოფნის საბუთებს ჩვენ არ ვეძებთ, ჩვენ ვგრძნობთ, რომ მის ნათელში ვიმყოფებით, ჩვენ ბრძემბი არა ვართ — საგნებს მხოლოდ შეხებით რომ შე-

ვიცნობდეთ, ჩვენ ვხედავთ უფსკრულს და ვერიდებით, კლდეს შევხედავთ და არ მივასკდებით.

ამგვარ საუბარში მთელს იერუსალიმს მოივლიდნენ. მთას მიჯარული ტყეებიც თავიანთი ნაირფერადოვნებით, თუ მინდვრის ყვავილები სურნელებით, ფრინველნი გალობით უზენაესის, მარადიულის ჯადოსნურ ძალას ემოწმებოდნენ და ეს მეგობრობაც არც როდის შეწყდებოდა, ცხოვრებას თავად რომ არ დაედო ზღვარი.

ერთ დღეს თავადმან ინდომა გაეცნო იოანესათვის თავისი თანამეცხედრე, ქალი უზადო სილამაზისა, ნატიფი გემოვნებისა, რომელსაც მათზე ნაკლებად არ აღელებოდა ჭეშმარიტების მიგნება. მეტად აღონებდა, რადგან უშვილო იყო, დედობის ღირსებას მოკლებული.

იოანე განაცვიფრა ქალის გარეგნობამ; არა მისმა სილამაზემ, არამედ მსგავსებამ იმ ქალთან, რომელიც ხატად ჰქცეოდა, ახლა კი თითქოს მის ორეულს უცქეროდა, დაიბნა, საკუთარი საიდუმლოების საშინელების საშიშროება იგრძნო. ქალის ხმა მის გარეგნობას ჩრდილავდა, მისი ხმის ბგერების ჰარმონიულობა იოანეს გულის სიღრმეში განცდილს ეხამებოდა. არავისში არ განმეორდებოდა, ეს შეუძლებელი იყო, შეუძლებელი იყო ორი სრულიად მსგავსი ადამიანის არსებობა — ეს სომ ბუნების ერთ-ერთი საოცრებათაგანია!

მაგრამ ბაგეთა წყობა, თმის ვარცხნილობა, მისი თანამგრძობი ღიმილი, მომხიბლავი მზერა, გამომწვევი სინაზე, ნაბიჯის სიმსუბუქე, ჩაცმულობაც კი — იგივე მაქმანშემოვლებული ცისფერი კაბა, ოქრონემსული მოსასხამი — ჩაფერფლილ მოგონებათა მთელ სამყაროს უცხოველებდა, გულის სიმებს ქლერებდა, წინააღმდეგობათა მთელ ჯარს უმხედრებდა, მალ-მალ ქალისაკენ თვალს აპარებდა, უნებლიედ აცქერდებოდა, თითქოს რაღაც უნდოდა ეპოვნა მასში.

უსშირა იოანემ იერუსალიმის და თავადის მონახულება. შეუმჩნეველად ყოველდღიურობა ქრებოდა და რჩებოდა მხოლოდ სილამაზე და აღფრთოვანება. ესმოდა სამყაროს იდუმალების ექო.

იოანეს თითქოს თან შემოჰყვებოდა ვნებათა ამშლელი ნაკადი და ქალიც რაღაც უჩვეულოს შეიგრძნობდა. იოანეს დაკვირვებული და გაკვირვებული მზერა ქალისათვის შეუმჩნეველი არა რჩებოდა, თრთოდა, უჩვეულო სინაზის გრძობა ეუფლებოდა. თავსაც უკვე მხოლოდ მაშინდა გრძობდა ბედნიერად, როდესაც იოანე ეწვეოდათ, გულს ია-ვარდი ეფინებოდა მისი მჭერმეტყველებისას.

არც თავადს გამოჰპარვია მეგობრის მალული მზერა, - მეუღლის უჩვეულო აღფრთოვანებამ, ჭარბმა სიცილმა, გაუთავებელმა საუბარმა იოანესთან, იჭვის ნესტარი დაასო, მაგრამ არას იმჩნევდა, ფიქრობდა, ნაჩქარევი მოქმედებით სასაცილო არ გამხდარიყო, ღონდებოდა კი. იოანეს ნათელ სახეს რომ შეხედავდა, თვალს თამამად უსწორებდა, ღრუბელი გადაეყრებოდა, გადასწყვეტდა, რომ ეს ყველაფერი მისი მეუღლის მშვენიერების ბრალი იყო. დარწმუნდა კიდევ, რომ იოანესთან მისი იჭვები შეურაცხმყოფელიც კი იქნებოდა და მასაც დაამცირებდა, თავადს კი დიდსულოვნება და ნდობა უფრო დამ-

ვენდებოდა, და იგი თავის ღირსების შენარჩუნებაზე ფიქრობდა მხოლოდ.

მდგომარეობა მართლაც რომ არასახარბიელო აღმოჩნდა სამივესათვის.

ჯერ, თითქოს მსუბუქმა ნიავმა დაჰბერა, ოდნავ შეარხია ცხოვრების მყუდრო ყურე, მაგრამ ერთ დღეს უეცრად ამოვარდნილმა ქარიშხალმა ისე შორს გაიტაცა ქალის ფიქრები, გულის სიღრმეში ჩანავლებულმა გრძნობამ ისეთი ძალით ამოხეთქა, რომ აფიქრებინა, იქნებ ახლა მაინც გავხდე დედაო... მერე ისევ სურდა როგორმე ეს მაცდუნებელი ფიქრები ცხრაკლიტულში ჩაემწყვდია, მაგრამ სხეული არ ნებდებოდა, აზვირთებულ ვნებათა ტალღები გულს ყოველის მხრიდან აწყდებოდნენ და ვნებათა პერობილებაში მოქცეულ ფიქრებს, ვნებათა ჭიდილს ქალი თავს ვერ ართმევდა.

იოანე ყველაფერს ამჩნევდა და რატომღაც საფრთხეს ვერას გრძნობდა, ქალის ზნეობრივი სიმტკიცის, ნებისყოფის იმედი ჰქონდა, იმედი ჰქონდა საკუთარი თავისაც, რამეთუ ქალთან სიანჭლოვეს არ ეძიებდა, იგი მასში შორეულს ელაციცებოდა და მას როგორც ქალს, კიდევაც გაუბოლდა, მისთვის სიყვარული უკვე ვნებიანობას აღარ ნიშნავდა, მაგრამ მეგობრის წინაშე მაინც რაღაც უხერხულობას გრძნობდა, რადგან იმაზე მეტს ფიქრობდა ქალზე, ვიდრე ეს მეგობარს მოეწონებოდა. და გადაწყვიტა, რაც შეიძლება ნაკლები ყურადღება მიექცია ქალისათვის. ქალიც თითქოს მოერია თავს, დასძლია პირველი შემოტევა და ჩვეული სიდინჯით იქცეოდა. ეტყობოდა კი რომ მასში რაღაც ცვლილება მომხდარიყო.

იოანესდა საბედნიეროდ საოცარი რამ ხდებოდა, როგორც კი ქალი დაილაპარაკებდა, მისი ხმა ქარივით ფანტავდა იოანეს მგზნებარებას, და ფრთაშესხმული აღტაცება დარბაისლურ მდინარებას გზას უთმობდა, ეს სომ მაინც ბორანი იყო და არა ნავი, რომ აფრა აშვებულს გუნების მიერ გაეცურა! იგი მხოლოდ ფიქრთა მდინარეს გადალახავდა და გაიფიქრებდა:

— ჩვენ ხომ ოცნებებით, წარმოსახვებით ვცხოვრობთ და არა შიშველი სინამდვილით!

იოანეს უნდოდა ქალის მიმართ გამოეჩინა ის უწმინდესი, უფაქიზესი გრძნობები, რაც იმ გაუჩინარებულ ადამიანისათვის ვერ გამოეთქვა და მხოლოდ ახლა ხვდებოდა რა სისავსით, უბიწოებით, სილამაზით შეიძლებოდა მათი ერთად ყოფნა!

ქალი ეკითხებოდა:

— რა დაამტკიცებს ცნობასა ღმრთისასა?

— სოლომონ ბრძენზე უკეთ რა უნდა გითხრათ?

— მაინც, გვითხარ ვითარ სცანით აღდგომა შემდგომ სიკვდილისა?

უპირველეს საცნაურ არს იმისა გამო ესოდენ დიდსა და საოცარსა ხელოვნებას, როგორიც არის სიცოცხლე, შემოქმედი მიწის საპა-

ტიოდ არ შექმნიდა, გასახრწნელად არ გაიმეტებდა. არსებას სხეული, როგორც იარაღი, მიენიჭება ამ რთულსა და მრავალფერ სამყაროში თავისი სულის გამოსაძერწად, პიროვნების გამოსაჭედად, რომ სამარადისოს თავისი შესაფერი ადგილი მოიპოვოს და ორთა საქმეთაგანაც საცნაურ არს ეს, რამეთუ განწვალებულ არს ცხოვრება მორჩილთა, ხოლო ურჩთა ვხედავთ შვებითა, ამით უწყი, რამეთუ მართალმან მან ღმერთმან მორჩილთ, აღდგომასა მას უმეტესი პატივი უყოს, ხოლო ურჩნი იგი დასაჯნეს საქმეთა მათთაებრ. მეორედ — საცნაურ არს ქადაგებთა მოციქულთა, რომელნი თვითმხილველ იქმნენ დიდებისა ღმრთისასა, აჩვენებდნენ ნიშნებსა და სასწაულებსა.

ქალმა ამ განმარტებაში, მაინცდამაინც სარწმუნო ვერა დაინახა რა, მაგრამ აღარ ჩაეძია და ახლა შეეკითხა:

— მითხარ მე სახე სიბრძნისა და რად აქვს ნათესავსა ამას ჩვენსა სიბრძნე სიყვარულისათვის კერპთა მიმართ?

იოანემ აქ უკვე გადასწყვიტა იგავით ეპასუხა.

— კაცმან ვინმე შეიპყრა მჭურინავი და დაჰკვლიდა მას, ხოლო მჭურინავმან ჰრქვა: რაისათვის გნებავს დაკვლა ჩემი? რამეთუ არა რაა ჩემთან გასაძღომელი შენი? უკეთუ განსწავლნე სამნი მცნებანი და უკეთუ დაიმარხნე, სცხონდე და სარგებელ გეყოს და უთხრა: „აუწითომელსა ნუ ეწუთები, გარდასულსა ნუ ინანი და რომელი შენთვის არა ვინდოდეს ბოროტი, ნურც სხვასა უზამ და სცხონდე“. ხოლო მან რა განუტევა მჭურინავი იგი, დაჯდა სიმალღესა რტოთა ხეთასა, რამეთუ უნდოდა გამოცდა კაცისა მის, თუ ვითარ დაიმარხნეს მცნებანი იგი და ხმა უყო მალლით: „კაცო, უკეთუმცა ცოდნილ იყავ და მე დაგეკალ, ჩემსა ინჩაყვსა იდვა მარგალიტი სირაქლემისა კვერცხის ოდენი და იგიმცა შენ დიდი საფასეს შეგებნდა“. და ვითარცა ესმა კაცსა მას, იწყო სინანული და ენება შეპყრობა მისი კვალად და დაკვლა და ჰრქვა კაცმან მან: „ვინაიდან მასწავენ მცნებანი, სხვა არა მაქვს ნაცვალი, რათა მოგოზლო მის წილ, აწ მოვედ სახედ ჩემდა, რამეთუ ზამთარი ესე ფიცხელ არს და მე კეთილად გიღვაწო, განგისვენო და განგიტევო“. ჰრქვა მას მჭურინავმან: „ცუდ არს სწავლა მცნებათა ჩემთა შენდა მიმართ, რამეთუ სამივე მცნებანი აწვე დაჰკარგი. პირველი იგი: რამეთუ გარდასულ არს გაშვება ჩემი და აწ ინანი; მეორე — შეპყრობა ჩემი არს და შეუძლებელ გსურს კი შემიპყრო; მესამე — სიკვდილი შენი არა გნებავს და ჩემსა დაკვლასა ჰლამობ. და აწ ვითარ გწამს, თუ არს ჩემსა ინჩაყუსა მარგალიტი ვითარცა სირაქლემისა კვერცხისა ოდენი, რამეთუ თვის ნაკრტენითურთ არცა ხოლო თუ ნატამალი ვარ სირაქლემისა კვერცხისა“. ასევე უკეთუ ასწავლიდე კაცთა უგუნურთა, არავე ირწმუნებენ და გარდაჰხდებიან მცნებათა ღმრთისათა და თავის თვისით მოგონებულსა დაამტკიცებენ, რამეთუ ხელითა თვისითა შექმნიან კერპნი და ღმერთად თავყანს სცემენ და არა გულისხმა ჰყოფენ ვითარმედ ერთი არს ღმერთი დამბადებელი და სხვანი დაბადებულნი, იგი მხოლოდ უჟამო და სხვანი ჟამიერ, ყოველი

მის მიერ შეიქმნა და თვინიერ მისსა არცა ერთი რა იქმნა და განუშზა-
დებია მორჩილთათვის საშუებელნი, ხოლო ურჩთათვის სატანჯველნი.

— მადლობა ღმერთს, ჩვენ უგუნურებად ვერ შევირაცხებით, რამე-
თუ, უფალმა იოანემ თავად უწყის, არა ვართ სკონ კერპთაყვანის-
მცემელნი, ერთი ღმერთი გვიწამებია და მხოლოდ მასთან მისასუ-
ლელ გზას ვეძიებთ, — კიდევაც გამარჯვებულის ღმილით შესედა
იოანეს და უთხრა: შენა ხარ ჩვენი მეგზურიო.

ეს სიტყვები ისე ორაზროვნად იყო თქმული, თითქოს დამცინავ
კილოთიც კი, რომ იოანეს გულის სიღრმეში გააჟაჟრა, სულის ამბოხ-
მა გამოაფხიზლა და ინარჩუნებდა რა გარეგნულ შეუვალობას, მეტის
სიდინჯით პასუხობდა ქალს, რომელიც კვლავაც შეკითხვებით მიმარ-
თავდა:

— რა არს სიკვდილი?

— რა არს სიკვდილი? — გაიმეორა კითხვა იოანემ და მის ხმაში
უკვე მრისხანე ბეურები გაისმა, უნდოდა ეთქვა, რომ არის ორი სიკვ-
დილი, ერთი ყველასათვის გარდუვალია, მეორე კი ყველას არ შეეხება,
ისიც უნდოდა ეთქვა, რატომ და როგორ, მაგრამ სთქვა მხოლოდ:

— ...სიკვდილი ზღვარია, საიდანაც იწყება სამარადისო. ქრისტეა-
ნობა კი ხიდია ცხოვრების მდინარის ერთი ნაპირიდან მეორეზე გა-
დასასვლელად, ხიდი, რომელზედაც სიკვდილი ყველას ერთნაირად
შეაყვარებს და, თუ ვერ გაიგებ რა არის სიკვდილი, ვერ ჩასწვდები
უკვდავებას, ვერ მონასავ სწორ გზას. ქართველი იტყვის კაცი კი არ
მოკვდა, გარდაიცვალა, ანუ ფერი იცვალა და მხოლოდ...

აღარ დაამთავრა იოანემ, გრძნობდა მეტი აღარ შეეძლო და ერთი
სული ჰქონდა, რაც შეიძლება მალე გაცლოდა იქაურობას.

იოანე იმ დღეს მოსწრაფებულად წამოდგა წასასვლელად, არც მათ
დაუყოვნებიათ, არ უთხოვიათ დარჩენა, აშკარა იყო, მეგობრობა გა-
იბზარა.

დამშვიდობებისას თუ თავადს მედიდურობის ღმილი უკრთოდა
თვალთახედვაში, იოანეს სეტყვის ღრუბელივით ჩამოსწოლოდა შიში,
სულის სამყაროს ნგრევაზე რომ აფიქრებიანებდა და ესეც დასტური
იყო თავისი გადაწყვეტილების სისწორისა.

სინას მთისაკენ გზას კი უკვე რალაცისაგან განთავისუფლებულის,
სილალის გრძნობითაც კი მიჰყვებოდა. გონება მოეხმო განმგებელად.
გრძნობებზე და საკუთარ თავზე ბასრობდა, ღმერთს ჰმადლობდა, რომ
ხიფათს განარიდებდა და ვიდრე სენაკის კარს შეაღებდა, მის სულ-
ში უკვე სინათლე ეღვარებდა — ეს იყო შეუჩერებელი სწრაფვა შე-
უცნობელი მიზნისაკენ, ეს იყო სულის უსაზღვრო ქროლვა, ძიება ნავ-
საყუდელისა მეორე ადამიანში, ეს იყო თავდავიწყება, იგი თავის სა-
ოცნებოს არასოდეს უღალატებდა და ეს გატაცებაც ისევ მისი ხატების
თაყვანისცემის მოასწავებდა და იმ ღამეს სოლომონის „ქებათა ქებას“
შეასხამდა მის გაცოცხლებულ ხატებას:

„ასულწო იერუსალიმისანო, სად წავიდა მოყვასი შენი, კეთილო
5. ქ. ნუცუბიძე

დედათა შორის, სად მიდრკა მოყვასიან შენმან და ვიპოვო იგი შენ-
თანა, ვითარცა საყოველნი კედარისანი და ვითარცა კრეტსაბმელა
სოლომონისა! შენ, მასლობელო ჩემო. უმჯობეს არიან ბაგენი შენნი
უფროს ღვინისა და სურნელება სამოსელთა შენთა ვითარცა კეთილ-
სუნელება ლიბანისა, მსგავს არს მოყვასი ჩემი ქურციკსა, ნუკრსა
ირემისასა, მათა ზედა ბეთლემისათა... მოყვასო ჩემო, ვითარცა შრო-
შანი ეკალთა შინა... მე მიძინავს და გული ჩემი მღვიძარე არს. სმა
მოყვასისა ჩემისა ჰრეკს კარსა შინა. ვეძებდი მას და არა ვპოვე იგი.
ვინ არს ესე, რომელი აღმოიჭვირვების ვითარცა ცისკარი, ვითარცა
სათნოება, ვითარცა მთოვარე, რჩეული ვითარცა მზე, მშვენიერ — ვი-
თარცა იერუსალიმ, საკვირველი — ვითარცა განწყესებული. წყლულ
ვარ სიყვარულითა, რამეთუ ძლიერ არს ვითარცა სიკვდილი სიყვარუ-
ლი, ფრთე მისი ფრთე ციცხლისა, ალი მისი არ ძალუძს წყალსა მრ-
ვალსა დაშრეტად სიყვარულისა და მდინარე ვერ წარღვნის მას...”

თ ა ზ ი IX

ს ე რ ბ ი

მამა თეოდორე ხალისიანად დასდგომოდა გზას ვინმე სერგის სა-
ძებნელად. სიციხით გათანგულ დღეს პირქარი აგრილებდა. ათასფრად
გადაფეთქილი მთა-ველი გულის სიღრმეში მიყუყუულ იდუმალებას
მათთან სააღერსოდ უხმობდა, ზღვით მონაბერ სურნელს იყნოსავდა,
ფრინველთ უღურტულთან ერთად საგალობელს ღიღინებდა.

მიდიოდა, მიდიოდა და ალექსანდრიასაც მიაღწია. კითხვა-კითხ-
ვით სერგისაკენ გზას იკვლევდა.

ერთი ხნიერი დედა ქალი კი აჩრდილივით ასდევნებოდა, იგრძნო
თეოდორემ მისი გამჭოლავი მზერა და მოუხედა.

ქალი იგი სახეზეც არ შეხედავდა, წყრომით კი შეაგონებდა:

— ძეო ჩემო, ჭეშმარიტად მონაზონი ხარ, ახალგაზრდა და არაა
საჭირო ქალაქს გარს უარო. არ იცი, რომ მონაზვნობას სამს განმარ-
ტოვება? ნუ დადიხარ და სოფლებში ღამეს ნუ ათევ, უდაბნოშია შენი
თავშესაფარი.

— იმ დღიდან, რაც მონაზვნობა მივიღე, არ მაგონდება ცოდვილ
ადამიანებს დავახლოვებოდე, — აუღელვებლად მიუგო თეოდორემ.

მაგრამ მოხუცი ისე აბუტბუტებულყო, არ ცხრებოდა.

თეოდორე გააბეზრა მისმა შეუჩერებელმა შეგონებებმა და უკვე
გულმოსულმა უთხრა:

— მიხსენ ამ შენს ლაპარაკისაგან, თუ შეგიძლია დამეხმარე, მე-
ბატრაკე სერგის ვეძებ!

მაშინ, ქალმა თითით ანიშნა:

— აგერ, შენი მეპატრაკე, შესაკრებელთან ზის.

თეოდორემ მის კილოში დაცინვა ამოიკითხა და როგორც კი შესაკრებელს მოუახლოვდა, შემოესმა, როგორ ხმამაღლა და ნიშნის გებით გადაიხარხარა იმ ქალმა, გაიგონა კიდევ მისი გესლიანი სიტყვა: გიცნობთ, გიცნობთ, რა წმინდანებიცა ხართო! თეოდორეს უეცარმა აზრმა ისეთი ძალით გაუელვა, რომ თვალები გაუნათდა, მიხვდა, ეს ქალი სწორედ ის უნდა ყოფილიყო, ვინც ცილი დასწამა, და შიშმა შეიპყრო, ვაითუ, ყრმას მიაგნოს, შეიტყუოს და მაშინ თეოდორე ყველაფერს ერთბაშად ჰკარგავდა. ახლა იგი სერგიზე სულაც აღარ ფიქრობდა, ვერცკი შეამჩნია, როგორ აღმოჩნდა სერგისთან. ვერ ხედავდა ამ განცხრომით მოღიღინე ადამიანს, განცვიფრებით რომ შეჰყურებდა მას.

სერგიმ იფიქრა, მეტად მორცხვიაო, და სქიმას მოსწია, თითქოს უნდოდა ეთქვა: შენისთანებიც გვინახია ჩვენს საშვებელშიო.

თეოდორე გონს მოეგო და დაბნეული ხმით ჰკითხა:

— შენა ხარ, სერგი?

— ჰო, მე ვარ.

— სათქმელი მაქვს შენთან, — ძლივს წარმოსთქვა თეოდორემ.

— კეთილი, დაჯექ, საიდან მოხვედ და რა გსურს ჩემგან? — ისეთი თანამგრძობი ღიმილით წარმოსთქვა სერგიმ, თითქოს წინასწარ იცოდა, რაც უნდა ეთქვა თეოდორეს.

— აქ ვერაფერს გეტყვი, — ამბობდა თეოდორე და თან დაბნეულად მიიხედ-მოიხედავდა, ის ქალი კიდევ ხომ არ მითვალთვალეხსო, და შევიდნენ ქულბაქს.

სერგის უგემურად ეღიმებოდა, უბრძანა მექულბაქეს, საჭმელთან ერთად სასმელიც მოეტანა. ფიქრობდა, ბერს გამბედაობა მიეცემა და სათქმელსაც დროზე იტყვისო.

მშიერმა თეოდორემ მორჩილად გაიზიარა მასთან ტრაპეზი, სასმელს კი მოერიდა.

სერგის ღვინის ციალი უფრო ხიბლავდა, ვიდრე თეოდორესთან საუბარი, საჭმელსაც ისეთი ნეტარებით ეტანებოდა, თითქოს უწმინდეს საქმეს აღასრულებსო.

თეოდორე ისევ მოკრძალებით უმეორებდა:

— სიტყვა მაქვს შენთან, სახლში წამიყვანეთო.

სერგიმ უნდობლად გახედა, გაკვირვებული მზერა შეაჩერა მასზე, თვალებში ცნობისმოყვარეობამ გამკილავად გაიკიაფა, მხარზე სელი ისე დაჰკრა, გეგონებათ თავისი ფიზიკური ძლიერება უნდოდა ეგრძნობინებინა.

თეოდორე წელში მოიხარა და ქვევიდან გახედა.

სერგიმ თავი მოიფხანა და წამოსასვლელად რომ წამოდგა თქვა:

— თავაზიანობას თავაზიანად ვუპასუხებ, დარტყმას — დარტყმით-ვე მოვიგერიებო.

მოვიდნენ სერგის სახლშიც.

თეოდორემ აღარ იცოდა, საიდან დაეწყო და შეეკითხა:

— ღმერთი თუ გწამსო?

— ღმერთი, ბრიყვსა და უბირსაც კი სწამს და მე როგორ უნდა შევიტანო იჭვი მის არსებობაში?! — გაიკვირვა სერგიმ.

— მე გეძებდი, როგორც მეპატრაკეს, ტყავით მოვაჭრეს, შენ კი შესაკრებელის პატრონი ყოფილხარო, — თქვა თეოდორემ და სახეში ჩახედა.

— ჰო, ჩემი ხელობა ტყავით მოვაჭრობაა, ფული რომ დამიგროვდა, შესაკრებელი შევისყიდე. უფრო სარფიანია, შრომაც ნაკლებია, ტყავის სუნსაც სუნამოების სურნელება ვარჩიე, ასე უფრო საამოა ცხოვრება, — მიუგო სერგიმ და მუხუდოს ტკვერვა დაიწყო, თან ფიქრობდა: ამას რა, ჩემთან მოსურვილება ხომ არ განუზრახავს, მამათმავალი არ იყოსო და ცერად გახედა.

თეოდორემ მის გამოხედვაში უკვე ნათლად ამოიკითხა მასპინძლის ფიქრები და რომ არ გასცინებოდა, თვალთახედვა მოარიდა, დაბლა დახარა თავი, რამაც სერგი კიდევ მეტად დააეჭვა, თავის გუმანში დაარწმუნა და მუხუდოს ტკვერვას უმატა.

თეოდორეს მუხუდოს ტკვერვა აღიზიანებდა, ზვიგენის კბილების ელვარება აშფოთებდა და შიმნარევი ხმით წარმოსთქვა:

— მერე და, ხომ ცოდვაში ჩამდგარხარ, ტყავით ვაჭრობას ადამიანის სხეულით ვაჭრობა გიმეჯობინებია.

— ვეჭვი! — ისეთ რიხიანად წარმოსთქვა სერგიმ ეს ერთმარცვლოვანი სიტყვა, რომ თეოდორე ახლა გაკვირდა.

— შენ, თუ იცი, რა არის ფსალმუნი? — უნდოდა თეოდორეს დავითი დაემოწმებინა, მაგრამ სერგიმ არ აცალა:

— მე რად უნდა ვიცოდე, მეღავითნემ რაღა გააკეთოს? კაცო ღმერთისაო, იმაზე, რასაც ღვთის მსახურნი ცოდვას იტყვიან, უმეტესი ადამიანური თვისებებია. მე ხომ მოძალადე არა ვარ, თვითონ მოდიან და მადლიერებიც მიდიან, საწყლები არიან, აქ საშვებელს ღებულობენ, ზოგი ადამიანის მოდგმის გაგრძელებისათვისაც კი მოდის.

თეოდორემ იფიქრა, ეს ვის მივმსგავსებივარ, ლამის ნადირს ვედრებო, მაგრამ მაინც თქვა:

— ხო, მაგრამ, სიცოცხლეცა და სინდისიც ხომ ერთხელ ეძლევა ადამიანს სამარადისოს მოსაპოვებლად?!

სერგის გამქირდავად გაეცინა:

— მართლაც ერთხელ ცხოვრობს ადამიანი და რამდენი ზღაპარიც არ უნდა მოჰყვე, სიკვდილთან ერთად ყველაფერი ქრება. სულელი იქნება ის მამაკაცი, რომელსაც სიამოვნების საშუალება მიეცემა და უარს იტყვის. კეისრები და შაჰები ჩემზე ბევრად ჭკვიანები არიან და მეტ ფუფუნებაშიც ცხოვრობენ, — ცბიერი სერიოზულობით გახედავდა, გულგვამში კი დაუოკებელი სიცილი უტრიალებდა.

საწუთროს შემტკბობელი ადამიანის უსახურება, ცხოვრების ცვალებად ტალღებს რომ აჰყვებ-დაჰყვებოდა, თავისთავის თაყვანისმცემელი უფრო საზარლად გამოიყურებოდა, ვიდრე ცეცხლისა, თუ გინდ

მთვარისა. მასთან ღვთაებრივ საგანზე სიტყვის ჩამოვლება, ღვთისავე შეურაცხყოფად მიიჩნია თეოდორემ. გუნებაწამხდარმა ზმანებაც ცდუნებად ჩათვალა, წასვლა დააპირა და უთხრა:

— ცხოვრება უფრო მნიშვნელოვანია, ვიდრე ჩვენ ვფიქრობთ და ნუთუ საწუსარი არაფერი გქონია?

— საწუსარი ვის არა ჰქონია, რომ მე არა მქონდეს? — უპასუხა სერგიმ.

— ჰოდა მოინანიე, თუ რამ ცოდვა ჩავიდენია და ნახავ, რომ სინანულით მიღებული შვება ყველა სიამოვნებაზე უმეტესია.

— შურისგებაში რომ შვება მიგრძენია, — ამბობდა სერგი, — იმაზე უმაღლესი რაღა იქნება? ბოღმა ბაღღამივით რომ დამინთხევია, იმაზე მარგებელი რამ მაღამო იქნება? რა გამოსილაქებია, რა ალიყური მოჭმევია! ამას წინათ ისეთი ვდრუზე ჩემს გამჭირდავს! — ამბობდა სერგი და სიცილისაგან ლამის ყბები მოჰქცეოდა.

თეოდორეს ტანში ჟრუანტიელმა დაუარა. შეტრიალდა.

— ...ჰო, — განაგრძობდა სერგი, — ბოროტება ზოგჯერ შვებასაც ნიშნავს, მაშინ მე ვლოცულობ კიდეც სამადლობელოდ.

— ადამიანს განსოვდეს ბოროტება და ლოცულობდე, იგივეა, ზღვაზე სთესდე და მოსავალს ელოდე! — ამბობდა გაოგნებული თეოდორე.

— მე არ ვიცი, შენ რას ლაპარაკობ, — უკვე ბრაზმორეული ამბობდა სერგი, — მაგრამ ვიცი, რომ კაცი ვარ და ჭკუაც სწორედ იმისთვისა მაქვს, რომ, რასაც ვაკეთებ, მერე აღარ ვინანო.

— სინანული და მონანიება სულ სხვადასხვაა, — ამბობდა თეოდორე, მაგრამ გრძნობდა კი, რომ უადგილო, უსარგებლო იყო ახლა მისი ქადაგებანი, ისევე, როგორც ცივი რკინის გამოჭედვა იქნებოდა შეუძლებელი.

— მე დამახრჩობდა ეს ცხოვრების ზღვა, — განაგრძობდა სერგი, — ისე რომ არ ვიქცეოდე, როგორც ჩემი გუნება მთხოვს.

— ადამიანს ცხოვრების ზღვა კი არ ახრჩობს, — ამბობდა უკვე სახეშეშლილი თეოდორე, — არამედ, საკუთარი სულის წუმპედ ქცეული გუბე.

— თქვენში რომ მამათმავლობას ამბობენ, იმას რა მონანიება შველის?! ჩალადაც არ მიღირს ეგ თქვენი სინანული?! — ცხარობდა სერგი და უკვე მოთმინებიდან გამოსულს თვალთაგან ნაპერწყმები სცვიოდა.

— თუ გაცხადდა, იმას აღარაფერი შეეღის, მას ღვთის სამსახური ეკრძალება, — სთქვა, უკვე კარებთან მისულმა თეოდორემ.

სერგის გული ყელში მობჯენოდა, სიტყვის დამთავრებას აღარ აცლიდა. ახლოს მოვიდა მასთან, ძერასავით დააცხრა, მაგრამ მხოლოდ შეანჯღრია, რადგან სტუმრის თვალებში რაღაც შემაკავებელი ამოეკითხა და ხელი შეუშვა:

— ამ ყბედობისათვის მოხვედი აქ? ეს იყო შენი საქმე? — ღრიალებდა სერგი.

ამ მუქარამ თეოდორეს ხასიათი გამოავლინა — გამომწვევი იერი მიიღო, და სერგიმაც უკან დაიხია.

— გაფიცებ, — დაკვირვებული მზერით ამბობდა თეოდორე, — მიტხარი ცხოვრება შენი, არა დაფარო რა. თუ გაგიკეთებია სიკეთე ვინმესათვის?

სერგი მიხვდა, რომ თეოდორეს თავისი სათქმელი ჯერ არ ეთქვა და ოდნავ ლმობიერი, მომთმენი ღიმილით უპასუხა:

— შენი თვალით ნახე მოედანზე მებაძვთა თანა განვცხრებოდი, სხვა რაღა ცნობა გნებავს?

— აი, რა მნებავს, — ლამის ბრძანებით წარმოსთქვა თეოდორემ, — ქრისტე არს ჩვენს შორის, — პირჯვარი გადაისახა და განუცხადა მოსვლის მიზეზი.

სერგიმ სულთ ითქვა, სახე გაუნათდა, ღმრთივ ბრძენად დაინახა ის, ვისაც ეს არის ყბედი უწოდა.

— შემინდე, ძმაო, უკეთუ ესე ესრეთ არს, — თავი დალუნა სერგიმ, — ერთხელ მაინც რომ მენახა ღმერთი!

— თუკი ჭეშმარიტად ინდომებ, მისი დანახვა ყველგან და ყოველთვის შესაძლებელია, — სთქვა უკვე გამხნეებულმა თეოდორემ.

სერგი ერთხანს სდუმდა, და მერე ერთბაშად დაიწყო:

— ერთხელ ვიხილე ქალი, ფრიად მშვენიერი, ქსოვდა იგი ფასითა. მე გულმან მითქვა მისთვის და ვუთხარი იმ დედაკაცს, რომელთან ერთად ქსოვდა: ვინ არის ეს ქალი? ამ ქალაქისაა, მითხრა და ვსთქვი: უთხარი, რათა დაწვეს ჩემთან, ხოლო მან მითხრა: არ შემიძლია ამის თქმა, იგი წარჩინებულთაგანია და თუ დღეს ამ ზომამდეა დასული, ეს იმიტომ, რომ მისმა ქმარმა ისეხსა მთავრისაგან 100 დრაჰკანი, ვერ დააბრუნა და მთავარმა იგი შეაყენა საპყრობილეში, მასთან მისი ორი ბეც დაიმონა, ამის გამო ეს ქალი ასეთ ჯაფაშია, რათა რითიმე შესძლოს მათი გამოსყიდვა. რა მოვისმინე ეს, მაინც ვთქვი: შენ უთხარი, რომ მოვიდეს ჩემთან და მას 100 დრაჰკანს მივცემ. ხოლო დედაკაცმა კვლავ მითხრა: არცა მგონია, რომ ყოს ესე, რადგან ვიცი, ფრიად ღირსეულიათ. მე კი ისევ გავეუმეორე, მიდი და უთხარი, უარს იტყვის თუ არ იტყვის, ეს შენ არ მოგეკითხება, მაშინ დამმორჩილდა და უთხრა მას. ხოლო იმ ქალმა რა სულ ითქვა, ტირილით თქვა: „ღმერთი მოწყალეა და შემინდობს ამ ცოდვას სამთა სულთათვის, უწყის მადლმან, რომ დღემდე არ ვიცი სხვა მამაკაცი გარდა მეუღლისა ჩემისა“. მე წავედი სირბილით, ავიღე ასი დრაჰკანი და მივეცი ხელში. მან. მიიღო ის დრაჰკანი ცრემლითა და სულთქმითა, შევიდა სენაკში და თქვა: „უფალო ღმერთო, შენ უწყი წუხილი ესე ჩემი და შემინდვე ცოდვა ესე ბოროტი“. და რა მესმა ეს ხმა, დაიკოდა გული ჩემი და ვთქვი ჩემს გონებაში: უკეთუ ეს ესე წუხს, მაშ, რად არ მივალ მათთან, რომელნი ჩემს ხელთ არიან, ვისთანაც მინდა აღვისრულებ ნებასა ჩემსა? და გავუშვი ქალი იგი დრაჰკანით უვნებლად და წარვიდა და განათავისუფლა ქმარი და მისი ყრმანი მისნი.



თეოდორეს თვალები გაუბრწყინდა და თქვა:

— შენ მარტო სიკეთისათვის კი არა ხარ საქები, არამედ უმეტეს იმისათვის, რომ შეგებლო ჩაგედინა ბოროტება და არ ჩაიდინე. ბოროტებაა, როდესაც შეგიძლია სიკეთის გაკეთება, შენ კი თავს იკავებ. სერგი თითქოს არც უსმენდა მას და განავრძობდა:

— უკეთუ, ეს მიუთვალავს ღმერთსა და ამის გამო ღვთისა მიერ მოხვედ ჩემთან, მოვიტხოვ სხვა: იყო მთავარი ერთი მძლავრი, შორს მდგომი ეკლესიისაგან. ერთ ღღეს გაიარა ამას ქალაქს, სადაც არის მონასტერი დედათა და იხილა მათგანნი მონასტრის ეზოს. გულმა უთქვა მათთვის. აღარცხვინა და ჰპოვა 70 ქალწული. მაშინ მოვიდა ჩემთან და მიბრძანა: როგორც გნებავს ყავ და ოდეს ვითხოვო მომიყვანდი მათ, ვიდრედის გასრულდეს რიცხვი ესე 70-ისა. როცა ვიხილე და მესმა, ვთქვი გონებასა ჩემსა: ვაჰ მე ცოდვილსა ამას! რამდენი წელი მარწვითა და ყოვლითა შრომითა დაიცვენ თავნი თვისნი უბიწოდ და ჩემი ძალით უნდა შეივინენ ბილწისაგან. ვიფიქრე ბევრი, ვითოვუე ღვთისაგან რათა მომიცეს ცნობა მონაზონთა განსათავისუფლებლად ამ შეგინებისაგან, ხოლო ღმერთმან მომცა აზრი კეთილი. აღვდეგე და მივედ მათთან, მეძავთან, რომელნიც ჩემს ხელთ იყვნენ. განუყავ მათ ყოველი მონაგები ჩემი ძალით დავარწმუნე, რათა მოიპარსნონ თავი და შეიმოსონ სქიმა მონაზონთა და შევიყვანე რა იმ მონასტერში იქ დავტოვე, ხოლო იგი ქალწულნი წავიყვანე და დავმალე სხვა ადგილას და მივცემდი იმ მთავარს ყოველთა დღეთა მეძავთა, ვიდრემდის გასრულდა სამოცდაათი. და როდესაც განსრულდა, მაშინ წავიყვანე ქალწულნი იგი და შევიყვანე მონასტერსა და მინდოდა გამომეყვანა მეძავნი იგი. ხოლო მათ, როცა იხილეს მხეველნი იგი და სძალნი ქრისტესანი, აღარ გამოვიდნენ იქიდან, არამედ თქვეს: უკეთუ ღმერთმა ღირს გვყო ჩვენ შევმოსილიყავით წმიდის სქიმით, ამიერიდან აღარ მივბრუნდეთ ჩვენ გარყვნილებასა, წარმწყმედელთა სულთა! და დაადგინე იგინი იქაურ მონაზვნებასა და წმიდა და სათნო ეყვნეს ღმერთსა სინანულითა წმიდითა.

თეოდორემ აღიდა შემწე და მხსნელი მათი და უთხრა სერგის:

— მერწმუნე, ძმაო, აწ უწყი, რამეთუ არა ხოლო ჩვენი თანასწორი ხარ სათნოვებითა, არამედ უაღრეს ხარ ჩვენსა, რამეთუ დაგივიწყებინეს ესოდენ დიდი სიკეთე და შენს დიდებულებას კიდევ უფრო გააბრწყინებ, თუ დაიხსომებ იმ სიკეთეს, რომელიც შენთვის გაუკეთებიათ. ხოლო აწ, ლოცვა ყავ ჩემთვის, რათა დავბრუნდე მშვიდობით ჩემს სამყოფელსა.

— როგორ? მე ვილოცო შენთვის, რათა წახვიდე? ცხოველ არს ღმერთი ჩემი უკეთუ შენთანა შერაცხილ ვარ, არათუ გაგიშვებ, მეც შენთან წამოვალ, — წამოიძახა თვალცრემლიანმა სერგიმ.

— თუ მართლაც შენ ამას იტბ, შენ ჯერ კიდევ სიბერის კართან მისული არ იქნები, რომ ამ ღღეს დალოცავ.

მაშინ აღივსო სიხარულით სერგი და ერთმანეთს გულითადად გამოეთხოვნენ.

წავიდა მამა თეოდორე ღვთის სიყვარულით აღშენებული.

მარტოდ დარჩენილი სერგი ქარიშხლისაგან გატაცებულ სომალდ-სა ჰგავდა, რომელსაც გადარჩენის იმედი არ დაეკარგა. მის სულში იბრძოდა სინათლე და სიბნელე. ამ თავისუფალ და მეამბოხე ბუნებაში თეოდორეს გაცხადებას ისე შთაენტოა ბიჭიერება, როგორც ცეცხლს — ბურბოშელა. მას ახლავე უნდა ეყარა წილი — ამქვეყნიური კეთილდღეობა და სამარადისო ცხოვრება? თუ იგი ახლა დაცემულია, მაშ, მაღლითაც მდგარა — ამაში თავის ძალას ხედავდა, ამ ძალაშივე იყო ის თვითნებობაც, რომელიც ცხოვრებისათვის აფლანგვინებდა.

შესაკრებლის ღია კარი საპყრობილის ჩარაზულ კარად ეჩვენა. თეოდორეს გახსენებაზე კი სახე ისე გაუნათლებოდა სოლმე, თითქოს ღვთაებრივ ნათელში იმყოფებოდა. მემრუშეთ ზედაც არ შესედავდა, საფასურს გაურჯელად მიაწოდებდა და ხედავდა ესოდენი მაღლიერებით და გაკვირვებით რომ შესციცინებდნენ — ისინი ხომ მხოლოდ საფასურისათვის მოდიოდნენ მასთან?! სერგის უნდოდა მათთვისაც ერჩია გასდგომოდნენ ამქვეყნიურ ხრწნილებას, მაგრამ ისიც იცოდა, რომ მათთვის სასაცილო განდებოდა და დუმილს არჩევდა.

იმ შობა დილას კი მან თითქოს პირველად დაინახა ის, რასაც ყოველდღე უტკეროდა — გააკვირვა მის სარკმელთან ათეული წლების მანძილზე მდგომმა მარად მწვანე კვიპაროსების სიდიადემ, პირველად შეხედა ცაზე ამომავალ მზეს, გაულიმა, თითქოს იგიც მოუწოდებდა, ღამით კი ღრუბლებიდან ამოცურებული მთვარე თითქოს რაღაც იდუმალის გაცხადებას ჰპირდებოდა, ეკლესიის ზარის ხმაში ესმოდა მოწოდება მიეტოვებინა მიწიერი საზრუნავი და მარადიულისათვის ეზრუნა. დულდა დაწურული ყურძენი, დადუღებული კი ახალ ჭურჭელს მოითხოვდა, რათა ნაღეჭი ჩამოეცილებინა.

იმ დღეს გადაეწყვიტა კიდევ არჩევანი. მოსწრაფებულად გაყიდა შესაკრებელი, საფასური განუყო გლახაკთ, ერთ მონასტერს მიადგა და ითხოვა მორჩილება.

წინამძღვარმა იცნო, არ ეამა და ცივად მოუჭრა:

— ვერ უძლო შენ აქ დადგომადო.

— თუ მონაზვნობის ღირსი არა ვარ, — ევედრა სერგი, — მიმიღე მონასტრის მეპატრაკედ და თუ ნახო ღირსება რამე ჩემში, ნუ დამიკარგავ.

წინამძღვარი იჭვის თვალთ გახედავდა, ეგონა ხუმრობდა სერგი, მაგრამ მის თვალეზში რომ სახუმაროს ვერას ხედავდა, შეაგონებდა:

— ერში სიწმინდით მოღვაწე ადამიანი შესაძლოა უფრო მისაღებიც იყოს ღვთისათვის, ვიდრე მონასტრის უღირსი მსახური, შენც შესცვალე შენ ცხოვრებაში რაც სააუგოა და შეგინდოს უფალმა.

სერგის თვალეზმა დაკვესეს, მოსმენაც არ უნდოდა, ხელებს იქნევდა, ბოლოს დაემხო მის წინაშე მუხლებზე და შეჰძალადა:

— აღსარებაზე ვარ, მომისმინეო.

წინამძღვარმა დაჩოქილს თავზე ოლარი გადააფარა, ჯვარი გადასახა, იდუმალ ლოცვა წარმოსთქვა და უთხრა:

— ქრისტე არს ჩვენს შორის, ინანიებ შენს ცოდვებს?

— ვინანიებ, ვინანიებ, შემინდოს უფალმა, — მიწამდის თავდახრილი ცრემლებითა და სულთქმით ამბობდა სერგი და თან ყოველივე მიზეზს განუცხადებდა..

— ნეტარ არიან, რომელთა მიეტევნეს უშეჯულოებანი და რომელთა დაეფარნეს ცოდვანი, — თქვა წინამძღვარმა და წამოაყენა ცრემლებისაგან დაოსებული სერგი.

წინამძღვარს სახე შესცვლოდა, სერგისადმი მოწიწებით განმსჭვალული, მზად იყო მაშინვე შეეყვანა სენაკში და კურთხევა განეღო მისი მონაზვნობისათვის, მაგრამ სერგი კიდევ ვერ დაშოშმინებულიყო და ისევ ცრემლებით მოსთქვამდა:

— მე შეურაცხ ვიქმენ, ვითარცა პირუტყვი და უფალმან აღმინთო სანთელი ჩემი, იხსნა სული ჩემი სიკვდილისაგან და ფერხნი ჩემი ბორკილისაგან. აჲ მყავ მე შემწედ მაცხოვრებისა და მოძღვრებამან შენმან განმსწავლოს მე.

— შენი სიტყვა და ღვთის ნება ერთი იყოს, — წარმოსთქვა უკვე საზეიმო ხმით წინამძღვარმა და იმ დღიდან სერგი მონასტერს დარჩა.

თუ ადრე სერგისათვის მონასტერი საპყრობილეს ნიშნავდა, სადაც იძულებით შეამწყვდევდნენ სამეფო კარის დამნაშავეთ, ან ღვენილინი მთავართაგან თავს აფარებდნენ სიკვდილის შიშით, ნებით მისულნი კი მას მცონარებად, ან გონებადასშულ ადამიანებად მიაჩნდა, ახლა აჲ, მაღალი გალავნით შემოზღუდულ კედლებში უჩვეულო თავისუფლებას შეიგრძნობდა, აჲ ხედავდა გამართლებას ადამიანის ცნებისა, აჲ თავისი ბაბილონის გოდოლი აღემაართა და სიმაღლიდან გაჰყურებდა ქვეყნის ჯახირს. კაცვი, რომელიც სასმისის ფსკერზე პოულობდა უდიდეს შვებას, ახლა ბარძიმიდან მიღებული ზიარების წვეთები ანიჭებდა, და ნეტარებას და ცას ეწეოდა მისი სიხარული.

ფხვაკრეფით დადიოდა, ჩურჩულით ლაპარაკობდა, გრძნობდა, სული სხეულზე როგორ მძლავრობდა. ღამით ყველას კაპაგონებს დაუსინჯავდა, დაუკერებდა, დაუსუფთავებდა და გათენებისას კი თავს მოიმიწინარებდა, რომ მადლობა არავის ეთქვა.

ფსალმუნებად შესცვლოდა ამაოდ მეტყველება, გულფიცხოზა — მორჩილებად, როკვა — მუხლთდრეკად, ხორცთა მღერანი — ხორცთა გვემით, გემოთმოყვარეობა — მარხვით, ძილის მოყვარეობა — მღვიძრობით, ჯავრისყრა — მოთმინებით, ვერცხლისა და ოქროს მოყვარეობა — სასოებითა ღვთისა.

გ ა ნ თ ა ვ ი ს უ ზ ლ ე ბ ა

თავადის ოჯახში დიდი განსაცდელი ტრიალებდა. ქალს ტრფიალი გამოუნელებელ სევდად ჰქცევოდა. გზნება ცეცხლად ედებოდა, თითქოს წყალქვეშა კლდეს წასწყდომოდა, ვნებათა ლელვის ქარიშხალი შეჭრილიყო სულის მყუდროებაში და სხეულის გმინვადა ისმოდა. აღარ იცოდა რა ელონა, რამეთუ გონება დაბნელებოდა. იოანეს განრიდებაც აღაშფოთებდა, გულგრილობად და სისასტიკედ მიუთვლიდა და იქაძნებოდა, რომ ზეციური მართლმსაჯულება ამ გულქვაობისათვის დასჯიდა; ვნებიან კვანძში ჩახლართულიყო თვით ცხოვრება, იმედი აღარაფრისა იყო და უკვე დაუძლეველ სენით პყრობილი სარეცელს მისჯავყოდა.

ხედავდა თავადი, როგორ მისცემოდა ქალი საგონებელს, ჭამაც კი აეკრძალა და თვალდახუჭული, მეუღლესთან საუბარსაც ერიდებოდა.

ვერანაირი მიდგომით თუ დაკითხვით, ქმარი ცოლისაგან მიზეზს ვერ იგებდა. არაერთხელ ეცადა ქალიც მასთან აღსარებას, მაგრამ სირცხვილი ჰბოჭავდა.

თავადისათვის საეჭვო აღარაფერი იყო, ამას იოანეს განრიდებაც ემოწმებოდა, იოანე მის თვალებში ახლა უკვე მაცდურად, ცბიერად გამოიყურებოდა, მასში ახლა მხოლოდ კაცსა და მზაკვარს ხედავდა.

ცოლს მკურნალნი მოუყვანა.

ქალის სატკივარს არას უჩიოდა და მკურნალთაც თქვეს:

— არა არს ამასთან სენი ხორცთა, არამედ სულისა.

რა წავიდნენ მკურნალნი, დაჯდა თავადი ქალს და ევედრა:

— მითხარი, რა არის საქმე შენი?

ხოლო ქალი შეძრწუნდა, შერცხვა და ვერ აღიარა.

ბოლოს, ქმარი რომ აღარ მოეშვა, თქვა:

— შენ იცი, უფალო ჩემო, გინა თუ სიყვარულით, გულუბრყვილობითა, თუ ალაღმართლობით, მოიყვანდი აქა მეგობარსა, რომელი არს მსახური ღვთისა, შევძრწუნდი მისგან ვითარცა მთვრალი და ყოველი სიბრძნე ჩემში დაინთქა.

თავადს ახლა უკვე თავის დიდბუნებოვანება, ნდობა უგუნურებად ეჩვენა და გულგასენილი, ფიქრთა ქარღვარით იოანესთან შესახვედრად გასწია, გასწია, მაგრამ უნუგეშობა და შეურაცხყოფის გრძნობა თან მისდევდა, რას მოუტანდა ეს შეხვედრა?!

ფერისცვალების დღესასწაული იყო და იერუსალიმში იყრიდა ყველა თავს. ისმოდა საზეიმო ზარების რეკვა, რომელიც ყველას მოუწოდებდა მიწიერი საზრუნავების მისატოვებლად და სამარადისოზე საზრუნავად.

იოანეც აქ იყო; აღტაცებულ ადამიანთა გარემოცული, რომელნიც ზარბად იჭერდნენ ყოველ მის სიტყვას.

ამ წყნარ ჯანყში მედღესასწაულე დღისა იოანე განთიადს განსჭვ-
რეტდა, მხიარულ გუნებაზე იყო და ზღვა ხალხში თავადი ვერც შეე-
ნიშნა, იგი კი შორიანხლოს, არწივივით დაფოფრილი იდგა. მისთვის
თითქოს დღეც დაბნელებულიყო, არავისთან არ საუბრობდა, მაგრამ
დუმილი შინაგან შფოთს ვერა ფარავდა, სახეს ერთთავად სარკასტული
ღიმილი უსერავდა.

იოანეს სახე უცინოდა, ენად გაკრეფილიყო. წინა ღამეს მაკარი
დიდის ნააზრევს ისე დაეპყრო, ისე შეესისხლხორცებინა პავლე მოცი-
ქულის ქადაგებანიც, საკუთრებად მიეჩნია და ყველას გასაგონად ამ-
ბობდა:

— ვითარცა ასონი ერთისა გვამისანი, ადამიანები ერთნაირად სა-
ჭირონი არიან ურთერთათვის, ერთს არ შეუძლია მეორის გარეშე
იცხოვროს. ასოთა შორის არ არის ერთი დიდი და საპატიო, ხოლო
მეორე მცირე და შეურაცხი, ასონი აღემატებიან ერთმანეთს ერთნი
სილამაზით, მეორენი კი ძალ-ლონით, ასე თვალი ლამაზია, ფეხები
ძლიერი, თავიც კი ვერ ეტყვის ფეხებს, თქვენ არა მჭირისართო.
თვალნი ხედავენ და უძღვიან ფერხთ, კბილნი განცხრომიან, სასა გე-
მოსა იხილავს, ხორხი შთაბნევს სტომაქად. ენა ზრახავს მას, რომელ-
საც მოსცემს გული და გონება, ყურნი ისმენენ გარეშეთა სიტყვათა
და მისცემენ ცნობასა გონებასა; საყნოსელები იყნოსენ და აცნობენ
ტვინს და ყოველსა საცნობელსა. ეგრეთვე შინაგანი ასონი იქმან ყო-
ველსავე განსწორებულად თითოებითა მით ბუნებრივითა მათითა —
სახმარსა მას დაიყენებენ განსაძლიერებლად გვამისა და ნივთსა მას
ნამეტნავსა გარე განაბნევენ, არარაით მძლავრობენ ურთიერთსა. ეგ-
რეთვე მეფესა სჭირიან ქვეშევრდომნი, ქვეშევრდომებს მეფე, ჩვენც ჯერ
არს მორჩილებად და მსახურებად ურთიერთსა, ვითარცა ვის რა ნიჭი
მიუღიეს ღმერთისაგან. თვალნი უნდა ხედავდენ სიწმინდით, ყურნი
ისმენდნენ მშვიდობით და არ ერთობოდნენ კიცხვაბასრობით; ენა უნ-
და იტყოდეს მხოლოდ კარგს, ხელნი ქველმოქმედებდნენ, სტომაქნი
იცავდეს ზომიერებას, ფერხნი მიილტვოდნენ კეთილ საქმეთათვის.
ოდეს ვინმე აგინებდეს, ღებულობდეს მას, როგორც შემწეს სიმდაბლის
მოპოვებისათვის, სიმდაბლე კი აღამალლებს ადამიანს და მოაგონებს
სიყვარულს, სიყვარული კი ღვთის სამყოფელს...

აქ თავადს ისე მობჯენოდა ყელში ბრაზი, ლამის ეყვირა, ცბიერ
ადამიანს არა აქვს უფლება ილაპარაკოს ღვთაებრივზეო, მაგრამ მხო-
ლოდ გადაიხარხარა.

იოანემ უცებ შესწყვიტა სიტყვა, შემობრუნდა და დაინახა თავადის
სრულიად უცხო სახე.

— შეგეწიოს დღევანდელი დღის მადლი, — უთხრა იოანემ თავადს,
თავადის ნაძალადევ ღიმილში ყველაფერი ამოიკითხა, მაგრამ არ შე-
იმჩნია; ისევ თავის მსმენელებს მიუბრუნდა, რომელნიც ელოდნენ სი-
ტყვის დამთავრებას და მანაც განაგრძო.

თავადი, რომელსაც სარწმუნოებრივი გზააბნეულობა ისედაც სტან-

ჯავდა, ახლა პირად საწამებელს მთლად დაეთრგუნა და რამდენადაც ყველა მსმენელს იპყრობდა იოანეს აზროვნებისა თუ მეტყველების ხელოვნება, იმდენად თავადს გულს ბოლმით უკვებდა.

იოანე გრძნობდა ამას, შეუცნობლად გამოსავალსაც ეძებდა და უკვე აზნებულად, მაგრამ მაინც დინჯად ამბობდა:

— მომავალი ჩვენი საიდუმლოებითაა მოცული, აღსასრულის ჟამს ადამიანი ხედავს ახალ თუ უკვე დავიწყებულ სახეებს, ასალ საგნებს, რომელნიც მას არ უნახავს; ესმის ხმა, რომელიც არასოდეს არ სმენია და ჩვენ მზად უნდა ვიყოთ ამ დღისათვის, დღევანდელი დღესასწაულიც შინაგან, სულიერ სამყაროს შეცვლაზე მოგვიწოდებს. დღესასწაული ნავსაყუდელია, რომელშიც შევდივართ ყოფიერების ქარიშხლიან ცურვისას და როგორც ნავსაყუდელში ნაოსნები შეაკეთებენ თავიანთ ხომალდებს, ემზადებიან ახალი ცურვისათვის, იკრეფენ ახალ ძალებს, ასევე ჩვენ ვისარგებლოთ ამ მოკლე დროით და მივუძღვნათ იგი მარადიულობის მოპოვების მცდელობას... უმაღლესი გონება ვლინდება სამყაროს სიმწყობრეში, ქმნილებათა და მოვლენათა ურთიერთმიმართებაში... რწმენამ უნდა აიძულოს ადამიანი თავის სულს მიხედოს, რწმენამ ადამიანი უკეთესი უნდა გახადოს...

იოანეს სიტყვა უწყდებოდა, რადგან გრძნობდა თავადის გამჭოლავ და იმავე დროს დამცინავ მზერას.

თავადმაც თავი ველარ შეიკავა და ამაყი, ცბიერი ღიმილით წარმოსთქვა:

— რამდენი ღვთის მსახურია, რომ სახიერების ნაცვლად უსახურობას სჩადის, ჩვენ კი მათი უნდა ვიწამოთ და ხელზეც ვემთხვიოთ!

იოანემ მთელ თავის შინაგან ძალებს მოუხმო და მშვიდად განაგრძო, — ...ადამიანის გონება უმაღლეს გონებას, ღვთაებრივს უნდა ესწრაფვოდეს, გაღმერთებას ლამობდეს, დიახ, ლომის ბუნაგში მოხვედრილი ჭკუამ იხსნა და არა სასწაულთ მოქმედებამ...

თავადი ძალდატანებით აჭყეტდა თვალებს, არც თვითონ უსმენდა და არც სხვებს ასმენინებდა, ერთთავად რასმე ყურადღების მიმტაცებელს ჩაურთავდა, მას ახლა ზესთა სამყაროს არსებობა და მით უფრო, მისი საიდუმლოების ამოხსნა ზღაპრად მიაჩნდა, მას მიწიერ საიდუმლოებათა სივერაგე აწამებდა.

მისი მოუსვენარი, აღგზნებული მოქმედება უკვე ყველასათვის შესამჩნევი ხდებოდა და იოანესათვის უკვე — გასაძლისი, როგორღაც უეცრად შესწყვიტა სიტყვა, თითქოს ფრთები შეიკეცაო, მოუბრუნდა თავადს, ხელი დინჯად მოჰკიდა და განზე გაიყვანა.

მოშორებით, ტაძრის გალავანს მიეყრდნენ და ერთმანეთს თვალს გაუსწორეს. თავადის შუქჩამქრალი მზერა მკვდრის მზერასა ჰგავდა და ამბობდა:

— შენ უწყვი, ვითარ შეგიყვარე, ჩემს სახლში შეგიყვანე...

იოანემ დამნაშავედ, წყნარად მიუგო:

— ეგრე არს, უფალო ჩემო, ვითარცა ბრძანე.

— აჰა, ესერა გულისთქმასა შეუპყრია მეუღლე ჩემი...
იოანეს გული განმგმირავი ტკივილისაგან შეეკუმშა, რამეთუ უყვარდა თავადი და თქვა:

— ნუ იურვი, რამეთუ, ძალუძს ღმერთსა შეწევნა ჩვენი.

თავადის გულს პირქუშ ღრუბლად ჩამოწოლილი მტანჯველი განცდა გონებას ბრაზით უჩრდილავდა, იოანეს სიტყვებს ვერაფერი ენუგეშებინა, ველარც თქვა რამე.

და დაშორდნენ ერთმანეთს დამძიმებულნი.

პარასკევი დღე იყო, ამ დღეს ევნო უფალი იესო ქრისტე ხსნად ადამიანისა და ამ დღეს უმეტეს ევალებოდა ადამიანს კეთილმასახურება მოყვასისა.

„გულია ხიფათის მქნელი, — მრავალგზის იმეორებდა იოანე თავისთვის. რაოდენ უფრო ადვილია ზრახვებით ჩავარდნა ცოდვაში, ვიდრე საქმით! ზრახვებით ბრძოლაც უფრო ძნელია! მხოლოდ აზრობრივ წარმოდგენის შეცვლას შეუძლია ქალის გამობრუნება, მაგრამ როგორ, რა გზით უნდა მოხდეს ეს?“

ამ ფიქრებით შევიდა იოანე ტაძარში სალოცავად.

„უფალო და ღმერთო ჩვენო. ურვათა ჩემთაგან განმათავისუფლე ვითარცა დააცხვრე მღელვარება ზღვისა და იხსენ მოწაფენი შენნი დანთქმისაგან, ეგრეთვე, მოიხილე ჩვენზედა და გვიხსენ აღტყინებისაგან ვნებათა ამთაგან“.

მაგრამ ვით დედამიწას შეუწყვეტელი მიწის ძერა შეარყევდა, ეგრეთვე მის ბუნებას სიღრმის ძალა მუქარით აზანზარებდა, მომაკვიდინებელ საშიშროების წინაშე იდგა, სალოცავ სიტყვებსაც ძლივსლა აბამდა და მხოლოდ „მამაო ჩვენოს“ წარმოთქვამდა მრავალგზის.

დიდხანს იყო ამ საგონებელში. სასოწარკვეთაც დაეუფლებოდა, რომ გონებაში ნათელმა აზრმა იელვა და ლამის სირბილით მივიდა დალაქთან.

— მომკვეცე თმა, მომწვი წარბნი, წამწამნი, მომკვეცე წვერი, — ბრძანებით ეუბნებოდა.

განცვიფრებული დალაქი ხელს ვერ ანძრევდა, ვერ დაეჯერებინა ბრძენისაგან ასეთი სიტყვა.

მაშინ იოანემ გამოართვა საკვეცი და თავად იწყო თმების შეკვეცა და დალაქიც დარწმუნდა, რომ იგი სრულს გონებას არის, არ გარდამხდარა მას და გაუღიმა კიდეც.

დალაქმა შეასრულა მისი თხოვნა.

შემდეგ იოანემ მოიბლარდნა თავპირი, ჩაიცვა შეურაცხი ტანისამოსი და თვალწარმტაცი, უკვე გონჯი მივიდა მეგობრის სახლში.

რა შევიდა მათთან, ნახა ქალი მთლად შეცვლილი, მწოლარე და ქმარი მისი მჯდომარე მასთან.

— რა განგეშორეთ თქვენ, — წარმოთქვა იოანემ, — ესრეთ შემქმნა მე ღმერთმან!

ხოლო ქალმა რა იხილა უმსგავსოებად ქცეული მშვენიერება, ჩა-

ფერფლილი თვალები დაეხუჭა, ყელში მოწოლილი ცრემლი სიტყვას გზას უხშობდა და მწარედ ატირდა.

თავადი მოულოდნელობისაგან დაიბნა, სიტყვებს ვერ პოულობდა რაიმეს სათქმელად.

ქალს კი მყის დაუცხრა ღელვა, განეშორა ბრძოლა და დახსნილი სხეულის პყრობილებიდან წამოდგა.

იოანემ გამოიყვანა ქმარი მისი და უთხრა:

— აჰა, შენ ცოლთან არლარა ვნებაა.

და როდესაც შინაგანი კმაყოფილებით განმსჭვალული იოანე მათ წინაშე მთელი დიდებულებით აღმართულიყო, თავადი განცვიფრებულად შესცქეროდა.

— ამიერიდან კი არლარა იხილოთ პირი ჩემი, თქვა იოანემ და წამოვიდა.

თავადი ჩაბრუნებით გასცქეროდა მიმავალს და ერთთავად იმეორებდა: რა უნდა მექნა, ან ახლა რა ვქნა? რა ვქნა? და ატირდა დამნაშავედ, რამეთუ ამ დასახიჩრებაში მან მეტი ბრწყინვალება დაინახა, სურნელება სილამაზეზე ძლიერი იყო და ირწმუნა, რომ ჭეშმარიტად ღვთისმსახურება იყო იგი, რაც იოანემ გააკეთა.

ცხადი იყო ისიც, რომ მეგობრობის სიღრმესა და ხანგრძლივობას არ განსაზღვრავდა მუდმივი სიახლოვე, მთავარი იყო მოხდენილი შთაბეჭდილება — მათ ერთმანეთი არაოდეს დაავიწყდებოდათ.

თავადმა მხოლოდ ერთი რამ მოახერხა — წავიდა და იმ დღესვე მოინათლა და თუ მანამდე სამყაროს გაბზარული მინასავით ხედავდა, ახლა მისი უზადო მთლიანობა დაინახა.

იოანე კი გავიდა უდაბნოდ, რომ თავისი სახიერება დაებრუნებინა. გზად სოფრონი მოინახულა, რომ მის ხანგრძლივ უნახაობას არ დაეღონებინა.

გაკვირვებული სოფრონი ღიმილით შესცქეროდა, ეს რა დაგმართნიაო?

იოანემ ისე მოუთხრო ამბავი, თავის საიდუმლოება მაინც არ გაამხილა.

— როდესაც ადამიანში ერთადაა შერწყმული საქმე ღვაწლისა და საქმე რწმენისა — იგი სრულყოფილია, — თქვა სოფრონი.

— შენ სოფისტი გამხდარხარო, — მიუგო იოანემ სიცილით.

სოფისტის წოდება თავისთავად მეტად საპატიო იყო, მაგრამ ახლა

ეს იმასაც ნიშნავდა, რომ მასში იოანე თანასწორს ხედავდა ფილოსოფიურ განსწავლულობით, რაც სოფრონისათვის უფრო მნიშვნელოვანი იყო.

— მე ვფიქრობ, — თქვა სოფრონიმ, — შენ ამ ამბავს აღწერ და შენს თსრობათა კრებულშიც იგი ყველაზე მნიშვნელოვანი იქნება.

აქ თვალნათლივ ჩანდა ცდუნებასთან ბრძოლისას როგორ უპირისპირდებოდა ერთ გრძნობას მეორე. ზიზღმა დათრგუნა ნდობა.

ხ ე რ თ ვ ი ს ი

დრომ იოანეს დაუბრუნა თმა, წვერი. დამშვენდა, სამშობლოს მოწყურებულს ხერთვისის მონასხულება გადაეწყვიტა სოფრონისთან ერთად.

ტრაპეზუნტიას გასცდნენ თუ არა, მოადგნენ ქართველოა ია პერკენა საზღვარს, ვით მიუფემ კვერთხს აღსავლის კართან, ისეთის აწმენით, ისეთის ძალით ჩასჭიდა ხელი იოანემ სასაზღვრე რკინის ძალოს. მოსსური მთანი შორიდანვე ეგებებოდნენ, მდინარენი მქუხარედ გალობდნენ სადიდებელს. წყარონი სალოცავ პანგებად ეღერდენ; სირთა სტვენანი, ტაროლათა წკრიალი მათ გულისთქმას ესმიანებოდნენ, მთის კალთების ბალახ-ყვავილნი სურნელებით უკმევდნენ; მთის მდინარის ტალღების დგაფუნში ზარის ხმა ისმოდა, მთხოთქილ ჩანჩქერის შხეფები ეამბორებოდნენ და აქაფებული მდინარე მოუსვენარო სწრაფვით, მძლავრი ნაკადით ლოდებს ლახავდა, კლიეებს ტალღებს ახლიდა და ფართოდ გაშლილი იქ, შორს ზღვას უეროდებოდა, რომ ქვეყნისთვის ემცნო იოანეს მობრძანება, სპერის ზღვას კი, როგორც მის მომლოდინე მრევლს ტალღებში ღიმილი უკრთოდა.

იოანეს ისეთი ცათაფრენა შესდგომოდა, ეგონა სამოთხეში ვარო. მუსლებზე დაეშვა და ცრემლები აკკურა სიყრმით მრავალგზის მოკლილს და ფიქრით ნასათუთარ სამშობლო მიწას. მის თვალებში არწივის მრისხანებასთან ერთად ყრმის გულუბრყვილო სიყვარულიც ელავდა, გრძნობათა ლელვაში — მთის მდინარის შეუპოვრობა, გულის ძგერაში — მზის მცხუნვარება, მის ახოვანებაში — სალი კლდის ძალოვანება.

ცაზე ელვა გაიკლაცნა, შსაპუნა წვიმამ გადმოშხეფა: — აიაზმას თვით უზენაესი ასსურებლათ და თვალნი ზეცას მიაპყრეს.

ქარაფების წვეროებზე ციხე-სიმაგრეები ათასფრად გაიბრწყინებდნენ წვიმის წვეთებში.

ისპირის კლდიანსა და ქვიშიან ხეობაში, მთაგრეხილებს შორის, თორთომის მდინარის შესართავს ზემოთ, მთის მდინარე გზას მიიკვლევდა და მისი ხმა მთების ექოში მესხურ მრავალხმიან საგალობლად გაისმოდა. ქარი მიერეკებოდა წვიმის ღრუბლებს. შიშფოთიბული სინამდვილე მოგონებების კორიანტელით სივრცეს შესეოდა და იოანე სიხარულში შეპარულ სევდას იგერიებდა: აქ ნათელიც და ჩრდილიც მდუმარედ ყიოდა.

მლოცავები, მოგზაურები, სოჭოებივით მიმოდითდნენ. ერთი მათვანი შემოუერთდათ და ჰერაკლე კეისრის გალაშქრების ამბავს მოკყვა:

— ჰერაკლეს, ხოსროზე ახალ დარტყმას რომ ამზადებდა, მოკავში-
6. ქ. ნუსუბიძე

რედ საზარები მოეზიდა. მათ გაიარეს დარუბანდი, მოაოხრეს ხოსროს განმგებლობაში მყოფი მიწები და ალყა შემოარტყეს ტფილისს. ტფილისს რომ ვერაფერი მოუხერხეს, ისევ სპარსეთს შეესივნენ, მაგრამ იმდენად ძნელი იყო სავალად მთიანი ქვეყანა, საზარებმა მალე მიატოვეს ბიზანტიელები. სამაგიეროდ, შეუერთდნენ იბერიელნი. ორ წყალშუა მყოფი საქართველო ცდილობდა მოცილე სახელმწიფოთა შუღლით ესარგებლა და მუდამ სანატრელი ოცნება აესრულებინა — დამოუკიდებლობა მოეპოვებინა, რადგან იცოდა ყოველი მფარველის იდუმალი ზრახვა ქვეყნის სიმდიდრეთა დაპატრონება იყო. თანაც კეისარიც და შაჰიც ფიცს როდი სჯერდებოდენ, უმეტეს სიმტკიცისათვის ქართველთაგან მძევალს მოითხოვდენ.

— ჰერაკლე რომ მოვიდა ქართლს, — ამბობდა მეორე, — ციხის თავმა არ დათმო ციხე კალისა, აგინა კიდევ კეისარსა ჰერაკლესა ესრეთ: „წვერნი ვაცისა გასხენ და კისერი ვაც-ბატონისაო“, კეისარს გაეცინებოდა და იტყოდა: „არა არს თქმული ესე ცუდადო“ და წავიდა სპარსეთს, ხოლო ტფილისს დაუტევა ერისთავი თვისი ჯიბლუ და მთავრად ქართლისა — ადარნასე, ძე ბაკურ მეფისა, მცირე ხანში აიღეს ციხე კალისა და გამოიყვანეს ციხისთავი, გააძვრეს ტყავი კადრებისათვის კეისარისა უშვერთა სიტყვათა და მისწიეს კეისარს ტყავი მისი.

ეს განსაცვიფრებელი სილამაზის; მრავალფერი ქვეყანა მუდმივ შოთსა და რბევას განიცდიდა. მიწის ქვეშა სამალავები მუდმივ მზადყოფნაში ჰქონდათ. ტრაგიკული იყო მესხეთის ბედი, მაგრამ ხალხი შეუდრეკელი, არც როდის ყმობია სპარსეთს, ქართული იყო იგი და ქართულად დარჩა.

სამშობლოს სატიკივარი იოანეს გულის სატიკივარი იყო. პირდებულ გამოქვაბულთა წინმდგომი მათში მლოცავ, მოღვაწე მამათა სუნთქვას და მათ მგზნებარებას შეიცნობდა. ერის გმირული წარსული თავისუფლების ტრფიალს უმძაფრებდა. ტყავს გააძრობდნენ ქართველს და სულს მაინც ვერ დაუზოზდნენ.

ისპირის მდინარის კიდეზე იხილეს ქალაქი მცირე — ისპირა.

თორთომის ტბასთან დაიოკეს მდულარება სულისა.

გზა ისევ ციცაბო კლდის კალთას მიჰყვებოდა, გარშემო მოწითალოფერის შიშველი კლდეები ხმალამოლებულ მცველებად გადმოჰყურებდნენ, მთანი ყოვლად მაღალნი და უვალნი, ლოდიანნი, მჯილად შეკრულიყვნენ. ამ კლდიან ფერდობში, ციხის ქვემოლან მრავალი გამოქვაბული იყო, უფრო ქვემოთ კი — ორი თაღოვანი ხიდი და ბრწყინვალე სასახლე.

სოფრონი ამ სასახლის გვირგვინით გადახურულ მოჩუქურთმებულ ქართულ დარბაზებში, რომელიც სულ ზემო სარკმლით თითქოს ცასა სწვდებო, ქართული სულის სიმალლეს, გულის სიწმინდეს და ფაქიზ გემოვნებას ხედავდა.

იოანეს სიჭაბუკე განახლებოდა. იქ, გზის მიღმა, ბავშვობა ახსენ-

დებოდა, ველზე ჰაერში აფარფატებულ ბაბუაწვერას რომ დაედევნებოდა. ეგონა, ახლაც ჭალაში ფეხშიშველი გაინავარდებდა.

ისპირის მდინარეს ერთვოდა — მდინარე გურჯი-ბოლაში. ხეობა ვიწრო ქარაფოვანკლდიანი. მაგრამ თღრთოლოდ, ღრანტებიან გზას იოანე მკვირცხლად გადაივლიდა, არც სოფრონის უჭირდა; ტყის სიღრმეში თუ დაბურულ ჭალაში, სადაც მზის სხივი ვერ აღწევდა, მათთვის ყველაფერი ბრწყინავდა, ფოთლებით დაბურულ ხეებს დიდი ხნის უნახავი მახლობლებივით შესცქეროდნენ.

ამ დროს ანტიოქიაში გახმაურებულ ყაჩაღების ამბავს მესხეთშიც მოეღწია.

ამბობდნენ: ანტიოქიაში სიმდიდრით განთქმულ დედათა მონასტერში 170 მონაზონი ყოფილა. ყაჩაღებს თვალი სჭვრიათ მათზე და ერთ დღეს განუზრახავთ კიდევ მათი გაძარცვა. თორმეტნი ყოფილან. მეთავეს უთქვამს: „მე ჩავიცვამ მონაზვნის სამოსელს, სმალს ტანსაცმლის ქვეშ დავმალაგ. ღამით მივიდეთ. ვთხოვ დაქანცულს კარებთან გამიშალონ დასაწოლად ჭილობი. როდესაც ყველანი დაიძინებენ, გაგიღებთ კარებს და ერთად დავერევითო.“

მეთავე მონასტერში, მართლაც, წმინდანად მიუღიათ. შეკრბენ მონაზონნი. მივიდნენ, გადაცმულ ავაზაკთან კურთხევის მისაღებად. შემდეგ დაბანეს ფეხები, მისი ნაბანი კი არ გადააქციეს. მონაზონთა შორის იყო ერთი, რომელიც დავრდომილ მონაზონს უვლიდა და ეს წყალი წაუღო დავრდომილს და უთხრა: ჭეშმარიტად ჩვენს მონასტერში დიდი წმინდანი მოვიდა. ჩვენ მას ფეხები დავბანეთ და მისგან კურთხევა მივიღეთ, აგრეთვე შენც გამართებს მიიღო მისგან კურთხევა ამ წყლითო.

დავრდომილმა მადლიერებითა და სასოებით ის წყალი წაისვა სხეულზე და მყის განიკურნა უძლურებისაგან, წამოდგა და თავისი ფეხით მივიდა ავაზაკთან, თაყვანი სცა.

განცვიფრდნენ ყველანი, რა დანახეს განკურნებული სნეული და უმეტეს განკვირვებულ თვით ავაზაკს შიში და ძრწოლა დაეცა.

— ღმერთმა ეს სასწაული ჩემს გადასარჩენად ქმნა, რათა იხსნას სული ჩემი წარწყმედისაგან, — თქვა ავაზაკმან და, დაემხო რა მათ წინაშე, იწყო აღსარება და ხედავდა რა შეშინებულ, ერთ ადგილზე გაშეშებულ მონაზონთ, ლულულუღით წარმოსთქვამდა:

— ნუ გეშინით, მე არ მოვუშვებ მათ ბოროტის ყოფად თქვენდა.

და როგორც თქვა ესე, გამოიღო მახვილი თვისი და დააგო იგი წინაშე მათსა.

შეძრწუნებულნი მონაზონნი კი გათენებამდე ფსალმუნებდნენ.

როდესაც ისინი ლოცვაში იყვნენ, ავაზაკთა მთავარი გავიდა და უთხრა მომლოდინეთ ყოველი და თქვა:

— ამიერიდან აღარ ვიყო მე ავაზაკი, არამედ შევუდგე მე ქრისტესა და ვიქმნე მონაზონი, აჰა, ესერა მომიცემიეს თქვენდა ყოველი მო-



ნაგები ჩემი, წარავეთ იგი ვითარცა გენებოთ და წარვედით მშვიდობით.

მაშინ ყოველთა ავაზაკთა მიუგეს:

— უკეთეს ბოროტსა ცხოვრებასა გეზიარებით და წინამძღვრობა შენი სათნო იყო ჩვენდა, აჰა, ეს ამიერიდგან ჩვენცა დავუტეოთ ავაზაკობა და არა განვეუშორნეთ და ევრეთვე აწ აღვილოთ უღელი მონაზვნისაბისა ერთობით შენონა.

და წარვიდნენ ყველანი მამათა მონასტერს.

წინამძღვარმა იცნო და უთხრა:

— ვერ შესძლებთ თქვენ აქ ყოფნასა.

— შემიძლებელ ვართ ყოველსა წესისა მონაზვნობისა შესრულებად ღმერთის შემწეობით და ნუ უკუღებულს ვკოფთ.

— შენი ყოფნა ჩვენთან არ იქნება, — განემეორა წინამძღვარმა.

მაშინ ავაზაკნი მიუგო:

— მე იმისთვის ვარ აქ მოსული, რათა ვსტიროდე ჩემს ცოდვათა დღეთა ცხოვრებისა ჩემისათა და თუ არ მიმიღებ, გვეუბრედეს, ჩემს მოყვასებთან ერთად, მოგსრინთ თქვენ ყველს მახეილითა, დაგინვრეთ მონასტერსა და შენზედ იყოს ეს ცოდვა.

რათა ესა ეს წინამძღვარს, შეიყვანა იგი მონასტერს, მას თან მიჰყენნენ მისი თარმეტოვე ავაზაკი. შემოსეს მათ სქიმა მონაზვნებისა და იწყეს მათ მსურველად მოღვაწეობა მარხვითა და ლოცვითა, მორწილიანთა და სიმდაბლითა. მთავრი იგი ავაზაკი კი იყო მღუშარედ. იოანე ყოველივე ამას იხსომებდა, იწერდა, სოფრონი კი ხარობდა, რამეთუ რწმუნდებოდა ლოცვის ძალაში.

ესევე გზას გაუდგნენ.

საკვირველ, მედიდურ სანახაობას წარმოადგენდა ტაო, კლარჯეთი, ერუშეთი, კარწახის ტბა, მდინარე მტკვარი. აქ ჩქეფდა სიცოცხლე და ყოველივე ხალხის სულიერ ძლიერებაზე მეტყველებდა.

მთაღწივის ციხე-ქალაქი წუნდას. წუნდა გული და კერა იყო ჯავახეთისა.

წუნდას პირდაპირ, მტკვრის ნაპირს, ერუშეთის ციცაბო ფერდობიდან დიდებული და მრისხანე თმოგვის ციხესიმაგრე დაჰყურებდა ქვეყანას დარაჯად, ხეობის ვიწრო გასასვლელის დასაცავად. იქვე მახლობლად ელავდა თვალწარმტაცი წუნდის ტბა.

ქალაქი მდინარის ორსავე ნაპირას იყო განლაგებული. იქვე მახლობლად ჭოლთის გამოქვაბულები იყო.

ციცაბო კლდეზე აღმართული ხერთვისის ციხე ამაყად და ცხოველსატულად იდგა. იოანეს გული ვადაუტანდა, იდუმალ ლოცვას წარსთქვამდა. კლდიდან ჩანჩქერად გადმომსკლარი მდინარე მრისხანებით მოჰქუხდა, იოანეს ცივ შხეფებს აფრქვევდა. იოანე შეღერებულ ხარირმის შეუპოვრობით გამოიყურებოდა, პაერსაც ისევე ხარბად ისუნთქავდა, როგორც ნაკადულს ეწაფებოდა. მრავლის აღმქმელი იყო გული, კალმახივით რომ უფართქალებდა.

მშობლების საფლავზე ცრემლად დაიდვარა.

სოფონი საბურველმობილი იდგა და საფლავის ქვის წარწერას ხმამაღლა კითხულობდა:

„ო, სიყვარული იდუმალეა, საუკუნო ტრფიალეა, სულის უფა-ქიზესი რხევაა, ტყვე იყო გული, სევდა ჩამარხული“.

— აჰა, ეს სევდა გაფანტულია, რაკი მათ სანუკვარ შვილს მათი სა-მარე დაუტირებია — თქვა სოფრონიმ.

იოანემ კი მამის სულის საოხად, მისი მოსახელე წმიდანის, შიო მღვიმელის სადიდებელი მდუმარედ წარსთქვა.

—... აწ, გავედრებ მშობელთა ჩემთა სულთა პატიოსანთა, მეოხ ეყო ნათელსა საუფლოსა ღმრთისასა. — ხმამაღლა დაასრულა სადიდე-ბელი.

ტბიდან გამომდინარე მდინარე ლაშქარივით მიედინებოდა ღრმა-სა და კლდოვან ხრამს, რომლის იმიერ და ამიერ კლდეში გამოკვე-თილ ქვაბებში მყოფნი მესხნი ხელდამშვენებულნი მოდიოდნენ საზრ-დელითა და სასმელით.

სუფრა გაიშალა, გაისმა შემოძახილი და სუფრულმაც დაიგუგუნა. დატრიალდა სუფრის გახსნისას ღვინის თასი, ისმოდა „ვინ დალევს მარნეულ ღვინოს“.

სასმელი ძალაში შესულიყო და ყველანი მთელის გულანდილობით ალაპარაკდნენ. დაიწყო სჯა ვის უფრო შესწევდა ძალი უბიწოებისა: მამაკაცსა თუ დედაკაცსა.

მათთან იყო ისიდორე წინამძღვარი, რომელიც მოუთხრობდათ:

— კვიპროსის ხეებმა უთხრეს ლერწმებს: როგორაა, რომ როდესაც დადგება ზამთარი და ატყდება ძლიერი ქარები, თქვენ არა ტყდებით, მაშინ, როდესაც ასე უსუსურნი ხართ, ჩვენ კი ძალა გვაქვს და ვიმსხ-ვრევით, ხშირად ძირთაგანაც აღმოვიფხვრებით? და მიუგეს ლერწმე-ბმა: ჩვენ რაც შეგვხება, როდესაც მოვა ზამთარი და დაბერავს ძლი-ერი ქარი, ჩვენ მივიდრიკებით, ქართან ერთად გადავწვებით ან აქეთ ან იქით, ამის გამო არ ვტყდებით, რაც შეგეხებათ თქვენ, თქვენ ქარს ეჭიდებით და ამის გამო გასაჭირს აწყდებით.

ყველამ მოიწონა ნათქვამი. სოფრონიმ კი დასძინა:

— ადამიანი თავის ბედს მაშინ ეწევა, როდესაც მას ემორჩილება, აჰყვებ-დაჰყვება. ახლა მეც მოგიყვებით ერთ ნამდვილ ამბავს.

და თქვა:

— სულ ახლახანს, იერუსალიმში შევხვდი ვინმე ბერს, ზოსიმეს, რომელმაც მომიყვა: ერთხელ იორდანეს უდაბნოში სალოცავად წავე-დიო, დავინახე შიშველი ქალი სხეულს იფარვიდა ჩამოშლილი თოვ-ლივით თეთრი თმებით. შორიდანვე დამიძახა: „ზოსიმე, შენ ხარო?“ გაოცებულმა ზოსიმემ იმით, თუ საიდან უნდა სცოდნოდა ქალს მისი სახელი, ესროლა თავისი მოსასხამი, რომ სიშიშველე დაეფარა და მი-ახლოვებოდა. და რა მისულა მასთან ახლოს, უპირველეს უკითხავს, საიდან იცოდა მისი სახელი, მაგრამ ქალს მხოლოდ გაღიმებია და პირდაპირ თავისი ცხოვრების ამბავს მოჰყოლია, უთქვამს, თუ როგ-ორ დატოვა ჯერ კიდევ სულ ახალგაზრდამ მშობელთა სახლი, რო-

გორ წამოვიდა ალექსანდრიას, სადაც სიძვის ცდუნებას აპყოლია. სხეულის სილამაზით მიმზიდველს მალე გაუთქვამს სახელი და უსასყიდლოდ ვიდოდა ყოველთა თანა, სიმდიდრე არ იტყებოდა, მკოდავი ყოფილა, სელსა ქსოვდა და მით მოიპოვებდა საზრდელს. მხოლოდ აღამიანების ცდუნება და ვნების დაცხრობა ყოფილა ტრფიალება მისი, სადაც ჰპოვებდა ჭაბუკს, საფრთხეს უგებდა — ჰგონებია ესა ცხოვრება, მაგრამ ერთხელ იერუსალიმს ჩამოსულა, პატიოსნისა ჯვრის აღპყრობის დღეს. ჭაბუკთ ესოდენ უდუხჭირეს სიტყვებით აცინებდა, ველარცა ენა იტყვის რალს არ სჩადიოდა და ოდენ ცისკარს, როდესაც ყველა ეკლესიას მოვიდოდა და დაუბრკოლებლად შევიდოდნენ, იგიც მისულა მათ თანა და ვითარცა ფხს შესდგამდა ზღურბლსა კარისასა, უხილავი ძალა აყენებდა, არ შეინდობდა შესვლად, გამთავდებდა კიდედ. პირველ ჰგონებია, ვითარმედ უძღურებოდა დედაკაცისათა შეემთხვეოდა და მიექალებოდა კვალად შესვლად, მაგრამ ვითარცა მიიწევდა ზღურბლად, ფხს დაადგამდა, ტაძარი იგი კვალად არ შეიწყნარებდა, ყოველნი შევიდოდნენ და იგი მარტოდ რჩებოდა, ბოლოს სულაც გამთავდეს იგი ეზოსა ტაძრისასა. ესე სამგზის შემთხვევია და მდგარა რა დიდხანს ყურესა მის ტაძრისასა, ჩასძინებია. ძილში უხილავს მიზეზი, რისთვისაც ტაძარი არ მიიღებდა. განთიად წამოსულა უდაბნოდ ცოდვათა მოსანანიებლად. სიმარტოვეს არ შეუშინებია. მწირსა და უკაცრიელ სამყაროს მეტ ზეგეშსა და შვებას პპოვებდა, ვიდრე ცდუნებით აღსავსე ცხოვრებაში, იქ ლომებსა და ვეფხვებს ხელით იპყრობდა, იმორჩილებდა და ესე 40 წელი დაუყვია იქ და უხილავს ნათელი იგი დაულამებელი... შემდეგ უთქვამს ზოსიმესათვის: წადი ახლა და ერთისა წლის შემდგომად მომინახულეო... ასეც უქმნია ზოსიმეს. ერთი წლის შემდგომ რომ მისულა იმავ ადგილს, იგი გარდაცვლილი დახვედრია. ლომს გაეთხარა მისთვის საფლავი და ზოსიმეს დაუფლავს.

ყველა გააკვირვა ქალის ნებისყოფამ.

სოფრონისთვისა ეს პირველი იყო საჯარო თხრობა და თავადაც ახლა კიდევ უფრო გაკვირვებული იყო, რომ ყველას ყურადღება დაიმსახურა, სულ მალე კი ეს ამბავი წიგნადაც დაწერა, „ცხოვრება მარიამ მეგვიპტელისა“, რითაც სახელი დიდად განითქვა.

ისიდორე ხუცესმა რა დაინახა ქალს უპირატესობა ენიჭებოდა სიწმინდის დაცვის ძალაში, ახლა არაკის ნაცვლად ისიც ნამდვილ ამბავს მოჰყვა:

— მოშორებით ამა ქალაქისაგან არს სოფელი, რომლისა ეკლესიაში იყო ხუცესი — ფრიად საკვირველი, რომელსაც მშობლებმა მოპგვარეს ქალი ვინმე პირმშენიერი. მჯულიერი იყო ქორწილი, მაგრამ ხუცესმა არწმუნა ქალი, რათა დასდგომოდნენ ორნივენი უბიწოსა ცხოვრებასა. ორთავენი ფსალმუნობდნენ ეკლესიაში, დაიცვენენ თავნი თვისნი სიწმინდით, ვიდრე სიბერემდე.

ამ თხრობამაც ყველა აალაპარაკა, ახლა უფრო ხუმრობის კილოზი იყვნენ და სოფრონიმ გულწრფელად აღიარა თავი ყოვლად უძღურაო

ასეთი გმირობისათვის, რაზეც ყველამ სიტყვიერად თუ უსიტყვოდ კვერი დაუკრა.

ერთმა თქვა:

— ეს უაღრესობა, ალბათ, ღვთივ ბოძებული, საგანგებო ნიჭია რჩეულთათვის, თორემ ჩვეულებრივი მომაკვდავი ვერ შემძლებელ არს ესეო.

— დათრგუნვა ბუნებრივი ლტოლვილებისა, — ამბობდა მეორე, — ყოველმხრივ გაუმართლებელია. კაცი უნდა დააკვირდეს ბუნებას, თავის აგებულებას და ისე მოქმედებდეს. ღვთის უკეთეს კაცი რას გამოიგონებს?! ყველა რომ ასე მოიქცეს, ადამიანის მოდგმა სომ არ უნდა ამოწყდეს? შვილი და შვილიშვილები რომ არ მეგულებოდეს სახლში, ამ ღუესჭირ ცხოვრებას რა გამატანინებსო!

ყველამ ითანეს გახედა, აბა რას იტყვისო, მაგრამ ითანემ არც ხუცესის საკვირველ დიდებულებაზე, არც ქალის გმირობაზე არაფერი თქვა, მხოლოდ ეს კი დაამატა:

— დასაკვირვებელი ადამიანს გარეგან აგებულებაზე რა აქვს? ყველაფერი ცხადლივ მეტყველებს თავის დანიშნულებაზე, მაგრამ დასაკვირვებელი შინაგანი რაობაა ადამიანისა, უმთავრესია ამოცნობა ვისთვის რისი უნარი მიუნიჭებია განმგებელს. მეტი აღარაფერი უთქვამს და არც ვინმე შეჰდავებია.

ითანეს არ შეეძლო ამ საგანზე მთელის გულწრფელობით ემსჯელა ხმაიადლა და თუ მსჯელობდა არ იქნებოდა გულწრფელი, მას არც სარგებლობის მოტანა შეეძლებოდა ვისმესათვის, სიტყვები მხოლოდ გონებას ვანაბნევდნენ.

რომ წამოვიდნენ, გზად სოფრონიმ მაინც სთქვა:

— იქნებ ისიდორეს ნამბობი მხოლოდ მისი ოცნებაა?

— ეგრეც რომ იყოს, — უპასუხა ითანემ, — ოცნება ჭეშმარიტების ის მოუცილებელი თანამგზავრია, რომელიც სშირად წინ უსწრებს, იგი გზის მკვლევიცაა.

სოფრონისათვის ითანე ბოლომდე მაინც ამოუცნობი რჩებოდა, მისი მზერა საიდუმლოს ფარავდა, ჩაკირულ სსოვნას მოწმობდა, რასაც მისი სშირი თქმაც ემოწმებოდა „ნამდვილი ცოდვა დავიწყებააო“.

ითანეს ამ საგანზე უფრო ღრმად უნდა ეფიქრა და იმ ღამეს ბევრი უტრიალა ისიდორეს თხრობას, ჩაიწერა, ბევრი ეცადა განსავრცობად, მაგრამ ვერა და ვერ მიჰყვა ბოლომდე, რალაც აკლდა. თხრობა ერთპიროვნული არ უნდა ყოფილიყო, იგი ყველასათვის მისაწვდომ განცდებით უნდა შემოფარგლულიყო. მისთვის მიწიერის განცდა ბიძგი იყო ასამაღლებლად, მაგრამ ეს მიწიერი ყველას ასე არ უბიძგებდა ამაღლებისათვის, პირიქით, იგი უფრო დაბლა დასწევდა და საბოლოოდ მიწას მიაჯაჭვებდა, თანაც ისე სამოდ, რომ მის დაძლევაზე არც იფიქრებდა. ასამაღლებელი ბიძგი მიწიერისა მრავალ წინაპირობას ითხოვდა, ამისათვის ადამიანი წინასწარ მომზადებული უნდა ყოფილიყო, მას შეურყვნელი რწმენა უნდა ჰქონებოდა იმისა, რომ მიწიერის დაძლევით ღვთაებრივს მიაღწევდა, რისთვისაც სხეულის დამთ-

რგუნველი ძალის მფლობელიც იქნებოდა, ასეთი კი ათასში ერთი თუ გამოერეოდა. ისიდორეს თხრობაც მისაბაძი მაგალითი ვერ გახდებოდა და ეს ამბავიც ასევე მოკლე თხრობად დარჩა მის კრებულში.

რამოდენიმე დღეს დააყვეს სერთვისს და ერთ დილას გოკიას წამოვიდნენ. გაჰყვნენ გოკიას წყალს და მივიდნენ მთის ძირას კარწახის ტბასთან. ტბა იყო დიდი, აღვსილი თევზითა, უმეტეს კალმახითა, ფრიად გემოიანიოთა. ამ ტბას მოერთოდა წყალი ფოსოსი, რომელიც გამოსდოდა ყარსის მთას და მიდიოდა ჩრდილოეთით, დასავლეთ კი — დიდებული მთა არტანისა. იოანე სანახაობით აღფრთოვანებული ამბობდა:

— ვინ ამოიცნობს რა საიდუმლოება იყო ჩაქსოვილი განგების შემოქმედებაში, როდესაც ბუნების ამ კუთხეს ძერწავდაო!

გოკიიდან წამოვიდნენ აწყურში.

აწყური შორიდანვე მოჩანდა უზარმაზარი კლდეზე აღმართული დიდი ციხით.

მოიგონეს გიორგი მაწყვერელი, მიაშურეს ზარზმას.

მღვდელნი და მამანი ზარზმისანი შემოეგებნენ, ტაძრად შევიდნენ, ილოცეს, წირვა ჩაატარეს და შემდგომ სერაპიონ ზარზმელი მოიგონეს.

— სერაპიონი კლარჯი იყო, — ამბობდა ერთი მამათაგანი, — მოწაფე მიქელ პარახელისა, ოპიზის დიდი მოღვაწე. მას ჩვენებით მიეღობრძანება, რათა სერაპიონი წარეგზავნა სამცხეს და იქ აღუშენებინა მონასტერი. აღაშენა სერაპიონმა მონასტერი, თავი მოუყარა ძმათ და მრავალთაც მიიზიდავდა მისი სახელგანთქმულობა. აწ კი აქ მოღვაწეობს სერაპიონის უფროსი ძმის შვილი ბასილი, რომელიც წერს წიგნს „ცხოვრება სერაპიონ ზარზმელისა“. ჩვენ მუდამ ვიგონებთ სერაპიონის მოღვაწეობას, მის სწავლას და ძალისაებრ ჩვენისა ვცდილობთ მივბაძოთ მის გულმოდგინებას და შრომისმოყვარეობას.

სანთელთა სიმრავლით და საგმეველის სურნელებით სერაპიონისათვის ჰყვეს ლოცვა:

„ანგელოზთა თანამზრახველო, უძლურთ მკურნალო, ჭირვეულთა შემწეო, ღელვა-გვემულთა ნავთ-საყუდელიო, გლახაკთა სიმღიდრეო, უცხოთა და მოგზაურთა ნუგეშინისმცემელო, მოღვაწეთა სამკაულო, მონაზონთა რჩეულებო, მამათა სიქადულო, დამიხსენ ჩვენ ლოცვითა შენითა ყოველთაგან მტერისა მანქანებათაგან“.

იოანემ და სოფრონიმ იჯერეს რა გული ხალხის სიყვარულითა და სამშობლოს სილამაზით, გაუდგნენ გზას პალესტინისაკენ.

თანამგზავრი ყვებოდა:

— უსან ქალაქს ვიხილეთ ერთი ბერძენი წმიდა ბერი, სახელად ლეონ, რომელიც გვეუბნებოდა: მერწმუნეთ, ძმანო, მომავალში მე გავმეფდებო. ჩვენ უთხარიოთ: დაგვიჯერე, მამო, რომ ამოა ეგ შენი ფიქრი. როდესაც მოვიდნენ ბარბაროსნი და ააოხრეს ქვეყანა, უსან ქალაქსაც მოადგნენ. ნახეს იქ მრავალი მონაზონი. ზოგი დახოცეს,

ზოგი ტყვედ წაიყვანეს. ასე, მათ ამა იოანე, ამა ესტატე და ამა თეოდორე, რომელნიც ავადმყოფები უძლურნი იყვნენ, უნდა წაეყვანათ. ამა იოანემ უთხრა ბარბაროსებს: წამოიყვანეთ ქალაქში და მე მოვაცემინებ თქვენთვის ეპისკოპოსს 30 დინარს. ბარბაროსებმაც გააყოლეს მას ერთი თავიანთთაგანი. ამა იოანე შევიდა ეპისკოპოსთან, მოუთხრო თავისი ამბავი. ეპისკოპოსს მხოლოდ 8 დინარი აღმოაჩნდა. მისცა იგი ბარბაროსებს, მაგრამ ბარბაროსმა უთხრა: ან მომეცი კიდევ 24 დინარი, ან ჩემი თანამგზავრი დამიბრუნეთ.

მაშინ გამოუყვანეს მას მონაზონი მტირალი. ეს 8 დინარი კი აიღო იმ ბერმა ლეონმა, რომელიც ამბობდა, რომ გამეფდებოდა. იგი მივიდა ბარბაროსებთან და უთხრა: აიღეთ ეს 8 დინარი, მეც მიმათვალეთ და გაათავისუფლეთ ის ავადმყოფნი, რამეთუ სიარული არ ძალუბთ. თქვენ მაინც მოკლავთ მათ და ახლა ტყუილად მოდიან თქვენთან. რაც შემეხება მე, სრულიად ჟანმრთელი სხეული მაქვს, თანაც თქვენთაგანი ვარ. ბარბაროსნი ასეც მოიქცნენ. როდესაც ლეონი მათთან მიდიოდა, კანკალმა აიტანა და ველარ შეძლო სიარული. მათ შეიპყრეს იგი და თავი მოჰკვეთეს.

გმირობის, თავდადების განცდებით აღჭურვილნი მოვიდნენ ბასილი დიდის საფლავთან.

საფლავის ქვას ნაზიანზელის წარწერა ამშვენებდა.

წარწერით აღფრთოვანებულმა სოფრონიმ ხმამაღლა ამოიკითხა:

„...ნუ დამივიწყებ მე შერ თანა ნეტარსა მაგას სამკვიდრებელსა შენსა, რამეთუ დავიწყება შენი ვერ ძალმიძს და უფროს, რათა მსწრაფლ გეწვიო, რამეთუ წარმავალ არს საწუთრო ესე და რად სახმარ არს დაყოვნება ქვეყანასა ზედა და მწუხარებათაგან განდევნა?... სცანიით ესე და უწყოდით, რამეთუ ბასილი, ვითარცა სურვილი იყო, ზეცად აღვიდა, ხოლო ვრიგოლი ქვეყანასა ზედა დაშთა და ცხოვრობს ცხოვრებითა საღმრთობითა!“

მდუმარედ განაგრძეს გზა.

მინდვრის ყვაველები კი თითქოს ხმაურით დასდევებოდნენ, წინ უსწრებდნენ, გზას უღობავდნენ, ისევე ჩამორჩებოდნენ, საყვედურობდნენ: რატომ გაგვირბიხართ, რატომ გვტოვებთო.

თ ა მ ი XII

გ ა ნ ს ა ც დ ე რ ი

მამა თეოდორე ბედნიერი ბრუნდებოდა სერგისაგან. შორიდანვე შემოსციცინა მისმა სავანემ და ის იყო უნდა გაქცეულიყო, რომ სილაზე ირმის ნაფხურები შენიშნა. მიჰყვა კვალს და სავანესთან სულ ახლოს ირემი დაინახა, რომელიც ორივე ფეხით მიწასა თხრიდა. უფრო ახლოს მივიდა და მოხუცის გვამი დაინახა. დააკვირდა — იცნო ეკლოგი. მისკენ მიმავალს ველარ მიეღწია მასთან. იქნებ სინდისის 90

ქენჯნას შეეპყრო, იქნებ, თავშესაფარს ეძებდა დევნილი? — ფიქრობდა უკვე სიბრალულით განმსჭვალული თეოდორე. მამა იოაკიმე და ჭაბუკი მოიყვანა საფლავთან, დაფლეს. სამარეზე სანთელი დაუნთეს.

ამ ამბავში თეოდორეს აღფრთოვანება დააშოშმინა და სერგისთან მომხდარს უკვე ისე ჰყვებოდა, თითქოს დიდმნიშვნელოვანი არაფერი მომხდარიყო.

თეოდორეს საოცარ სითამამესთან ერთად სინაზეც ამშვენებდა. და მამა იოაკიმე მის სახეს დაკვირვებულ მზერას ვერ აცილებდა. კვლავაც მიუქცევია ყურადღება მისი განსაკუთრებულობისათვის, რაღაც იყო თეოდორეში მისთვის ამოუცნობი. მაგრამ რაკი იგი თავად არას იტყოდა, გრძნობდა, სათქმელად ეძნელებოდა და ცნობისმოყვარეობას აღვირს უბამდა.

თეოდორეც ამჩნევდა ამას და მეტად ფრთხილობდა, მის ერთ წინდაუხედავ სიტყვას შეეძლო ხელიდან გამოეგლიჯა საიდუმლოება.

მამ იოაკიმე ხარობდა თეოდორეს წარმატებით, მასში სულ ახალ-ახალ ღირსებებს ხედავდა და ჰმადლობდა ღმერთს.

თვითნება ჭაბუკი კი უკრძალველად შეესიტყვებოდა, განსაკუთრებით, ევლოგიზე უნდოდა ეთქვა ნიშნის მოგებით, მაგრამ თეოდორეს გამონდვა ამის ნებას არ აძლევდა, მხოლოდ ეს კი უთხრა:

— ნეტა სიკეთისათვის მადლობა თუ უთქვამს ვისმეს?

— მადლობისათვის თუ იქმ სიკეთეს, ეს უკვე ქველმოქმედება აღარ არის, ღვთის წინაშე კი ქველმოქმედებაა უწინარესი, — ლმობიერი, დაღლილი ღიმილით ამბობდა თეოდორე და თან ერთი ამბავიც დაურთო:

— იყო ერთი ბერი, ხელოვნებით თერძი, დღე ჩამოუვლიდა სოლმე ღარიბებს, უსასყიდლოდ უკერავდა ტანისამოსს, თან განებებ რაიქს მრუდედ მიაკერებდა, ოღონდ ისე, რომ პატრონს თავადაც ადვილად შესძლებოდა შეკეთება, მაგრამ საყვედური მაინც არ ასცდებოდა და უსაროდა — უმადურებამ უნდა მაცხოვნოსო.

— გადარეული ვინმე იქნებოდაო, — თქვა ჭაბუკმა და სენაკიდან გავიდა, რადგან იცოდა, თეოდორე კიდევ რასმე შეგონებას მოაყოლებდა, მას კი კუტკალიების ჭირიჭინი ერჩივნა, თხასთან ძიბგილობა. ვაჟს ყველაფერზე თავისი შეხედულებები ჰქონდა, თეოდორეს ჭარბი მზრუნველობა, რატომღაც აღიზიანებდა, მას მამა იოაკიმეს ზომიერი სიმკაცრე უფრო სიბლავდა.

მამა იოაკიმემ კარგად იცოდა, რომ ბავშვის აღზრდაში მთავარი დამოუკიდებლობის განვითარება იყო. ამიტომაც ხშირად არ უწონებდა თეოდორეს ბავშვის ნებუირობას და თავად იკისრა ბავშვის აღზრდა. ხედავდა, ჭაბუკი ჭკუასთან მწყრალად არ იყო, რამეთუ ჯერ ფიქრობდა და მერე მოქმედებდა, რაც ბევრ ხანდაზმულ ადამიანსაც არ ახასიათებდა. თავისუფალი სეტიალის ნებას კი არ აძლევდა, თვითნებობისათვის დატუქსავდა, მაგრამ არასოდეს არ დასცინებდა, სახუმაროდ კი რასმე ისევ თეოდორეს ნათქვამს გაჰყენწლავდა. ეს კი თეო-

დორეს მოსწონდა, რომ მისი ნათქვამი მამა იაოკიმეს დასსომებოდა, ამიტომ იაოკიმეს არაფერს გაუსწორებდა, თანაც ხედავდა, რომ ყრმა უსაქმობის მსხვერპლი არ განდებოდა.

ჭაბუკის მჩქეფარე სიცოცხლეში საოცრად სათუთი და გულფიცხელი ადამიანი ვლინდებოდა. დროს იხელთებდა თუ არა, ტბისაკენ გაუტყვდა. ერთ ადგილზე გაიტვირთებოდა. აცქერდებოდა ტბის წვრილი კენჭებით მოოჭვილი ფსკერს, აკვირდებოდა, როგორ ისარკებოდა მისი სახე, თვალს ადევნებდა ფლამინგოებს, როგორ იჭერდნენ ლოკოკინებს, როგორ გულდასმით ისუფთავებდნენ მოვარდისფრო თეთრი, შეღუნული ვრძელი ნისკარტით ფრთებს და ფიქრობდა — რამდენად ლამაზი და სრულქმნილია ფლამინგო! თეოდორე კი ამბობდა: ადამიანი ყველაზე სრულქმნილიაო. ფლამინგო უეცრად შეფრინდებოდა წყალში, და გასცურავდა, გაივლიდა; რა ბედნიერი იქნებოდა ფლამინგოდ რომ დაბადებულიყო! საიდუმლოებით იყო სავსე ეს ქვეყანა და მისი ოცნებები პეპლებივით დაფარფატებდნენ. მიწა, ამ ვეება სეებს რომ ამოზრდიდა, სიცოცხლეს რომ ასულდგმულებდა საიდუმლოებას მალავდა წყალში, ცის ლაჟვარდოვან გუმბათში!

სადაგი დღე იყო.

თეოდორე ჭაბუკთან ერთად ქალაქად წამოსულიყო სახმარის შესაძენად და გზად რატომღაც სიკვდილზე წამოიწყეს საუბარი.

— ადამიანს ერთი ბედნიერება აქვს, — ამბობდა თეოდორე, — არ იცის როდის მოკვდება, მაგრამ იმავე დროს გეშინია კიდევ მისი, ცოდების მოუწინაველად არ გახვიდე ამქვეყნიდან.

— ამისათვის მთელი სიცოცხლე ხომ არ უნდა იყო, როგორც ბერ-მონაზონი?! მე სიკვდილის წინ მოვინანიებ, — ამბობდა რაღაცით უკმაყოფილო ჭაბუკი.

— ღმერთმა დაგვიფაროს და იქნებ, ადამიანი უცაბედ ტყვიისაგან კვდება, იქნებ, წყალში იხრჩობა, იქნებ, ვისიმე წყევლაში ამოსდის სული, ან ისეთი ცოდვა გიპყრობს — სხვის სიკვდილს უცდი... — მეწყვიტა თეოდორემ სიტყვა, ატყობდა ჭაბუკი ყურს არ უგდებდა.

ერთხანს მდუმარედ მიდიოდნენ და როგორღაც მოულოდნელად შეკეისას თეოდორეს ჭაბუკი:

— შენ ის არ გინდა მითხრა, თუ ვინ არის ჩემი დედა.

ეს კითხვა თეოდორეს მიმინოსავით დააცხრა. თითქოს არც ეფიქრა, თუ როდისმე ასეთ კითხვას დაუსვამდა ჭაბუკი და როგორ უნდა ეპასუხა, რა მოეგონებინა, ან რას მოუტანდა სიმართლის გაცხადება? ბუნებამ იმარჯვა და სრული სიწრფელით, განწირულებით, მოკლედ, ყველაფერს მოჰყვა.

ჭაბუკს თეოდორე შეებრალა, თავისი თავიც შეეცოდა და მადლიერებით გადაეხვია, თეოდორეს თვალებში კოცნიდა.

დაღლა რომ იგრძნეს, იქვე ხის ძირას ჩამოსხდნენ.

ჭაბუკი ხეს აცქერდებოდა. ხიდან თეოდორეს თავზე ობობა ეშვებოდა. უცებ ბიჭმა კატასავით ისკუპა, ობობას ხელი სტაცა და ხელის გულზე გასრესილი ობობა თეოდორეს დაანახა.

— რაღაცას გადავურჩებით, — თქვა ბედნიერი ღიმილით თეოდორემ და თან დასძინა, — ფათერაკი კაცს სწორედ მაშინ დაატყდება თავს, როდესაც ყველაზე ნაკლებად ელის.

წამოდგნენ და გზა განაგრძეს.

თეოდორემ ახლა საღვთისმეტყველო საუბრის წამოწყება დააპირა, მაგრამ ჭაბუკმა არ აცალა:

— არ მიიხრა, ახლა, ბერად უნდა აღიკვეციო.

თეოდორე არც აპირებდა ამის თქმას. ვინ, თუ არა მან, კარვად იცოდა, რომ ბერობა აუცილებელი არ არის ქრისტიანული სარწმუნოების აღიარებისათვის, ადამიანი სულიერად უნდა ყოფილიყო სქიმოსანი.

ჭაბუკი კი თავისთვის ჯუჯღუნებდა:

— მირწევნია კოლტები ვმწყემსო, მეხრედ დავუდგე გადამთიელს, ბატებზე ვინადირო, ვითევზათ, ვიდრე მარხვასა და მუხლთ დრეკაში სული დავლიო...

ასეთ საუბარში იყვნენ, რომ მიადგნენ დაყურძნებულ ვენახს.

ჭაბუკი თეოდორესათვის შეუმჩნევლად შეახტა ზღუდეს, მაგრამ ისე მოუზომავად, რომ უცაბედ ზღართანი მოადინა ვენახში. სმაურზე დიდმა ძაღლებმა, ყორნისფერა თმოსნებმა და საშინელებმა, ასტუნეს ყიფა.

დამფრთხალ ჭაბუკს ყურძნის მტევნის პირთან მიტანა ვერ მოესწრო, რომ თავს წამოადგა მოხუცი მევენახე, სტაცა ხელი, მაგრამ სელიდან დაესხლტა. ჭაბუკმა დიდი ქვა დაინახა, წამოავლო ხელი და ერთი მოქნევით ვენახის პატრონს სული გააცხებინა.

სმაურზე მიზობლები გამოცვივდნენ, აყვირდნენ, გზაზეც ხალხი ჩერდებოდა, შეიქნა ერთი აურზაური.

გონებააბნეული თეოდორე, რაკი ჭაბუკს ველარ ხედავდა, მიხვდა, უბედურების მიზეზი ის იქნებოდა, ვალავანს აწყდებოდა, ვარს უვლიდა, უნდოდა გაეგო, რა ხდებოდა, მაგრამ ამოდ — ვერას ვებულობდა.

ჭაბუკი ვალავანის მეორე მხრიდან გადამხტარიყო და გაუჩინარებულყო.

დამნაშავის ძებნაში თეოდორეს სტაცეს ხელი.

თეოდორე დამფრთხალი კურდღელივით შეჰყურებდა ყველას.

— შენა ხარ იმ მოხუცის მკვლელი? — დასძახა ვილაცამ და გამეტბით შეანჯღრია.

— ჰო, მე ვარ, — დაუფიქრებლად თქვა თეოდორემ.

— არ დაინდოთ, — იყვირა სხვამ და ზღუდიდან პირდაპირ თეოდორეს დაახტა.

ხალხი ფუტკრის ნაყარივით თავს იყრიდა მის ირგვლივ და ვისაც რითი შეეძლო, დაუნდობლად ურტყამდა. ბოლოს ნაგვემი, გაბაწრული თეოდორე გამგებელთან წაიყვანეს:

გამგებელმა განაჩენი არ დაავიანა და მაშინვე გამოაცხადა:

„ჩამოხრჩობით განიყვანონ მკვლელი ამა სოფლიდან“.

ჭაბუკი სამალავში თავგზადაკარგული გართხმულიყო, ნაპირზე გამოორიყული თევზივით ფართხალებდა, იკრუნჩხებოდა, გულხეთქებით ადევნებდა თვალყურს შორიდან და რა გაიგონა განაჩენი, გული ისე შეეკუმშა, ყელს უთანგავდა, ყურების შუილი თავბრუს ასხამდა, განცედები ერთმანეთს ესეთქებოდნენ. რა უნდა ექნა? თავიც ენანებოდა და თეოდორეც! სიკვდილის იმდენად ეშინოდა, რამდენადაც სიცოცხლე უყვარდა!

მილეთის ხალხის ღრიანცელმა იქაურობა გააყრუა, ახლომანლო სოფლებიდანაც ხალხი მოაწყდა და მოაწყდა.

ეკლესიის დიდმა ზარმა განაჩენის სისრულეში მოყვანის ნიშანი მისცა. ხედავდა ჭაბუკი, როგორ ემზადებოდნენ ჯალათნი, როგორ მიჰყავდათ ნატანჯი და ნაგვემი თეოდორე განსაკითხავად. სინდისის ქენჯამ უცებ სალმობასავით დარია ხელი; წამოვარდა, გაქანდა და გულის სიღრმეიდან ამოგლეჯილი სმით იყვირა:

— ნუ მოჰკლავთ, უბრალოა იგი, მე ვარ ის, რომელმაც მოკლა კაცი! და სასჯელის ადგილზე თეოდორეს წინაშე დაენარცხა.

ხმაური ერთბაშად შეწყდა, ყველა ადგილზე გაირინდა.

ნაწამები თეოდორე სახრჩობელას ყულფთან მწევარის კლანჭებში მოქცეულ კურდღელივით დამშვიდებულიყო. უკანაკნელი ძალ-ღონე მოიკრიბა და ძელს ზემოდან გადმოსძახა:

— ადამიანო, შეგინდოს ღმერთმა ისევე, როგორც არ ინდომე, რომ მიმეღო სრულად მოწამის გვირგვინი. მე ვეწამე და ახლა შენ გინდა მოკვდე? — ესა თქვა და თავი ჩაჰკინდრა.

მომსდარი უმაღ გამგებელს აცნობეს.

გამგებელმა ხალხი შეკრიბა.

მოვლენები ელვის სისწრაფით სცვლიდნენ ერთმანეთს.

სამსჯავრომ თავიდან მოისმინა მათი ამბავი. განცვიფრდნენ. შეიქმნა ძიება. ამბავმა არქიებისკოპოსამდე მიაღწია. ახლა მან ბრძანა მასთან შეკრებილიყვნენ გამგებელნი და წინამძღვარნი.

იმსჯელეს.

შემდეგ ხალხის წინაშე გამოვიდა ეპისკოპოსი და აღიმალლა ხმა:

— კანონი მეტყველებს: ვინც მოჰკლავს ადამიანს და ამავე დროს სხვა ადამიანს იხსნის სიკვდილისაგან, იგი იქმნას დახსნილი სიკვდილისაგან. აღიკვეცოს ბერად და ცოდვათა მოსანანიებლად უდაბნოდ განდგეს.

ჭაბუკი გულწრფელად აღვარვარებდა სიხარულის ცრემლებს იმაზე, რაზეც სულ რამოდენიმე ხნის წინ გაგონებაც არ უნდოდა — ახლა ბერობა მისთვის მკვდრეთით აღდგომა იყო.

მამა თეოდორეს შესახებ კი გაისმა:

— წამებისაგან ნატანჯი მოიხსენონ ჟამის წირვაში, განკურნონ, მოასვენონ და გაათავისუფლონ.

ჭაბუკი ზვიადი მორჩილებით იმოსებოდა პატიოსანი სქიმით, ამიერიდან სახელდებული მამა ისააკ.

მამა ისააკს სული ისე დაჟეჟოდა, ახირებული, დამყოლი გამხდა-

რიყო, მაგრამ ჩვეულებისათვის მაინც ვერ ელაღატა და რამოდენიმე დღის მერე თეოდორეს მაინც ჩასწურწულა:

— მე რომ არ მოვსულიყავი, როგორ გიშველიდა შენი ღმერთი?! გრძნობდა თეოდორე, ეს საწყენად არ იყო თქმული, ეს შემარტიბელი სიტყვა იყო და ღმობიერად უთხრა:

— უფლისა ნებით მოხველ შენ.

ნამდვილი მწუხარება მცნებაზე ძლიერი აღმოჩნდა, განცდა — განსჯაზე უმაღლესი და სრულიად ახალგაზრდა, ამ ერთ დღეს იმდენ რას-მე ჩასწვდა, რასაც მრავალი ადამიანი მთელ სიცოცხლეს მოანდომებდა.

...მშვიდად დაადგნენ გზას უდაბნოსაკენ, როგორც გზას ცისაკენ, მამა იოაკიმეც ხომ უნდა გაეხარებინათ!

ქალაქს რომ გადავიდნენ მამა ისააკს დაუძლეველი სურვილი დაე-უფლა თეოდორესთან ერთად თითო ფიალა ღვინო შეესვა და სთხოვა შესულიყვნენ ქულბაქის მეღვინისას.

თეოდორემ თქვა:

— აღელვებულს ღვინო გარდარევესო.

— მე უკვე დავმშვიდდი და შემერგებო, — მიუგო მამა ისააკმა.

— შენ წადი, მე ვერ შემოგყვებიო, — უთხრა თეოდორემ და იქვე მოშორებით ჩამოჯდა.

ირგვლივ რომ მიმოიხედავდა, ერთ ქალზე შეაჩერა თვალი თეოდორემ, არაერთხელ ენახა იგი, გაახსენდა კიდევ სად და როგორ და ტანში ჟრუანტიელმა დაუარა. ქალი კი მას თითქოს ვერც ამჩნევდა და მამა ისააკს უთვალთვალებდა და რა გამოვიდა ქულბაქიდან მამა ისააკ, დაინახა, როგორ წაავლო ხელი, განზე გაიხმო და უთხრა:

— შვილო ჩემო, არ უწყვი, რამეთუ გმოსავს შენ სქიმა წმინდათა? ვითარ იკადრე და შესვედი მსმელებთან, სადაც შენ გესმის ის, რაც არ გინდა და ხედავ მას, რისი ხედვაც არ გნებავს და მამათა და დედათა თანა აღერავი? ნუ, შვილო, ნულარ ჰყოფ ასეთ საქმესა, გაეშურე უდაბნოსაკენ.

— წარვედ გზასა შენსა, ადამიანო, რამეთუ ღმერთი ეძიებს გულსა წმიდასა, — მიუგო ისააკმა და ზედაც არ შეხედა.

ქალმა აღაპყრო ხელნი ზეცად და თქვა:

— გმადლობ, შენ უფალო, ამ საკვირველებისათვის. ათეული წლები ვიყავ სკიტესა და ვერ მოვიპოვე გული წმიდა, ამას კი მსმელებთან აღრევით გული წმიდა მოუპოვებიაო!

ისააკისათვის ახლა სულერთი იყო, ვინ რას იტყოდა, მას თავისი შეხედულება ჰქონდა.

თეოდორემ კი სული მოითქვა, რა დაინახა ისააკმა იგი ქალი ჩამოიცილა.

მართალია, ისააკს გარეგნულად ბერობა კი მიეღო, როგორც სიკვდილიდან ხსნა, მაგრამ მაინც მთავარი იყო შინაგანად გამხდარიყო ბერი. ეს კი ფრიად ძნელი რამ იყო, რადგან ჯერაც ვერ გაეგო — გამარჯვა თუ დამარცხებულიყო, სიბნელიდან უეცრად მზის სინათლეზე

გამოსულივით ვერას არჩევდა, ფიქრებიც მოუცილებელი კრახანები-
ვით დასტრიალებდნენ.

— ჩემისთანა უღირსი ღვთის სამსახურში რის მაქნისიაო? — შეს-
ჩივლა თეოდორეს გულისტკივილით.

— როდესაც ფიქრობ უღირსებაზე, სწორედ მაშინ ხარ ღვთის წი-
ნაშე ღირსეული, — კმაყოფილებით მიუგო თეოდორემ.

უბედურებამ გადაიქუხა, სულის ჩქროლვაც შენეულდა, თუმცა ნა-
ტუნჯი სხეული აღსასრულზე აფიქრებინებდა სოლმე. თ'მით კი არას
იტყოდა, პირჯვარსაც მალულად გარდაისახავდა, ისააკს კი მაინც ეტ-
ყოდა:

— ლოცვის მოსწრაფე იყავ, ბრმას წინამძღვარ ექმენ, სნეულს შე-
მწედ...

— მიიერი განაძღე, შიშველი შემოსე, ნურცა ძვირს იტყვი ძმისა
შენისათვის ზურგს უკან, რასაც პირში ვერ ეტყვი, სხვისას ნურას ინ-
დომებ, — გააგრძელა მამა ისააკმა. — თეოდორეს სიყვარულით მხრებ-
ზე მოხვია და თვალებში ჩახედა, უშედეგოდ არ ჩაეველო განსაცდელს,
თეოდორეს სახეს ჩამავალი მზის ნათელი მოჰფენოდა, გულს ნაღვე-
ლი სწვეთდა და ცდილობდა გაღიმებას.

თ ა ვ ი X I I I

კ ვ რ ა კ ღ ე

კონსტანტინოპოლის ირგვლივ ზღვაში უამრავი სომალდი აფრიაშ-
ლილი დასრიალებდა. ავარებს გაევისთ ზღვა ველური ტომებით, დე-
დაქალაქის კედლებს მისწყდომოდნენ და ისეთ შიშის ზარსა სცემდ-
ნენ, რომ ალყაშემორტყმულ ქალაქიდან ვერავინ გამოდიოდა.

პატრიარქი სერგი ლოცვებით, ღამის თევით, ხალხს ღვთის შემ-
წიობის იმედს უცხოველებდა, და კარიბჭეებიც ღვთისმშობლის ხა-
ტებით იმოსებოდა.

ხანი უთვლიდათ:

„თქვენ არ შეგიძლიათ გადაიქცეთ თევზებად, რათა ზღვაში იხს-
ნათ თავი. ვერც ჩიტებად გადაიქცევით, რომ გაფრინდეთ ცაში, ამი-
ტომ უსიტყვოდ ჩავგბარდითო“.

კონსტანტინოპოლი არც პასუხობდა და არც ნებდებოდა.

მაშინ ხანი წამოვიდა ორმხრივი იერიშით — როგორც ზღვით, ისე
ხმელეთით, მაგრამ დედაქალაქი ისეთი თავგანწირვით იგერიებდა
შემოტევას, რომ თავდამსხმელები ადგილზევე განიგმირებოდნენ. მე-
რე იმდენად გათამამდნენ, რომ თვითონვე გააღეს ქალაქის კარიბჭე,
შეტევაზე გადასასვლელად. ჯარს ქალები და ბავშვებიც შერთვოდნენ
და მტერს ყიჟინა დასცეს...

ამ მარცხის შემახდელი ხანის წყრომა ლომის ბღღვინვასა ჰვავდა
და სხვა რომ ევლარა მოისაზრა, ბრძანება გასცა ცეცხლი წაეკიდები-
ნათ ნაგებობისათვის.

სპარსელებმა რა დაინახეს ქალაქზე დაფიონი, ეგონათ, ქალაქი აღებულიაო და გაიხარეს მოკავშირის წარმატებით, მაგრამ შაჰრბაზრმა მალე მარცხი აშკარად დაინახა, გაეცალა იქაურობას და ჯარი სირიაში გარეკა.

კონსტანტინოპოლი თავის გამარჯვებას ღვთისმშობელს მიაწერდა, ამიტომაც, ზეიმზე მის სადიდებლად ლოცვას აღავლენდა. აიასოფიას დიაკონი გიორგი პისიდიელი პოეტიც იყო. მან აღფრთოვანებულმა სანახაობით იმავე დღეს შექმნა ყოვლადწმიდა მარიამის დაუჯდომელი.

პატრიარქ სერგის ხელში კი პისიდიელის მთრთოლვარე პერგამენტი სასოებითა ეღერდა, მოზეიმე ზღვა ხალხის ტალღებში შეუწყვეტლად გაისმოდა გულში ჩამწვდომი სიტყვები:

„გიხაროდენ პალატო ქრისტეს მეუფისაო... ვარდო დაუჭნობელო, შროშანო მშვენიერო, საკმეველო სულნელო... გიხაროდენ, ცისკარო ბრწყინვალეო, რომელმან აღმოგვიბრწყინვენ გზა... გიხაროდენ, სოფლისა სალხინებელო და ქვეყნით ზეცად ამალღებულო კიბეო, გიხაროდენ, წიაღმყვანებელო სიკვდილისაგან ცხოვრებად... ჰოი, სიხარულის ამიზეზო მზიარულ-ჰყვენ გულის-სიტყვანი ჩვენნი, რათა ქებით გიგალობდე...“

საგალობელი უმალ მიიღო მთელმა საქრისტიანომ აღმოსავლეთსა და დასავლეთში, იგი იქცა ნიმუშად მრავალ ჰიმნთათვის მომდევნო საუკუნეებში და დღესაც, თითქოს იმ დღის საზეიმო გზნებით აღავლენს ეკლესია.

როდესაც იმპერიის დედაქალაქი ზეიმობდა გამარჯვებას, იმპერატორი შორეულ კავკასიაში ხოსროს წინააღმდეგ ახალი დარტყმისათვის ემზადებოდა.

ვერ უძღვებდნენ რა ჰერაკლეს შეტევას სპარსთა ჯარების მეთაურნი, დახმარებას ითხოვდნენ ხოსროსაგან. გაასპიტებული ხოსრო კი სიტყვებს ტყვიასავით ისროდა, უთვლიდა: „თუ არ შეგიძლიათ გამარჯვება; შეგიძლიათ მოკვდით“.

ჰერაკლე თავად მიუძღვოდა ჯარს და იხვეჭდა რა აურაცხელ სიმდიდრეს ხოსროს მიტოვებულ სასახლეებში, ზეიმობდა და ხოსროს უთვლიდა:

„გდევნი რა, მე ვისწრაფი ზავისაკენ. არა ჩემი კეთილი ნებით ვწვაგ და ვანადგურებ სპარსეთს, არამედ შენით ვარ იძულებული. დავაქროთ ცეცხლი, ვიდრე ყველაფერი ალში დაიღუპება“.

მაგრამ ხოსრო არც პასუხობდა და თავდასაცავად ქალაქ სელევკიასთან მისადგომ ხიდებს ანგრევიანებდა.

ნინევიასთან ჰერაკლემ საბოლოოდ გაანადგურა მტრის ჯარი და ხოსროც დამარცხდა.

სპარსელთა ამ დამარცხებას მოჰყვა აჯანყება თვით სპარსეთში. ხოსრომ გაქცევითაც ველარ უშველა თავს; იგი შეიპყრო სპარსთა დიდებულებმა. მის თვალწინ დაკლეს მისი შვილები, ამოწყვიტეს მის შთამომავალთაგან ყველა მამაკაცი და თავადაც ზედ დააკლეს.

პერაკლე კონსტანტინოპოლს სწერდა:

„უხაროდეს ცას და ზეიმობდეს დედამიწა. უხაროდეს ზღვას და ყოველივეს, რაც მასშია და ჩვენც ყველა ქრისტიანებმა აღუვუცინოთ ქება, დიდება და მადლობა ერთადერთ ღმერთს. გვისხაროდეს უდიდესი სიხარულით მისი წმინდა სახელისათვის. დაეცა ამპარტავანი ღვთისმბრძოლი დაეცა და დაემხო მიწის წიაღში და მოისპო დედამიწიდან მისი სახსენებელი შრომა მისი მის თავზე დაეცა და სიცრუე მისი ავიდა მის კორტოზზე“.

გიორგი პისიდიელი კი ისევე პოემით პასუხობდა:

„იზეიმე გოლგოთავ, ყოველი ქმნილება ისევე თაყვანს გცემს შენ“.
ყოველივე ეს შთაგონებით აღაგზნებდა პისიდიელს და ახლა უკვე პერაკლეს შეასახმდა ქებას აღმოსავლურ ყაიდაზე, პოემით „პერაკლიადა“, ანუ „სოსროს დაცემა“.

პერაკლემ ყოვანათა მეფეს აღუთქვა ცოლად თავისი ასული, წამოიყვანა მრავალი ერი სპარსეთს, წამოიღო ძელი ცხოველი, წამოიყვანა ზაქარია მამათავარი და ძღვევამოსილებითა და ზეიმით შევიდა იერუსალიმს.

ასე იქმნა პერაკლე პირველი ჯვაროსანი.

გიორგი პისიდიელის პოემა „ექვს დღეთაც“ პერაკლეს მიემძვნებოდა, სადაც პირველ ადგილზე დაყენებულია თვით პერაკლეს პიროვნება და არა გამარჯვების ფაქტი, გამარჯვება მისთვის მხოლოდ ჩარჩოს წარმოადგენდა.

ბიზანტიელებს თავი მოსწონდათ პისიდიელით და ამბობდნენ: „აბა, ვინ უფრო უკეთეს ლექსებსა სთხზავს — ევროპიდე თუ პისიდიელი?“
ექვსი წლის ომის შემდეგ დაბრუნებულ იმპერატორს ბოსფორის ნაპირას შესვდნენ მშვიდობის სიმბოლოთი — ზეთის ხილის ტოტებით, ანთებული ჩირაღდნებით, გამარჯვების შეძახილებით, ახალი საგალობლებით.

თავისი დიდების სიმაღლეზე იდგა პერაკლე, სიხარულის ცრემლებით ირწყვოდა მიწა.

პერაკლემ შემოუარა რა დედაქალაქს, ტრიუმფით შევიდა ოქროს კარებით. მისი გამარჯვების ეტლი მიჰყავდა ოთხ სპილოს, რომელნიც შემდეგ მოედანზე ხალხს გაართობდა, პერაკლე კი ხალხს საჩუქრებს დაურთებდა სპარსეთს მოხვეჭილი ნაალაფევიდან.

სპარსთა ასალმა მეფემ, კავადმა, მაშინვე ზავი შეკრა პერაკლესთან და გამოთქვა სურვილი კეთილმეზობლობისა. ბიზანტიას დაუბრუნდა სოსროს მიერ დაპყრობილი ტერიტორია ედესიდან ალექსანდრიამდე — სირია, პალესტინა, ეგვიპტე.

კავადი მალე დასნეულდა და რვა თვის მეფობის შემდეგ სასიკვდილო სარეცელზე მყოფმა, პერაკლეს თსოვნით მიმართა, დაეცვა ტანტი მისი მცირეწლოვანი შვილისათვის და სწერდა:

„როგორც თქვენი ღმერთი მიანდვეს სუცეს სვიმეონს, ისე მე შენ ხელთ გაბარებ შენ მონას, ჩემ შვილს, დაე ღმერთი, რომელსაც შენ

თაყვანსა სცემ, იყოს მოწმე იმისა, თუ შენ როგორ მოექცევი მას“.

მაგრამ ჰერაკლემ ვერავითარი პატრონობა ვერ მოასწრო, რადგან სპარსეთში ისევ გადატრიალება მომხდარიყო, მცირეწლოვანი, კანონიერი მემკვიდრე მოექლა შაჰრბაზრს და თავად ასულიყო ტახტზე: ვითარებაში კიდევ კარგად ვერ გარკვეულიყვნენ, რომ უზურპატორიც ასევე ვერაგულად მოეკლათ და რადგან სასანიდებში აღარ აღმონდა ტახტის შესაფერი მამაკაცი, გამეფდა ხოსროს ქალიშვილი.

ყოველისმშუსრველმა სპარსეთმა დაჰკარგა სახელმწიფოებრივი დამოუკიდებლობა.

თ ა ვ ი X I V შ ე ს ვ ე რ ა

ერთ დღეს იძრა პალესტინის მიწა და შუადღის ცაზე გამოჩნდა ჩრდილოეთისაკენ მიმართული ვარსკვლავი მახვილის სახით და ოცდაათი დღის განმავლობაში იდგა გაჭიმული — ასე ვადმოგვცემს ჟამთა აღმწერელი და დასძენს, რომ იგი მაუწყებელი იყო არაბების ძლიერების გავრცელებისათ.

კეისარი ჰერაკლე, რომელსაც ვარსკვლავმრიცხველადაც აღიარებდნენ, ამ მოვლენას დაეფიქრებინა.

ბიზანტიის კეისარმა ველარ იზეიმა გამარჯვება.

სამხრეთიდან დაიძრა მუჰამედის მოძღვრებით აღფრთოვანებული, გამაჰმადიანებული არაბთა ლაშქარი, რომელიც ძალითა და მახვილით ავრცელებდა ახალ სარწმუნოებას.

მუჰამედს წინ უსწრებდა მესიანური მოლოდინი და აი, მუჰამედიც, მოწოდებით მიმართავს თავის ერს, არაბებს:

„განვწმინდოთ ჩვენი ტომების სარწმუნოება, მოვსპოთ კერპები, უარი ვთქვათ ყოველივე მიწიერზე, ვიწამოთ ერთი ალლაჰი და მისი, მოციქული მუჰამედი, რომელსაც უნდა ემორჩილებოდეს ყველა, რამეთუ მან უწყის ჭეშმარიტება“.

ყველას კარს ადგებოდა უპოვართა ახალი მესიის ამბავი, მის ირგვლივ თავს იყრიდნენ მიმდევარნი.

მჭერმეტყველი მუჰამედი ხალხზე შთამავონებლად მოქმედებდა; იღვიძებდა და ენთებოდა ათასობით გული, ათასობით მზეურა მისჩერებოდა მუჰამედს, როგორც ჭეშმარიტების მახარობელს.

არაბულად მორჩილება ნიშნავდა „ისლამს“ და ამიტომაც მოძღვრებასაც შეერქვა ისლამი.

იგი მორწმუნეს, ანუ „მუსლიმს“ ავალებდა უპირველეს მორჩილებას მუჰამედისა, რომელსაც ალლაჰი ჰკარანახობდა; იმისათვის კი, რომ „მუსლიმს“ სარწმუნოება შეეთვისებინა, საჭირო იყო დღეში ხუთჯერ

ელოცა, წელიწადში ერთი თვის განმავლობაში — მეცხრე თვეზე რამადანისა, ე. ი. მეცხრე თვეზე არაბთა მთვარის წლისა, რომელსაც ჰქვია რამაზანი ანუ რამადანი, ემარხულა. მზის ამოსვლიდან მზის ჩასვლამდე არაფერი ეჭამა. მორწმუნეს მუდამ უნდა ევლო სათაყვანებელ ადგილებში: მექას, მედინას; ვალდებული იყო თავისი შემოსავლის გარკვეული ნაწილი გაეღო ღარიბთა სასარგებლოდ, მონაწილეობა მიეღო საღმრთო ომში, ანუ არამუსლიმანთა წინააღმდეგ.

მუჰამედი ამბობდა:

— ჩემი საზოგადოების შენახვა ემყარება მათი ცხენების ჩლიქებსა და მათი შუბის წვერებსაო.

მაგრამ ამბობდა იმასაც, რომ ჭეშმარიტმა სარწმუნოებამ არ იცის ძალდატანებაო.

მექა არაბების სავაჭრო მთავარი ქალაქი იყო, აქედან ვითარდებოდა საქარავნო ვაჭრობა არაბებს შორის.

არაბების ჯარი უმთავრესად შესდგებოდა ბედუინებისაგან, ფიცხელი, მომთაბარე ცხენოსნებისაგან, რომელთაც მუჰამედის მოძღვრებისა არაფერი გაეგებოდათ, მაგრამ მათ წარმატებას ხელს უწყობდა ის, რომ ისინი ცხოვრობდნენ ბიზანტიის სასაზღვრო მიწაზე, იცოდნენ ბიზანტიელების სუსტი ადგილები, იცოდნენ ისიც, რომ ომებით დასუსტებული ბიზანტია პროვინციებში ახალ ძალას წინააღმდეგობას ვერ გაუწევდა.

არაბებს თავინთი ცხოვრების სიდუხჭირე აიძულებდათ შეკავშირებულიყვნენ და წარმართულიყვნენ იმ ქვეყნებისაკენ, სადაც მათ ნადავლი და ხარკის მიღება ელოდათ.

სირია-პალესტინასა და ეგვიპტეში კეისარ პერაკლეს ბატონობით გამწარებული მუჰამედის მოწოდებას აღფრთოვანებით შეხვდნენ, არაბებს დახვდნენ, როგორც განმათავისუფლებლებს; ასევე იუდაელები, რომელნიც ძალით ინათლებოდნენ არაბებში მხსნელებს ხედავდნენ, მათკენ გარბოდნენ, უერთდებოდნენ.

ამგვარად მუჰამედი თავის გარშემო დიდ ძალას უყრიდა თავს, რითაც გადააჭარბეს ბიზანტიელებს. არაბებით გათამამებული იუდეეელები, როგორც აბრაამის შთამომავალნი, პერაკლესაგან ითხოვდნენ აღთქმულ მიწას. ამან კი კვლავ ჩამოაგდო ომიანობა.

ბიზანტიელები არაბებს ძალღებად იხსენიებდნენ, რაც არაბებს აცეცხლებდა და სულ მალე მუჰამედის ვეებერთელა მხედრობა მედინიდან ჩრდილოეთით დაიძრა.

ამ აღრევით შეძრწუნებული სოფრონი, მაღიმალ გარბოდა რჩევი-სათვის იოანესთან სინას მთაზე. მისი გარეგანი დიდებულება შინაგანი სიმტკიცის ბრწყინვალეობით ელვარებდა და ქრისტიანულ სამყაროს თავის ერთი შეხედულებითაც კი ამხნევებდა.

იერუსალიმშიც მოეტანათ თეოდორესა და ისააკის თავგადასავალის ამბავი და სოფრონი უდაბნოში უთვლიდა მასთან მოსულიყვნენ. დიდ-სანს არაფერი ისმოდა მათგან და აი, ხარების ბრწყინვალე დღესასწა-
100

ულის საღამოს, იოანე და სოფრონი სავანის ხეივანში რომ ისხდნენ, კრიალოსანს მარცვლავდნენ და გაზაფხულის ცის გამჭვირვალე სილურჯეს გასცქეროდნენ, აუწყეს ორი უცხო ვინმე ბერის მოსვლა.

— გვაკურთხენ, ღირსნო მამანო, — ძლივს გამოთქვა მოკრძალებით ისააკმა და მთრთოლვარე ხელი გაუწოდა.

თეოდორე კი იოანეს დანახვაზე თითქოს გაშეშდა.

იოანეც უნებლიედ წამოდგა, მაგრამ იგიც ადგილზე გაქვავდა.

სოფრონიმ იგრძნო, რაღაც მნიშვნელოვანი ხდებოდა, მან ჩვეულის სიდინჯით კურთხევა გაიღო. მისი სულში ჩამწვდომი მზერა იჭვნაკრავად ხან თეოდორეზე, ხან ისააკზე გადაიკლაკნებოდა.

საიდან მოსულხართო? — ჰკითხა.

ჩვენ სიკვდილისაგან გამოსხსნილნი ის ცოდვილნი ვართ, თქვენი ყურადღების ღირსნი რომ გავხდით და რაკი იერუსალიმში ვერ გიხილეთ, ვიკითხეთ და აქეთ მოგვასწავლეს, — თქვა ისააკმა.

ყველანი დასხდნენ.

ისააკ მოკლედ მოჰყვა მომხდარს.

სოფრონი აღფრთოვანებული წამოიჭრა და გადაეხვია თეოდორეს.

— მეფე ხარ, მეფე, ჭეშმარიტად, — ეუბნებოდა, — მძისათვის თავდადებული.

თეოდორე ძლივს აბამდა მადლიერების სიტყვებს, მაგრამ მის ხმაში ერთბაშად ისმოდა სათნოება, სიმდაბლე და გამბედაობა.

თეოდორე ცანცანებდა, როგორც წყალში მთვარის ანარეკლი. ოფლისაგან დაცვარულ სახეს წამებულის ღიმილი გადაურბენდა, ბაგენი გაპობოდა, თითქოს რაღაცის თქმას აპირებდა, მაგრამ უცაბედ ვერ მოესაზრებინა. დროს, რომელიც პატარა ცეცხლს ქარივით აქრობს, დიდი ცეცხლი ისე გაეჩაღებინა, მთელ მის არსებაში აალებულიყო და ახლა უკვე ჩაფიქრდებით ემუქრებოდა.

სინამდვილე მთელის თავისი სიმალლით, მრისხანებით, სიზმარს უფრო ჰგავდა. იოანემ ნამდვილად იცნო, გონება ფიქრებმა დასერეს. თვალის გუგები გაფართოვებოდა და გული საგულეიდან ამოვარდნას ლამობდა.

თეოდორე ყველაფერს ამჩნევდა, მაგრამ სდუმდა, რამდენი ყიჟინა იყო მის განცვიფრებაში რა სირთულე იფარებოდა ამ სისადავეში იოანემ ვეღარ გაუძლო ფიქრთ შეჭირვებას, გული ამოსუნთქვის საშუალებას აღარ აძლევდა, წამოდგა, მივიდა თეოდორესთან, მხარზე ხელი ფრთხილად დაადო და უთხრა:

— მამაო, შემომხედე თვალებში.

თეოდორემ თავი ოდნავ ასწია, ქვემოდან გამოსხედა და თვალი ისე გამჭოლავად, ისეთი მრავლისმთქმელი ღიმილით გაუსწორა, იოანეს თავი დაახრევინა.

იოანემ თვალებზე ხელები აიფარა, თითქოს ძლიერი ნათებისაგან თვალთ იფარვიდა და დაბალი ხმით წარმოთქვა:

— ასლა მოისვენე მამაო, და ხვალ თეოდოსე დიდის მონასტერში დაგელოდები.

მაგრამ თეოდორე ადგილიდან ვერ იძვროდა. მისი ყურადღება სოფროსის დაეპყრო, რაღაც ეცნობოდა, სადღაც ენახა და უცებ გონებაში გაიელვა ენატის სავანემ. ის, ის ჭაბუკი იყო და უნებურად ისააკაც რომ თვალი გადაჰკრა — საოცარი მსგავსება დაინახა მათ შორის, ნუთუ? ფიქრობდა რაღაცით გახარებული და უკვე მთვარალივით, კედელ-კედელ გავიდა.

შეფიქრიანებული სოფრონი გამომცდელ მზერას ვერ აცილებდა მოსულთ და იოანესათვის კითხვის გამომხატველი სახე მიეპყრო.

იოანემ მშვიდად ღიმილითაც კი წარმოთქვა რაღაც ორიოდე სიტყვა, მაგრამ გასშირებული სუნთქვა სულაც არ ემოწმებოდა თავისივე სიტყვებს, მის ხმაში იმდენი განცდა გამოსჭვიოდა, დიდხანს ვერ გაუძლო იოანემ იქ ყოფნას და სულ პალე თვითონაც გავიდა სენაკიდან.

ასლა ისააკიც დააფიქრა თეოდორეს ამ მოსწრებულმა გასვლამ, ეს მის ჩვეულებრივ მორიდებაზე მეტს მეტყველებდა და რაკი იოანესათვის აღარ მიუქცევია ყურადღება, მხოლოდ ის იფიქრა, რომ ნამგზავრს მართლაც მოსვენება ესაჭიროება და უფრო თავისუფლად განაგრძო სოფრონისთან საუბარი.

სოფრონის ასლა ისააკისაგან აინტერესებდა, რაც შეიძლება მეტი გაეგო თეოდორეზე, რომ მიმხვდარიყო რასმე, რა კავშირში შეიძლებოდა ყოფილიყო იგი იოანესთან. შიგადაშიგ კითხვებს აძლევდა უფრო მნიშვნელოვანის ამოსაცნობად, მაგრამ ამათ, რამეთუ ისააკამც ბევრი რამ არ იცოდა.

სოფრონის მოსწონდა ისააკის დიდრონი თვალები, თავშეკავებული სიცილისაგან რომ ციმციმებდნენ და სითბოსთან ერთად შუქსაც ავლენდნენ. თავს ფრინველივით ცქვიტად ატრიალებდა, ბუქია თმები, სინაუქე, ყველაფერი ეს მის ბალღურ მეამიტობას ავლენდა.

ისააკ სწორედ იმ ასაკში იყო, თავად სოფრონი რომ პირველად პალესტინას მოვიდა. ასლა მასზე თვალს ასვენებდა და აოცებდა იმდენად, რომ ეცინებოდა კიდევ — როგორ ჰგავდა მას ისააკ გარეგნულადაც.

ისააკ დროდადრო კრძალვით ჩუმდებოდა, სირეგვენე რამ არ წამომცდესო, მაგრამ მონანიე ღიმილით მაინც იტყოდა იმას, რაზედაც სულაც არ ფიქრობდა.

სოფრონიმ ამ ყმაწვილკაცში ფხიანობა, ენერგიულობა დაინახა და მაშინვე გადასწყვიტა თავისთან დაეტოვებინა.

ისააკ ჯერ არავისზე ყოფილიყო გულშეგარდნილ, მაგრამ სიყვარულის ჯადოსნურ ძალას მაინც ეტრფოდა და აღიარა, რომ ასკეტური ცხოვრება მას არ ხიბლავდა და თქვა კიდევ:

— ძნელია გაკეთება იმისა, რაზეც გული არ მიგიწევს.

სოფრონისათვის მისი სათქმელის ამოცნობა არ იყო ძნელი და მიუგო:

— სქიმა სიყვარულს კი არ გვიკრძალავს, იგი სიყვარულისათვის გვმოსავს, სიყვარულისათვის, რომელიც უმაღლეს სათნოებას ნიშნავს, განწმენდილს ყოველგვარ ბიწიერებისაგან, რასაც ადამიანი მხოლოდ სიმწიფის ასაკში აღწევს, როდესაც სრულქმნილი ხდება; მცენარესაც ყლორტი უნდა დაუმწიფდეს, რომ ნაყოფი გამოიღოს, ახლა მითხარი, მაინც რაზე არ მიგიწევს გული?

— ყველაფერზე, რაც იძულებითია, — თქვა მორიდებით ისაკმა.

— მაინც, მაინც? — ჩაეკითხა სოფრონი.

— მაინც? — გაიმეორა ისაკმა ღმილით, — მაინც, თუნდაც ის, რომ არ შემიძლია ერთდამიპვე დროს, ერთი და იგივე ლოცვის შესრულება, რასაც მონასტრული ცხოვრება აიძულებს ადამიანს, მე ვლოცულობ მსალოდ: მაშინ, როდესაც მინდა გამოვიტვირო საკუთარი თავი, როდესაც მინდა ვთქვა აღსარება, გამოვთქვა ჩემი თავით უკმაყოფილება ვისიმე მიმართ. მინდა ზოგჯერ სიხარულისაგან ვიტვირო კიდეც, მაღლობა შევსწირო უფალს და არავის არ გავანდო სათქმელი.

— სწორედ მხოლოდ ასეთ ლოცვას აქვს მაღლი და ის, ვინც გამუდმებით ლოცულობს, ლოცულობს მაგ ბედნიერი წუთების მოსაპოვებლად... ახლა მითხარი, რას დაკავებდი შენის სურვილით?

— ამაშია ჩემი უბედურება, რომ არ ვიცი, რისი შემძლებელი ვარ.

სოფრონი ხედავდა, რომ ისაკის ფაქიზი ბუნება გულისხმიერ მოძღვარს საჭიროებდა, რათა არ დაკნინებულიყო, არ დამსხვრეულიყო, არ გაბნეულიყო ის ღირსშესანიშნავი, რითაც ბუნებას უხვად დაეჯილდოვებინა და თქვა:

— მოგზაურობა თუ გიყვარს!

— ძალიან, — აღფრთოვანებით მიუგო ისაკმა.

— მოგზაურობისას, თუ დაკვირვებულები იქნები, ბევრი რამის შეძენა შეიძლება. უბირველეს სახელი ენდა ძებნო, მწესარებას არ განერიდო, მის მოცილებაზე არ იზრუნო, არამედ მის სულის სიღრმემდე ჩაწვდომას ეცადე, რამეთუ ბუნებაც უმშვენიერეს მარგალიტს ზღვის ფსკერზე ცრემლით წარმოშობს, მოსვენებას სარჯელი არჩიე, ვისაც სარჯელი არ უნახავს, იგი მოსვენებასაც ვერ შეიტყობს. სამოგზაუროდ წახვალ ჩვენს მამებთან ერთად; იქნები შემკრებელი სულის მარგებელ ამბავთა. ჩაიწერ, დაიხსომებ, თუ რამ მნიშვნელოვანს გაიგონებ ან დაინახავ. შენ გეტყობა მოსმენა იცი და ეს ახლა შენთვის მთავარია, ისედაც მოსმენა ზოგჯერ მჭკვერმეტყველებაზე მეტია. ამით შენს სულიერ სამყაროსაც გაამდიდრებ და ჩვენს სულის საზრდელ ბელელშიც წვლილს შემოიტან. ხვალვე იერუსალიმს მოხვალ და ჩვენს მამებთან ერთად სამოგზაუროდ წახვალ.

ესა თქვა და ის იყო კურთხევა უნდა მიეცა წასულიყო, რომ შეაჩერა და ჰკითხა:

— ეს ყველაფერი კარგი, მაგრამ შენ არ გითქვამს, საიდან, როგორ შეხვდი შენ თეოდორეს, თუ საიდუმლოება არ არის, მითხარი, ვინ

დააკისრა, ან თუ რამ აკისრებინა შენი აღზრდა, ვინ არის შენი დედა, თუ იცი?

ისააკმა თავი დახარა, უჭირდა აღიარება. არ იცოდა, თეოდორეს-ათვის ეს მოსაწონი იქნებოდა თუ არა და თავი რომ მაღლა ასწია, სოფრონის თვალეში ჩახედდა და გაუბედავად წარმოსთქვა:

— ეს საიდუმლოება არ არის, მაგრამ ახლა უკვე მე მინდა, რომ თქვენ საიდუმლოდ შეინახოთ... მე ნამდვილად არ ვიცი ვინ არიან ჩემი მშობლები, მაგრამ ჩემი დაბადების ამბავი ჭეშმარიტებით ვიცი მამა თეოდორესაგან, — ესა თქვა და გაჩერდა.

— სთქვი ყველაფერი და ისეთი იმედი გქონდეს საიდუმლოების დაცვისა, როგორც რომ არ გეთქვას.

და დაჯდა ისევ ისააკ ამბის თხრობად იქიდან, საიდანაც თავად აიძულა თეოდორეს აღიარება.

სოფრონი უსმენდა და მღელვარებისაგან ველარც უსმენდა, რამეთუ მოგონებანი თავად მეტყველებდნენ.

ისააკ ამჩნევდა სოფრონი როგორ იძაბებოდა, ვერა ხვდებოდა, რატომ უნდა ემოქმედა მასზე მისი დაბადების ამბავს და ისევ თავის თავს სდებდა ბრალს, რომ არ უნდა ეთქვა, მერე ისე უნელა თხრობას, ბოლოს სულაც დადუმდა, რადგან ხედავდა სოფრონის ისე დაეჭუფრა სახე, ცრემლადაც დაიღვრებოდა, რომ არ წამომდგარიყო და მოსწრაფებულად არ ეთქვა მისთვის:

— ახლა კი გვიანაა, დავემშვიდობოთ ერთმანეთს, — და ისეთი ძალით ჩაიკრა გულში, ისააკიც ისე მიეკრა, ერთ მთლიანობად აქცია, უნდოდა ეთქვა „შვილი ხარ ჩემი“, მაგრამ ვერ წარმოთქვამდა, ატირდა კი მის მხრებზე და ვიდრე ცრემლები მისივე სქიმაზე არ შეაშრო, ხელიდან ვერ გაუშვა და მაშინ კი უკვე გაბრწყინებული სახით შესცქეროდნენ ორივენი ერთმანეთს, მერე დაშორდნენ.

სოფრონიმ რა მოიხურა კარი, მუსხლთ მოიყარა ჯვარცმის წინაშე და მდულარებით ატირდა, ატირდა ღვთის მადლიერებით, სამართლიანობით და რა გული იჯერა, ცრემლმა განბანა წარსული ცოდვა-ბრალისაგან და კიდევ ერთხელ და კიდევ უფრო დაკვირვებით აღადგინა ისააკის ნაამბობი. ყველაფერი ისე ნათლად, ისე ცხადად იყო თქმული, რომ დაუჯერებელიც კი იყო. გული ისე ებჭინებოდა ყულში, ნერწყვის ქლივს ყლაპავდა. იგონებდა ისააკის სახეს და ყველაზე უტყუარ დასტურად მიაჩნდა მისი თვალეები, ხასიათი, დედის მხოლოდ ბაგენი გამოჰყოლოდა... ენატის დედათა სავანე, ის საბედისწერო ღამე, რომელიც აღარ განმეორებულა.

სოფრონის ამალეებულმა სიტყვამ ისააკს თავისი შემბოჭველი სქიმა უძვირფასეს მოსასხამად უქცია, კამკამა დღე ჩამოუდგა დაბინდულ სულში, იგი თავის თავს წარმოიდგენდა, როგორც მხედარი კეისრის წინაშე წარმოდგარი ჯილდოს მისაღებად. ახლა გაიფიქრო თელის ძალით სიკვდილმისჯილის მოულოდნელი განთავისუფლების სიხარული. სოფრონი არ ჰგავდა ვნებაუქონელ მამებს, ისააკს რომ ენახა და

მზად იყო მისი მორჩილება ეკისრა, იგი კი ისეთ სახარბიელო რასმე სთავაზობდა, რასაც თავად ვერ მოიფიქრებდა.

ისააკ უღიმოდა ხეებს, ეხმიანებოდა ფრინველებს, ყველაფერს მსუბუქი ნათელი მოჰფენოდა, ყველაფერი მას უღიმოდა, ბედი გაშლილი წიაღით ეგებებოდა, ისააკ ქცეულიყო იმათ, რაც იყო.

— რა მივაჯო უფალსა ყოვლისათვის, რომელი მიმაგო მე, რომელმან დამიცვა, ვითარცა გუფა თვალისა. მცნებანი შენნი შევიყვარო უფროსი ოქროსა და ანთრაქისა, — ლალადისში იყო ისააკ. ფრთებდამსხვრეულ არწივს ერთი სულის შებერვით ფრთები გამართვოდა და ერთი მძლავრი შემოკვრით ზეცას შეინავარდებდა.

ისააკ თეოდორეს ისეთი შეუნელებელი აღფრთოვანებით უყვებოდა როგორ ეპოვა ცხოვრების გზა, რომ თეოდორე ამოშმინებდა, ამშვიდებდა, ეუბნებოდა:

— საქმეს, მით უფრო ახალს, დინჯად უნდა შეუდგე, ბედნიერებას კიდევ მეტი სიღინჯით შეხვდე, ვიდრე უბედურებას.

ისააკის თხრობიდან ჩანდა, რომ სოფრონის არ გაემხილა მისთვის მამობა და თეოდორე კმაყოფილი იყო ამით. ისააკ თვითონაც მიხვდებოდა სიმართლეს დროთა ვითარებაში.

თეოდორემ გათენებისას შეიხსნა სინატიფით ამოტვიფრული სპილოს ძვლის პაწაწინა სანაწილე მაცხოვრის ცხოველმყოფელი ჯვრის ნატეხით და ისააკს შეაბა ყელზე:

— დღეიდან შენი მფარველი იყოსო, — დაღლილი ღიმილით წარმოთქვა და გზა დაულოცა.

მსურველედ გადაეხვივნენ ერთმანეთს და შემდეგ სევდამორთეული თეოდორე დიდხანს, დიდხანს გაჰყურებდა მის გზას, თითქოს რაღაცას იხსომებდა, ამასთან, მთელი ერთად განვლილი ცხოვრების გზაც გადაშლოდა. ეს პირველი გაყრა იყო, ისიც ისააკის დამოუკიდებელი ცხოვრების გზაზე დადგომისა.

მარტოდ დარჩენილ თეოდორეს ირვვლივ შეუცნობელი იდუმალება იქსოვებოდა. ქორი ყრუდ წიოდა, სევდა ცრემლს ჰკვრიოდა, იგი იმ ყვავილს დამსგავსებოდა, რომელიც რაც მეტად გათელავ, მით უფრო სურნელოვანი ხდება. მხოლოდ ახლა აკვირდებოდა, რა ძალამ გამოატარა ესოდენ მძიმე ცხოვრება, როგორ ატარა ათეული წლების მანძილზე ნადველით სავსე გული, რომ მისი სიმწარე არ უგრძენია!

კაემნიან სულის სიღრმის სამალავში მიყუჟული იდუმალი რამ სინათლეზე გამოეხმო უცაბედ შეხვედრას. ნოყიერ ნიადაგში სიყვარულს მზესავით აელორძინებინა თესლი. გაზრდილიყო და იმ მარგალიტად ქცეულიყო, რომლის ძიებაშიც იყო ბიბლიური მეზურე, ამ მარგალიტის მოპოვებით კი დიადი სახე მიიღო უძებმა შვილიმა.

თეოდორეს ყველაზე ძლიერ მსაჯულისათვის, დროისათვის გაეძლო, დროს ვერ გაეფანტა გრძნობები, ვერ მოეცარა რწმენა ადამიანში. თუ გარეგნული ფერთა სიუხვე და ელვარება ჩაფრთხილიყო, თუ მისი სახე დაღარულიყო, სულის სიხასხასე არ გაჰქრობოდა, ჟამს ში-

ნავანი ცეცხლი ვერ ჩაეჭრო, რამეთუ ეს მზის სხივების ნაქარგი იყო სულის ქარგაზე. და თუ ცხოვრებას მისთვის გულგრილობა, ცილისწამება, უნდობლობა, თავისი ყველა სიავე არ დაეშურა, თუ სტიქიამ სიცხით წაართვა მას სილამაზე, დრომ მისცა მას სიმწიფის მშვენიერება.

გაუფურჩქვნელი ახალგაზრდობა კი დამჭკნარ სხეულში სიყვარულს ამა ქვეყნად ისევე ვერ იზეიმებდა, როგორც დაფლეთილი სამოსით სამეფო მეჯლისისუდ წმინდანი ვერ წარსდგებოდა.

უჩვეულო სიმისუბუქეა გრძნობდა, სულის მეთა უქრებოდა, თავის ალარ ეკუთვნოდა, თოვლის ფანტელივით დაფარფატებდა. მას უდიდესი ღვაწლი მოეპოვებინა — ადამიანის გულში კვალი დაეტოვებინა, ეს კი მთელი სამყაროს დაპყრობას ნიშნავდა, რომლის სიმდიდრის შემკვიდრება სამარადისო საუფლოში ელოდა. იგი შემძლებელ იქნებოდა სამსჯავროში ქრისტესათვის ეთქვა: მომიტევე, ვითარცა მე მივუტევე.

მის სასქეს მშვიდი არილი დასტრიალებდა, ბაგეთ კეთილი ღიმილი დავანებოდათ და იდუმალ სიჭაბუკე უხილავ პანთონში დაფარულ ქორწინებას ზეიმობდა, ლოცულობდა:

„ღმერთო საუკუნეთაო, რომელმან ღირს მყავ მოწმედ უამად ამას და განწმინდე მდაბალი სული ჩემი ყოვლისა ბიწიერებისაგან ხორცისა, დიდება შენდა“.

ეს ცრემლიანი ლოცვა იმავე დროს სისხარულის ქვითინიც იყო.

იოანეს გამოგზავნილობა ცხენმა სარკმელთან დაიფრუტუნა და თეოდორე უცებ წამოიჭრა.

ცხენმა ერთი კი იუცხოვა მხედარი, ყალფზე შედგა, მაგრამ იღრპნო რა მისი დაჯერება, თავნაქინდრულმა მწყობრი სიჩქარით გასწია. ცხენს გზის მიმართულებას არ აძლევდა და მასაც საითაც მოეგუნებებოდა იქით მიჰყავდა მხედარი. რალაზე არ ფიქრობდა, რალას არ გაისხენებდა! როდესაც მოაგონდა თავდაპირველი თავშესაფარი, ლოცვად დამდგარი მოძღვრის სიკვდილი, მწარე ღიმილით გაიფიქრა, მეც სიმართლოვეში მიწერია სულის დაღვევაო. მაგრამ მხნეობა არა სტოვებდა, დავიწყებოდა ასაკი, გარემო, დაბრუნებოდა უზრუნველი ახალგაზრდობა. ისე დაღამებულყოფი, ისე ასცდენოდა გზას ამ ხეტიალში, რომ ვერც შეეჭყო. უცებ ცხენი ციკაბო ნაპრალთან ყალფზე შესდგა, მთელის ძალით თეოდორე მიწას დაანარცხა და თავად სამშვიდობოს დადგა.

იოანე კი ამ დროს თეოდოსე დიდის სავანეში მოუთმენლად ელოდა, ელოდა იმდენხანს რომ შეხვედრის მოლოდინის საზეიმო ელფერი გამქრალიყო. მოლოდინით აჟღერებული თაღებიც დადუმებულიყვნენ, ფსკერების გულისძგეააც ჩერდებოდა და ლამპრის მიღმა ჩრდილი მოჩვენებასავით გაწოლილიყო.

სენაკიდან გამოვიდა, ცას გახედა, იგიც გარინდულიყო, ახალა შენიშნა მის სარკმელთან მერცხალს დაეწყო ბუდის შენება და მიეტოვებინა, ვარდებს ისე ეყვავილათ, ვერავინ გაეხარებინა.

რას შეეძლო თეოდორეს დაყოვნება? იქნებ სულაც გადაიფიქრა

მასთან მოსვლა? ჰქონდა ამის უფლება, მაგრამ მისი ხმა, გამოხედვა ამას არ იუწყებოდა და ისევ და ისევ მოთმინებას იკრეფდა. გზას სავანის ვიწრო სარკმლიდან აღარ გაჰყურებდა, კარი ფართოდ გამოეღო და თავადაც გზის პირად დამდგარიყო.

შუალამე გადასულიყო, მოლოდინის იმედიც გაწყდა. მობრუნდა სენაკში.

ძილი თითქოს არ ეკარებოდა, მაგრამ მიწოლილს წუთიერად ჩასთვლიმა, ჩასთვლიმა და ეზმანა კიდევ: თეოდორე შარავანდედით მოსილი სიმაღლეზე იდგა, სიხარულმა გამოაფხიზლა, მაგრამ როდესაც ისევ ჩასთვლიმა, შემზარავი რამ ეზმანა: უკუნეთ ბნელში ხედავს თავის თავს, სამკლავიარო სამოსში მტირალს; ადამიანთა აჩრდილები კი მოედინებოან, წინ ყრმა უსწრებთ, უკან-უკან რომ იხედება და ანიშნებს უსმინოს მაღლიდან ხმას და ესმის კიდევ: „ღვთის განგებით შეიღლი უღლა დაიკლას“. ისე ცხადად სედავდა ყველაფერს, ისე გარკვევით ესმოდნა ხმა, რომ გველნაკბენივით წამოვარდა, ეს ჩვეულებრივი სიზმარი არ იყო!

მისი სუნთქვა ზღვის ღელვით ოხვრასა ჰგავდა, აწეწილი ფიქრებით უმაღ სინას მთისაკენ გამოეშურა.

გამყინავი ფიქრები ცნობიერებას ახშობდა, მივარეულივით ვიდოდა. თენდებოდა, სულში კი უფრო და უფრო ბნელდებოდა, წვიმაც მწუხარედ მოდიოდა.

სინას მთაზე ვისაც არ ჰკითხა წინა დღეს მოსული ბერის შესახებ, ვერავინ ვერაფერი უთხრა. ერთს დაენახა მხოლოდ, ცხენით იერუსალიმიდან ვავიდაო. ერთი მოხუცი მონაზონი ქალი იდგა, რომელსაც არავინ შეჰკითხვია და თავად კი ცდილობდა ყველას გასავონად თავისი სიტყვა ეთქვა, საოცრად მოუსვენრად ატრიალებდა თვალებს, საოცარი ნიშნისგება გამოსჭვითდა სახეზეც, მისი იერი სრულიად არ შეეფერებოდა მისი სამოსელის ღირსებას.

— ყოველგვარ საოცრებას ელოდეთ მისგან, რაკი ყრმა მოუცილებია, კიდევაც თავისას არ მოიშლისო, — ქირქილებდა. მის კილოში კი სიტყვებზე მეტი უღმობლობა გამოსჭვითდა. უთამამესი სიტყვაც კი დასცდა:

— იქნებ, იგი სულაც არ იყო ბერი და გაიპარაო.

იოანემ ერთი გახედვით ჩააჩუმა, მაგრამ მაინც თქვა:

— ნუ განიკითხავთ და არ განიკითხებითო.

— ერთნი ხართ ყველანი და ერთმანეთსაც იმიტომ იცავთო, — მაინც ჩაილაპარაკა ქალმა და უკვე ბრაზით დაჩრდილული გაეცალა იქაურობას.

ამ დროს გაისმა კიდევ ეკლესიის ზარის მწყობრი ხმა, აჩოჩქოლებული ხალხი თავს იყრიდა.

იოანე ელვის სისწრაფით ხალხის შუაგულში გაჩნდა.

ებრაელს, რომელსაც თეოდორე უსულთ ენახა, აქ მოესვენებინა. სამოსელი შემოეფხრიწა, თავზე ნაცარი წაეყარა, გვამს კი არავის

აკარებდა, რაღაცას გაუგებარს ბუტბუტებდა, უფრო ლოცულობდა და, რა დაინახა იოანე, მუხლებში ჩაუვარდა, კალთაზე მოსწია, ფართოდ დაღებულ თვალებით ანიშნებდა მისკენ დახრილიყო, ეგონა საკვირველს რასმე ეტყოდა, მაგრამ იოანემ არც უსმინა, ანიშნა გასცლოდა და იგიც მიიმედა, უკან-უკან იხევდა.

იოანე უფრო გულგრილ მოწმესა ჰგავდა, ვიდრე ჭირისუფალს, ის-მთ რა ორი ბერი, სამივემ თეოდორე თეოდოსე დიდის მონასტერში დაასვენეს. ყველანი გაისტუმრა და დარჩა მასთან მარტოდ.

მზის აღმაცერი სხივები კიაფობდნენ თეოდორეს გაყინულ სახეზე. დამსხვრეულ სხეულს სულის სიმრთელე სახიერებას არ უკარგავდა. ჭაღარით დათოვლილი თმები შუბლზე ჩამოჰყროდა. მარადიულ ცივ ძილს ნეტარება მოჰყენოდა, თითქოსდა უკვე მიეღო ზეციური მოქალაქეობა.

მის მიყინულ ღიმილში იოანემ ნათლად ამოიკითხა: ბედნიერებაჲ, შენ ციმციმებ შორიდან.

„არა ჯერ არს უზომო გლოვა მიცვალებულისათვის, არამედ უმჯობეს არს გულმოდგინე ფსალმუნება და ვედრება მისთვის. წუხილი იმაზე, რასაც აღარაფერი ეშველება ცოდვაა, უაზრობაა“, — რამდენჯერ დაურწმუნებია ამ სიტყვებით მწუხარე ჭირისუფალი, მაგრამ ახლა ეს სიტყვები იოანესათვის არაფრის მთქმელი იყო. უნუგემო სინანულით კვნესოდა გული და მხოლოდ ისევ სიკვდილი იყო მანუგემებელი, სიკვდილში რაღაც მშობლიური გამოსჭვიოდა.

და რა მოვიდა სოფრონი, მიცვალებული დიდის პატივით დაკრძალეს თეოდოსე დიდის სავანეში.

თ ა ვ ი X I V

ა ლ ს ა რ ე ბ ა

იოანემ კარგა ხანს დაჰყო თეოდოსე დიდის სავანეში, თეოდორეს საფლავი მას კიდევაც ამშვიდებდა, რამეთუ დღემდე თავის აღსასრულზე აფიქრობინებდა, მაგრამ თეოდორე სიზმრად მთელის თავისი ბრწყინვალეობით, შარავანდედით მოსილი რომ ეცხადებოდა, მრავალგზის შეაგონებდა დაეტოვებინა იქაურობა, ჯერ კიდევ ბევრი რამ ჰქონდა მას გასაკეთებელი და იოანე რომ მაინც არ იძვროდა ადგილიდან, ერთ დღეს თეოდორემ ისევე სიზმრად განუცხადა წასულიყო საბა წმიდის სავანეს.

მაშინ კი დაფიქრდა იოანე, რომ მართლაც ჭარბი გოდება და ცრემლი გარდასულზე უაზრობა იყო. ადამიანი სიცოცხლის უკანასკნელ დღემდე უნდა მოქმედებდეს, იღვწოდეს საუფლოში სამკვიდრებლის მოსაპოვებლად და თუკი იგი ერთგულია თავისი მწუხარების, მუდამ საფლავთან ყოფნა არაფერს მოუტანს, საფლავსაც ისევე მონახულება უნდა, როგორც ცხოვრებას დროდადრო სჭირდება გაცლა, რომ თავის-

თავში წესრიგი დაამყაროს და ცხოვრებასაც უფრო ღრმად ჩახედოს. და აი, მართლაც, გამოეთხოვა თეოდორეს საფლავს, როგორც მისი შორჩილი და გაუდგა გზას.

ჩნაურთან, სიცოცხლით სავსე იერუსალიმს გადაივლიდა და ფიქრები კი სულის უდაბნოს სერავდნენ.

იერუსალიმის აღმოსავლეთით საბა წმიდის ლავრა ბრწყინავდა და იოანეს მის დანახვაზე სიხარული დაეუფლა.

საბა წმინდის ლავრა განთქმული იყო მოღვაწეებით. აქ დაეწერა მარტივლი ქართველს თავისი „სინანულისათვის და სიმდაბლისა“, აქ მოენახა თავშესაფარი იოანე მდუმარეს და აქ მოვიდა მდუმარებისათვის იოანე მოსხი, რომელიც თავადაც მდუმარებით მოცულ ტაძარსა ჰგავდა.

იოანეს სარკმელთან მარადიული მწუხარების სიმბოლო, ცად აღმართული კვიპაროსები უსაზღვრო სივრცეში შეჭრილიყვნენ.

„ათეული წლები განმარტოვებით ცხოვრობ ადამიანი, — ფიქრობდა იოანე, — მოკლებული ხარ იმ მთავარს, რაც ქვეყნად შენთვისაა განკუთვნილი, ქალის სიყვარულს, რომელიც მთელ სამყაროს მთიცავს თავისი სიღრმითა და ფერადოვნებით, რისთვის?“

ერთიღა დარჩენოდა ნუგეშად — ელოდა ისააკს. ისააკ იყო მისთვის ერთადერთი, რომელიც ცოცხლად აკავშირებდა წარსულთან, მნიშვნელოვანს ხდიდა აწმყოს და მომავლის იმედს უცხოველებდა.

სოფრონი კი, ეს ურყევი დედაბოძი ეკლესიისა, თავის ღვაწლმოსილებას და თვალსაჩინოებას იერუსალიმის საპატრიარქო ტახტზე აყვანა.

იოანეს ახარებდა მოწაფისა და მეგობრის ესოდენ საპატიო აღზევება, მაგრამ იმავე დროს აღონებდა პატრიარქის მძიმე ტვირთი, პასუხისმგებლობა და მით უფრო, რომ მას უკვე აღარ ძაღედვა მისი თანამოსაგრეობა.

ცრიატი დღე იდგა და იოანეს სენაკში სხივი არსაიდან აღწევდა. შწუხრით მოცულ სიმარტოვეში ხეების მოძრავ ჩრდილებს რომ აკვირდებოდა, ჟიჟმატი რამ თუ გაუელვებდა ფიქრად.

— გვაკურთხენ, მამაო, — უცებ შემოესმა სანატრელი ხმა.

—გაკურთხოს ზეციერმან, — წარმოთქვა იოანემ და ხელებგამლი-ლი შეეგება, როგორც ღვიძლ შვილს, და ჩუმი ტირილით ატირდა, ერთხანს ისააკიც დუმდა, მხოლოდ მისი გულის ბაგა-ბუგი გაისმოდა, რამაც იოანეს თავისი სევდა დააფარვინა და უკვე გაბრწყინებული სახით ერთმანეთს ჩახედეს თვალებში.

ისააკს აღმოსავლეთი მოეველო. მისმა გაბრწყინებულმა სახემ, როგორც მზემ ღრუბლებიდან, შემოანათა და სხივმა იოანეს სულში ჩააღწია.

ისააკს ცხოვრება თავისგულისად რომ აეწყო, ახლა ნახულისა და გაგონილის გაზიარებაზე ფიქრობდა, მაგრამ იოანეს ესოდენ სევდიან თვალებში ნალველის მეტი რომ ვერაფერი ამოიკითხა, თითქოს მიხვდა

კიდევ, რომ მისგან სასიხარულოს ვერას გაიგებდა, სიტყვა ვერ დასძრა, ვიდრე იოანე თავად არ წამოიწყებდა.

იოანემ ისააკს მსარზე ხელი მიძიმედ დაადო, სახეში ველარ უცქერდა, თავი დაბლა დაეხარა და უფრო ახლოს მიიზიდა. იგი მთელის სიფრთხილით და თანაგრძნობით განუცხადებდა მომხდარს, მაგრამ იმდენად მნიშვნელოვანს და იმდენად გასაოცარს, რომ მისი ყოველნაირი რწმუნება, დამწოდება ამოდ რჩებოდა.

ისააკ ჩვილი ბალღივით ტიროდა. შეძრული თეოდორეს ხვედრით სახეზე ხელებაფარებული ლამის ღრიალებდა, ბოლოს მკერდი შეიხსნა და თეოდორეს უკანასკნელი საჩუქარი აჩვენა.

იოანემ იცნო — ეს ხომ თეოდორეს მან აჩუქა სულ ახალგაზრდამ პირველსავე შეხვედრისას და ისიც აქვითინდა. ასე ერთად გამოიტირეს ორივესათვის ერთნაირად ახლობელ და გულისმომწყვველ ადამიანთან განშორება.

რა ჩაცხრა მღუღარება, იოანე არწმუნებდა, რომ თეოდორე დღესაც მათი მფარველია, მათთვის მლოცველი, და მომლოდინე მათთან შესვედრის. ისააკიც ჭეშმარიტად ირწმუნებოდა, რომ დიდი წყალობა იყო ღვთისა, რომ მისი ცხოვრება თეოდორესთან დააკავშირა, იგი იყო მისთვის ნამდვილი თავდადებული აღმზრდელი.

— ჭეშმარიტად მასში ანგელოზი იყო ჩასახლებული, — ამბობდა უკვე სულმოთქმული იოანე, — რამეთუ ადამიანისათვის შეუძლებელი იქნებოდა ასეთი მიძიმე ჯვარის ზიდვა სულ აღმართში.

ისააკ კი, ცრემლების ყლაპვით დაწვრილებით ჰყვებოდა თეოდორესთან ერთად განვლილ ცხოვრებას. გარდასულ დროთა მონაბერი იოანეს უძრავ სახეს ნაღვლიანი ღიმილით შეარხევდა.

ისააკს გარემოებანი ერთმანეთისათვის ვერ დაეკავშირებინა, წვალობდა, როგორც ობობა დაწყვეტილ ქსელის გაბმაზე. არ შორდებოდა ვონებას კითხვა, თუ რა უკიდურესობას შეეძლო აეძულებინა თეოდორე, დაეფარა თავისი ქალობა? იოანესათვის კი გასაგები იყო, მაგრამ ჰიზებში იგი სათქმელად შეუძლებელი, იმდენად სათუთი, იმდენად ზრმად განსაცდელი იყო, სიტყვებში იგი მხოლოდ გაუფერულდებოდა, და თვით განცდის წინაშეც დანაშაულს მოასწავებდა, ამიტომაც ამაზე არას იტყოდა.

ისააკს ერთი დღეც გაახსენდა:

— ზღვაში სამოგზაუროდ ნავში ჩავსხედით, მაგრამ პირქარი აფრებს აფერხებდა, იძულებულნი გავხდით უკან დავბრუნებულიყავით. ყველანი სინანულსა და წუხილს გამოვთქვამდით, თეოდორე კი ღვთის სადიდებელს ადავლენდა; ეგების, — იტყოდა, — სწორედ ეს პირქარია, რომ გვიცავს მოსალოდნელი უბედურებისაგან, უკან რომ გვაბრუნებდნო. თან თავის ახალგაზრდობიდანაც ბევრს რასმე შესატყვისს გაიხსენებდა დასტურისათვის.

იოანემ აქ ფრთხილად ჩაურთო:

— არაფერი უთქვამს ვისიმე დანაშაულზე მის მიმართ?

— არასოდეს, არავისზე, — მტკიცედ მიუგო ისააკმა, — იგი მუდამ ამბობდა, რომ ადამიანი თუ ჩაუკვირდება მისთვის საზიანოდ მომსდარს, ყოველთვის დაინახავს, რომ დანაშაულის მიზეზი მასშივეა.

ისე დაათენდათ, ვერც შეიტყვეს, ძილი გაკრთობოდათ, მაგრამ მაინც მოსვენება არჩიეს. თან იოანემ დასძინა:

— ჩვენ ისე უნდა მოვიქცეთ, ისე ვიცხოვროთ, როგორც მას მოეწონებოდა და მასინ მის წინაშე შეურცხვენელნი წარვსდგებით.

მეორე დღეს საღამომდე არ გამოსულან სენაკიდან, ეძინათ და შეხვედრისას უკვე აღარაფერი უთქვამთ წარსულზე. ერთად წავიდნენ საფლავის მოსანახულებლად და იქიდან მობრუნებულნი უკვე სოფრონისა და სხვათა ამბავს გამოკითხავდენ.

შემდეგ კი იოანემ სასხვათაშორისოდ ჰკითხა, ხომ არაფერი აქონდა მოგზაურობიდან მოსათხრობი, თუ ჩანაწერი.

მხოლოდ ახლა დაუბრუნდა ისააკს ხალისი თავის შესახებაც რაიმე ეთქვა. მას ისეთი გულმოდგინება გამოერინა, მონაპოვარი მილიანად გადმოეწერა და იოანეს გადასცა, თან იუწყებოდა:

— მივიწიე ოდესმე ითბედ და მუნ ვპოვე წიგნი ესე ჰინდოთა საწიგნესა, რომელსა შინა სწერიან საქმენი ამის სოფრონისანი, ფრიად სარგებელნი სულისანი.

იოანე წიგნს გარინდებული ფურცლავდა, წიგნმა ისე გაიტაცა, დაავიწყა ისააკის იქ ყოფნა, ისააკ ამას ამჩნევდა, უხაროდა და მოუთმენლობით ელოდა, რას იტყოდა იოანე, მოუწონებდა თუ არა ამ პირველ მონაპოვარს. იოანე კი ფურცლავდა და ფურცლავდა ხელნაწერს. მიხვდა ისააკ, რომ იოანემ მასში რაღაც ყურადსაღები ჰპოვა, იოანე მარტოდ უნდა დაეტოვებინა და მოკრძალებით წარმოთქვა:

— გვაკურთხეს, მამათ.

— ვაკურთხოს ზეციერმან, — წარმოთქვა უცებ გამორკვეულმა იოანემ, წამოდგა და გაბრწყინებული სახით შეხედა ისააკს, ისააკს კი თავი დაედუნა კურთხევის მისაღებად. იოანემ უსიტყვო მადლიერებით დაუკოცნა თავი, მხრები და თქვა:

— ო, რა ძალა აქვს ადამიანს, როდესაც მის თავისებურებას თავისუფალი გზა მიეცემა! წადი ახლა სოფრონისთან, დღეს შენ მას სჭირდები ისე, როგორც არასდროს. მოუყვივი მასაც რაც ამ წიგნში სწერია, შენ კი იცოდე, რომ დიდი განძი გამოვსა.

ისააკ ბედნიერი თვალებით შესცქეროდა იმისთვისაც, რომ თავად ვერ გაებედა მისი ასე უეცრად მიტოვება და სოფრონის მონახულება, ახლა კი როდესაც იგი თავად ავალებდა ამას, სიხარულით, სიამაყით გაუდგა გზას იერუსალიმისაკენ, სადაც სოფრონის შეხვდებოდა უკვე როგორც პატრიარქს. გზად ისააკს ხნიერი მონაზონი ქალი წამოეწია, თითქოს ეცნო კიდევ, მაგრამ ეცადა თავი აერიდებინა, რამეთუ უსიამო გრძნობამ გაჰკაწრა, მას ისედაც არავისთან არ უნდოდა გამოლაპარაკება, თავის ფიქრებთან სურდა დარჩენა. ქალი კი უკვე გვერდით მიჰყვებოდა, ისააკ მისკენ მაინც არ იხედებოდა, ქალი სახეში შეს-

ცქეროდა და რომ თავისკენ მაინც ვერ მოახედა, ოდნავ გაუსწრო, მოუბრუნდა და შესთხოვა:

— მოწყალეობა მოილე, შვილო.

ისააკ შეკრთა, შეეშინდა კიდეც და უნდოდა რაც შეიძლება მალე ჩამოეცილებინა გზიდან, ქისაში გროშებს ძებნა დაუწყო, და ქისიანად ესროლა. ნაბიჯს აუჩქარა, იმედი მიეცა, რომ ველარ დაეწეოდა, ანდა რისთვის უნდა დასწეოდა?

ქალმა ქისა იცნო, სიხარულისაგან ცრემლები გადმოსკდა, ამდენ ხანს შეუნახავს, თან უტარებიათ და კიდეც უფრო გაბედულად, უფრო თამამად დაედევნა.

ისააკ გრძნობდა, როგორ მოსდევდა ქალი, სუნთქვა ეკვროდა, გადასწყვიტა მისკენ აღარ მოეხედა.

— მოწყალეობას არ გთხოვ, კურთხევა მინდა, შვილო, შენგან, — უკვე ისევ გვერდით მისდევდა და ქისასაც აწვდიდა, — დაიბრუნე, მოწყალეობას მე თავად გავიღებ, იმდენი დამიგროვებია.

— შეილოს მიწოდებ და კურთხევასა მთხოვ? — ნაბიჯის შეუჩერებლად, მისკენ მიუხედავად მიუგო ისააკმა.

— სიტყვა მაქვს შენთან, „მამაო“, მომისმინე! — სიტყვა მამაოს ისეთი ნიშნის გებით იტყოდა, თითქოს რალცაში ამხელდა კიდეც.

— დამეხსენ, ადამიანო, კურთხევას ჩემზე ღირსეულნი მოგცემენ და მოსმენითაც უკეთ მოგისმენენ, — ლამის ბრძანებით ამბობდა ისააკ.

— მომისმინე, გვედრები, სიტყვა მაქვს შენთან, — არ ცხრებოდა ქალი და რომ ველარ ეწეოდა, ხელი ჩაავლო მკლავში.

ისააკმა ხელი გამოჰგლიჯა და უყვირა:

— ნუ მაყოვნებ, დამეხსენ-მეთქი, ჩამომეცალე გზიდან.

— შენს მეტი ვერავინ მოისმენს ჩემს სათქმელს, — მეტად აღგზნებული ევედრებოდა.

— დამეხსენ, რა გინდა ჩემგან, — ისააკ ამბობდა და უკვე გაქცევაზე ფიქრობდა.

— ბედი მხოლოდ იმისათვის მამოგინებს ბედშავს ამ წყეულ მიწაზე, რომ ბოლომდე ვერ შევსვი სასჯელის ფიალა, ბოლოშია მთელი სიმწარე დალექილი, სიკვდილის აჩრდილი თან მსდევს და შენგან ელის სასიკვდილო განაჩენს. — ამბობდა სასოწარკვეთილი ქალი.

— სიკვდილ-სიცოცხლის გამჩინებელი უზენაესია და მას მიმართე, წადი ეკლესიაში, მიდი მოძღვართან, იგი შეგინდობს... — ამბობდა ისააკ და როგორღაც ნაბიჯს აჩქარების ნაცვლად უნელეობდა, უფრო ხმადაბლა, ლმობიერადაც კი გამოსთქვამდა სიტყვებს, თითქოს რალცას სენდებოდა.

— ტაძარში წავიდე? სქიმებში გამოხვეულ ავაზაკებს გავანდო, მათ ვუთხრა აღსარება, ყველაფერი გადმოვუღაგო და შემდეგ ერთმანეთს უქირქილონ და სასაცილოდ ამიგდონ?! — ისეთის მძულვარებით წარმოსთქვამდა სიტყვებს, თან სინანულით თავს იქნევდა, რომ არ შეეძლო უფრო უდიერად მოეხსენიებინა ისინი.

ისააკს უცებ მთელი სიცხადით გაახსენდა კონსტანტინოპოლი, თეოდორე, როგორი უმოწყალო, როგორი შემზარავი იყო ევლოგი. თეოდორეს მიმართ, შეშინდა, რომ ახლა მას ემსგავსებოდა, შეჩერდა და მოუბრუნდა:

— სათქვი შენი სათქმელი, გისმენ, — თითქოს ბოდიშსაც კი უხდიდა.

ქალს მოეშვა, სახეც გაუნათდა, თვალებზე ცრემლებიც კი აუკიაფდა, უნდოდა გადახვეოდა კიდევ სიხარულისაგან, მაგრამ აბა როგორ, მაშინ იქნებ სულაც გამწყვრალიყო, აღარ მოუსმენდა, ოღონდ ამდენი დევნით აქოშინებულს სიარული აღარ შეეძლო და სთხოვა:

— დავედეთ ამ ხის ძირას, დავიქანცე.

ისააკ მორჩილად ჩამოუჯდა.

ქალმა აღარ იცოდა საიდან დაეწყო, თითქოს მართლაც სიკვდილი წამოსდგომოდა თავს და უნდოდა ყველაფრის აღიარება მოესწრო. ხან საიდან მიუდგებოდა და ხან საიდან სათქმელს, აბნეულად ლაპარაკობდა, ცხადი იყო ლოგიკური აზროვნების უნარი დარღვეოდა.

ისააკ ერთხანს როგორც სწეულს სიბრალულითაც კი გახედავდა, მაგრამ რომ ვერ გაუგო რისი თქმა უნდოდა, რაღაც სანუგეშო სიტყვა უთხრა, შეჰპირდა, სხვა დროს უფრო დიდხანს მოავისმენო, ახლა კი აგვიანდებოდა და წამოდგა წასასვლელად.

შეშინებულმა ქალმა ისეთი ძალით მოსწია სქიმაზე, აიძულა ისევ დამეფდარიყო.

— მაშ, რაკი არ გნებავს გაიგო, როგორ დაიწყო ჩემი ცხოვრება, საიდან გაუკულმართდა ჩემი ბედი, პირდაპირ გეტყვი — დედა ვარ შენი!

ისააკმა ელდანაკრავი თვალი ჰკიდა, უნდოდა ხელი ეკრა და გაქცეულიყო, მაგრამ რა შეხედა მის მავედრებელ, დატანჯულ სახეს, დინჯად, მაგრამ მაინც მრისხანედ, წარმოთქვა:

— ჩემი დედა მკვდარია, — თქვა და თავისავე სიტყვამ შეაძრწუნა, არ უნდოდა სიკვდილი მის აღმზრდელს შეხებოდა და უმალ ნათქვამი შეასწორა:

— ჩემი დედა საუფლოსაა, ამქვეყნად აღარ დაიარება. შენ კი ცდომილებაში ხარ, გეშლები, რაკი ამბობ დედა ვარო, შვილიც გეყოლებოდა, ალბად დაგიკარგავს და ეძიებ, ეძიე და იპოვი, უსათუოდ იპოვი, თუკი გაგიზრდია, თუკი მისთვის ერთხელ მაინც „შვილო“ გითქვამს და მასაც შენთვის „დედა“ უწოდებია. დამშვიდდი, იგიც მოგძებნის და შეხვდებით ერთმანეთს. დედა ისეთი მომხიბველელია, ისეთი მაღალი წოდებაა, ყველა შვილი ეტრფის მას და მით უფრო, თუ დაშორებულია.

ქალი ამ დროს სადღაც შორს უაზროდ გაჰყურებდა და თითქოს თავისთვის ამბობდა:

— ჩემი უბედურებაც იმაშია, რომ არც „შვილო“ მითქვამს მისთვის და არც მას უწოდებია ჩემთვის „დედა“. შორიდან კი თვალი არ მომი-
8. ქ. ნუტუბიძე

ცილებია მისთვის, ვხედავდი საიმედო ხელში იყო, მის გვერდით მისი აღმზრდელიც კი ისე ბედნიერად გამოიყურებოდა, რომ მე კიდევაც შურის თვალთ ვუცქერდი მას. მე კი მხოლოდ 9 თვე ვზიდე, აუტანელ ტკივილებში ვშობე.. ეს მე ვიყავი ქულბაქიდან გამოსულს რომ შეგავონებდი...

— შემგონებელი შესვლამდე შეშავონებდა, — მოუჭრა' ისააკმა.

— პირწავარდნილი მამაა, — ჩაილაპარაკა ქალმა, — მანაც ასე მომიჭრა სიტყვა უკანასკნელი...

ისააკმა ველარ გაუძლო მის უბედურებას, ისეც წამოდგა და გზა განაგრძო.

ქალი უცებ გამოფხიზლებულივით წამოვარდა და ისეც ვედრებით აედევნა.

— მე ვერ გავიგე, რა გინდა ჩემგან, — ამბობდა ისააკ და ფეხს უჩქარიდა.

— მომისმინე, მომისმინე, ბოლომდე და შემდეგ თუნდა შემაჩვენე, — არ ნელდებოდა მუდარა ქალის.

ისააკს ისეც ევლოვის ამპარტავანმა, ულმოებლმა სახემ გაუელვა გონებაში, გულის სავანის ქუხილით შეპრწუნებული ისეც შეჩერდა:

— სთქვი, ადამიანო, სთქვი, რა გინდა ჩემგან, — ამბობდა ისააკ და ანთებული თვალებით შესცქეროდა.

— დაჯექ, სული მომათქმევი, არასა გთხოვ მოსმენის გარდა... შენი აღმზრდელი რომ მთელ ცხოვრებას სიცრუით ატარებდა, ქალი იყო და მამაკაცად წარმოაჩენდა თავს...

ისააკს უნდოდა ყელში სწვდომოდა, გზიდან გადაესროლა, მაგრამ სულთმობრძავი ქალი განმგმირავი ხედვით აბრუებდა, იდუმალ ლოცვას წარმოთქვამდა, უფალს მოთმინებას შესთხოვდა, ევლოვის არ დამსვავსებოდა, ეცლია სათქმელი დამთავრება და შემდეგ, შემდეგ, საკადრის პასუხსაც გასცემდა.

— ...შენ იგი ჯერ მამად მიიჩნიე, ბოლოს დედად შეიცანი და ახლა როგორც წმიდანი სავანეს დაკრძალეთ, ის კი ისე წავიდა ამ სოფლიდან, აღსარების ღირსიც კი არ გახდა, სომ ვხედავ, ვხედავ, რომ ძლივს უძლებ ჩემს სიტყვებს, მაგრამ იქნებ ის ჩემზე უარეს დღეშიც იყო, დღედაღამ მამათა შორის ტრიალებდა, შენ ალბათ ამაზე არც გიფიქრია, რამეთუ მამაკაცი იყო გეგონა, მამათმავლობასაც ვერ დასწამებდი, რამეთუ ქალწულის მიმტაცებლის ბრალი ედო, მე კი მას სწორედ მაშინ შევხვდი მეპატარაკე სერგის ძებნაში რომ იყო, მევე მივასწავლე შესაკრებელის გზა, მინდოდა შემეხედა მისთვის, იქიდან რომ გამოვიდოდა, მაგრამ იმდენ ხანს დაჰყო სალხინებელში, მე მოლოდინში ჩამძინებოდა...

— კმარა, — აქ უკვე შეურაცხყოფილმა ისააკმა იყვირა, წამოვარდა, ხელის კვრით მოიცილა, — შენ არა ხარ ღირსი მისი სახელის სსენებისა, შენ არა გაქვს უფლება მისი აუგად სსენებისა, — ტყვიასავით ესროდა სიტყვებს და ახლა უკვე გარბოდა, გარბოდა როგორც

დეენილი შმაგისაგან და თან მისდევდა განწირული ადამიანის სასო-
წარკვეთილი ხმა, წინ კი ევლოგის სახე უელავდა.

ქალს უკანასკნელი ძალ-ღონე მოეკრიფა, ისიც გაქანდა ძახილით:

— მომისმინე, მომისმინე, მაპატიე მომაკვდავს, არ ვახსენებ მის
სახელს, არც უნდა მეთქვა, მთავარი ჯერ კიდევ არ მითქვამს, — დაე-
წია ქალი და ორივე სელით მკლავზე ჩაეჭიდა.

— შენ როგორი ქრისტიანი ხარ, მოსმენა არ შეგიძლია და პატიე-
ბას როგორ შესძლებ?!
— მე ქრისტიანი არა ვარ, მე მხოლოდ მინდა ქრისტიანი ვიყო,
ქრისტიანობას, როგორც დედობას დამსახურება უნდა და, თუ უფლის
ნება იქნება, მე გავხდები ქრისტიანი.

— შენ თუ მართლაც გწადიან ჭეშმარიტი ქრისტიანი იყო, მომის-
მინე, შემინდე და შენ გაიგებ რა ძალა აქვს პატიებას, შენ მოიპოვებ
უფლებას სთქვა ქრისტიანი ვარო, მე კი დედობის უფლებას მაშაზე-
ციერიც ველარ მომანიჭებს..

ისააკ შეჩერდა.

— დაჯექ, — ისე თქვა ქალმა, რომ იგრძნობოდა, იგი ველარც წა-
მოღვებოდა, — მაშ, თუ ჩემ დედობას ვერ იწამებ, ეგების მამა იწამო
შენი...

ისააკ მდუმარედ მძიმედ ჩამოჯდა.

— მოთმინებითა შენითა მოიპოვე სული შენი, — თქვა ქალმა და
მეტის სიღინჯით დასძინა, — სოფრონი მამაა შენი.

ქალს ეგონა ისააკ შეიცხადებდა, როგორც შეუძლებელს და გამარ-
ჯვებულის სახით გახედავდა, მაგრამ მისდა გასაკვირად, ისააკს თვა-
ლიც არ დაუხამხამებია.

ისააკ მხოლოდ დასტურს ისმენდა მასზე, რასაც გუმანით ხვდებოდა
და სიხარულს არ იმჩნევდა.

ქალმა ისევ დინჯად ჰკითხა:

— მან თუ იცის, რომ შეილი ხარ მისი?

ისააკმა კითხვაზე კითხვითვე უპასუხა:

— მან თუ იცის, რომ შენა ხარ ჩემი მშობელი?

— არ იცის და არც უნდა იცოდეს, რომ მე ვარ შენი მშობელი,
დამბადებელი უბრალოდ, დედა არა, — ქალმა ხელიც კი გაიქნია, ისე-
თი ბავშვური მეთამილობით, ისეთი შიშამდგარი ჯერ კიდევ ცრემლ-
შეუშრობელ თვალებით, რომ მზად იყო გაეცინა, თუკი მასში პატიე-
ბას, თანაგრძნობას დაინახავდა, როგორც ერთხელ უკვე დანაშაულზე
დასჯილ ბავშვს უნდა ხსომებოდა აღარ გაემეორებინა და ისააკს,
მართლაც, კინალამ არ გაეღიმა, თავისი ბავშვობა გაახსენა ამ კილომ,
თავი დაბლა დახარა, რომ მას არ შეემჩნია.

— ...შვილო, ახ არა, ისევ გაასწორა ქალმა, — შვილო, არა, მა-
მაო, — განაგრძო თავისთავით უკმაყოფილო ქალმა.

— შენ რა, თავის მართლებას ხომ არ აპირებ? — ხელი დაიკრა
მუხლზე ისააკმა და გაეცინა.

— იცინე, იცინე, მამაო, ისააკ სიცილსა ნიშნავს.

— ...მართალია, სოფრონი ჩემთვის არც პირველი ყოფილა და არც უკანასკნელი, მაგრამ...

— მაგრამ, — დამცინავი კილოთი იკითხა ისააკმა, — საიდან ირწმუნები, რომ მაინცდამაინც იგია ჩემი მამა?

— მაინცდამაინც იქიდან, რომ... შენ ჩემი თქმაც არ დაგჭირდებოდა მისი სახის ნაკეთებს, თვალთახედვას, თუნდაც სიარულის დროს ტანის შერხევას დაკვირვებოდე. მაგრამ მე მაინც ყველაფერი უნდა ვსთქვა... მას შემდეგ, რაც მე იძულებით მოვედი მონასტერში, იძულებით, რადგან ჩემ მდიდარ მშობლებს არ უნდოდათ გავყოლოდი ღარიბს, რომელიც მე მიყვარდა და მათდა დაუკითხავად ვსცოდე კიდეც მასთან, უარი მათქმევინეს ჩემს მემკვიდრეობით უფლებებზე და ფიცი დამადებინეს, დღიდან საქმის მიღებისა დამეცვა მე საწმიდე როგორც სულიერი, ისე ხორციელი. მე მართლაც ვიცავდი მას წლების განმავლობაში, რადგან მიყვარდა ის ადამიანი და არა იმისათვის, რომ მე ვიღაცის ან რიღაცის წინაშე ვიყავი ამით ვალდებული. მაგრამ ერთ დღეს ეკლესიაში წირვისას, სადაც მე წამიყვანეს მგალობლებთან ერთად, რადგან მე ხმითაც გაპოვირჩეოდი, მრევლში შევნიშნე მომხიბვლელი ახალგაზრდა და სჩანდა იმდენად გამომწვევი იყო ჩემი მზერა, რომ იგი მოურიდებლად გამომელაპარაკა, ზრდილობაში არაფერი ეშლებოდა, მასაც თვალში მოვხვდი და მეორე დღესვე მოვახერხე და წყაროსთან შევხვდით, ჩვენ გვეგონა უკვე შეყვარებულნი ვიყავით და მეორედ იგი უკვე მონასტერში უნდა მოსულიყო ჩემთან, სწორედ იმ დღეს მონასტრის კართან აქლემებით ვინმე ბერი ღამის სათევად განისვენებდა. მე ველეავდი, ვუთხარი კიდეც ილუმენიას, რაღა მაინცდამაინც კარებთან უნდა მოესვენა, თუკი საერთოდ გარეთ შეეძლო დაძინება, თავლასთან მაინც მიეჩინათ ადგილი, მაგრამ ყური არავინ მიგდო, შუალამისას მოვიდა კიდეც სოფრონი, მაშინ სოფრონია ერქვა. იგი მოვიდა არა ჩემს განსახრწნელად, მოვიდა ჩემს გასატაცებლად, დასახსნელად, მას ჩემი ცოლად შერთვა უნდოდა, შვილის ყოლაზე ოცნებობდა, მე კი სულაც არ მიზიდავდა ოჯახური ყოფა, ერთფეროვანი ყოველდღიურობა და აღვასრულე რა ნებისაებრ ჩემისა, იმ ღამეს პირველად ვუღალატე აღთქმას და მასაც უარი ვუთხარი მონასტრის მიტოვებაზე. მეგონა, მას თავისუფალი სიყვარული უფრო ვაამებდი, რადგან თავად მხიბლავდა საინტიერესო მოლოდინი, საიდუმლო შესვლადრებით, თავისი სიახლეებით, მოულოდნელობებით, მაგრამ მოხდა საწინააღმდეგო — მას რაღაც არ მოეწონა და იმ დღიდან აღარც გამორჩენილა. მე მიდგომილი აღმოვჩნდი, ეს გაცხადდა, რადგან მე ვერ მოვახერხე ჩანასახის აღმოკვეთა, არავინ დამეხმარა, რამეთუ მათ ეს მკვლელობად მიაჩნდათ და მაიძულებდნენ მეთქვა, ვინ იყო ჩემთან. მაშინ მე კიდეც იმედი მქონდა, სოფრონის მობრუნებისა, იმდენად დარწმუნებული ვიყავი ჩემი სილამაზის ძალაში და რომ დამეფარა იგი, ცილი დავწამე ვინმე ბერს. მე სასირცხვილოდ და ცოდვად

არ მიმარჩნდა ჩემი საქციელი, რადგან ყველა დედანი ცოტად თუ ბევრად სცოდნავდნენ, ზოგს რომ მოჰბეზრდებოდა აღვირახსნილი ცხოვრება და წმინდანობა გადაწყვიტა, ამპარტავნობაში გადავარდნილიყვნენ, ზოგი ერთთავად სხვის განსჯაში იყო, სხვის უბედურებაში ხედვდა თავის ბედნიერებას, შურით თუ ნოროტი განზრახვით ვის აღარ ასმენდნენ ილუმენიასთან, ერთმანეთს იოტის ოღენას არაფერს პატიობდნენ, მე კი, ვფიქრობდი, ჩემის მოქმედებით მხოლოდ ჩემს თავს ვავნებდი.. დრო გადიოდა, სოფრონი მაინც არ მოდიოდა და მე იგი შევიძულე ქალის მთელი მძულვარებით. შენ კი გატაცებით ჩასახული იძულებით გშობე, გამძვინვარებულმა ტკივილებისაგან აღარც ვიკითხე ქალი ვშობე თუ ვაჟი და დედობაზეც უარი თვალდახუჭულმა განვაცხადე და მათსავით ცბიერებით აღვიარე, რომ მე ჩემი სულიერი დედობა უფრო უმადლებს მავალზედა. მათ ეს დაიჯერეს და შემინდეს დანაშაული. მე კი შესუცნობლად, ჩემდაუნებურად მხოლოდ შენზე ვფიქრობდი, მივდიოდა გამეგო შენ ქალი იყავი თუ ვაჟი, შენი ნახვის, შენთან ყოფნის სურვილი ყველგან თან მდევდა და მალონებდა, როგორც წყურვილი... იმ დიდ სუთშაბათ დღეს კი ევლოგისთან რომ მოვედით და თეოდორეს ხელში დაგინახე, დაუძლეველმა ცნობისმოყვარეობამ გამაბედინა და თეოდორეს მივუახლოვდი; ვფიქრობდი იმით მაინც ვავიხარებდი, რომ ქალი იქნებოდი, რადგან სოფრონის ოცნება იყო შესძენოდა ვაჟი. ბაღამით ამეცსო გული, ვსთქვი — რაკი ასეთი ბედნიერი ყოფილა, ბედი მათ კიდევაც შეახვედრებს—მითქი და აი, ხომ შეხვდით კიდევ!.. მეორედ კონსტანტინოპოლს გნახე, შენთვის მძივებით ამოქარგული ეს ქისა რომ გაჩუქე. შენ გამიღიმე, ხელიც კი დამიქინე დამშვიდობებისას და იმ დღეს მე სიხარულისაგან ბევრი ვიტირე.. შემდეგ, არ ვიცი, შურისძიებით თუ ისევ გატაცებით, ერთ მეტად მომხიბლავ, დიდებულ კაცს თვალი დავადგი. ყაჩაღი აღმოჩნდა, ნამდვილად თავგადასავლების, ფათერაკების მოყვარე. პირველ გამოლაპარაკებისთანავე ისე საიდუმლოდ, ისეთი რუღუნებით შემაპარა თავის დიდებულ დარბაზებში, თითქოს დიდი ხნის შეყვარებულებს პირველად გვეძლეოდა საშუალება განმარტოვებით შევხვედროდით. მომეწონა იქაურობა და თავადაც თავის გულახდობლივით. მე კიდევაც ვიცინოდი, როდესაც იგი ამბობდა: წმიდანის შეცდენა საინტერესო, თორემ ამ ჩვენ ლამაზმანებს ერთმანეთისაგან ჩაცმულობითაც კი ვერ გამოარჩევ, უფრო სქელსა და თხელს თუ ნახავ, თორემ სუნამოსაც კი ერთსა და იგივეს ხმარობენ; ერთფეროვნება მომაკვდინებელია მამაკაცისათვის, რამეთუ შესაძლოა იგი სამარცხვინო მდგომარეობაში აღმოჩნდეს, ქალმა თუ ხასიათზე ვერ მოიყვანა!..

ამ აღსარებაში უცებ რატომღაც დამფრთხალმა შეხედა ისააკს, გაქცევას არ აპირებდესო და რა დაინახა იგი თითქოს არც უსმენდა, ისე წასულიყო ფიქრებში, მუდარით წარმოთქვა:

— უნდა მაპატიო, მე ხომ აღსარებაზე ვარ მამაოსთან, მე ხომ დედა არა ვარ, რომ შეიღმა ყველაფერი არ აპატიოს და არც მოუსმინოს,

მამამ უნდა მოისმინოს და მეც ყველაფერი უნდა აღვიარო... იმ კაცს მე კვლავაც შევხვდი და ისე აშკარად, რომ ეს უკვე ვეღარ მაპატიეს, სასჯელი დამადევს და უდაბნოში მოსანანიებლად გამაწესეს. დიდხანს ვერ გავუძელი საშინელ სიმარტოვეს, იმ განაწესს და მაშინ უკვე ჩემის ნებით მივატოვე იქაურობა, ისე რომ, მონასტერში აღარ შემეხვლებოდა. ცხოვრების გზაჯვარედინზე ვიდექ და უეცრად გადავწყვიტე, მოლო, შევიხედავ-მეთქი შესაკრებელს, ერთი შესვლით რა დაშავდება-მეთქი და შევედი კიდეც. ყველამ ამრეზით ამხედ-დამხედა, ამას აქ რალა უნდაო, დამცინავთ სიცილმა გადაუარა ყველას, ერთმა, დოინჯ-შემოყრილი წინ რომ წამოვიდა, სიცილი ვერ შეიკავა და ისე გადაიხარხარა, მეგონა, მეხი დამეცა, როგორღაც თავი მოვიკატუნე, ვეძებ, ვთქვი უნებურად და რომ ეკითხათ რას ეძებო, არ ვიცი რას ვუპასუხებდი; მაშინ დაცხრნენ და მე კი ისე გამოვვარდი იქიდან, უკან აღარ მიმიხედავს. მივხვდი, რომც წყალობის თვალთ შეეხედათ ჩემთვის და იქ დავრჩენილიყავი, მაინც არ გამოვდგებოდი, გარეგნობით შესაძლოა ვერცა მჯობნიდნენ, მაგრამ იქ გამოცდილება უფრო მეტსა ნიშნავდა და მე მსახურად თუ დამიყენებდნენ, ისე გასაქანი არ მექნებოდა, მე კი ყველგან პირველობას ვეძებდი...

ქალი შეჩერდა, ქვევიდან გახედა, აბა, როგორ შეხვდა ამ ამბავსო. ვერა გაიგო რა, ღრმად ჩაფიქრებული ისააკ, ლამის მიწამდე დახრილიყო და აშკარა იყო, არ უსმენდა, მაშინ თამამად განაგრძო, გაუხარდა კიდეც, თუკი არ გაიგონებდა.

— ...ახლა ასე დავხეტები, — განაგრძობდა, უფრო უცხო ადგილებს ვეტანები, სადაც არ მცნობენ, სადაც სამადლოდ შემიფარებენ. ძნელია შენი კუთხე არ გაგაჩნდეს, მაგრამ მაინც ასე მირჩევნია, თავისუფლება ყოველნაირ სიდუხჭირეს მინელებს.

ქალი უკვე ისეთ კილოზე და ისე მხნედ ლაპარაკობდა, მისთვის ასაკი არ არსებობდა, მიუხედავად თავისი ხანდაზმულობისა დღესაც ახალგაზრდა იყო. ისააკ რაღაცამ უცებ შეაკრთო და მისკენ მოიხედა.

ხომ არ გაიქცა და სხვა არ მომიჯდაო და რა დარწმუნდა იგივე იჯდა მის გვერდით, ოღნავ გაელიმა კიდეც შინაგანი კმაყოფილებით, ქალს არც ეს გამოუპარა და შინაგანად გაეხარდა, გაეხარდა ისიც, ისააკმა რომ უთხრა:

— აბა, სთქვი ახლა ყველაფერიო.

— მე მგონი ყველაფერი ვსთქვიო და აი შენ არაფერი გითქვამს, შემინდობ თუ არაო. — გაკვირებული შესცქეროდა ქალი და თან ხვდებოდა, რომ მას ყველაფერი თუ არა, ბევრი რამ ვერც გაეგო, ისე იყო ფიქრადქცეული და ახლა უფრო დაკვირვებით, უბრალოდ ჩამოსთვლიდა, საკუთარი განცდების გარეშე და ზოგ რამესაც გამოსტოვებდა, გარეგნულადაც კი მოწესრიგდა, წელში გაიმართა, თავი მადლა ასწია და კარგი მომღერალივით ხელებსაც კი მიაქცია ყურადღება, გულზე დაიკრიფა და რომ ჩაახველა კიდეც, ისააკმა მოხედა და თქვა:

— მე გისმენ, დაიწყეო.

— თავიდან მოვყვე, თუ კიდევ რაიმე გავიხსენო? — ეს ისე თქვა, მის ხმაში გამკილავე ბგერები გაისმა.

— თავიდან დაიწყე, — ისევე მისკენ მიუხედავად წარმოსთქვა ისააკმა.

— სიძვის დიაცმა მონაზუნობა ვიკისრე.

— ღმერთმა გაპატიოს, — თქვა ისააკმა.

— შემდეგ მონაზუნობის ფიცს ვუღალატე.

— ღმერთმა გაპატიოს.

— ღვთის ანაბარა დაგტოვე.

— ღმერთმა გაპატიოს.

აქ — უკვე ერთი და იგივე პასუხით გულმოსული ქალი სდუმდა.

— კიდევ? გაიხსენე, — ამბობდა ისააკ აუღელვებლად, თითქოს ელოდა უფრო მნიშვნელოვან რასმე იტყოდა.

— კიდევ? კიდევ რა გავიხსენო? — დაფიქრებით თქვა ქალმა.

— ჰო გავიხსენე. — ცილი დავწამე უბრალოს.

— რისთვის დასწამე? — გამომძიებელივით ეკითხებოდა უკვე ისააკ.

— რისთვის? იმ ადამიანის დასაფარავად, რომელიც შობილის მამა უნდა ყოფილიყო და რომელსაც, როგორც დიდგვაროვანს, პასუხსაც დიდს მოსთხოვდნენ.

აქ ისააკს გაახსენდა განაჩენი — თუ მოჰკლავ ადამიანს და ამავე დროს სხვას სიკვდილისაგან გადაარჩენ, ეპატიოს და რაღაც შინაგანი რწმუნებით წარმოსთქვა:

— ღმერთმა გაპატიოს.

ქალს კი ეგონა, სწორედ აქ მოისმენდა მისგან შეჩვენებას და სული შითთქვა.

— კიდევ? — ახლა უფრო ხალისიანად ეკითხებოდა ისააკ.

— კიდევ? შევიძულე ადამიანი მხოლოდ იმისათვის, რომ მიმატოვა, ამაში ჩემი შეურაცხყოფა დავინახე.

— ღმერთმა გაპატიოს, კიდევ?

— რა კიდევ? კიდევ? — ძლივს იკავებდა ქალი ბრახს, მაგრამ რაღაც აზრმა გაუელვა და თითქოს სასაუბროდ განეწყო, კიდევაც ხალისიანად პასუხობდა. რაკი ხედავდა, რომ მისი ცხოვრებით კიდევ და კიდევ ინტერესდებოდა ადამიანი, რომლისაგან მხოლოდ ერთ სიტყვას ელოდა.

— მე მშურდა შენი აღმზრდელის სვედრი, — თქვა ქალმა და პასუხს დაელოდა, მაგრამ ისააკ აღარაფერს ამბობდა, — რა, შური ცოლ-ვა არ არის? — დამცინავი კილოთი შეეკითხა ქალი.

ისააკ ვედარაფერს პასუხობდა, რამეთუ საპატიებელს ვერას ხედავდა, იმდენად, რომ ამართლებდა კიდევ.

ქალი გრძნობდა ისააკში რაღაც სდებოდა და ბედნიერ წუთებს არ არღვევდა. ისააკიც ხედავდა, გულწრფელი იყო ქალი ბუნებით და ისე იმეორებდა მის ერთიდაიგივე შეკითხვას „კიდევ“? ეტყობოდა იუმორის

გრძნობაც ჰქონდა, რაც სინამდვილესთან ერთად ახალგაზრდა ქალს მოუგერიებელ, წარმტაც არსებად აქცევდა და ამ უკვე ჩამომჭკნარ, გაუფორულებულ, ნატანჯ ადამიანს ქალურ ხიბლს მაინც არ უკარგავდა. ისააკ ისევ მიწას ჩასციებოდა, ორივენი კი ერთნაირად კმაყოფილნი იყვნენ.

ბოლოს მაინც ამდენი განცდებით დაღლილმა, გულის ისეთი შემოტევა იგრძნო, შეეშინდა და მოკრძალებით მდუმარება დაარღვია:

— მამაო, ერთვად რომ გაიძახი, ღმერთმა გაპატიოს, ღმერთმა გაპატიოს, — ღმერთი უშენოდაც მაპატიებს, თუკი ინება პატიება, მე მინდა შენ მაპატიო და ერთხელ მაინც მითხრა „დედა“!

— მე გაპატიებ „დედავ“, ოღონდ ასევე გაპატიოს ღმერთმაც, — თქვა ისააკმა და წამოდგომა დააპირა.

— შენ ისე სთქვი „დედავ“, როგორც ყოველი, ყოველდღე მომმართავს წყალობის 'გაღებისას, ეგ სიტყვა „დედავ“ დამოკლეს მახვილივით დამკიდებია და ახლაც მისხველეტს უმოწყალოდ, ისააკ, შვილო, გემშვიდობები, — ქალმა ველარა თქვა რა და ისააკის მხარზე მძიმედ დაეცა.

შეშფოთებულმა ისააკმა ქალს თავზე ხელი მოხვია, მისი ხედავ უკვე ამქვეყნიური აღარ იყო, სიცოცხლის სხივი ჩამქრალიყო.

— დედავ! — ახლა კი შვილმა შესძახა; ოდნავ შეარხია, იქნებ გონს მოსულიყო, მაგრამ მის სახეს მხოლოდ ბედნიერმა ღიმილმა გადაურბინა და მიეყინა კიდევ.

ატირდა ისააკ და დიდხანს ვერ წამოდგა, გვერდით უჯდა და ლოცვას წარმოსთქვამდა, უფალს მისთვის შენდობას გამოსთხოვდა.

დაღამებულიყო. გზად მიმავალ ორ ბერს უხმო, მახლობელ ეკლესიაში დაასვენეს, ყველა წესი შეუსრულეს და მესამე დღეს ეკლესიის სასაფლაოზე დაჰფლეს.

ისააკმა გადაიფიქრა იერუსალიმს წასვლა, ჯერ იოაკიმე უნდა მონახულებინა, მასთან მოეთქვა სული, დამშვიდებულიყო და მერე უკვე წარმდგარიყო სოფრონის წინაშე.

იოაკიმე ჩვეულებრივ იორდანედან მომავალ გზას ანთებული ფანრით აპყვებ-დაპყვებოდა და უეცრად მარტოდ მომავალ ისააკს რომ შეანათა ფარანი, გული გადაუქანდა, ისეთ ნაღვლიან თვალებში ჩახედა, მიხვდა, უბედურება რამ შემთხვეოდა, უსიტყვოდ გადაეხვივნენ ერთმანეთს.

— თეოდორემ დაგვტოვა, წავიდა ჩვეგან, — ამბობდა ისააკ და ორივენი ერთად ატირდნენ.

— ვიტიროთ, ვიტიროთ, — ამბობდა იოაკიმე, — ვილოცოთ მისი სულის საოხად. მისმა ტანჯულმა სხეულმა კი ჭეშმარიტად მოისვენა.

შევიდნენ სენაკში.

მოქანცულ ისააკს აღარაფრის თავი აღარ ჰქონდა და ისევე მიეძი-

ნებოდა გაუსდელს, მაგრამ იოაკიმემ, როგორც ბავშვს, გახადა სამოსი, ფერხთ დაბანა, ასვა, აჭამა და ქათქათა საწოლშიც მოასვენა.

— ახლა მოისვენე, ხვალ მიაბობ ყველაფერს, თქვა იოაკიმემ და გასვლა დააპირა, მაგრამ ისააკმა შეაჩერა.

— არა, მოდი დაჯექ ჩემთან, რალაც უნდა ვითხრა.

იოაკიმე უსიტყვო მორჩილებით სასთუმალს ჩამოუჯდა.

ისააკისათვის ერთბაშად თქმა ყველაფრისა შეუძლებელი იყო მოკვლად, — ამიტომ პირდაპირ უთხრა:

— მამო იოაკიმე, შენ ბრძენი ხარ და სინამდვილე რაც უნდა უცნაური იყოს, თვალს თამამად გაუსწორებ. თეოდორე დედაკაცი ყოფილა. ქალწულებში სახელად თეოდორა.

თავზარდაცემული იოაკიმე არც განძრეულა. ისააკის ნათქვამი თუმცა დასტური იყო მისი ეჭვებისა, მაინც მოულოდნელი იყო. არც შეუცხადებია და არც არაფერი უთქვამს.

— დაწვრილებით ხვალ მოგიყვები ყველაფერს, ოღონდ ახლა ერთ კითხვაზე მიპასუხე; დიდი ცოდვაა, როდესაც უაღსარებოდ სულს ლევ?

— აღსარება არ იყო მთელი მისი ცხოვრება?! ჩვენ შიშველი იგი არაოდეს გვიხილავს და იქნებ მას მხრებზე ფრთებიც კი ჰქონდა ჩაკეცილი, ანგელოზი იყო იგი და რა ცოდვა უნდა ჰქონოდა?! იგი აქვე იყო შეერთებული ზეციურთან და ახლა მხოლოდ მიწას ვალი დაუბრუნა, მიწიერი მიწას დაუტოვა.

ცრემლმორეულ ისააკს მაინც ეღიმებოდა, ისე მოეშვა სულს, თითქოს საფლავის ლოდი გადაეგორებინა გულის სარტყელიდან. დასაძინებლად გაემართა და იოაკიმესაც უთხრა:

— ახლა კი მშვიდობით დავიძინოთ. მოთმინება იქონიე და ხვალ იმდენსა და ისეთ რასმე გეტყვი, კიდევ არ ვიცო, თუ დაიტევ და არ გადაირევი.

წავიდა იოაკიმე თავის სენაკს არა ძილად, არამედ ლოცვად, ცრემლიან ლოცვად და მხოლოდ ალიონზე ჩაეძინა.

ისააკსაც ისე ღრმად ჩასძინებოდა, მზე უკვე საშუაღლეოზე იყო, რომ გაეღვიძა. ისააკ არ შესულა იოაკიმესთან, მას მარტოდ უნდოდა გარემოს შემოვლა.

აქ ყველაფერს თეოდორას კვალი აჩნდა, ყველაფერი მასზე ღალადებდა, ყველა ყვავილსა თუ ფოთოლში, თეოდორას კეთილ და ნაღვლიან თვალებს ხედავდა, მაგრამ ყველაფერი სევდას იწვევდა. ყველაფერს მისი ნათელის მაგიერ მისი ჩრდილი ადგებოდა.

იოაკიმეც გამოვიდა, დილამშვიდობისა უსურვეს ერთმანეთს და მდინარისაკენ წავიდნენ, სიგრილით დასხდნენ.

ისააკ ყველაფერს უწვრილესად ჰყვებოდა. ჰყვებოდა დინჯად, ისე თითქოს სხვის ამბავს ამბობსო საკუთარი განცდების გარეშე.

იოაკიმემ სცადა თავისი შეჭირვებული ფიქრების გაზიარება, მაგრამ ისააკმა უთხრა:

— სადღეისოდ საკმარისია, ხვალ შეკითხვები არ დაგჭირდება,

ყველაფერზე ისე მიიღებ პასუხს, რამეთუ დღეს დიდმნიშვნელოვანი საკითხი გვაქვს გადასაწყვეტი. შენ ყოველთვის იმ აზრისა იყავი, რომ ადამიანმა თავის პირადული უნდა დასთმოს სხვის საკეთილდღეოდ...

ისააკს უჭირდა თქმა, იოაკიმეც რაღაც თავისთვის საბედისწეროს ელოდა, ლელავდა და ერთხანს მდუმარედ მოდიოდნენ.

იოაკიმე ატყობდა ისააკს, რომ თქმა უჭირდა და ნაძალადევი დიმილით წარმოსთქვა:

— ისეთი რა უნდა იყოს, შენთვის ვერ დავთმო?

— ძალიან ძნელი დასათმობია არა მარტო შენთვის, ჩემთვისაც, მაგრამ, — ისევ შეჩერდა ისააკ.

— რა მაგრამ, სთქვი, მე მხოლოდ გამეხარდება, თუ კიდევ რამის გაკეთება შემიძლია შენთვის.

— ჩვენ აქაურობა უნდა დავტოვოთ და წავიდეთ იერუსალიმს.

— წავიდეთ, რატომაც არა, წავიდეთ, თუკი წმიდა ქალაქის მოქალაქეობის ღირსად მივუჩნევივართ უფალს. ანლავე, საქმეს გადადება არ უნდა. ჩავრაზოთ დარაბები, ყველაფერი მოწესრიგებულად დავტოვოთ, რა იცი, იქნებ კიდევაც როდისმე მოვბრუნდე, ან ვინმემ თავი შეაფაროს, დაგვლოცავს, წავიდეთ, თეოდორას საფლავსაც ხომ უნდა მივხედოთ, პატრიარქსაც მსახურად მაინც გამოვადგები — აღგზნებული ამბობდა იოაკიმე, და თან გასამგზავრებლად მზადებას შეუდგა.

გახარებული ისააკს ბაღლურად წარამარა გადაეხვეოდა, ჰკოცნიდა, ეუბნებოდა:

— მე უშენოდ არ შემიძლია, შენ თეოდორას მაგივრობას გამიწევ, აი, ნახავ, პატრიარქი რა ადამიანია და შენც კმაყოფილი იქნები.

მეორე დღეს კი უკვე იერუსალიმისაკენ გასდგომოდნენ გზას.

ისააკის საოცარ ამბებზე თხრობაში გზა შეუმჩნეველად ილეოდა.

იოაკიმე აღფრთოვანებული იყო ისააკით. რამდენჯერაც არ დააპირა რამის თქმა, ისააკმა არ აცალა, ისააკ მოყოლასთან ერთად ნათქვამს უფიქრდებოდა კიდევ და დასასრულს იკითხა:

— მართლაც, ღრმად რომ ჩავუკვირდე, რა უპატიებელი ცოდვა ჩაიღინა იმ ბედშავმა ქალმა? არა?

— უპატიებელი ცოდვა კი არა, მე ვფიქრობ, მას დიდი სიკეთე გაუკეთებია, იმდენად დიდი, რომ ყველა მისი შეცოდებანი დაფარული იქნება და შენდობილი უფლისაგან.

— აბა, გავარკვიოთ რა არის, საერთოდ, ცოდვა? — შეეკითხა ისააკ.

— ცოდვა არის ერთი ადამიანის მეორე ადამიანისადმი თუ ადამიანებისადმი საზიანო ქმედება თუ უმოქმედება. ცოდვაა, როდესაც შეგიძლია სიკეთის გაკეთება და არ აკეთებ, — დამაჯერებლად ამბობდა იოაკიმე.

— ეს კარგი, მაგრამ რომელი უფრო დიდი ცოდვაა, რასაც ვიქმთ, თუ რასაც არა ვიქმთ?

— ვფიქრობ, — თქვა ჩაფიქრებით იოაკიმემ, — რასაც არა ვიქმთ.

— ეგრე იყოს, — არ შეედავა ისააკ, — მოვყვეთ თავიდან. სოფრო-ნისათვის რომ თავი გაეწირა, მონაზვნობაზე უარი ეთქვა, მისი ცოლი გამხდარიყო, რა ოჯახს შექმნიდა ასეთი ვნების პატრონი? სოფრონისისათვისაც დიდი ცოდვა იქნებოდა ქალის ცდუნება და, ვინ იცის, როგორ წარიმართებოდა მისი ცხოვრების გზა, იქნებოდა კი დღეს პატრონარქი იერუსალიმისა?

— ესე იგი ქალს შეეძლო ბოროტების გაკეთება და არ გააკეთა, არ გაჰყვა ცოლად, ცოდვაში ჩადგა ფიცის ღალატით, მაგრამ მას ზიანი არ მოუტანია მეორე ადამიანისათვის, პირიქით, ჭეშმარიტ გზაზე დააყენა, ამდენად მისი ცოდვაც შენდობილ იქნება, — ამბობდა იოაკიმე.

— ახლა მეორე, ცილი დასწამა უბრალო ადამიანს, ადამიანს, რომლისთვისაც ეს ცილის წამება ოცნების აღსრულებასა და ბედნიერებას ნიშნავდა, — თქვა, თავის ნათქვამით გახარებულმა ისააკმა.

— მან მხოლოდ თავის თავს ავნო, უკეთ ცხოვრება უკუღმართად დაუტრიალდა, თავისი ადგილი ვერ მონახა, ისე ჩანს სადღეოფლო ქალი იქნებოდა და თავი მოიკლა უბრალოდ, მაგრამ საბედნიეროდ ისეთიარად, — ამბობდა აღგზნებით იოაკიმე, — ისე საბედნიეროდ, რომ ეკლესიას შეუძლია მისთვის ილოცოს, მისთვის ღვთისაგან შენდობა გამოითხოვოს, რისთვისაც მე და შენ უნდა ვეცადოთ იგი ჟამის წირვაში მოვაქციოთ. მას თავი დაუსჯია და ქვეყნისათვის კი დიდი სიკეთე დაუტოვებია.

— ჩანასახიც კი არ მიუკლავს, არ მოუპარავს, ქრთამი არ აულია, არც მიოცია, სხვისი არა მიუტაცია რა, არავინ განუესჯია, არავის საიდუმლოება არ გაუცია, თავის კუთვნილ ქონებაზეც კი უარი უთქვამს, ათივ მცნება შეუსრულებია. მე კი მართლაც დანაშაულისათვის, კაცის მოკვლისათვის სქიმით შევიმოსე, ჩემს მაგიერ წამებულისაგან საყვედურიც კი არ მიმიღია, რა სინდისით, რა უფლებით უნდა განესაჯო ადამიანი?

— მაინც რა ყოფილა ცოდვა? — ამბობდა იოაკიმე, რისთვის უნდა დაისაჯოს ადამიანი?

— ამქვეყნად ვერ გაიგებ, ვინ რისთვის ჯილდოვდება ან რისთვის ისჯება, მთავარია, ადამიანმა შენი შინაგანი სამყარო სიწმინდით დაიცვა და იქ, ჭეშმარიტ სამსჯავროში ყველა მიიღებს მას, რაც დაუმსახურებია.

— ამინ, — თქვა იოაკიმემ და თან დასძინა, — ადამიანმა არასოდეს არ უნდა მისცეს თავი სასოწარკვეთას, რა სასჯელიც არ უნდა მოგადგეს, რამეთუ ჩვენ არ ვიცით რისთვისაა იგი განზრახული, სასოწარკვეთა კი ჭეშმარიტად ყველაზე დიდი ცოდვაა.

— აი, შენ რომ სთქვი ჟამის წირვაში მოვაქციოთო, როგორ შეეძლებოთ ამას, მე ხომ მისი სახელიც კი არ ვიცი.

— მე მაგასაც გავიგებ, ჩემს თავზე ავიღებ შენზე გარდამხდარს,

საბაბს მოფუნახავ და თვითონ სოფრონის ვაჟქმევეინებ, ნახავ, თუ ვერ შევძლებ. სოფრონის — კეთილგონიერებას ნიშნავს.

— მე დავარქმევდი მას ვასილისას — დედოფალს, ან სოსიპატრას — მამის მხსნელს. იოანე რაღას ნიშნავს?

— მადლს, მისი მადლითა ვართ ჩვენ ყველანი ღვთის წინაშე მიღებული, — ამბობდა იოაკიმე. თეოდორა კი ნიშნავს — ნიჭს ღვთისას.

და თუ მანამ იოაკიმეს მსოლოდ ზეთის ხილის მთამდე, ან იერიქომდე უნდა ეზიდა მოყვასის ტვირთი, ახლა სიცოცხლის ბოლომდე უნდა ეტვირთა ისააკის სულის სიმძიმე, მის განსაცდელს იზიარებდა, მონაწილე ხდებოდა მისი ჭირის, მისი თოფრაკი ახლა მისი სიბრძნე და სიყვარული იყო, რომლიდანაც ადამიანი საშვებელს უხვად მოიპოვებდა და იოაკიმეც კმაყოფილებით ფიქრობდა: გამოთქვამს ადამიანი თავის გულისწუხილს და ღებულობს შვებას, უბედურება იმაშია, რომ ადამიანს არ შეუძლია ყველასთან გამოთქვას, ამისათვის თანამგრძობი, გულშემატკივარი ადამიანია საჭირო.

ამასობაში, იერუსალიმსაც მოაღწიეს. გზად იმ ბედშავის საფლავი მოინახულეს, სანთელი დაუნთეს, ლოცვა წარსტქვეს, ის ღამე თეოდორასთან ათიეს ფსალმუნებით და დილით კი მოვიდნენ საპატრიარქოს.

თ ა ვ ი XVI

„ს ი ბ რ ძ ნ ე ბ ა ლ ა ჰ ვ ა რ ი ს ი“

იოანეს ჩამობნელებულ სენაკს ნათელი მოჰფენოდა. დღე და ღამეც ასწორებდა, დაფერფლილ გულში ნაპერწკლებს ტკაცა-ტკუცი გაჰქონდა. ფენიქსს სიცოცხლე დაბრუნებოდა და საკუთარ გრძნობათა კანდელის შუქზე იღვენთებოდა, სულის სამხილზე იწვოდა, გულს სიღრმიდან მთელი წარსული ამოფრქვია და მოგონებათა ზევაად გადმოეხეთქა, შემოქმედებითი ნაკადი მდინარედ ქცეულიყო და მარადიულობის ზღვას ერთვოდა.

აღსარების სურვილი დაუფლებოდა და დაძრული ყინული კი წყალდიდობით იმუქრებოდა. სულის სამალავებში ღრმად დაფლულ მგზნებარების მეწყერს უკიდევანო სინათლის ზღვაში გაჰქონდა და შემოქმედი ყოფიერების მსაჯულიც ხდებოდა. ნაპოვნი ჩონჩხი ხორცს ისხამდა, მის კალამს მესსიერება მელნად ჰქცეოდა.

აფორიაქებულ გრძნობებში ისევე სწვდებოდა ნათელ აზრს, როგორც მღევარი გაუვალ შამბნარში ეწევა ნადავლს. მთრთოლვარე პერ-

გამენტის ხის ტევრთა შორის გამომკრთალ მთვარის ნათელზე ვარდა-
სულ დროთა ჰანგებით აჟღერებდა.

აგონდებოდა პირველი მოსვლა პალესტინაში, პირველი განცდა
მეუღაბნოვის მგზნებარებისა, შეხვედრა სოფრონისთან. აწმყო გადახ-
ლართული წარსულთან მომავალს ეტრფოდა.

ცისარტყელასავით აფერადოვნებული მოგონებანი გარს ეხვეოდ-
ნენ, ეჯარვოდნენ, ხან მოვარდნილ ნიაღვარივით წარიტაცებდნენ, ხან
ელვასავით ჩნდებოდნენ, ხან როგორც საოცარი ცისფერი ხილვა, ხან
მტანჯველი შეცოდება, ხან კი ჩრდილთა ციაგში ესმოდა როგორც ში-
რეული მუსიკა, რომელიც ოდესღაც სულ ახლოს ჟღერდა.

ხედავდა, ნამდვილად ხედავდა, როგორ შეენოდა თეოდორას აბრე-
შუმ თმებზე თხელი, მოფრიალე მაქმანიანი რიდე, ესმოდა მისი კაბის
შრიალი; როგორ ესამებოდა მის მოხდენილ ტანს მსუბუქ სამოსელზე
მჭიდროდ მორჭმული სარტყელი, როგორ ამშვენებდა ყვავილთ წწუ-
ლებით შემკული ჩამოშლილი თმების რხევა-ბიბინი, როგორ გაეპო
დიმილს ვარდისფერი ბავენი. მომაჯადოებელი იყო მისი ხმა. მისი
სიცილი. ერთი სუშბულით ხელში, შემოსილ დედოფალს ჰგავდა, ქალი
იგი ხილად ჰქცეოდა უშენაესთან მისადგომად.

ცხადლივ ესმოდა ძახილი ქალისა: „ვიყო ცოლი შენი ვითარცა
ვენახი მისმომ კიდეთა სახლისა შენისათა, შეილნი შენნი, ვითარცა
ახალნერგნი ზეთისხილისანი გარემოს ტაბლასა შენსა. თუ ჩემი მოქ-
ცევა ვსურს შენს სჯულზე, მოვედ წელიწადსა ერთსა ჩემსა ნებასა,
თანამეყავ თვესა ერთსა გინდა დამესა ერთსა და მე ვყო ყოველი ნება
შენი, სოლო შენ ესოდენმა მცირედმა ვნებამან ვერა გაენოს. რამეთუ
შეცთომილსა მომაქცევ“. და მიდრკა ვაშინ იოანე ნებას ქალისა რა-
მეთუ ღმერთს ქალის სისუსტე მამაკაცის დიდსულოვნობისათვის მი-
უნდვიო, სათუთი იყო გრძნობა, მძლავრ მკლავებში რომ ასტუნდა
ფროთნას.

წამოიშალნენ თაროებიდან წიგნები: მარკიანესა, არისტიდესი,
ნემესიოს ემესელისა, იოანე რუფუსისა, ცურტაველისა „მარტვილობა
ეკსტათი მცხეთელისა“.

აზრი გრძნობას წაეკიდებოდა, ვნება ნებას დაეჭიდებოდა და პერ-
გამენტი ნაირფრად იკაზმებოდა.

ჩანჩქერივით ჩამოიქცეოდა პერგამენტზე მთელი ზღვა ფერებისა,
სურნელებისა, ბგერებისა და შორეული ვითარცა ახლობელი იხილვე-
ბოდა. წარსული, აწმყო და მომავალი სიყვარულში ისე ერთიანდებო-
და, როგორც ცეცხლი, ალი და სინათლე. ეს იყო შერწყმა სინამდვი-
ლისა ოცნებასთან, როდესაც მწუხარება და სიხარული ერთად ქვითი-
ნებდა — დათალხულ ფიქრთა აღორძინებაში სული კვლავ იძერწებო-
და.

არსისა და აზრის მთლიანობას შეიცნობდა, იდუმალ სიღრმეში
შეჭრილი მოციქულებრივ ღაღადისში იმყოფებოდა, მოფარფატე ფა-
რვანასავით იხიბლებოდა, თითქოს თავად აღარც არსებობდა, ყველა-



ფერი თავისთავად ხდებოდა, თავისთავად იწერებოდა, აზრთა ვითარებას ბრმა მემუსიკესავით მისდევდა, მას უწრფელესი სიტყვა უნდა ეთქვა, რომ მონაპოვარი ყველას გაეზიარებინა.

იგი გატკეპნილი გზით სვებთან ერთად მიაბიჯებდა, მას საკუთარი გზა გაეკვლია და თუ აღრე ბერძენი წიგნებს არ წერდნენ — ცოცხალ აზრთა სიტყვა-გებაში ხედავდნენ აზრის განვითარების მნიშვნელობას, იმადაც, რომ ყველაფერი, ყველა დროში გულწრფელობით ვერ იწერება და შემდგომ თუ მაინც იწერებოდა — არსს ქურუმებს გაანდობდნენ და თავად წიგნს კი სამარეში თან ჩაიტანდნენ, რამეთუ ყველასათვის ღია იქნებოდა წიგნი, აზრს კი გაგება სჭირდება, ცოცხალი აზრის დაცვას კი უსიცოცხლო ასოები ვერ შესძლებდნენ.

იოანეს სინამდვილის გაცხადება არავისთვის არ შეეძლო, ამიტომაც შეფარვით დაწერა გულწრფელი წიგნი, რომელშიც ცოცხალი აზრი სტრიქონებს შორისაც იღვრებოდა და ის პირადი, რასაც უახლოეს მეგობარსაც ვერ გაანდობდა, ვერც მოძღვართან აღიარებდა, მთელ სამყაროს გააგებინა, ისტორიას სამსჯავროდ დაუტოვა და თავის სამშობლოს კი — საამაყოდ, რამეთუ ფერფლის ნაცვლად ცეცხლსა სტოვებდა.

ნაჩქარევად ჩაწერილი ბერძნულ ენაზე იერუსალიმს წაიღო მწიგნობარ ძმათა საკითხავად და უპირველეს სოფრონის აზრის გასაგებად. უწინარეს ისააკ შემოხვდა. იოაკიმეც იქვე იყო, მას ისეთი ფსა გამოეჩინა საეკლესიო საქმეებში, ისე შეჰფერებოდა სოფრონის, სულ მალე არქიმანდრიტად აღზევებულიყო.

იოანეს მოსვლამ საზეიმო განწყობა შეჰქმნა, უმეტეს კი სოფრონიმ გაიხარა, გაიხარა დიდისნის უნახავი მეგობრით და იმიტაც, რომ მის ხელში პერგამენტის გრაგნილი დაინახა.

იოანემ ყმაწვილური თავმომწონებით და მოკრძალებითაც კი აღიარა.

— ჩემს პატრიარქს ხელდამშვენებული ვეახელიო.

სოფრონიმ სწრაფად და მღელვარებით დაუწყო გრაგნილს ფერცვლა.

უცებ წამოდგა და ისევ გადაეხვია:

— მე ვიცოდი, ვიცოდი, ისააკის მონაპოვარი შენთვის რად იქცეოდა, მაგრამ ასე უმაღლესი?

— მელნითა ოდენ ცხოველნი სიტყვანი გამომისახავნ. შენდა დამიტევებიეს, რათა შენ კეთილად შეამკო და განაცხადო ჩემ მიერ გამოსახული ესე და ყოველი ნაკლულოვანი სრულჰყო. მე ახლა ყველაფერს ვუჩქარი, უწმინდესობავ, თუ დრო ჩემთვისაც იპოვო, გადაიკითხე.

— როგორ, თუ დრო ვიპოვო, შენთვის დრო საძებარია? ახლავე, ახლავე ჩემს აზრს მოგახსენებ, — ამბობდა აღზნებით სოფრონი და თან ისააკს ანიშნებდა ეხმო ყველანი, — შენთან ერთად ისმინოს ყვე-

ლამ, დასხედით, — თქვა სოფრონიმ და თავად ფეხზე გაჩერებულმა დაიწყო ხმამაღლა კითხვა.

სოფრონი გზადაგზა ჩერდებოდა, ჩამოჯდებოდა და ზოგ ადგილს საგანგებოდ განმეორებით წაიკითხავდა.

— კიდევ უკეთესი ისმინეთ, — თქვა სოფრონიმ და მეტის გზნებით ხელმეორედ, უფრო დინჯად წაიკითხა:

„მსგავს საწუთო ესე კაცსა, რომელსა სდევდა პილო ამრიგებულნი და მიაწყუდია იგი ჯურღმულსა საშინელსა. და ისილნა ხენი, რომელსა ზედა აღხდა და ისილნა კუალად ორნი თავგუნი, ერთი შავი და ერთი თეთრი, რომელნი სჭირდეს ძირთა მათ ხეთასა, რომელთა ზედა აღსრულ იყო კაცი. და შთახედნა ჯურღმულსა და ისილა ვეშაპი, რომელსა აღეშემო პირი და ეგულებოდა შთანთქმა მისი. და აღიხილნა ზე და ისილა თაფლი მცირე, რომელი ჩამოსდიოდა ხეთა მათ, და იწყო ლოკვა მისი. და კუალად არლარა მოიხსნება განსაცდელი, რომელსა შთავრდომილ იყო. ხოლო თავუთა მათ ხე იგი წასჭრეს და კაცი იგი დაეცა და პილომან აღიტაცა და მიუგდო ვეშაპსა.“

აწ, ძეო მეფისაო, პილო იგი სახე არს სიკუდილისა, რომელი სდევს ძეთა კაცისათა, და ხე იგი სწუთო არს, და თავგუნი იგი დღენი და ღამენი და თაფლი იგი საწუთროისა ამის სიტკბოება არს და შეაქცევს კაცსა გემოვნება საწუთროისა. დღენი და ღამე აღსრულდებიან, სიკუდილი წარიტაცებს და ჯოჯოხეთსა შინა ვეშაპი იგი შთანთქამს და ესე არს ცხოვრება კაცთა“.

— დიდებულია; დიდებული, უკეთ ხატოვნად თქმა შეუძლებელია, — ამბობდა სოფრონი და გადაეხვია იოანეს, — მე ამას ჩემს ქადაგებაში გამოვიყენებ, რამდენს გავახარებ, ეს ყველამ ზეპირად უნდა ვიცოდეთ, ყრმათაც ვასწავლიდეთ.

ყველაც ემოწმებოდა და ამბობდა:

— ჭეშმარიტად, მამაო იოანე, თავად ხარ სიტყვით მკურნალიო.

— ამინ, — ხმამაღლა წარმოსთქვა იოაკიმემ და ყველამაც ერთხმად გაიმეორა:

— ამინ!

კითხულობს სოფრონი გატაცებით და ისევ ჩერდება:

— აჰა, შენი პეტრე იბერიც დაგიმოწმებია:

„...ვევედრები უფალსა, დამბადებელსა ცისა და ქვეყანისასა, სამებასა წმინდასა, რომელსა არა აქვს აღსასრული, საშინელსა და სახიერსა, ძლიერსა, მოწყალესა, უხილავსა, გამოუთქმელსა, მეუფესა, კაცთმოყვარესა, მეცნიერსა და არა უცნაურსა, რომლისაგან ძრწიან ყოველნი დაბადებულნი...“

ისააკს საკუთარი ღირსების შეგრძნების ღიმილი დასთამაშებდა სახეზე, საქმიან კაცის გამომეტყველება ჰქონდა და ისეთ ზრდილობასა და სინატიფეს ავლენდა, ყველასათვის გულითად მისანდობი, სასურველი და საქებარი იყო. და როდესაც აქებდნენ იოანეს, არ ივიწყებდნენ ისააკს.

იოანე ამ ხნის განმავლობაში თავდახრილი იდუმდა, სჩანდა შექეზას არ იფერებდა.

— ჭეშმარიტად, — ამბობდა იოაკიმე, — სენი უმეტეს არა არს ხორცთაგან, არამედ გულისკვლებისა არს.

და რა ჩაათავა კითხვა სოფრონიმ მივიდა იოანესთან და უთხრა:

— ნიჭი, შერწყმული პირველ თვისებებთან ურთიერთ სამსახურში ხდგას შენ სათავე იცოდი და სასრულსაც მიაგენი. შენ ჩემს წინაშე თავდახრილი დგახარ, მაგრამ რასაც შენ აკეთებ ის პატრიარქობაზე შეტია, — უკვე სიხარულის ცრემლებით ეხვეოდა იოანეს.

— ჭეშმარიტი სარწმუნოება მორცხვია, — თქვა იოაკიმემ.

ყველანი წამოდგნენ და ულოცავდნენ.

ეს იყო ნამდვილი დღესასწაული, როდესაც ერთის წარმატება ყველას პირად გამარჯვებად მიაჩნდა.

— არც ცაზე, არც დედამიწაზე, არ არსებობს დარი სილამაზისა, რომელსაც ფლობს სული ადამიანისა, — ამბობდა სოფრონი და ყველას თავისთან ეპატიჟებოდა.

დილით კი, როდესაც პატრიარქს ვალდებულება უხმობდა, უპირველეს იოანეს თანამოსაგრებობაზე იფიქრა და უთხრა მას:

— წმინდაო მამავ, საბა წმიდის ლავრის წინამძღვრობა მინდა შემოგთავაზო.

— მომიტევე, — მიუგებდა იოანე, — მაცალე, ვიდრე წმიდა ადგილები მოვილოცო, რათა ვიტირო ჩემი ცოდვების გამო. ჭეშმარიტად მე ჯერ არ მიმიღწევია ისეთ სრულყოფისათვის, რომ სხვებისათვის, რომ სხვების სული განვაგო, რამეთუ ვისაცა სურს სულები განაგოს, ზამს იყოს მსგავსი წმიდა ანტონისა, პანუმისა, თევდორესი, პეტრესი. აწ გულმოდგინებისა ჩემისათვის მილოცეთ, რამეთუ არა სიმრავლისაებრ ძღვენთა და შრომათსა, არამედ სიმრავლისაებრ გულსმოდგინებისა მიაგებს ღმერთი სასყიდელსა.

იმ დღეს აღზევდა იოაკიმე მეუფედ და დადგინებულ იქნა ქორეპისკოპოსად. მასვე დაავალა სოფრონიმ დროებითი მეთვალყურეობა საბა წმიდის და სინას მთის სავანეთა.

იმ სიხარულით სავსე დღის დაღამებისას, ძილად მისვლის წინ იოაკიმემ ისააკს საიდუმლოდ გაანდო:

— იმ ბედშავის სახელი ყოფილა ანასტასია, რაც ნიშნავს „მკვდრეთით აღდგენილს“.

— იოაკიმე კი ნიშნავს დადგინებულს, ჰო, შენ იმ თავითვე ღვთისაგან ყოფილხარ დადგინებული, — ამბობდა გამარჯვებულის ღიმილით ისააკ.



ა ლ ს ა ს რ უ ლ 0

მუჰამედის გარდაცვალების შემდეგ ბიზანტიას უხდებოდა შებრძოლება უძლიერეს ხალიფა ომართან.

არაბებმა სამხრეთ პალესტინაში რომის ძალაუფლების საყრდენი ციხესიმაგრე აიღეს.

კეისარი ჰერაკლე ამ დროს ანტიოქიაში იყო და ხედავდა, როგორ იხევდნენ უკან დამარცხებული რომაელები.

ბუნებაც თითქოს არაბების მხარეზე იყო. სამხრეთის ქარი რომაელების პირისპირ ქროდა, მტერის ღრუბლებს ჯარს სახეში აყრიდა, მათ აღარ შეეძლოთ მტრის დანახვა, იწევდნენ ტრამალებისაკენ, ესეთქებოდნენ მდინარის ნაპირთან ციცაბო კლდეს და წყალში ცვიოდნენ.

— მშვიდობით სირიავ! — მწუხარედ წარმოსთქვა იმედდაკარგულმა ჰერაკლემ და დასტოვა ანტიოქია.

იერუსალიმიდან წამოიღო ძელი მაცხოვრისა და დაბრუნდა კონსტანტინოპოლს.

არაბებმა დაიპყრეს ედისი, რომლის კედლებშიც ინახებოდა მაცხოვრის ხელთუქმნიელი ხატი, იგი მრავალჯერ იქნა გადახატული, მაგრამ ყველა ეს ხატი გაქრა, დარჩა მხოლოდ საქართველოში მოტანილი. „პირი ღვთისა“, ანჩის ხატად წოდებული, ერთხანს ქალაქ ანჩის საეპისკოპოს ტაძარში იყო დაცული, შემდეგ კი ტფილისის მისთვის საგანგებოდ აგებულ ტაძარში.

სარაციებმა აიღეს დამასკო და ჩასახლდნენ ფინიკიაში.

ქრისტიანების სიძულვილით არაბები ქვეყანას ვერაგულად ძარცვავდნენ და ხალიფა ომარის კარავში ეზიდებოდნენ, რაც კი რამ სასუკვარი იყო.

ომარი ინარჩუნებდა რა პირველყოფილ უბრალობას ბედუინისა, თავის ნაიარევი, დასახიჩრებული სახით პალესტინის მოსახლეობაზე შემზარავ შთაბეჭდილებას ახდენდა, სიტყვით კი ისე სწამლავდა ყოველს, ამბობდნენ ომარს ენა გველივით შებრუნებით დაჰკიდებიაო.

ბიზანტიელებმა სცადეს მოლაპარაკება სარაციებთან, რომ ეგვიპტიდან დაეხიათ, რაზეც ისინი პირზე დუქომოდგარი ხარხართ ეუბნებოდნენ.

— შეგიძლიათ თქვენ გადასანსლოთ ეს ვეებერთელა სვეტიო?

— შეუძლებელიაო, — უპასუხებდნენ რომაელები.

— ჰოდა, ჩვენთვისაც შეუძლებელია ეგვიპტიდან უკან დახევაო.

და იწოდა საწიგნე აღეყსანდრისა!

კეისარი ჰერაკლე დამარცხებების სიმწრით გმინავდა, აღარ ჰყავდა გამამხნეველები პატრიარქი და მეგობარი სერგი, წყალმანკისაგან იხუთებოდა და 30 წლის მეფობის შემდეგ 66 წლისა გარდაიცვალა.

მასთან ერთად ბიზანტიის ძლევამოსილების მზეც ჩაესვენა. ამ განსაცდელის ჟამს, როდესაც ცაზეც ბრძოლის ველი აირეკლებოდა, სოფრონი მთელის არსებით ჩაბმული ქვეყნის ვაებაში, ვერ სთმობდა საღვთისმეტყველო სარბიელს.

სოფრონი ჭეშმარიტებისათვის თავდადებას მთელის თავისი დიდებულებით ავლენდა.

სინას მთისაკენ მიმავალ იოანეს კი ისააკ თან გაჰყოლოდა.

როგორც კი გასცდნენ იორდანეს ერთი მილის მანძილით, იოანე შეიპყრო მსურველებამ ციებ-ცხელებით.

ჰპოვეს მცირე ქვაბი და იქ დაივანეს.

სამ დღეს დაჰყო იქ მსურველემ და იხილა ძილში კაცი, რომელიც ეტყოდა:

„ნუ წახვალ ამ ქვაბიდან“.

მაგრამ იოანე არ შეიწყენარებდა ამ მოწოდებას და მაინც ცდილობდა წასვლას, მაშინ მსურველებამ უმატა. კვლავ ეჩვენა კაცი იგი და ისევ განუმეორა:

„შენ შენი თავის დაშვრომა კი ნუ გწადის, არამედ დამიჯერე მე და ნუ წახვალ“.

— ვინ ხარ შენ? — ჰკითხავდა იოანე.

„მე ვარ იოანე ნათლისმცემელი, — თქვა კაცმან, — ეს მცირე ქვაბი უაღრესია, ვიდრე სინას მთა, რამეთუ აქ, ჩემთან, მრავალგზის შემოსულა უფალი იესო ქრისტე. მომეცი სიტყვა, რომ დამკვიდრდები აქ და შე შენ განგკურნავ“.

იოანემ აღუთქვა თანხმობა და მართლაც, მყის განიკურნა.

აღფრთოვანებულმა გამოცხადებით, ისააკთან ერთად შეკრიბა ძმანი და სულ მალე იგი ქვაბი ეკლესიად აქციეს.

ეს ამბავი გაეგოთ იერუსალიმში, გაეგო თავადს, რომელსაც მეუღლითურთ მიეღო ქრისტიანობა, აღუთქვა უბიწო ცხოვრებაც, მაგრამ მონაზვნობა მაინც ვერ მიეღოთ, ღვთის მსახურებისათვის თავი ღირსად ვერ მიუჩნიათ, ფიქრობდნენ სქიმა ისევე ვერ დაამშვიდებდათ მათ, როგორც ჯალათს მეწამული მანტია. საერო ქრისტიანს კი უბრალო ქველმოქმედებაც დამშვენებოდა, ღირსებად მიეთვლებოდა და ისინიც გულუხვად ქველმოქმედებდნენ, მთელ თავიანთ ქონებას ლტაკთ ახმარდნენ, თავს კი ყოველდღიური შრომით ირჩენდნენ—ქსოვით, თუ ეკლესიისათვის სამსახურით. ახლა კი წამოსულიყვნენ იოანესთან ახლადაგებულ ეკლესიისათვის დიდი შემოწირულებით.

მოუხედავად ხანდაზმულებისა თვალბში ახალგაზრდული ცეცხლი უგიზვიზნებდათ. მოწიწებით და სიყვარულით შესცქეროდნენ მათსაკით წლებით დაძაბუნებულ იოანეს.

— ქრისტე არს ჩვენს შორის, — წარმოსთქვა იოანემ, როგორც კი იცნო.

— არის და იყოს, — მგზნებარებით წარმოსთქვა ორივემ.

თავადი და ითანე გადაეხვივნენ ერთმანეთს, როგორც საომარ ჭრბოლებიდან დაბრუნებული მეგობრები.

შევიდნენ ახალ ტაძარში და შემოწირულების სამადლობლოდ მათთვის პარაკლისი გადაიხადეს.

იოანეს ისე აჩვილებოდა გული, საგალობლებს უცრემლოდ ველარ ისმენდა და ახლაც ატირდა ღვთის სიყვარულით, მეგობრის დაბრუნებითა და ქალის გადარჩენით გულმონყეული.

აქ, ამ ღვთიერ ნაკვალევ მიწაზე მისი „სიბრძნე ბალაჰვარისი“ უკვე ქართულად კიდევ და კიდევ იხვეწებოდა, მაგრამ სხეული მისი წლებით და ჯაფით უფრო მეტად ძაბუნდებოდა.

— უკეთესია კისერნი მოგტყდეს მალლით დაშიზნებისათვის, ვიდრე კუზი აშოგივიდეს დაბლა ცქერისაგან, — ეტყოდა ისააკს უკვე ძალგამოლეული, მაგრამ მაინც წელში გამართული იოანე.

აქ დღისა და ღამის ბრწყინვალეებას ვერ ჩრდილავდა ცხოვრების ამოება და უკანასკნელ წუთამდე ახალგაზრდული მღელვარებით აღსავსე, ერთ დღეს მოულოდნელად გაირიხდა.

სოფრონიმ მისდამი მიძღვნილ სიტყვაში თქვა:

— მუზარადით დაცულნი დაეცემიან, ჯავშნიანი განიგმირებიან, ზნეობრივ სამყაროს დაყრდნობილი კი ვით მთა სიონისა შეურყეველია... ღვთაებრივ სიყვარულს ვერ იტევს ადამიანის ბუნება, იგი სიხარულთან ერთად სევდაცაა, მუდამ სევდიანიც იყო განსვენებული, მაგრამ სიკვდილი ხომ განახლებაა, შეძენაა და ვითარცა ყამირ მიწას მიბარებულნი თესლი, იგიც მეტად გაიზრდება, მეტად დამშვენდება და საუკუნეებშიც მეტის ბრწყინვალეებით აღორძინდება.

დიდის დიდებით დაკმალეს იოანე თეოდოსე დიდის სავანეში.

სოფრონი კი იმ სავანიდან აღარ წასულა, იქ დარჩა და იქიდან მართავდა თავის საპატრიარქოს.

მეუფე იოაკიმე განსაცვიფრებელ ხუროთმოძღვრების ნიჭს ავლენდა, თითქოს მხოლოდ ასლა მიეგნო თავისი ჭეშმარიტი მოწოდებისათვის და თავდაუზოგავად, უანგაროდ ერთბაშად რამოდენიმე მშენებლობას უძღვებოდა, რამეთუ იერუსალიმი თითქმის დანგრეული იყო. არაბებმა დაიპყრეს სპარსეთი და გააუქმეს მეფობა.

ანტიოქიამაც სცნო მათი ძალაუფლება, მაგრამ ყველაზე საშინელი იყო ის, რომ მკვიდრნი მერყეობდნენ. სოფრონის მთავარი დიაკონი, ხელობით მარმარილოს მომსხმელი, მუსლიმანთაგან მოსყიდული, მათ სალოცავს, მიზგითს, აშენებდა. სოფრონიმ უბრძანა თავი დაენებებინა, რადგან ეს არც კაცს ეპატიებოდა და მით უფრო სასულიერო მსახურს. დიაკონმა აღუთქვა ფიცით, რომ აღარ იქმდა, მაგრამ ფარულად მაინც განაგრძობდა შენებას. მაშინ სოფრონი მივიდა მასთან, მოჰკიდა ხელი და განზე მოისროლა, ეკლესიიდან განკვეთა წყევლით, რის შემდეგაც სულ მალე დიაკონი დასნეულდა და ტანჯვით განუტევა სული.

მძარცველი ბრბოები დათარეშობდნენ ტაძრებში. საჭურველთა-
წკრტილის შემზარავი ხმაური პატრიარქს საშუალებას არ აძლევდა
აღესრულებინა ლოცვანი.

ხალიფა ომარი იერუსალიმის კარს ღრუბლებში გარინდებული მე-
ხივით მოსდგომოდა. სოფრონი მის ვერაგულ ლიქნას აშკარად ხედავ-
და, მაგრამ იმის ფიქრით, რომ ომარი შეუნარჩუნებდა მოსახლეობას
ქრისტიანული სარწმუნოების თავისუფლებას, მაინც ენდო და ქალაქი
ჩააბარა.

ომარი გამარჯვებულის ქედმაღლობით იერუსალიმში აქლემზე
წამომჯდარი შემოვიდა, აქლემისავე მატყლის გაცვეთილი, მქისე, ოფ-
ლით აშმორებული, დასვრილი ჯვალოთი შემოსილი:

ომარმა შესვლისთანავე მოიწადინა სოლომონის ტაძარში შესვლა,
ამრეზილს მობრეცილ ღიმილში კბილები უელავდნენ.

სოფრონი ტაძრის კართან აღუდგა და მოსთხოვა ტაძარში საკად-
რისად შესულიყო.

ძლივს დაითანხმეს სელის ტანისამოსი ჩაეცვა და ისიც იმ დრომ-
დე, ვიდრე მისი ჯვალო გაირეცხებოდა და გაშრებოდა.

სოფრონის სული ეღვენებოდა, ომარის გადახლართულ წარბებში
მიჩქმალულ ბოროტ ზრახვას ხედავდა და ამბობდა:

— აღსრულდა წინასწარმეტყველ დანიელის სიტყვა „ესე არს ჭეშ-
მარიტად სისაძაგლე მოხსრებისაო“.

ხედავდა სოფრონი, როგორ იძულებით ალებინებდნენ ხელს
სარწმუნოებაზე, როგორ ილახებოდა სიწმინდე, ინგრეოდა ტაძრები,
საშველი კი არსაიდან ჩანდა.

და აი, როგორც კი ომარმა მთელი აღმოსავლეთის მეფედ სცნო
თავი, საზეიმო ლოცვის დროს ჩასაფრებულმა სპარსელმა, მახვილის
ერთი დარტყმით ადგილზე განგმირა.

— დაე, დახშულ იქნას ბაგენი ყოვლისა, ვინც უჯერო კადნიერე-
ბით დაგმობს ქრისტესა ჩემსა, — თქვა სოფრონიმ, ეგონა საშველი გა-
მონჩნდაო, მაგრამ უარესი მოხდა, ახლა სრული ანარქია დამყარდა.

პერაკლეს მემკვიდრეთ თავის ნებაზე მიეშვათ საქვეყნო საქმენი,
არც ხალხი სცნობდა მათ, როგორც სისხლის აღრევის, უკანონო ქორ-
წინების შვილებს.

ტახტზე ავიდა პერაკლეს შვილიშვილი, მონოთელიტი კონსტან-
ტინე III, ხალხში კოსტად წოდებული. მან უპირველეს მამსიმე და
ანასტასი საპყრობილეში გამოკეტა. შემდეგ მოუხმო კონსტანტინო-
პოლს, რათა განემარტა მათთვის, რომ უკანონოდ და გაუმართლებ-
ლად მოქმედებდნენ. ლიქნითაც ბევრს ეცადა დაეყოლიებინა, მაგრამ
ორივე მტკიცედ განუცხადებდნენ, რომ მათ სწამთ თავიანთ გზისა და
არც როდის გადაუხვევენ მისგან.

მაშინ კოსტამ მსაჯულებს უსასტიკესი განაჩენი გამოატანინა:
„მოვკვეთოთ მათ ენა და მარჯვენა ხელი, როგორც ღვთის მგმობელი
გონების მსახურნი“.

ნაწამებანი მოატარეს სამეფო ქალაქის თორმეტსავე უბანს და განიგზავნენ სამუდამო ექსორიობასა და პყრობილებასი ლაზიკის ქვეყანას.

ლაზიკაში, საეგროს ცაგერის მახლობლად მაქსიმე და ანასტასი ერთმანეთს დააშორეს. მაქსიმე ერთ ჩაკეტილ თემის მაღალ მთაზე აღმართულ ციხეში შეამწყვდიეს, რომელსაც ქიმერიოს ერქვა; ანასტასი კი — ციხესა თუსუმიან წოდებულსა და სულ მალე კი მათი სხეული იქვე, ქართულ მიწას ამოეფარა. მათ საფლავზე აიგო ეკლესია და დარჩა მაქსიმე თქმულებაში, როგორც წვიმის ღვთაება, მისი ნააზრევი კი გაუქმებულ ისტორიულ-ფილოსოფიურ ღირებულებად იქცა.

თეოდოსე დიდის სავანეში განმარტოვებული სოფრონი არაბულ ენაზე თარგმნიდა იოანეს „სამოთხეს“, თხრობათ წინ წარუმძღვარა იოანეს უკანასკნელი ხვედრი და უწოდა კრებულს „ალ-ბუსთანი“, რამეთუ ამ წიგნში, როგორც ბუსთანში, გადახლართულ ხეების მსგავსად გაერთიანებულია მამაკაცთა და დედაკაცთა, ერისკაცთა, მონაზონ კაცთა და მონაზონ ქალთა მშვენიერ თავგადასავალნი.

სულ მალე კი ეს ღირსეული კვერთხის მფლობელი, სიამაყე იერუსალიმისა აღესრულა და დაკრძალეს იგიც თეოდოსე დიდის სავანეში.

მის საფლავის ქვას წარეწერა:

„ო, მესიაჲ, იყავი ჩემი შემწე დაწყებისას და დასრულებისას იმ ჯგაზე, რომელიც შენკენ მოემართება, ამინ!“

НУЦУБИДЗЕ КЕТЕВАН ЗАХАРЬЕВНА
ИОАНЭ МОСХИ

Исторический роман.
(На грузинском языке)
Издательство «Мерани»
пр. Руставели, 42
Тбилиси
1980

მხატვარი სპ. ცინცაძე
მხატვრული რედაქტორი ქ. ზენაიშვილი
ტექნიკური რედაქტორი ო. კაპანაძე
კორექტორები: რ. გოცირიძე, მ. შვალახიანი
ნ. ბურჯანაძე.
გამომშვებინ. კვატაშიძე

3

ს. ბ. 4317

მაბარდა წარმოებას 3.01.89 წ. ხელმოწერილია საბეჭდად 26.04.89 წ. უე 06670-
ფორმატი 60X84¹/₁₆. გარნიტურა ივერია. ქალაქი საბეჭდი №2. პირობითი წა-
ბეჭდი ფურცელი 7,91. სააღრიცხვო-საგამომცემლო ფურცელი 8,34. პირობითი-
საღებავ-გატარება 8,14. ტირაჟი 5.000. შეკვეთა №238.

ფახი 70 კაპ.

საქართველოს სსრ გამომცემლობათა, პოლიგრაფიისა და წიგნის ვაჭრობის
საქმეთა სახელმწიფო კომიტეტის №1 სტამბა, თბილისი, ორჯონიძის ქ. 50-
Типография № 1 Государственного комитета Грузинской ССР
по делам издательств, полиграфии и книжной торговли,
Тбилиси, ул. Орджоникидзе, № 50.